



# ನರಡ ಸರ ಸಾರ

[That is my Some-Saara]

ಜಾಲ ಸೋಮಣ್ಣ ಕೊಟ್ಟುಕತ್ತಿರ

ಕರ್ನಾಟಕ ಸರ್ಕಾರ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಮಡಿಕೇರಿ

## ಅರ್ಪಣೆ

ಈ ಪುಸ್ತಕತನ ನಾಕ್ ಜನ್ಮತಂದ ದೇವಡ ಸಮಾನ, ಇಕ್ಕ ಸ್ವರ್ಗತ್ ಉಳ್ಳ, ನಾಡ ಅಪ್ಪ ಶ್ರೀ ಕೊಟ್ಟುಕತ್ತಿರ ಪೊನ್ನಪ್ಪ, ಅವ್ವ ಅಕ್ಕವ್ವ ಪೊನ್ನಪ್ಪಂಗಕೂ, ನಾಕ್ ಪೊಣ್ಣ್ ತಂದ ಮಾಂವ ಮಾಂವಿ ಶ್ರೀ ಪೊನ್ನಚೆಟ್ಟಿರ ಜೋಯಪ್ಪ, ಕಾಮವ್ವ ಅಯಿಂಗಕೂ, ಅಡ್ಡ ಬುದ್ಧ, ಕಾಲ್ ಮುಟ್ಟಿ ಕೈ ತೊತ್ತ, ಅರ್ಪಣೆ ಮಾಡುವಿ. ಅಯಿಂಗಡ ಆಶೀರ್ವಾದವೇ ನಾಡ ಶಕ್ತಿ, ಸ್ಪೂರ್ತಿ.

ಅಲ್ಲತೆ ನಾಕ್ ವಿದ್ಯೆ ಬುದ್ಧಿ ತಂದ ಎಲ್ಲಾ ಗುರುಕೂ (ಟೀಚರೇ, ಮಾಸ್ಟರೇ ಅಲ್ಲ, ದಾರೇ ನನ್ನ ತಿದ್ದಿತುಂಡೇಂಗಿ..ಅಯಿಂಗಕೂ) ಈನ ಅರ್ಪಣೆ ಮಾಡುವಿ. ಅದೂ ಅಲ್ಲತೆ ನಾಡ ಕಷ್ಟ ಸುಖತ್ ಸಮ ಭಾಗಿ ಆನ ನಾಡ ಪೊಣ್ಣ್ ಕುಸುಮ(ಸತ್ಯ)ಂಗೂ ಅರ್ಪಣೆ ಮಾಡುವಿ.

- ಜಾಲಿ ಸೋಮಣ್ಣ ಕೊಟ್ಟುಕತ್ತಿರ.

## ಅಧ್ಯಕ್ಷರ ತಕ್ಕ

ಕೊಡವ ತಕ್ಕ ತಾಂಡದ ಆನ ಇತಿಹಾಸ, ಹಿನ್ನೆಲೆ ಉಂಡ್. ಅನಾದಿ ಕಾಲತಿಯೆ ಇಲ್ಲಿಯತ ಮೂಲನಿವಾಸಿಯ ಬಳಸಿಯಂಡ್ ಬಂದ ಭಾಷೆ ಕೊಡವ ತಕ್ಕ. ಕೊಡವ ಪಿಂಞ ಕೊಡವ ತಕ್ಕ ಪರೆಯುವ ಎಲ್ಲಾ ಜನಾಂಗಕಾರಳ ಅಣ್ಣ-ತಮ್ಮಣಂಗಡ ಮಾದರಿ ಪುಡ್ಚಿ ಬೆಪ್ಪಲ್ಲಿ ತಕ್ಕರ ಮಹತ್ವ ಬಲ್ಯದ್. ಇನ್ನತ ಕೊಡವ ತಕ್ಕ ಬೊಳಿಯಂಡೂಂಡ್ ಕಂಡಕ ಏರ ಸಾಹಿತ್ಯ ಪೊರಬೂವಂಡು. ಈ ನಿಟ್ಟಲ್ ಕರ್ನಾಟಕ ಸರ್ಕಾರ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ ರಚನೆ ಮಾಡಿತ್ ಸಾಹಿತ್ಯಕ್ ಏರ ಒತ್ತ ಕೊಡ್ತಂಡುಂಡ್. ಈ ಮೊಟ್ಟಲ್ ಕೊಡವ ತಕ್ಕರ ಪಲತರ ಸಾಹಿತ್ಯತನ ಪುಸ್ತಕ ರೂಪತ್ ಪ್ರಕಟ ಪಡ್ತುವದ್ ಅಕಾಡೆಮಿರ ಉದ್ದೇಶ.

'ನಾಡ ಸಂಸಾರ' ಎಣ್ಣುವ ಈ ಪುಸ್ತಕತನ ಎಳ್ಳೆನ ಜಾಲಿ ಸೋಮಣ್ಣ ಕೊಟ್ಟುಕತ್ತಿರ ಇವು ಪಲತರ ಸೇವೆ ಮಾಡಿತ್ ಸುಮಾರ್ 40 ಕಾಲತರ್ ಅನುಭವ, ಪಲಜಾಗ, ದೇಶ ಸುತ್ತನ ಅನುಭವತನ, ಎಕ್ಕಲೂ ಕೆಲಸ ಮಾಡಿಯಂಡೇ ಇರೊಂಡು ಎಣ್ಣುವ ಈಯಾಂಡ ಮನೋಭಾವ, ಅದೇ ಪ್ರಕಾರ ವಯಸ್ಸು 68 ಅಚೇಂಗಿಯೂ ಸಕ್ರಿಯವಾಯಿತ್ ಕೆಲಸ ಮಾಡಿಯಂಡುಳ್ಳ ಇವು ದಂಡ್ ನಾಟಕ ರೂಪಕ ಕಥೆನ ನಿಂಗಡ ಮಿಂಞಲ್ ಬೆಚ್ಚಂಡುಂಡ್. ಈ ನಾಟಕತ್ ನಂಗಡ ಸಾಮಾಜಿಕ ಜೀವನತ್ ಬಪ್ಪ ಫಟನೆಲ್ ವಿದ್ಯೆರ ಮಹತ್ವ, ನಲ್ಲ ಡಾಕ್ಟರ್-ಮಲಿಯ ಕಣಿಯ ಅಲ್ಲ; ವೆಹಿಕಲ್ ರಿಜಿಸ್ಟ್ರೇಷನ್ ನಂ. ಕೆ.ಎ. ಪನ್ನೆರಂಡ್‌ರ ವಿಷಯ; ಪೊರಮೆ ಆಕ್ಸಿಡೆಂಟ್ ಆನಕ ಆಪದ್; ಹೋಮ್‌ಸ್ಟೇರ ಎಡವಟ್ಟ್, ಕಾಮಾಲೆ ಕಣ್ಣ್; ಸಾರಥಿರ ಮಹತ್ವ ಉಪಯೋಗ; ನಾನ್ ಸರಿ.... ಇಡೀ ಪ್ರಪಂಚವೇ ಸರಿ.... ಐ. ಟಿ. ಬಿ.ಟಿ ಪ್ರಭಾವ, ಈ ನಗರೀಕರಣತ್‌ರ ಪ್ರಭಾವ. ದುಡ್ಡ್ ಪೆರ್ತದ್, ಚೆರಿಯ ವಯಸ್‌ಲೇ ದುಂಬಾ ದುಡ್ಡ್ ಕಂಡಂಡುಳ್ಳದ್, ಆ ಅಮಲ್ ಪೆರಿಯಯಿಂಗಳ ಮರ್ಪದ್, ಪೆರಿಯಯಿಂಗಡ ಬಿಡಾರ ಜಾಸ್ತಿ ಜಾಸ್ತಿ ತೊರ್ಂದಂಡುಳ್ಳದ್, ಪೆರಿಯಯಿಂಗಡ ಮನಸಾರ ಮೀದ ಆಪ ಪರಿಣಾಮ, ಮಕ್ಕಡ ಕರ್ತವ್ಯ, ಇದ್‌ನೆಲ್ಲಾ ಕೂಟುವಂಜಿ ಸಂಭಾಷಣೆ ರೂಪತ್ ಆಡ್ ಭಾಷೆಲೇ ಎಳ್ಳೆದ್‌ನನ್ನಕೆ ಕಾಂಬ. ಎಳ್ಳೆಕಾರನುಂಡ್ ಇನ್ನತ ಎಳ್ಳೆ ಇಂಞಚ್ಚಕೂ ಪೊರಬರಡ್, ಕೊಡವ ಸಾಹಿತ್ಯ ಬೊಳಿಯಂಡ್‌ಂದ್ ಬಯಂದವಿ. ಈ ಪುಸ್ತಕತನ ಪೊರ ಬೂಕುವಕ್ ಸಹಕಾರ ಮಾಡ್‌ನಂತ ಅಕಾಡೆಮಿರ ರಿಜಿಸ್ಟ್ರಾರ್, ಪುಸ್ತಕ ಪ್ರಕಟಣಾ ಸಮಿತಿರ ಸಂಚಾಲಕಿ ಡಾ. ತೀತಿರ ರೇಖಾ ವಸಂತ್ ಪಿಂಞ ಪ್ರಕಟಣಾ ಸಮಿತಿ ಸದಸ್ಯಂಗಕ್ ಅಕಾಡೆಮಿರ ಎಲ್ಲಾ ಸದಸ್ಯಂಗಕ್, ಅಂದೋಡೆ ಅಚ್ಚ್ ಮಾಡ್‌ನ ಶ್ರೀ ಕೃಷ್ಣ ಪ್ರಿಂಟರ್ಸ್ ಅಂಯಿಂಗಕೂ, ಈ ಪುಸ್ತಕ ಪ್ರಕಟಣೆಕ್ ಪ್ರತ್ಯಕ್ಷವಾಯಿತೂ, ಪರೋಕ್ಷವಾಯಿತೂ ಒತ್ತಾಸೆ ತಂದ ಎಲ್ಲಾರ್‌ಕೂ ವಂದನೆ ಬಯಂದವಿ.

- ಬಿದ್ದಾಟಂಡ ತಮ್ಮಯ್ಯ

ಅಧ್ಯಕ್ಷ, ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

# ಎಳ್ಳಾಕಾರಂಡ ತಕ್ಕ

ಆದ್ಯತ್, ಇದ್ ಒರ್ ವ್ಯಕ್ತಿ, ಒರ್ ಸಂಸಾರಕ್ ಸಮ್ಮಂದ ಪಟ್ಟದಲ್ಲ. ಆಚೆಂಗಿ, ನಂಗ ಸಮಾಜತ್ ನೋಟ್‌ಚೆಂಗಿ ಇದ್‌ಲ್ ಬಪ್ಪ ಪಾತ್ರ, ನಡಪ ಸಂಗತಿ, ಬೋಂಡಿಯಚ್ಚಕ್ ಕಾಂಗೋಲು. ಒರ್ ಗರೀಬನಾಯಿತ್ ಪುಟ್ಟಿತ್, ತಾಂಡ ನ್ಯಾಯ ನೀತಿ ಧರ್ಮ ಬುಡತೆ, ನಿಯತ್‌ಲ್ ಕೆಲಸ ಮಾಡಿಯಂಡ್, ತಾಂಡ ಸಂಬಳತ್‌ನೇ ನಂಬಿಯಂಡ್ ಸಮಾಜತ್ ಚಾಯಿತೆ ಬದ್‌ಕೋಲು, ಅಲ್ಲತೆ ಈ ಸಂಭಾಷಣೆ ರೂಪ ಕಥೆಲ್, ವಿದ್ಯತ್‌ರ ಮಹತ್ವ, ಕಳ್ಳರ ಅನಾಹುತ, ನಲ್ಲ ಡಾಕ್ಟರ್-ಮಲಿಯ ಕಣಿಯ ಅಲ್ಲ, ಕೆ.ಎ. ಪನ್ನೆರಂಡ್‌ರ ವಿಷಯ, ಪೂರ್‌ಮೆ ಆಕ್ಸಿಡೆಂಟ್ ಆನಕ ಆಪದ್, ಹೋಮ್ ಸ್ಟೇರ ಎಡವಟ್ಟ್, ಕಾಮಾಲೆ ಕಣ್ಣ್, ಸಾರಥಿರ ಮಹತ್ವ ಉಪಯೋಗ, ನಾನ್ ಸರಿ...ಇಡೀ ಪ್ರಪಂಚವೇ ಸರಿ, ಇದೆಲ್ಲ ಕೂಟುವಂಜಿ ಒರ್ ಕೂಟ್‌ಕರಿ ಪೋಲೆ ಈ ಪುಸ್ತಕತ್‌ರ ಒಂದನೆ ಕಥೆನೋ, "ನಾಡ ಸಂಸಾರ" ಎಣ್ಣುವ ಈ ಕಥೆ, ಆಂಡ ಅಡಿಲ್ ಉಳ್ಳ ಇಂಗ್ಲಿಷ್ ಕೇಪ್ಸ್‌ನ್ "ದಟ್ ಈಸ್ ಮೈ ಸಮ್ 'ಸಾರ'", ಒರ್ ಸಂಸಾರತ್‌ರ "ಸಾರ"ತ್‌ನ ಎಳ್ಳಾ ರೂಪತ್ ಬೋಳಿಪಡ್‌ತುವ ಚೆರಿಯ ಪ್ರಯತ್ನ ಮಾಡಿಯೆ.

ದಂಡನೆ (ಆಸರೆ ತಾಕಕೊತ್ತ ಕೊತ್ತ) ಕಥೆಲ್ ಒರ್ ವ್ಯಕ್ತಿ ತಾಂಡ ಜೀವನತ್ ಮಕ್ಕಳ ಕೈಲಾಪಚ್ಚಕ್ ಓದ್‌ಚಿಟ್ಟಿತ್ ನಲ್ಲ ಬಟ್ಟೆಕ್ ಕೂಟುವ. ವಯಸ್ಸ್ ಕಾಲತ್ ಪೊಣ್ಣ್ ಚಿತ್ತ ಪಿಂಞ ಮಕ್ಕ ಅವನ ನೋಟಿಯವತೆ ಪೋಚೆಂಗಿ ಆ ವ್ಯಕ್ತಿಕ್ ಒರ್ ಆಸರೆರ ಅಗತ್ಯ ದುಂಬಾ ಇಪ್ಪ. ಅದೂ ಇಕ್ಕಿಕ್ಕ ಈ ಐ.ಟಿ.ಬಿ.ಟಿ ಪ್ರಭಾವ, ಈ ನಗರೀಕರಣತ್‌ರ ಪ್ರಭಾವ. ದುಡ್ಡ್ ಪೆರ್‌ತದ್, ಚೆರಿಯ ವಯಸ್‌ಲೇ, ದುಂಬಾ ದುಡ್ಡ್ ಕಂಡಂಡುಳ್ಳದ್, ಆ ಅಮಲ್‌ಲ್ ಪೆರಿಯಯಿಂಗಳ ಮರ್‌ಪದ್, ಪೆರಿಯ ಯಿಂಗಡ ಬಿಡಾರ ಜಾಸ್ತಿ ಜಾಸ್ತಿ ತೊರ್‌ಂದಂಡುಳ್ಳದ್, ಪೆರಿಯಯಿಂಗಡ ಮನಸ್‌ರ ಮೀದ ಆಪ ಪರಿಣಾಮ, ಮಕ್ಕಡ ಕರ್ತವ್ಯ, ಈನೆಲ್ಲ ಕೂಟೊಂಜಿ : ಟಿ.ವಿ. ಸೀರಿಯಲ್ ಅಥವಾ ಸಿನೇಮ ಮಾಡುವಕ್ ಚಾಯಾಪನ್ನಕೆ, ಚಿತ್ರ ಕಥೆ, ಸಂಭಾಷಣೆ ರೂಪತ್ ಎಳ್‌ದಿಯೆ. ತೋಂದ್‌ನ ನಾಲಂಜಿ ಪಾಟ್ ಎಳ್‌ದಿಯೆ.. ತಪ್ಪುಂಡೆಂಗಿ ಮನ್ನೆಚಿಟ್ಟೋಳಿ, ಇದ್ ನಾಡ ನಿವೃತ್ತಿ ಜೀವನತ್‌ರ ಆದ್ಯ ಎಳ್ಳಾರ ಪುಸ್ತಕತ್‌ನ ಬೋಳಿಪಡ್‌ತ್‌ನ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ, ಅಧ್ಯಕ್ಷ, ಸದಸ್ಯಂಗಕ್ ನಾಡ ಎದೆದುಂಬ್‌ನ ವಂದನೆ. ನಿಂಗಡ ಅಭಿಮಾನ ಆಶೀರ್ವಾದವೇ ನಾಡ ಜೈತನ್ಯ.

- ಜಾಲಿ ಸೋಮಣ್ಣ ಕೊಟ್ಟುಕತ್ತಿರ

# ಪಾತ್ರ ಪರಿಚಯ

ಅಪ್ಪ	:	ಮೇದಯ್ಯ
ಅವ್ವ	:	ಮುದ್ದವ್ವ
ಪೆರಿಯ ಮೋಂವ	:	ಕಾರಿ ಕಾರ್ಯಪ್ಪ
ಪೊಣ್ಣಾ	:	ಕಾಮುಣಿ ಕಾಮವ್ವ
ಮಕ್ಕ: ಮೋವ	:	ಸೀತೆ ಸೀತಮ್ಮ
ಮೋಂವ	:	ಚಾಂಗ್ ಚಂಗಪ್ಪ
ಅಳಿಯ ಮೋಂವ	:	ಪ್ರೇಮ್ ಪೊನ್ನಪ್ಪ
ಪ್ರೇಮ್‌ರ ಪೊಣ್ಣಾ	:	ಬೋಜಿ ಬೋಜಮ್ಮ
ಮಕ್ಕ: ಮೋಂವ	:	ಗ್ಯಾನ್ ಗಣಪತಿ
ಮೋವ	:	ಕಾವ್ಯ ಕಾವೇರಿ
ಕಾಮುಣಿರ ಅಣ್ಣ	:	ಉತ್ತು ಉತ್ತಯ್ಯ
ಮೇದಯ್ಯಂಡ ಅಣ್ಣ	:	ಮಂದಯ್ಯ
ಮೇದಯ್ಯಂಡ ಮೊಮ್ಮ	:	ಮಂದವ್ವ
ಪ್ರೇಮ್‌ರ ಸಿನೇತ	:	ರಜತ್

## ಸೀನ್ ಒಂದ್

(\*ಸೀನ್ ನುಪ್ಪತ್ತ ದಂಡ್ ಆಚೆಂಗಿ ಒಂದ್)

(ಜೈಲ್ ಕಂಬಿನ ಪುಡ್‌ಚಂಡ್ ಪಳೆಯಾನ ಎಲ್ಲ ಗ್ಯಾನ ಮಾಡಿಯೆಂಡುಳ್ಳ ಕಾರಿ  
ಕಾರ್ಯಪ್ಪ) (ಇದೇ ಸೀನ್ ಒಂದಾಲ್‌ಂಜಿ ಇಕ್ಕಣೆ)

ನಾಡ ಸಂಸಾರ, ನಾಡ ಸಂಸಾರ,  
ದಟ್ ಈಸ್ ಮೈ ಸಮ್ ಸಾರ,  
ಬಾನ್‌ಲ್ ಪಾರುವ ಪಕ್ಷಿಯಾ,  
ನೀರ್‌ಲ್ ತೇಲುವ ದೋಣಿಯಾ,  
ಅಲ್ಲ ಜೈಲ್ ಕಂಬಿರೊಳ್‌ರ್ ಈ ಜೀವವಾ,  
ನಾಡ ಸಂಸಾರ, ನಾಡ ಸಂಸಾರ,  
ದಟ್ ಈಸ್ ಮೈ ಸಮ್ ಸಾರ,

\* \* \* \* \*

## ಸೀನ್ ದಂಡ್

(ನಾಡ್ ಮನೆ, ಅಪ್ಪನು ಅಪ್ಪನು ಕೋಂಬರೆಲ್ ತಕ್ಕ ಪರ್ಂದಂಡಿಪ್ಪ)

ಮೇದಯ್ಯ : ಅಲ್ಲ ನಂಗಡ ಕಡೇ ಕುಂಚೆರ ಮಂಗಲವೂ ಆಚಿ, ನಂಗಡ ಬಲ್ಯ ಭಾರ ನೀಸ್‌ನನ್ನಕೆ ಆಚಿ..

ಮುದ್ದವ್ವ : ಅಕ್ಕು, ನಂಗಕಿಕ್ಕ ಬಲ್ಯ ಭಾರ ಕಯಿಂಜತ್, ಇಂಚೆ ನಂಗಡ ಮಕ್ಕ ಜಾಯಿತೆ ಇಂಜತೇಂಗಿ ಮದಿ, ನಂಗ ರಾಮಾ ಕೃಷ್ಣಾಂಧ್ ಎಣ್ಣಿಯೆಂಡ್ ಇರೋಲು.

ಮೇದಯ್ಯ : ಪುತ್ತಂಗಾರನೂ ಪುತ್ತಂಗರ್ತಿಯೂ ನಾಳೆ ಪೋಪಲೋ, ಅಯಿಂಗಕ್ ಎಂತೇಂಗಿ ಬೋಂಡುವಾಂಧ್ ಕೇಳ್. ಮೂಡಿಯೂ ಚೆರಿಯ ವಯಸ್ ಅನುಭವ ಇಪ್ಪಕಿಲ್ಲೆ, ಅಡಿಗೇ ಗೊತ್ತುಂಡೋ ಎನ್ನೋ, ನಂಗಡವನೋ ರಸ ಬಾಯಿ, ಎನ್ನಾಪೋ

ಮುದ್ದವ್ವ : ನಾನ್ ಮಂಗಲ ಕಯ್ಯುವಕ ನಾಕೂ ಚೆರಿಯ ವಯಸ್, ನಾಕೂ ಅಡಿಗೇ ಗೊತ್ತಿಂಜಿತಿಲ್ಲೆ, ನಿಂಗಡ ಬಲ್ಯ ಸಂಸಾರತ್‌ನ, ಅಡಿಗೇ ಮಾಡಿಯೆಂಡ್ ನೀಸಿತಿಲ್ಲಿಯಾ, ಅನ್ನನೆ ಇವಳೂ ಪಡಿಪ ಬುಡಿ, ನಂಗಡವನೂ ಅಡ್ಡಸ್ತ್ ಮಾಡಿಯವ ರಸ ಬಾಯಿ ಆನಾಂಗ್ ಜಾಯಿತೆ ಅಡಿಗೇ ಪಡಿಪ ಬುಡಿ, ದಂಡಾಳೆನ್ನೆ ಜಾಯಿತೆ ಇಪ್ಪ ನಿಂಗ ಆಂಡ ಚಿಂತೆ ಮಾಡಂಡ.

ಮೇದಯ್ಯ : ಅದೇ ಸರಿ ಎಣ್ಣಾ, ಆಚೆಂಗಿಯೂ ಎಂತೆಲ್ಲ ಸಾಮಾನ್

ಬೋಂಡೂಂದ್ ನೋಟಿತ್ ಎಡ್ತ್ ಕೊಡ್, ಅವು ಕೇಪಕಿಲ್ಲೆ  
ನೀನೆ ಕೇಟ್ ನೋಟ್.

ಮುದ್ದವ್ವ : ನಾಕ್ ಅವಂಡ ಬಗೆಯಾಡ್ ಅವಂಡ ಪೊಣ್ಣಾರ ಬಗೆಯಾಡ್  
ಚಿಂತೆ ಇಲ್ಲೆ, ನಾಕ್ ಮನೆಲುಳ್ಳಯಿಂಗಡ ಬಗೆ ಚಿಂತೆ ಅವಂಡ  
ಪೊಣ್ಣೋ ಒರ್ ತರ ಕಾರಿಯೋ ಅವ ಎಣ್ಣಾ ನನ್ನಕೆ ಕಳಿಪ,  
ಎಂತ ಮಾಡೋ ನಂಗ ಎಲ್ಲ ನೋಟಿಯಂಡ್ ಇಕ್ಕೊಂಡು.

ಮೇದಯ್ಯ : ನಂಗ ಕಯ್ಯುವಲ್ಲಿಕತ್ತಣೆ ಕಯ್ಯುವ ಕೆಲಸ ಮಾಡಿಯಂಡಿಕ್ಕ, ಇಟ್ಟಾನ  
ತಿಂದಂಡ್ ಇಕ್ಕ, ಎಲ್ಲಾಂಗೂ ನೀನ್ ಮಾತ್ರ ಮನೆ ಮೈಮಡ  
ಮೀದ ಚೆಡಿಂಜವತೆ, ಒಂದೂ ಎಣ್ಣತೆ, ಜಗಳ ಬಕ್ಕಣ ಮಾಡತೆ  
ಇರ್.

ಮುದ್ದವ್ವ : ನಾನೆನ್ನ ಮುಂಡತೆ ಮುಂಡತೆ ಜಗಳ ಮಾಡುಲೆ, ತಪ್ಪು ಕಂಡತೇಂಗಿ  
ನೇರೆ ನೇರೆ ಎಣ್ಣೆರುವಿ, ಅದ್ ಆಪುಲೆ, ಮನೆ ಬದ್ಕ್ ಪಾಳಾಪದ್  
ನಾಕ್ ಕಾಂಬಕ್ ಕಯ್ಯುಲೆ. ನಂಗ ಎಚ್ಚಕ್ ಕಷ್ಟ ಪಟ್ಟಿತ್ ಮಕ್ಕಳ  
ಇಲ್ಲಿಕತ್ತಣೆ ಕೊಂಡ ಬಾತ್.

ಮೇದಯ್ಯ : ಆಚೆಂಗಿ ಅದ್ ನಂಗಡ ಕರ್ತವ್ಯಾಂದ್ ಗ್ಯಾನ ಮಾಡ್,  
ನಂಗಳಗುಂಡ್ ಈ ಮಕ್ಕಳ ಪುಟ್ಟ್ಚ್ಚ್ಚಾಂಗ್ ನಂಗ ಅಯಿಂಗಳ  
ಬೊಳ್ತುವದ್ ನಂಗಡ ಧರ್ಮವೂ ಅಕ್ಕು ಕರ್ಮವೂ ಅಕ್ಕು,  
ಆಂಡ ಬಗ್ಗೆ ನಂಗ ಜಾಸ್ತಿ ಗ್ಯಾನ ಮಾಡುವಕಾಗ, ಎಂತೆಲ್ಲೋ  
ಗ್ಯಾನ ಮಾಡಿಯುಂಡ್ ತಡಿ ಪಾಳ್ ಮಾಡಿಯುವದ್  
ಬೋಂಡ್, ಜೀವನ ಬಂದನ್ನಕೆ ಎಡ್ತವನ.

ಮುದ್ದವ್ವ : ಆಚಿ ಜೀವನ ಬಂದನ್ನಕೆ ಎಡ್ತವನ, ನಂಗಕ್ಕೆಂತ ಮಾಡುವಕ್  
ಕಯ್ಯುವ, ಆಚೆಂಗಿ ನಂಗಡ ಮಕ್ಕಕ್ ಮಂಗಲ ಆಚಿ ಅಯಿಂಡ  
ಪಾಡ್ಕ್ ಅವು ಇಪ್ಪ, ನಂಗಡ ತೋಟ ತೊಡಿಯತ್ನ ಭೂಮಿ  
ಕಾಣಿನ ಪಾಲ್ ಪರಿಕತ್ ಮಾಡಿ ಕೊಡ್ತಿತುಂಡೇಂಗಿ ನಲ್ಲದ್  
ಇಂಜತ್, ಅದೇ ಬಲ್ಯ ವರೀಸ್. ಮಿಂಞಕ್ ಮಕ್ಕ ಎಂತ  
ಮಾಡಿಯವೋ ಎನ್ನೋ...

ಮೇದಯ್ಯ : ನೀನ್ ಎಣ್ಣವದ್ ಸರಿ ನಂಗ ಮಿಂಞಲೇ ಆಸ್ತಿ ಪಾಲ್ ಮಾಡುವಕ್  
ಕಯ್ಯುಲೆ, ಇಕ್ಕ ಪ್ರೇಮ್‌ರ ಮಂಗಲ ಆಯೆ, ಬಯ್ಯ ನೋಟನ,



ಇಕ್ಕ ಮಕ್ಕ ನಾಳೆ ಪೋಪಕ್ ಪೊರಟಿತ್, ಆಂಡ ಬಗೆ ನೋಟನ..

ಮುದ್ದವ್ವ : ಸರಿ ಅನ್ನನೇ ಆಡ್ ಆಚಿಂಗಿ...

ಮೇದಯ್ಯ : ಪುನಹ ನೀಡ ಎಂತ ರಾಗ..

ಮುದ್ದವ್ವ : ನಂಗ ದಾಕೂ ಬೇದ ಭಾವ ಮಾಡಿತಿಲ್ಲೆ ಆಚಿಂಗಿ ಮನೆಲುಳ್ಳಂವ ಪೊರಮೆ ಉಳ್ಳ ಮೋವಂಗ್ ಎನ್ನೇಂಗಿ ಮೋಸ ಮಾಡಿರೂಂದ್ ಪೋಡಿ..

ಮೇದಯ್ಯ : ಅವ ಅನ್ನನೆ ಒಂದೂ ಮಾಡುವಕಿಲ್ಲೆ.

ಮುದ್ದವ್ವ : ಅವ ಮಾಡುವಕಿಲ್ಲೆ ಆಚಿಂಗಿ ನಂಗಡ ಮೈಮಡ ತಕ್ಕ ಕೇಟಂಡ್ ಎನ್ನೇಂಗಿ...

ಮೇದಯ್ಯ : ಅನ್ನನೆ ಒಂದೂ ಆಪುಲೆ, ಬುಡ್, ಅದ್ ಬಂದಕ ನೋಟಿಯವನ, ದಂಡಾಳೂ ನಂಗಡ ಮಕ್ಕ ಎನ್ನೆ.

ಮುದ್ದವ್ವ : ಅದ್ ಸರಿ ಎಲ್ಲಾ ದೇವಕ್ ಬುಟ್ಟರನ ನಂಗಳುಂಡ್ ಎಂತ ಆಪ, ಅದ್ ಮಾಡನ.

ಮೇದಯ್ಯ : ನೀ ಎಣ್ಣಾನನ್ನಕೇ ಎಲ್ಲಾ ಆ ದೇವಕ್ ಬುಟ್ಟಿತ್ ನಂಗಡ ಪಾಡ್ಕ್ ನಂಗ ಇಕ್ಕ, ನಂಗಡ ದಂಡ್ ಮಕ್ಕಳೂ ನಂಗಡ ಮೂಡಲ್ ಉಳ್ಳ ದಂಡ್ ಕಣ್ಣ ನನ್ನಕೆ. ಬುಡ್, ಇಕ್ಕ ಪೋಯಿತ್ ಅವು ಪ್ಯಾಕ್ ಮಾಡಿಯೆಂಡುಲ್ಲಿಕ್ ಪೋಯಿತ್ ಅಯಿಂಗಕ್ ಎಂತೇಂಗಿ ಬೋಂಡುವಾಂದ್ ಕೇಳ್.

ಮುದ್ದವ್ವ : ಆಚಿ... ಆಚಿಂಗಿ...

ಮೇದಯ್ಯ : ಪುನಹ ಎಂತ ರಾಗ..

ಮುದ್ದವ್ವ : ಈ ಕ್ಕಣ್ಣ ಚಾಂಗ್ ಒಂದೂ ಮಾಡುವದ್ ಕಾಂಬುಲೆ ಸ್ಕೂಲ್ಕ್ ಪೋಪುಲೆ ಕಾಂಬ, ಕಯಿಂಜ ಕಾಲ ನಾಡ ಕುಂಇ ನೋಗ ಎಡ್ಪ ಇಂಜತ್ ಈಯಾಂಡ್ ಕಳಿಕೋಲ್ ಎಡ್ಪುಲೆ ಅನ್ನನೆ ಆಯೆಂಡ್ ಉಂಡ್..

ಮೇದಯ್ಯ : ಅವಂಡ ಅಪ್ಪ ಅವ್ವನೂ ಉಂಡಲ್ಲ, ಅಯಿಂಗ ನೋಟಿಯವ ಬುಡ್, ಪೋ ಎಂತ ಬೋಂಡೂಂದ್ ಕೇಳ್..

ಮುದ್ದವ್ವ : ಆಚಿ (ದಂಡಾಳೂ ಪೋಪ)

## ಸೀನ್ ಮೂಂದ್

(ಅಪ್ಪಂಡ ಮನೆ, ಮಂಗಲ ಆಯಿತ್, ರಜ ತೀಂದತ್, ನಾಳೆ ಪೊಣ್ಣಾನ ಕೂಟಿಯಂಡ್  
ಬೆಂಗಲೂರ್ಕ್ ಪೋಂಡು, ಎಲ್ಲಾ ಪ್ಯಾಕ್ ಮಾಡಿಯಂಡ್ ಇಪ್ಪ-  
ಪುತ್ತಂಗಾರ ಪುತ್ತಂಗರ್ತಿ)

ಪ್ರೇಮ್ ಪೊನ್ನಪ್ಪ : ನೋಟ್‌ರ ಬೋಜಿ, ಕಷ್ಟವೋ ಸುಖವೋ, ಮಂಗಲ  
ಆಚಿ (ಕಣ್ಣಲ್ ನೀರ್)

ಬೋಜಿ ಬೋಜಮ್ಮ : ಆಂಗೆನ್ನಂಗ್ ನಿಂಗ ಇಚ್ಚ ಬೇಜಾರತ್ ತಕ್ಕ ಪರೆವ,  
ಎನ್ನಂಗ್ ಕಣ್ಣೀರ್, ಮಂಗಲ ಆನ ಪಿಂಞ ನಂಗ ದಂಡಾಳೂ  
ಕಷ್ಟಕೂ ಸುಖಕೂ ಸಮ ಭಾಗಿಯಲ್ಲಾ, ನಿಂಗಡ  
ಕೂಟ್‌ಕ್ ಇಕ್ಕ ನಾನುಳ್ಳೋ..ನಾಕ್ ನಿಂಗ, ದೇವಡ ಸಹಾಯ  
ಇಪ್ಪ ಬುಡಿ ಇಂಞೆ ಮಿಂಞಾಕ್ ನಂಗ ಏದೇ ಕಾರಣಕೂ ಕಣ್ಣಲ್  
ನೀರ್ ಇಡುವಕಾಗ...

ಪ್ರೇಮ್ ಪೊನ್ನಪ್ಪ : ಅದೇ ನಾನ್ ಫಂಡ್ ಪಟ್ಟ ಕಷ್ಟ ಎಲ್ಲಾ ಗ್ಯಾನ ಬಾತ್

ಅನ್ನನೇ ಕಣ್ಣೀರ್ ಬಂದ್‌ರ್‌ತ್.

ಬೋಜಿ ಬೋಜಮ್ಮ : ಕಣ್ಣೀರ್ ಬಪ್ಪಂತದ್ ಎಂತ ವಿಷಯ, ನಾಕ್ ಎಣ್ಣುವಕ್ ಇಷ್ಟ ಇಲ್ಲತೆ ಪೋಚೆಂಗಿ ಬೋಂಡ ಬುಡಿ..

ಪ್ರೇಮ್ ಪೊನ್ನಪ್ಪ : ಇಂಇ ನಾಡ ನೀಡ ಮಧ್ಯ ಎಂತ ಸೀಕ್ರೇಟ್, ನಂಗಡಲ್ಲಿ ನೀಕ್ ಗೊತ್ತುಳ್ಳನ್ನಕೆ ದಂಡ್ ಮಕ್ಕ, ಅಪ್ಪಂಡ ಚೆರಿಯ ಸಂಬಳ, ಭೂಮಿಲ್ ಅಚ್ಚಕ್ ನೆಲ್ಲ ಆಪ ಇಂಜಿಲೆ, ತೋಟ ನಂಗ ಇಕ್ಕ ಮಾಡಿಯಂಡ್ ಉಳ್ಳ, ಫಸಲ್‌ಕ್ ಇಕ್ಕ ಬಂದಂಡ್ ಉಳ್ಳ, ಭಾರಿ ಕಷ್ಟ ಇಂಜತ್, ಕೆಲಕ್ ಕೂಳ್ ಇಲ್ಲತೆ ಇಂಜ ದಿನವೂ ಇಂಜತ್... (ಕಣ್ಣೀರ್ ಬಪ್ಪ).

ಬೋಜಿ ಬೋಜಮ್ಮ: ನಿಂಗ ದಯಬೆಚ್ಚಿತ್ ಕಣ್ಣೀರ್ ಇಡತಿ, ನಿಂಗಡ ಮನಸಾರ ಭಾರತ್‌ನ ದಾರ್ ಕೇಂಗಿ ಎಣ್ಣೆ ಚೇಂಗಿ ಭಾರ ಕಮ್ಮಿ ಆಕು. ಎಣ್ಣೆ..

ಪ್ರೇಮ್ ಪೊನ್ನಪ್ಪ: ನಂಗ ಸ್ಕೂಲ್‌ಕ್ ಪೋಪಕ್ ಸುರು ಮಾಡ್‌ನದೇ ಬಲ್ಯ ಸಂಗತಿ, ನಂಗಡ ಊರ್‌ಲ್ ಸ್ಕೂಲೇ ಇಂಜಿತಿಲ್ಲೆ. ದಾರೋ ಒರ್ ಪುಣ್ಯಾತ್ಮ ಆ ಕಾಲ ಸ್ಕೂಲ್ ತೊರಂದತ್, ನಾಕ್ ಅಂಜಿ ವಯಸ್ಸು ಆಯಿ ತಿಂಜಿಲೆ, ನಂಗಡಲ್ಲಿ ನಾಕುಂಜಿ ಪೆರಿಯಯಿಂಗಳ ಎಲ್ಲಾ ಸ್ಕೂಲ್‌ಕ್ ಅಡ್ಡಿಸನ್ ಮಾಡ್‌ಚಿ, ನಾಡ ವಯಸ್ಸನ ಒರ್ ತಿಂಗ ಜಾಸ್ತಿ ಮಾಡಿತ್ ಅಯಿಂಗಡ ಕೂಡೇ ಸ್ಕೂಲ್‌ಕ್ ಕೂಟ್‌ಚಿ.

ಬೋಜಿ ಬೋಜಮ್ಮ : ನಲ್ಲದೇ ಆಚಲ್ಲ, ನಿಂಗಕೂ ಅಯಿಂಗಡ ಕೂಡೇ ಅಡ್ಡಿಸನ್ ಆನದ್.

ಪ್ರೇಮ್ ಪೊನ್ನಪ್ಪ: ಅಕ್ಕು, ನೇರಾಯಿತೂ ಅಕ್ಕು, ನಾಕ್ ಪೆರಿಯವು ಎಲ್ಲಾ ದುಂಬಾ ಕೇರ್ ಎಡ್‌ತವ ಇಂಜತ್, ಕಾಡ್ ಬೇಲ್ ತೋಡ್ ಪೊಳೆ ದಾಟಿತ್ ಸ್ಕೂಲ್‌ಕ್ ಪೋಂಡು ಇಂಜತ್, ನಾನ್ ಎಲ್ಲಾರ್‌ಕೂ ಅಳಿಯಂವ ಆನಾನಗುಂಡ್, ನನ್ನ ಮಧ್ಯತ್ ಕೂಟಿಯಂಡ್ ಕೈ ಪುಡ್‌ಚಿ ಪೋಪ ಇಂಜತ್, ಎನ್ನೇ ಎಣ್ಣೆ ಅಕ್ಕತ ಪ್ರೀತಿ ಅಕ್ಕರೆ ಇಕ್ಕ ಇಲ್ಲೆ ಬುಡ್..

ಬೋಜಿ ಬೋಜಮ್ಮ : ಎನ್ನಂಗ್ ಅನ್ನನೆ ಎಣ್ಣುವಿರಾ, ಇಕ್ಕ ಜಾಸ್ತಿ ಮಕ್ಕ ಮಾಡಿಯವಲೆ, ಆನುಂಡ್ ಅಯಿಂಗಕ್ ಅನ್ನನೆ ಪ್ರೀತಿ ಮಾಡುವಕ್ ಜನಳೂ ಇಲ್ಲೆ, ಅಪ್ಪವ್ವಂಡ ಕೋಪಟೆ ಜಾಸ್ತಿ ಅದೇ ಪಾಳ್.

ಪ್ರೇಮ್ ಪೊನ್ನಪ್ಪ : ಅಕ್ಕು, ಫಂಡ್ ಒರ್ ಗಾದೆ ಇಂಜತ್ "ನಾಯಿನ ಕೆಟ್ಟ

ಚಾಕೊಂಡು, ಮಕ್ಕಳ ಪೊಜ್ಜಿ ಚಾಕೊಂಡು" ಆಚೆಂಗಿ ಇಕ್ಕ ಮಕ್ಕ  
ಕಮ್ಮಿ ಉಳ್ಳಾಂಗ್ ಇದಾಪುಲೆ ಬುಡ್.

ಬೋಜಿ ಬೋಜಮ್ಮ : ಅದ್ ನೇರ್. ದಂಡಾತು ನಲ್ಲದ್ ಕೆಟ್ಟದ್ ಇಂಜತ್  
ಅಲ್ಲ..

ಪ್ರೇಮ್ ಪೊನ್ನಪ್ಪ : ನೇರ್ ನೇರ್ ಇದತೂ ಕೆಲವು ನಲ್ಲದ್ ಉಂಡ್  
ಅನ್ನನೆ ಪಾಳೂ ಉಂಡ್. ಮಕ್ಕ ದುಂಬ ಇಪ್ಪಕ ದಾರ್ಕೇಂಗಿ ಪನಿ  
ಬಾತೇಂಗಿ, ಅವಂಡ ಕೂಡೆ ಬುದ್ದಂಡಂವ ಎಣ್ಣೊಂಡು, ಅಕ್ಕೇ  
ಅಪ್ಪವ್ವಂಗೆ ಗೊತ್ತಾಪ ಇಂಜಿಯೆ...ತಮಾಷಿ ಅಲ್ಲಾ..ಇಂಇೋರ್  
ವಿಷಯ, ಮಕ್ಕ ಜಾಸ್ತಿ.... ಸರಿಕ್ ಪೆದವೂ ಗೊತ್ತಿಪ್ಪುಲೆ, ಏ ಇವನೆ,  
ನೀ ಬಾರ, ಇನ್ನನೆ

ಸಂಭಾಷಣೆ ...

ಬೋಜಿ ಬೋಜಮ್ಮ : ಪಳೇ ಗ್ಯಾನ ಮದಿ, ಇಕ್ಕ ನಿಂಗಡ ರಜ ತೀಂದತ್,  
ಪಳಿಯಾನ ಸಧ್ಯಕ್ ಮರಂದಿತ್, ಇಂದೇಕ್ ಎಂತ ಬೋಂಡು  
ಅದ್ನ ಗ್ಯಾನ ಮಾಡನ.

ಪ್ರೇಮ್ ಪೊನ್ನಪ್ಪ: ಸರಿ ಸರಿ, ಇಂಗ್ಲಿಷ್ ಒರ್ ಗಾದೆ ಉಂಡ್;; ಫ್ಲರ್ಗೇಟ್ ದ  
ಪಾಸ್ಕ್, ಡು ನಾಟ್ ತಿಂಕ್ ಅಬೌಟ್ ದ ಫ್ಯೂಚರ್, ಲಿವ್ ದ  
ಪ್ರೆಸೆಂಟ್, ಪಳಿಯಾನ ಮರಂದಿತ್, ಭವಿಷ್ಯತ್‌ರ ಬಗ್ಗೆ ಚಿಂತೆ  
ಮಾಡತೆ, ಇಕ್ಕತಾನ ಬದ್‌ಕನ.

ಬೋಜಿ ಬೋಜಮ್ಮ : ನಂಗ ಇಕ್ಕ ನಂಗಡಲ್ಲಿಕ್ ಪೋಪಕುಳ್ಳಾಂಗ್ ಪ್ಯಾಕ್  
ಮಾಡನ.

ಪ್ರೇಮ್ ಪೊನ್ನಪ್ಪ : ನಾಡ ನೀಡ ಸಾಮಾನ್ ಮಾತ್ರ ಪ್ಯಾಕ್ ಮಾಡಿಯವನ,  
ಮನೆಂಜಿ ಒಂದೂ ಕೊಂಡೋಪದ್ ಬೋಂಡ, ನಂಗ ಎಂತ  
ಉಂಡೇಂಗಿನು ಸುರೂಂಜಿ ಮಾಡನ..

ಬೋಜಿ ಬೋಜಮ್ಮ : ನಿಂಗ ಎಣ್ಣುವದ್ ನೇರ್, ನಂಗ ಮಾಡ್‌ನಾನ ನಂಗ  
ಖುಶೀಲ್ ಅನುಭವ್‌ಚಿಡೋಲು, ದಾಡೋ ಹಂಗ್ರಾಣೆ ಇಪ್ಪುಲೆ,  
ಮನಸ್‌ಕೂ ತೃಪ್ತಿ ನೆಮ್ಮದಿ.

(ಬಸ್‌ಲ್ ಪೋಪಕುಳ್ಳದ್ ಪ್ಯಾಕ್ ಮಾಡಿಯವ)

## ಸೀನ್ ನಾಲ್

(ಬೆಂಗಳೂರ್‌ನಲ್ಲಿ ನಲ್ಲ ಏರಿಯತ್ ಚೆರಿಯ ಮನೆ, ಒಡಿಯನೂ ಪೊಣ್ಣು ಎತ್ತುವ) ಅಲ್ಲಿಯತ ನೆರೆ ಕೆರೆ ಕೊಡವ, ಮನೆ ತೊರಂದಿತ್, ಬೊಳ್‌ಚೆ ಬೆಚ್ಚಿತ್ ಪುದಿಯ ದಂಪತಿಯಳ ಮನೆರ ಒಳ್‌ಕ್ ಕೂಟಿಯವ...ದಂಡಾಳೂ ಕಾಲ್ ಕೈ ಪುಡಿಪ, ತಕ್ಕ ಬಾಕ್ ಪರಂದಿತ್, ಅವು ಎಲ್ಲ ಈಯಂಗಳ ಬುಟ್ಟಿತ್ ಪೋಪ)

ಪ್ರೇಮ್ ಪೊನ್ನಪ್ಪ : ನೋಟ್ ಬೋಜಿ, ಚೆರಿಯ ಮನೆ ಬೇಜಾರ್ ಮಾಡತೆ, ಮನೆಲ್ ಅಡಿಗೇಕಾಡ್ ಒಂದಾಂಗು ಸಾಮಾನ್ ಒಂದೂ ಇಲ್ಲೆ, ನಂಗ ಇಕ್ಕ ಪೋಯಿತ್ ಬೋಂಡಿಯಂತಾನ ಕೊಂಡ ಬಕ್ಕ.

ಬೋಜಿ ಬೋಜಮ್ಮ : ಮನೆ ಚೆರಿಯದಾಚೆಂಗಿ ಎನ್ನ, ನಾಡವಂಡ ಮನಸ್ಸು ದುಂಬಾ ಬಲ್ಯದ್, ನಾಕ್ ಅದೇ ಮದಿ,

ಪ್ರೇಮ್ ಪೊನ್ನಪ್ಪ : ಅಚ್ಚಕ್ ಹೊಗಳತೆ, ನಾಕ್ ಎಂತೋ ಆಪ, ಇಲ್ಲಿ ಇಕ್ಕ ದಾರೂ ಇಲ್ಲೆ, ನಂಗ ದಂಡಾಳೆ, ಪ್ರೈವಸಿ ದುಂಬಾ ಪಾಳ್, ಗೊತ್ತಾಚಾ...

ಬೋಜಿ ಬೋಜಮ್ಮ : ನಿಂಗಡ ರಸಿಕ ತನತ್‌ನ ಸಧ್ಯಕ್ ನಿಪ್ಪುಚಿಟ್ಟಿತ್, ಅಕ್ಕಲೆ  
ನಿಂಗ ಎಣ್ಣಾನನ್ನಕೆ ಬೋಂಡಿಯ ಸಾಮಾನ್ ಎಡ್‌ತವನ, ಮಿಂಇಕ್  
ಬೋಂಡಿಯಾಪಕ ಅಕ್ಕ ಎಡ್‌ತವನ, ಇಕ್ಕಲೇ ಕೈಲ್ ಉಳ್ಳ ದುಡ್ಡ್  
ಎಲ್ಲಾ ಖರ್ಚಿ ಮಾಡಿಯವದ್ ಬೋಂಡ.

ಪ್ರೇಮ್ ಪೊನ್ನಪ್ಪ : (ಪೊಣ್ಣಾನೇ ನೋಟಿಯಂಡಿಪ್ಪ)...

ಬೋಜಿ ಬೋಜಮ್ಮ : ಎಂತ ಅನ್ನನೆ ನೋಟುವ,

ಪ್ರೇಮ್ ಪೊನ್ನಪ್ಪ : ನಾನ್ ಗ್ಯಾನ ವಾಡ್‌ನನ್ನಕೇ ನೀನೂ ಗ್ಯಾನ  
ಮಾಡಿಯಂಡ್ ಉಳ್ಳಿಯಲ್ಲಾ, ಅದ್‌ಂಗೇ ಎಣ್ಣುವ " ಕಟ್ಟೋಳೆಕೊತ್ತ  
ಪಡೀಂದ್" ಗಾದೆ.

ಬೋಜಿ ಬೋಜಮ್ಮ : (ಕ್‌ರಂದೊಳಿ ತೊಳ್‌ಚಂಡ್) ಮದಿ ಮದಿ ನಿಂಗಡ  
ಗಾದೆ ಎಲ್ಲ.. ಬೆರಿಯ ಸಾಮಾನ್ ಎಡ್‌ಕ.

ಪ್ರೇಮ್ ಪೊನ್ನಪ್ಪ : ನೀಕ್ ಎಂತ ಸಾಮಾನ್ ಬೋಂಡು ಎಡ್‌ತ,

ಬೋಜಿ ಬೋಜಮ್ಮ : ಇದ್ ಪಾಲ್ ಕಾಚುವಕ್, ಇದ್ ಕೂಳ್‌ಕ್, ಇದ್  
ಕರಿಕ್, ಇದ್ ಮೋರ್‌ಕ್, ಮದಿ ಕಾಂಬಲ್ಲ,

ಪ್ರೇಮ್ ಪೊನ್ನಪ್ಪ : ಏಯ್, ಕಾಪಿ ಟೀಕ್ ಬುಟ್ಟಿತುಳ್ಳಿಯಲ್ಲ, ಅಗ್ರಾಣೆಕ್  
ಇದ್ ಇರಡ್, ಕುಡಿಪ ನೀರ್ ಕಾಚುವಕ್, ಕುಳಿಪಕ್ ಬಕ್ಕೆಟ್  
ಮಗ್ಗ್..

ಬೋಜಿ ಬೋಜಮ್ಮ : ನಿಂಗಕೂ ಸುಮಾರೆಲ್ಲ ಗೊತ್ತುಂಡಲ್ಲ,

ಪ್ರೇಮ್ ಪೊನ್ನಪ್ಪ : ಎಲ್ಲಾ ನೀಡ ಸಹವಾಸ.

ಬೋಜಿ ಬೋಜಮ್ಮ : ಅದೊಂದಿಲ್ಲೆ.

ಪ್ರೇಮ್ ಪೊನ್ನಪ್ಪ : ಅನ್ನನೆ ಜಿನಸಿ ತರಕಾರಿ ಎಲ್ಲಾ ಎಡ್‌ತವನ.

ಬೋಜಿ ಬೋಜಮ್ಮ : ನೇರ್ ನೇರ್ ಅದೂ ಬೋಂಡು.

ಪ್ರೇಮ್ ಪೊನ್ನಪ್ಪ : ಅನ್ನನೆ ಸಾಮಾನ್ ಬೋಂಡುವೇಂಗಿ ಅಂಗಡಿ ಕಾರಂಗ್  
ಎಣ್ಣಿತಯಿಚಕ ಅವನೇ ಅಯಿಚಿ ತಪ್ಪ, ತಿಂಗಕೊಮ್ಮ ಲೆಕ್ಕ ತೀತಕ  
ಮದಿ.

ಬೋಜಿ ಬೋಜಮ್ಮ : ಆಚೆಂಗಿ ತಿಂಗ ಲೆಕ್ಕ ಸಾಮಾನ್ ಬೋಂಡ, ಅಕ್ಕಕ್ಕೆ  
ದುಡ್ಡ್ ಕೊಡ್‌ಕೊಂಡು, ಅಂಗಡಿ ಸಾಲತ್‌ರ ವ್ಯಪಹಾರ ಮಾತ್ರ  
ಬೋಂಡ.

ಪ್ರೇಮ್ ಪೊನ್ನಪ್ಪ : ಎನ್ನಂಗ್, ಅದಾಲೆಂತ, ತಿಂಗ. ಆಖೀರಿಲ್ ಕೊಡ್ತಕ  
ಮದಿ ಅಲ್ಲ, ನಂಗಕೂ ಸುಲಭ ಆಪ.

ಬೋಜಿ ಬೋಜಮ್ಮ : ಅದೇ ಬೋಂಡಾಂದ್ ಎಣ್ಣುವ, ಸಾಲ ಕ್ಕಟ್ಟುವ  
ಎಣ್ಣಿಯಂಡ್ ಬೋಂಡಿಯದ್ ಬೋಂಡತದ್ ಎಲ್ಲ ಎಡ್ತವ  
ಅಂಗಡಿಕಾರ ಎಳ್‌ದನ ಲೆಕ್ಕ ನಂಗಲೂ ನೋಟುಲೆ, ಆಂಗೇ  
ಬೋಂಡಾಂದ್ ಎಣ್ಣುವ.

ಪ್ರೇಮ್ ಪೊನ್ನಪ್ಪ : ಆಚಪ್ಪ, ನೀನ್ ಎಣ್ಣುವದೇ ಸರಿ, ಅನ್ನನೆ ಮಾಡನ,  
ಅಲ್ಲಾ ಇದೆಲ್ಲ ನೀಕೆನ್ನನೆ ಗೊತ್ತ್,

ಬೋಜಿ ಬೋಜಮ್ಮ : ಇದೂ ನೀಡ ಸಹವಾಸ ದೋಸ.

ಪ್ರೇಮ್ ಪೊನ್ನಪ್ಪ : ಏಯ್ ನಾಡ ಸಹವಾಸ ನಾಲಂಜಿ ದಿವಸ ಆಯೆ,  
ಅಕ್ಕಣೆ ಸಹವಾಸ ದೋಸ ಆಚಿಂಗಿ ಇಂಚ್ ಮಿಂಚ್....

\* \* \* \* \*

## ಸೀನ್ ಅಂಜಿ

ಕಾರಿ ಕಾರ್ಯಪ್ಪ : ಅವಂಡ ಎಂತ ಅಹಂಕಾರ ನೋಟ್, ಮನೆಂಜಿ  
ಒಂದೂ ಬೋಂಡಾಂದ್ ಎಣ್ಣೆಚಲ್ಲಾ..

ಕಾಮುಣಿ ಕಾಮವ್ವ : ನಲ್ಲದಾಚಿ ಬುಡಿ, ಅವು ಕೊಂಡ ಪೋಯಿತುಂಡೇಂಗಿ  
ಇಲ್ಲಿ ನಂಗ ಎಂತ ಮಾಡುವ..

ಕಾರಿ ಕಾರ್ಯಪ್ಪ : ಅದೂ ಸರಿ, ಅದಿರಡ್ ಇಕ್ಕ ನಂಗಡ ಇರ್‌ನೂರ್  
ಬಟ್ಟಿ ಭೂಮಿನೆಲ್ಲ ನಂಗಕ್ ಮಾಡುವಕ್ ಕಯ್ಯುವೋ ಎನ್ನೋ?

ಕಾಮುಣಿ ಕಾಮವ್ವ : ಅದೆನ್ನಂಗ್ ಅನ್ನನೆ ಎಣ್ಣುವಿರಾ? ಅಯಿಂಗಳ  
ಇಯಂಗಳ ಕೂಟಿತ್ ಮಾಡನ ಪ್ರೇಮ್ ಭಾವ ಎಡ್‌ತ ಪೋಪಕಿಲ್ಲೆ  
ನಂಗಕೇ ಆಪಲ್ಲಾ.

ಕಾರಿ ಕಾರ್ಯಪ್ಪ : ಅತಿ ಆಸೆ ಗತಿಗೇಡ್ ಅಚ್ಚಕ್ ಆಸೆ ಪಡತೆ ನಂಗಕ್  
ಎಳ್‌ದನದ್ ನಂಗಕೇ ಕಟ್ಟುವ, ಪ್ರೇಮ್‌ಕ್ ಕೊಡ್‌ಪದ್ ನಂಗ  
ಕೊಡ್‌ಕನ..

ಕಾಮುಣಿ ಕಾಮವ್ವ : ನಿಂಗಕೆನ್ನ ಮಂಡೆ ಕೆಟ್ತ್ ಪೋಯಿತಾ ನಂಗಡ ದಂಡ್  
ಮಕ್ಕಳ ಚಾಕಿತ್ ಎಡ್‌ಕಂಡಾ, ಮೂಡಿ ಕುಂಜಿರ ಮಂಗಲವೂ



ಮಾಡೊಂಡು. ಆನುಂಡ್ ಎಲ್ಲಾ ಭೂಮಿ ಮಾಡನ, ನಂಗಕೆನ್ನೆ  
ಕೊಟ್ಟುಪೋ.

ಕಾರಿ ಕಾರ್ಯಪ್ಪ : ಅದೂ ಸರಿಯೇ ಅಲ್ಲತೆ ಚೆನ್ನ ಯಾಲ ಕಾಪಿಯೂ  
ಉಂಡಲ್ಲಾ, ಆಂಡ ಪಣಿ ತೀತಿತ್ ಆನೋ ಕರೆ ಕೇತೊಂಡು ಅಲ್ಲ,  
ಪ್ರೇಮ್ ಬಪ್ಪಕ ಅವಂಗು ಚೆನ್ನ ಅಕ್ಕಿ ಕಾಫಿ ಮಳು ಪುಳಿ ಎಲ್ಲಾ  
ಕೊಡ್ಕೊಂಡು..

ಕಾಮುಣಿ ಕಾಮವ್ವ : ನಿಂಗ ಎಂತ ಪೆದ್ದಂಡನ್ನಕೆ ತಕ್ಕ ಪರೆವ, ಅವು ಮನೆಂಜಿ  
ಒಂದೂ ಬೋಂಡಾಂಡ್ ಪೋಯಿತ್ ನಂಗಾಯಿತ್ ಕೊಡ್ಪದ್  
ಬೋಂಡ ಅವು ಕೇಟಕ ನಂಗಕೇ ಕಷ್ಟಾಂಡ್ ಎಣ್ಣನ, ಅಚ್ಚಕ್  
ಬೊಳೆ ಆಯಿತಿಲ್ಲೆ, ಕಾಪಿ ಯಾಲ ನಂಗಡ ಖರ್ಚೆಕೇ ಪೋರಾಂಡ್  
ಎಣ್ಣನ ಅಯಿಂಗಕ್ ಕೊಡ್ಪದೊಂದೂ ಬೋಂಡ.

ಕಾರಿ ಕಾರ್ಯಪ್ಪ : ಅದೆನ್ನನೆ, ಪ್ರೇಮ್ಕೂ ಪಾಲ್ ಉಂಡಲ್ಲಾ, ಅವಂಗ್  
ಕೊಡ್ಕತೆ ಆಪುಲೆ.

ಕಾಮುಣಿ ಕಾಮವ್ವ : ನಿಂಗ ಮುಂಡತಿರಿ, ನಿಂಗ ಮಧ್ಯ ಬರಂಡ, ನಾನೆಲ್ಲ  
ಮೇನೇಜ್ ಮಾಡುವಿ.

ಕಾರಿ ಕಾರ್ಯಪ್ಪ : ಆಚಪ್ಪ ಅದೆಂತ ಮಾಡುವಿಯೋ ಮಾಡ್ ನನ್ನ ಮಾತ್ರ  
ನಿಷ್ಟುರ ಮಾಡತೆ.

ಕಾಮುಣಿ ಕಾಮವ್ವ: ಆಚಿ ಆಚಿ ನಿಂಗ ಆಪಚ್ಚಕ್ ಮುಂಡತಿರಿ ನಾನ್ ಎಣ್ಣನನ್ನಕೆ  
ಕೇಳಿ ಮದಿ.

ಕಾರಿ ಕಾರ್ಯಪ್ಪ : ಆಚಪ್ಪ ಆಚಿ ಆಂಗೆನ್ನಂಗ್ ದುಂಡ್ ಬಣ್ಣ ಬೆಪ್ಪ  
ಚಿಟ್ಟವ.

ಕಾಮುಣಿ ಕಾಮವ್ವ: ಅಲ್ಲಾ ಮನೆಂಜಿ ಒಂದೂ ಬೋಂಡಾಂಡ್ ಎಣ್ಣುವಯಿಂಗಕ್  
ಅದ್ ಕೊಡ್ಪಿ, ಇದ್ ಕೊಡ್ಪೀಂದ್ ಎಣ್ಣುವಿರಲ್ಲಾ ನಂಗಡ  
ದಂಡ್ ಮಕ್ಕಡ ಗತಿ ಎನ್ನಾಂಡು, ನಂಗ ಇಕ್ಕೇ ಬೇಲ್ ಪಣಿ  
ತೋಟ ಪಣಿ ಮಾಡಂಗ. (ನೆಲ್ಲ ಕೊಜ್ಜಿತಾಪ)

ಕಾರಿ ಕಾರ್ಯಪ್ಪ : ನೆಲ್ಲ ನಂಗಕ್ ಎಚ್ಚಕ್ ಬೋಂಡು ಬೆಚ್ಚವನ ಬಾಕಿನ  
ಕೆಟ್ಟಿ ಬೆಕ್ಕ..

ಕಾಮುಣಿ ಕಾಮವ್ವ : ಕೆಟ್ಟಂತೆ ಬೆಪ್ಪ, ಆನ ಮಾರಿರನ, ಪ್ರೇಮ್ ಬಪ್ಪಕ

ನೆಲ್ಸ್ ಮನೆಲ್ ಇಪ್ಪಕಾಗ.

ಕಾರಿ ಕಾರ್ಯಪ್ಪ : ಓ! ಅನ್ನನೆಣ್ಣ ಆಚಿ ಮಾರಿರನ ಇಂಞ ಇಕ್ಕ ಕಾಪಿ ಪಣಿ ಸುರು ಆಚಲ್ಲಾ. ಆ ಪಣಿ ಈ ಪಣಿ ಎಣ್ಣಿಯಂಡ್ ನಂಗಡ ಮಕ್ಕ ಸ್ಕೂಲ್‌ಕೇ ಪೋಯಂಡ್ ಇಲ್ಲೆ ಅಯಿಂಗಡ ಅವಸ್ಥೆ ಎಂತ.

ಕಾಮುಣಿ ಕಾಮವ್ವ : ಮಕ್ಕ ಸ್ಕೂಲ್‌ಕ್ ಪೋಚೆಂಗಿ ನಿಂಗಡ ಇರ್‌ನೂರ್ ಬಟ್ಟಿ ಭೂಮಿನ ನಟ್ಟಿತ್ ಆಪಕಿಂಜತಾ, ಯಾಲ ಕಾಪಿ ಕೊಜ್ಜಿತ್ ಒಣಕಿತ್ ಆಪಕಿಂಜತಾ, ಎನ್ನನೆಯೋ ಸೀತೆರ ಎಸ್ ಎಸ್ ಎಲ್ ಸಿ ಆಯಿತ್ ಇಲ್ಲೇ ಪಿ ಯು ಸಿ ಮಾಡಡ್ ಖರ್ಚಿ ಕಮ್ಮಿ ಆಪ.

ಕಾರಿ ಕಾರ್ಯಪ್ಪ : ಸೀತೆ ನಲ್ಲ ಮಾರ್ಕ್‌ಲೇ ಪಾಸಾಯಿತಲ್ಲ ನಲ್ಲ ಕಾಲೇಜ್‌ಕ್ ಪೋಡ್, ಅವಳೇಂಗಿ ಚಾಯಿತೆ ಓದಿತ್ ಮಿಂಞಕ್ ಬರಡ್. ನಂಗಡ ಮೋಂವ ಚಾಂಗ್ ಎಣ್ಣುವಾಂಗ್ ಮಿಂಞ ಪಣಿಕೇ ಪೋಪ ಅವ ಮಾಡುವಡ್ ಅಚ್ಚಕಾಲೆ ಉಂಡ್.

ಕಾಮುಣಿ ಕಾಮವ್ವ : ನಿಂಗ ಮುಂಡತಿರಿ, ಸೀತೆಕ್ ಬಲ್ಯ ಕಾಲೇಜೊಂದೂ ಬೋಂಡ, ಮುಂಡತೆ ಖರ್ಚಿರ ಬಟ್ಟಿ, ಅವ ಮನೆಂಜೇ ಕಾಲೇಜ್‌ಕ್ ಪೋಚೆಂಗಿ ಬರೀ ಕೂಳ್ ಬಟ್ಟಿ ಖರ್ಚಿ, ನಾಕೂ ಚೆನ್ನ ಸಹಾಯ ಆಪ "ಕುಯಿಪಲ್ಲಿಕ್ ಕೈಂಕಣೆ ತುಣೇಂದ್"

ಕಾರಿ ಕಾರ್ಯಪ್ಪ : ನೀನ್ ಎಣ್ಣಾನ ಪಿಂಞ ಆಚಿ ಬುಡ್ ನಾಡದೆಂತ.

ಕಾಮುಣಿ ಕಾಮವ್ವ:(ಕ್‌ರ್‌ಂದೆಳಿ ತೆಳಿಪ) ಇಕ್ಕ ನಿಂಗ ಪೋಯಿತ್ ಕಾಪಿನ ಕೊಯ್ಯುವ ವಿರ್ಪಾಡ್ ಮಾಡಿ.

ಕಾರಿ ಕಾರ್ಯಪ್ಪ : ನಾನಿಂದೇ ಪೋಯಿತ್ ಆಳಕ್ ಎಣ್ಣಿತ್ ಬಪ್ಪಿ.

ಕಾಮುಣಿ ಕಾಮವ್ವ : ಜಾಸ್ತಿ ಆಳ ಬೋಂಡಾ, ನಂಗಲೂ ಉಂಡಲ್ಲಾ.

ಕಾರಿ ಕಾರ್ಯಪ್ಪ : ಮಕ್ಕ ದಂಡೂ ಸ್ಕೂಲ್‌ಕ್ ಪೋಡ್, ಮೂಡಿ ಕುಂಞಿ ಎನ್ನೋ ವಿಧ್ಯತ್ ಪರೋಲೆ, ಮೊಂವಂಡದೇ ಚಿಂತೆ, ಆಪಚ್ಚಕ್ ವಿಧ್ಯ ಪಡ್‌ಚಂಡಕ ಅಯಿಂಗಡ ಬಟ್ಟಿ ಅವು ನೋಟಿಯವಲು, ನಾನಂತು ಇನ್ನನೆ ಆಯಿಟ.

ಕಾಮುಣಿ ಕಾಮವ್ವ : ನಿಂಗಕೆನ್ನಾಯೆ, ಇಚ್ಚಕ್ ಭೂಮಿ ತೋಟ ಉಂಡಲ್ಲಾ ಮಕ್ಕಲೂ ಅದ್‌ನ ನೋಟಿಯಂಡ್ ಇರಡ್ ಬುಡಿ..

ಕಾರಿ ಕಾರ್ಯಪ್ಪ : ಇಕ್ಕ ನೋಟ್ ಪ್ರೇಮ್ ಚಾಯಿತೆ ಓದ್‌ನಾನ ಗುಂಡ್

ಕೆಲಸಕ್ ಪೋಚಿ ಮಂಗಲಾಯಿತ್ ಪೋಣ್ಣಾನ ಕೂಟಿಯಂಡ್  
ಬೆಂಗಳೂರ್ಕ್, ಮನೆಂಜಿ ಒರ್ ಸಾಮಾನ್ ಎಡ್ತವತೆ ಪೋಯಿತ್,  
ಅಲ್ಲಿ ಅವಂಗ್ ಮಕ್ಕಳೂ ಆಚಿ, ಅವು ಸ್ಕೂಲ್ಕೂ ಪೋಯಂ  
ಡೂಂಡ್ಲೋ, ಈ ಕ್ರಿಸ್ ಮಿಸ್ ರಜತ್ ನಂಗಡ ಪುತ್ತರಿ ಬಂದಾಂಗ್  
ಅವು ಬಪ್ಪಲೋ.

ಕಾಮುಣಿ ಕಾಮವ್ವ : ಅಯಿಂಗಡೋರ್ ಕಾಟ, ನಂಗಕೋ ಪುತ್ತರಿ ಪಣಿ,  
ಇವು ಬೋರೆ ಪುತ್ತರಿಕ್ ಬಪ್ಪಲೋ, ಕಳತ್ ಕಾಪಿ ಒಂದೂ  
ಇಪ್ಪಕಾಗ. ಅವು ಬರಣೆ ಎಲ್ಲಾ ಕೊಜ್ಜಿತ್ ಮಾರಿರನ, ಈ ಕಾಲ  
ಒಣಕ್ ಪುತ್ತರಿ ಆನಾಂಗ್ ನಂಗಡ ಕಾಪಿ ಎಲ್ಲಾ ಪಣ್ಣಾಯಿತ್.

ಕಾರಿ ಕಾರ್ಯಪ್ಪ : ಆಚಪ್ಪ ಆಚಿ ಅನ್ನನೇ ಮಾಡನ..

\* \* \* \* \*

## ಸೀನ್ ಆರ್

(ಬೆಂಗಳೂರ್ ಮನೆ ಪ್ರೇಮ್ ಬೋಜಿ ಇಪ್ಪ)

ಪ್ರೇಮ್ ಪೊನ್ನಪ್ಪ : ನೋಟ್‌ರ ನಂಗ ಅಪರೂಪತ್ ಮನೆಕ್ ಪೋಪ ಅದೂ  
ಪುತ್ತರಿಕ್ ನಂಗಡ ಮಕ್ಕಕ್ ಪುದಿಯ ಬಟ್ಟೆ ಎಡ್ತವಂಡು.

ಬೋಜಿ ಬೋಜಮ್ಮ : ಅದೆನ್ನ, ನಂಗಡ ಮಕ್ಕಕ್ ಮಾತ್ರ, ಬಾವಂಡ ದಂಡ್  
ಮಕ್ಕಕೂ ಎಡ್ತವನ, ಸೀತೆಕ್ ಮಣಿ ಸರ, ಹೇರ್ ಪಿನ್, ಬ್ರೋಚ್,  
ಓಲೆ ಎಲ್ಲ ಎಡ್ತವನ, ಚಾಂಗ್‌ಕೂ ಜೀನ್ಸ್ ಪ್ಯಾಂಟ್ ಟೀ ಶರ್ಟ್  
ಎಡ್ತವಂಡು. ಅಯಿಂಗಕ್ ಎಲ್ಲೆಂಜಿ ಕಟ್ಟುವ ಎಣ್ಣೆ.

ಪ್ರೇಮ್ ಪೊನ್ನಪ್ಪ : ಅದೂ ಸರಿ ಎಣ್ಣೆ, ಅಯಿಂಗಕ್ ಇಕ್ಕ ಸೆಲ್ಲೆ ಕಾಪಿ  
ಯಾಲ ಎಲ್ಲಾ ಕಟ್ಟುವ, ನಾನೂ ಒಂದೂ ಕೇಟಂಡೂ ಇಲ್ಲೆ.

ಅವು ತಂದಂಡೂ ಇಲ್ಲೆ, ಅನ್ನನೆ ಅವುವೇ ಎಡ್ತವಲು ಅಲ್ಲ..

ಬೋಜಿ ಬೋಜಮ್ಮ : ಅದೂ ಸರಿ, ಆಚೆಂಗಿ ನಂಗ ಮಾಡುವದ್ ಮಾಡನ, ನಂಗಡ ಧರ್ಮ ನಂಗಳ ಕಾಪಾಡುವ ಇಕ್ಕ ನಂಗಡ ಗ್ಯಾನ್ ಹೈಯರ್ ಪ್ರೈಮರಿ ಪಾಸಾಯಿತ್ ಹೈಸ್ಕೂಲ್ ಓದಿಯಂಡ್ ಉಂಡ್, ಅವಂಗ್ ಪ್ಯಾಂಟ್ ಟೀ ಶರ್ಟ್ ಎಡ್ತವನ, ಅನ್ನನೆ ಬಾವಂಡ ಮಕ್ಕಕೂ ಬಟ್ಟೆ ಎಡ್ತವಂಡು, ಕಯಿಂಜ ಕುರಿ ಪೋಯಿತಿಪ್ಪಕ್ಕಲೇ ಚಾಂಗ್ ಜೀನ್ಸ್ ಪ್ಯಾಂಟ್, ದುಂಬ ಜೋಬ್ ಉಳ್ಳದ್ ಬೋಂಡೂಂಡ್ ಎಣ್ಣೆಂಜತ್ ಪಿಂಞ ಟೀ ಶರ್ಟ್ ಬೋಂಡೂ ಎಣ್ಣೆಂಜತ್ ಅದನೇ ಎಡ್ತವನ, ಸೀತೆಕ್ ನಲ್ಲ ಫ್ಲಾಕ್ ಎಡ್ತವನ.

ಪ್ರೇಮ್ ಪೊನ್ನಪ್ಪ : ನೀಡ ಲಿಸ್ಟ್ ಕಾಂಬಕ, ನಾಡ ಸಂಬಳ ಅಲ್ಲತೆ ಫ್ಲೆಸ್ಸಿವಲ್ ಅಡ್ವಾನ್ಸ್ ಸಹ ಪೋರಾಂಡ್ ಕಾಂಬ.

ಬೋಜಿ ಬೋಜಮ್ಮ : ಎಕ್ಕೇಂಗಿ ಒಮ್ಮ ಎನ್ನೇ, ಅಲ್ಲತೆ ನಂಗಡಯಿಂಗಕೆನ್ನೆ ಎಡ್ತಂಡ್ ಪೋಪ.

ಪ್ರೇಮ್ ಪೊನ್ನಪ್ಪ : ಆಚಪ್ಪ ಆಚಿ, ನೀನ್ ಎಣ್ಣಾನ ಪಿಂಞ ಆಚಿ ಫ್ಲೈನಲ್, ಅಲ್ಲತೆ ಚೆನ್ನ ಪಿಟಾಕಿಯೂ ಎಡ್ತವಂಡು ಮಕ್ಕ ಎಲ್ಲ ಒಕ್ಕ ಕೂಡಿ ಕಳಿಪಕ್ ಚಾಯಿ ಅಲ್ಲ.

ಬೋಜಿ ಬೋಜಮ್ಮ : ಅಕ್ಕು ಅದೂ ಬೋಂಡು, ಪಿಂಞ ನಲ್ಲ ನಲ್ಲ ಬಟ್ಟೆ ಎಡ್ತೊಳಿ ಕಮ್ಮಿ ಕ್ರಯತ್ ಕಲರ್ ಚಾಯಿ ಇಲ್ಲತದ್ ಎಡ್ತವತಿ.

ಪ್ರೇಮ್ ಪೊನ್ನಪ್ಪ : ಅದಾಂಗೆನ್ನ ಮಾರ್ಕೆಟ್ ಶಾಪಿಂಗ್ ನೋನೂ ನೀಡ ಅಪ್ಲೀಸ್ ತೀತಿತ್ ಬಂದಕ ದಂಡಾಳೂ ಪೋಯಿತ್ ಮಾಡಿಯ ಬಕ್ಕ. ನಾಕೂ ಸೆಲೆಕ್ಟ್ ಕಷ್ಟ ತಪ್ಪುವ, ಆಚೆಂಗಿ ಒಂದ್ "ಕಂಬಳಿ ಉಳ್ಳಚ್ಚಕೇ ಕಾಲ್ ನೀಟೊಂಡು".

ಬೋಜಿ ಬೋಜಮ್ಮ : ನಿಂಗಡ ಅಪ್ಲೀಸ್ ಆನ ಪಿಂಞ ನಾಡ ಅಪ್ಲೀಸ್ ಕಾಲೆ ಬಂದರಿ ನಂಗ ಆಲೇ ಎಮ್. ಜಿ. ರೋಡ್, ಕಮರ್ಷಿಯಲ್ ಸ್ಟ್ರೀಟ್ ಪೋಯಿತ್ ಶಾಪಿಂಗ್ ಮಾಡಿಯಂಡ್ ಬಂದರನ ಮನೆಲ್ ಮಕ್ಕಕ್ ಪೋನ್ಲ್ ಎಣ್ಣೆರನ ನಂಗ ಚೆನ್ನ ತಡ ಆಪಾಂಡ್.

ಪ್ರೇಮ್ ಪೊನ್ನಪ್ಪ : ಆಕು, ಅದೇ ಸರಿ ನಾನ್ ಇಂದ್ ಚೆನ್ನ ಬೆರಿಯ ಬುಡುವಿ, ನೀಡ ಅಪ್ಲೀಸ್ ಟೈಮ್ ಕ್ ಬಂತ್ ಎತ್ತುವಿ, ಬೆರಿಯ

ಶಾಪಿಂಗ್ ತೀತಂಡ್ ಬೆರಿಯ ಮನೆಕ್ ಬರೋಲು, ಮಕ್ಕಳೂ  
ಚೆರಿಯವು ದಂಡಾಳೆ ಮನೆಲ್ ಇಪ್ಪಲ್ಲ.

ಬೋಜಿ ಬೋಜಮ್ಮ : ಚೆರಿಯವು ಎಂತ, ಪೆರಿಯಂವ ಎಟ್ಟನೆ ಸ್ಪಾಂಡಾರ್ಡ್  
ಅವಂಡ ವಯಸ್ಲ್ ನಂಗ ಎಂತ ಎಲ್ಲ ಮಾಡುವ ಇಂಜತ್.

ಪ್ರೇಮ್ ಪೊನ್ನಪ್ಪ : ಆಚೆಂಗಿಯೂ ಅದ್ ನಂಗಡ ಕಾಲ, ಹಳ್ಳಿ ಜೀವನ,  
ಇಕ್ಕ ಕಾಲ ಬದಲಾಯಿತ್ ಅಲ್ಲತೆ ಇದ್ ನಗರ ಜೀವನ ವ್ಯತ್ಯಾಸ  
ಉಂಡ್.

ಬೋಜಿ ಬೋಜಮ್ಮ: ಆಚಪ್ಪ ಆಚಿ ನಂಗ ಬೆರಿಯ ಬಕ್ಕನ.

(ಬೈಟ್ ಅಪ್ಪೀಸ್ ತೀತಂಡ್ ದಂಡಾಳು ಮಾರ್ಕೆಟ್ಕ್ ಪೋಪ)

ಬೋಜಿ ಬೋಜಮ್ಮ : ಇದ್ ಸೀತೆಕ್ ಚಾಯಿ ಉಂಡ್, ಇದ್ ಕಾವ್ಯಂಗ್  
ಸರಿ ಆಪ, ಗ್ಯಾನ್ಕೂ ಚಾಂಗ್ಕೂ ನೀನೇ ನೋಟ್.

ಪ್ರೇಮ್ ಪೊನ್ನಪ್ಪ : ಅದೆನ್ನ ಕಣ್ಣ ಮಕ್ಕಕ್ ನೀ ನೋಟುವಕಾಗಂದಾ?

ಬೋಜಿ ಬೋಜಮ್ಮ : ಅನ್ನನೆ ಅಲ್ಲ ನೀಡ ಸೆಲೆಕ್ಸನ್ ಒರ್ ತರಾ ಚಾಯಿ  
ಇಪ್ಪ.

ಪ್ರೇಮ್ ಪೊನ್ನಪ್ಪ : ಅದೆಂತ ಒರ್ ತರಾ ಚಾಯಿ, ದಂಡಾಳೂ ನೋಟನ  
ನಂಗಡ ಮಕ್ಕಳ ಮರ್ಂದರತೆ.

ಬೋಜಿ ಬೋಜಮ್ಮ : ಬಾವಂಡ ಮಕ್ಕಕ್ ಎಡ್ತ ಪಿಂಇ ನಂಗಡಯಿಂಗಕ್  
ಎಡ್ತವನ, ನಿಂಗ ಮಿಂಇಲೇ ಕಂಬಳಿ ಉಳ್ಳಚ್ಚಕೆ ಕಾಲ್  
ನೀಟೊಂಡೂಂದ್ ಎಣ್ಣೆತುಳ್ಳಿರಲ್ಲ. ಆಂಗಾಯಿತ್ ಅಯಿಂಗಕ್ ಎಡ್ತ  
ಪಿಂಇ ಬಾಕಿ ದುಡ್ಡಲ್ ನಂಗಡಯಿಂಗಕ್ ಅಡ್ಡಸ್ತ್ ಮಾಡನಾಂದ್.

ಪ್ರೇಮ್ ಪೊನ್ನಪ್ಪ : ಅದೂ ಸರಿ ನೀನ್ ಎಣ್ಣೆನ ಪಿಂಇ ಆಚಿ ಬುಡ್,  
(ದಂಡಾಳೂ ಎಲ್ಲಾರ್ಕೂ ಬಟ್ಟೆ ಪಿಟಾಕಿ ಎಡ್ತಂಡ್ ಮನೆಕ್ ಪೋಪ)

\* \* \* \* \*

## ಸೀನ್ ಏಳು

(ನಾಡ್‌ರ ಮನೆ ಅಪ್ಪ ಅಪ್ಪ ಪೆರಿಯ ಮೋಂವ ಮೈಮ ಮಕ್ಕ ಇಪ್ಪ)  
(ಪ್ರೇಮ್ ಬೋಜಿ ಮಕ್ಕ ಬಪ್ಪ)

ಮೇದಯ್ಯ : ಬಂದಿಯಪ್ಪಾ ಬಂದಿಯಪ್ಪಾ ಎನ್ನ ಕುಂಇಯಳೇ ಚಾಯಿತೆ  
ಉಳ್ಳಿರಾ?

ಪ್ರೇಮ್ & ಬೋಜಿ : ಬಾತಲ್ಲಾ, ನಂಗ ಚಾಯಿತೇ ಉಂಡ್ ನಿಂಗಡ  
ಆಶೀರ್ವಾದತ್.(ಎಲ್ಲ ಕಾಲ್ ಪುಡಿಪ)

ಮುದ್ದವ್ವ : ಬಂದಿರಾ, ಎನ್ನ ಕುಂಇ ಲಾಚಾರ್ ಆನನ್ನಕೆ ಕಾಂಬ.

ಕಾಮುಣಿ ಕಾಮವ್ವ : (ಮನಸ್ಸಲ್) ಲಾಚಾರ್‌ಲೋ, ಮಂಗಲ ಕಯಿಂಜ  
ಪಿಂಇ ಚೊಕ್ಕಿಯಂಡೇ ಉಂಡ್, ಈಂಡ ಕಣ್ಣೆಕ್ ಎನ್ನಾಯೇಂದ್.

ಪ್ರೇಮ್ ಪೊನ್ನಪ್ಪ : ಚಾಯಿತೇ ಉಂಡವ್ವ, ಲಾಚಾರೊಂದು ಆಯಿತಿಲ್ಲೆ,  
ಆಪ್ಲೀಸ್‌ಲ್ ದಂಡಾಳ್‌ಕೂ ಕೆಲಸ ಜಾಸ್ತಿ ದುಂಬಾ ಟೆನ್ನನ್ ಇಪ್ಪ.

(ಮಕ್ಕ ಮಕ್ಕ ತಕ್ಕ ಪರೆವ)

ಕಾರಿ ಕಾರ್ಯಪ್ಪ : ಎನ್ನಪ್ಪ, ಭಾರಿ ಅಪರೂಪ, ಪುತ್ತರಿಕೇಂಗಿ ಬಂದಿರಲ್ಲ..  
ಪ್ರೇಮ್ ಪೊನ್ನಪ್ಪ : ಈಯಾಂಡ್ ಪುತ್ತರಿಕ್ ಬರೊಂಡೂಂದೆ ಇಂಜತ್,  
ಆಂಗ್ ಸರಿಯಾಯಿತ್ ಮಕ್ಕಕೂ ರಜ ಇಂಜತ್, ಇಕ್ಕ ನಂಗ  
ಎಣ್ಣೆ ನನ್ನಕೆ ಒಂದೂ ಆಪುಲೆ, ಮಕ್ಕಕ್ ರಜ ಉಂಡೇಂಗಿ, ಬೋರೆ  
ಸ್ವೆಷಲ್ ಕ್ಲಾಸ್ ಒಂದೂ ಇಲ್ಲತೆ ಪೋಚೆಂಗಿ ಮಾತ್ರ ಎಲ್ಲಿಕೇಂಗಿ  
ಪೋಲು.

ಕಾಮುಣಿ ಕಾಮವ್ವ : ಬಂದಿರಾ ಅಳೆರಿ, ಬೆಂಗಳೂರ್‌ಂಜಿ ಬಂದದಲ್ಲ  
ಚೋತಿತಿಕ್ಕು.

ಬೋಜಿ ಬೋಜಮ್ಮ : ಬಸ್‌ಲ್ ಬಂದದಲ್ಲಾ ಮಕ್ಕ ಸರಿಕ್ ಉಂಡಿತಿಲ್ಲೆ  
ಆಚೆಂಗಿಯೂ ಇಲ್ಲಿ ಮಕ್ಕಡ ಕೂಡೆ ಕಳಿಪಕ್ ಸುರು ಮಾಡಿರ್‌ತ್.

ಮುದ್ದವ್ವ : ಕಾಮುಣಿ.. ಮಕ್ಕಳ ಕಾಕಿಯ ಪೋಯಿತ್ ಎಂತೇಂಗಿ ತಿಂಬಕ್  
ಕೊಡವ್ವ.

ಕಾಮುಣಿ ಕಾಮವ್ವ : ಆಚಿ ಮಾಯಿ, ಬಾರಿ ಮಕ್ಕಳೆ.. (ಗ್ಯಾನ್ ಕಾವ್ಯ  
ಬಲ್ಯವ್ವಂಡ ಕೂಡೆ ಪೋಪ)

ಗ್ಯಾನ್/ಕಾವ್ಯ : ಈ ಪುಟ್ಟ್ ಎಂತ ಬಲ್ಯವ್ವಾ?

ಕಾಮುಣಿ ಕಾಮವ್ವ : ಇದ್ ಬರ್ತ ಪುಟ್ಟ್, ಇದ್ ಕರ್ಜಿ ಕಾಯಿ, ಇದ್  
ಚಟ್ಟಿ ಪುಟ್ಟ್, ನಿಂಗಡಲ್ಲಿ ಇದೆಲ್ಲ ಮಾಡುಲೆ ಕಾಂಬಲ್ಲಾ.

ಗ್ಯಾನ್/ಕಾವ್ಯ : ಇಲ್ಲೆ ಬಲ್ಯವ್ವ, ಬೋರೆ ಎಂತೆಲ್ಲೋ ಮಾಡುವ, ನಾರಾಚೆ  
ಮಾತ್ರ ಮಾಡುವ, ಬೋರೆ ದಿನ ಸ್ನಾಕ್ಸ್ ತಪ್ಪ. ಬಲ್ಯವ್ವ ಇದ್  
ಎಂತೋ ವಾಸನೆ ಬಪ್ಪ ಎಂತ ವಾಸನೆ..

ಕಾಮುಣಿ ಕಾಮವ್ವ : ಅದ್ ಇಲ್ಲೈತ ನಲ್ಲಣ್ಣೆಲ್ ಮಾಡ್‌ನದ್.

ಗ್ಯಾನ್/ಕಾವ್ಯ : ನಂಗಡಲ್ಲಿ ರಿಫೈಂಡ್ ಆಯಿಲ್‌ಲ್ ಮಾಡುವ ಅದ್  
ವಾಸನೆ ಇಪ್ಪುಲೆ..

ಕಾಮುಣಿ ಕಾಮವ್ವ : ಅದ್ ಸರಿ ನಿಂಗಡಲ್ಲಿ ಎಲ್ಲಾ ಚಾಯಿ, ನಂಗಡಲ್ಲಿ  
ಇನ್ನನೆ, ಬೋಂಡಿಕಿ ತಿನ್ನಿ..

ಗ್ಯಾನ್ ಗಣಪತಿ : ಅನ್ನನೆ ಅಲ್ಲ ಬಲ್ಯವ್ವ, ಪುಟ್ಟ್ ಚಾಯಿ ಉಂಡ್, ಬೋರೆ  
ತರ ವಾಸನೇಂದ್ ಎಣ್ಣೆಯೆ ಆಚ್ಚಕೇ.

ಕಾಮುಣಿ ಕಾಮವ್ವ : ಆಚಿ ಆಚಿ (ಮಕ್ಕ ತಿಂಡಿ ತಿಂತ್ ಪೋರಮೆ ಬಪ್ಪ)

ಮೇದಯ್ಯ/ಮುದ್ದವ್ವ : ತಿಂಡಿ ತಿಂದಿರಾ ಮಕ್ಕಳೆ.

ಗ್ಯಾನ್/ಕಾವ್ಯ : ಆಚಿ ತಾತವ್ವಯ್ಯ, ಚಾಯಿ ಇಂಜತ್, ನಂಗಡಲ್ಲಿ ಇಂತದೆಲ್ಲ ಮಾಡುಲೆ, ನಾರಾಚೆ ಮಾತ್ರ ಮಮ್ಮಿ ಮಾಡುವ, ಬೋರೆ ದಿನ ಬೇಕರಿ ತಿಂಡಿ.

ಮೇದಯ್ಯ/ಮುದ್ದವ್ವ : ಮಮ್ಮಿಯೂ ಕೆಲಸಕ್ ಪೋಪಲ್ಲಾ ಆಂಗ್ ಅವಕ್ ಟೈಮ್ ಇಲ್ಲೆ, ಆಂಗ್ ನಾರಾಚೆ ಮಾತ್ರ ಮಾಡುವ, ಎಕ್ಕಲೂ ಮಾಡುವಕ್ ಕಯ್ಯುಲೆಲ್ಲಾ ಮಕ್ಕಳೆ.

ಗ್ಯಾನ್/ಕಾವ್ಯ : ಅಕ್ಕು ತಾತ, ಮಮ್ಮಿ ನಂಗ ಸ್ಕೂಲ್‌ಂಜಿ ಬಂದ ಪಿಂಞ ಬಪ್ಪ ಬಂದ ಪಿಂಞ ಬೈಟಿಯಕ್ ಅಡಿಗೇ ಮಾಡೋ, ನಂಗಡ ಹೋಮ್ ವರ್ಕ್ ಮಾಡ್‌ಚಿಡುವದೆಲ್ಲ ಇಪ್ಪಲ್ಲಾ ಮಮ್ಮಿಕೂ ಸುಸ್ತಾಪಾಂದ್ ಕಾಂಬ.

ಮುದ್ದವ್ವ : ನಿಂಗಕ್ ದುಂಬಾ ನಲ್ಲ ಬುದ್ಧಿ ಉಂಡ್ ಮಕ್ಕಳೇ, ಮಮ್ಮಿನ ಚಾಯಿತೆ ಅರ್ಥ ಮಾಡಿಯಂಡಿತುಳ್ಳಿರ, ಅನ್ನನೆ ಚಾಯಿತೆ ಇರಿ, ದೇವ ನಲ್ಲದ್ ಮಾಡುವ. (ಅಕ್ಕಣೆ ಅಣ್ಣ ತಮ್ಮಣಂಗ್)

ಕಾರಿ ಕಾರ್ಯಪ್ಪ : ಬೆಂಗಳೂರ್‌ಲ್ ಎನ್ನನೆ ಉಂಡ್, ಕೆಲಸ ಜಾಸ್ತಿಯಾ?

ಪ್ರೇಮ್ ಪೊನ್ನಪ್ಪ : ಅಕ್ಕು ಅಣ್ಣಯ್ಯ, ನಂಗ ದಂಡಾಳ್‌ಕೂ ದುಂಬಾ ಕೆಲಸ ಇಪ್ಪ, ಸಂಬಳ ತಪ್ಪಾಂಗುಂಞೆ ಜಾಸ್ತಿ ಚೋರೆ ಊತುವ, ಈ ಪ್ರೈವೇಟ್ ಕಂಪನಿ ಕಾರ, ಪಿಂಞ ಬೆಂಗಳೂರ್‌ಲ್ ಎಲ್ಲಾಂಗು ದುಡ್ಡೇ, ಆಚೆಂಗಿ ಒಂದ್, ದುಡ್ಡ್ ಕೊಡ್‌ತತೇಂಗಿ ಎಲ್ಲಾ ಕ್‌ಟ್ಟುವ.

ಕಾರಿ ಕಾರ್ಯಪ್ಪ : ಅದ್ ಸರಿ. ದುಡ್ಡ್ ಕೊಡ್‌ತಕ ಎಲ್ಲಾ ಕ್‌ಟ್ಟುವಲ್ಲಾ.

ಪ್ರೇಮ್ ಪೊನ್ನಪ್ಪ : ಅಲ್ಲ ಅಣ್ಣಯ್ಯ, ನೀನ್ ಎನ್ನನೆ ಈ ತೋಟ ತೋಡಿಯ ಬೇಲ್ ಎಲ್ಲಾ ನೀಸುವಿಯ.

ಕಾರಿ ಕಾರ್ಯಪ್ಪ : ಅದೊಂದೂ ಎಣ್ಣಂಡ, ಇಲ್ಲಿ ಸರಿಯಾಯಿತ್ ಆಳಳೂ ಕ್‌ಟ್ಟುಲೆ, ಆಂಗ್ ನಾಡ ಮಕ್ಕ ಚೆನ್ನ ಸಹಾಯ ಮಾಡುವಾನಗುಂಡ್ ನಾಕ್ ಚೆನ್ನ ಸುಲಭ ಆಪ. ಇಲ್ಲೇಂಗಿ ದುಂಬಾ ಕಷ್ಟ.

ಪ್ರೇಮ್ ಪೊನ್ನಪ್ಪ : ಓದುವ ಮಕ್ಕಳ ಬೇಲ್ ತೋಟ ಪಣೆಕ್ ಕೂಟಿಯಂಡಕ ಮಕ್ಕಡ ಸ್ಕೂಲ್ ಪಾಳಾಪುಲಿಯಾ, ಅಣ್ಣಯ್ಯ ಮಕ್ಕಡ ಸ್ಕೂಲ್ ಪಾಳ್ ಮಾಡತೆ, ಬೋರೆ ಆಳಳ ಪಣೆಕ್ ಕೂಟಿಯ, ಮಕ್ಕ ಓದಡ್,



ಓದಿತ್ ಮಿಂಇಕ್ ಬರಡಣ್ಣಯ್ಯ.

ಕಾರಿ ಕಾರ್ಯಪ್ಪ : ಅದಿರಡ್ ಬುಡ್, ಅಯಿಂಗಡಯಿಂಗಡ ಅದೃಷ್ಟ.  
ಪ್ರೇಮ್ ಪೊನ್ನಪ್ಪ : ಅದೃಷ್ಟ ಎಣ್ಣಿಯಂಡ್ ನಂಗಡ ಪ್ರಯತ್ನ ಮಾಡತೆ  
ಪೋಚೆಂಗಿ ಒಂದೂ ಆಪುಲೆ, ಇಕ್ಕ ನೀಕ್ ದುಡ್ಡ್ ಕಾಸರ ತೊಂದರೆ  
ಒಂದೂ ಇಲ್ಲೆ, ಇಲ್ಲಿ ಆನಾಲ್, ನಾನೊಂದು ಎಡ್ತಂಡಿಲ್ಲೆ, ನೀನ್  
ಆಳ್ ಕೂಟಿಯಂಡ್ ಮಕ್ಕಳ ಸ್ಕೂಲ್‌ಕ್ ಅಯಿಪ ಏರ್ಪಾಡ್  
ಮಾಡ್.

ಕಾರಿ ಕಾರ್ಯಪ್ಪ : ನೀನ್ ಎಣ್ಣುವದ್ ಸರಿ, ಆಚೆಂಗಿ ನಾಡ ಮಕ್ಕಕೂ ಆ  
ಪುರ್‌ಡ್ ಬೋಂಡು ಅಲ್ಲಾ, ಪಣಿಕ್ ನಂಗ ಏವಾಂಗುಂಚೆ ಮಿಂಇ  
ಪೊರಟಿತಿಪ್ಪ. ಸ್ಕೂಲ್ ಬ್ಯಾಗ್ ಅಯಿಂಗಕ್ ಕಟ್ಟುವದೇ ಇಲ್ಲೆ. ಎನ್ನ  
ಮಾಡೋ.

ಪ್ರೇಮ್ ಪೊನ್ನಪ್ಪ : ನಾನೇ ನೀಡ ಮಕ್ಕಕ್ ಎಣ್ಣೆ ನೋಟುವಿ,

ಕಾರಿ ಕಾರ್ಯಪ್ಪ : ನೀನ್ ಎಣ್ಣೆ ಚೆಂಗಿ, ನೀನಿಲ್ಲಿ ಇಪ್ಪ ಕತ್ತಣೆ ಸ್ಕೂಲ್‌ಕ್  
ಪೋಕು ಪಿಂಇ ಮಾಮೂಲಿ ಪಣಿಕ್ ಪೋಯಿರುವ.

ಪ್ರೇಮ್ ಪೊನ್ನಪ್ಪ : ಅಯ್ಯೋ, ಮಕ್ಕಡ ಭವಿಷ್ಯ ಪಾಳಾಪ ಎಂತ ಮಾಡೋ.

ಕಾರಿ ಕಾರ್ಯಪ್ಪ : ಅಯಿಂಗಡ ಅದೃಷ್ಟತ್ ಉಳ್ಳನ್ನಕೆ ಆಡ್, ನಾನೂ  
ನೀನೂ ಎನ್ನಂಗ್ ಗ್ಯಾನ ಮಾಡೋ ಬುಡ್.

\* \* \* \* \*

## ಸೀನ್ ಎಟ್ಸ್

(ಪೇಟೆಂಜಿ ಬಂದ ಮಕ್ಕ, ತಾತಂಡ ಪಕ್ಕ ಪೋಯಿತ್ ಅಳತಂಡ್ ಕಥೆ ಎಣ್ಣುವಕ್ ಪೀಡ್‌ಚೆಡುವ, ಮನೆ ಮಕ್ಕಳೂ ಇಪ್ಪ, ಮನೆಲೂಳ್ಳವೂ ಬಂತ್ ಅಳತವ)

ಮೇದಯ್ಯ : ನಿಂಗ ಇಂಗ್ಲಿಷ್ ಮೀಡಿಯಮ್‌ಲ್ ಓದಿಯಂಡುಳ್ಳಾಂಗ್ ಇಂಗ್ಲಿಷ್‌ಲ್ ಚೆನ್ನ, ನಂಗಡ ಕೊಡವ ತಕ್ಕಲ್ ಚೆನ್ನ ಎಣ್ಣಿ ತಪ್ಪಿ, ನಾನಿಕ್ಕ ಎಣ್ಣುವದ್ ಅರ್ಥ ದುಂಬಾ ಉಳ್ಳದ್, ನಿಂಗ ಚಾಯಿತೆ ಕೇಟೊಳಿ..

ಮಕ್ಕ : ಆಚಿ ತಾತ.

ಮೇದಯ್ಯ : ಕೇರ್ ಈಸ್ ಟು ಎಕ್ಸ್‌ಪ್ರೆಸ್ ಐಂಡ್ ನಾಟ್ ಟು ಇಂಪ್ರೆಸ್, ವೆನ್ ಕೇರ್ ಈಸ್ ಎಕ್ಸ್‌ಪ್ರೆಸ್‌ಡ್ ಟ್ರೂಲಿ, ಇಟ್ ವಿಲ್ ಇಂಪ್ರೆಸ್ ಸೇಚುರಲ್ಲಿ. ಸೇವೆ ಸೇವೇಂದ್ ಮಾಡೊಂಡು, ದಾರ್‌ನೇಂಗಿ ಮೆಚ್ಚೆಚಿರುವಕಾಯಿತ್ ಮಾಡುವಕಾಗ, ಸತ್ಯವಾಯಿತ್ ಏದ್ ಸೇವೆ ಮಾಡ್‌ಚೆಂಗಿಯೂ ಅದ್ ಸ್ವಾಭಾವಿಕವಾಯಿತ್ ಮೆಚ್ಚೆಗೆ ಪಡ್‌ಂದವ. ಡೇಸ್ ಬಿಗಿನ್ ವಿತ್ ಹೋಪ್ಸ್, ಎಂಡ್ಸ್ ವಿತ್ ಡ್ರೀಮ್ಸ್, ಎವೆರಿ

ಡೇ ಸ್ಪಾರ್ಟಿಂಗ್ ವಿತ್ ಸಮ್ ಎಕ್ಸ್‌ಪೆಕ್ಟೇಸನ್ ಬಟ್ ಎವೆರಿ ಡೇ  
 ಸ್ಯೂರಾಲಿ ಎಂಡ್ಸ್ ವಿತ್ ಸಮ್ ಎಕ್ಸ್‌ಪೀರಿಯನ್ಸ್, ದಟ್ ಈಸ್  
 ಲೈಫ್. ದಿನ ಆಶಾಭಾವನೆಲ್ ಸುರು ಆಪಂಜಿ ಸ್ವಪ್ನತ್ ತೀರುವ,  
 ಎಲ್ಲಾ ದಿವಸವೂ ಭರವಸೆಲ್ ಸುರು ಆಪಂಜಿ ಖಂಡಿತ ವಾಯಿತೂ  
 ಕೊನೆ ಆಪ ಮಾತ್ರ ಅನುಭವತ್, ಅದೇ ಜೀವನ.

ಏದೇಂಗಿ ಒರ್ ವ್ಯಕ್ತಿನ ಪ್ರೀತಿಚಿಡೊಂಡು, ದ್ವೇಷ ಮಾಡುವಕಾಗ,  
 ಹೃದಯತ್ ವ್ಯವಹರ್‌ಚಿಡೊಂಡು, ಮನಸ್‌ಲ್ ಅಲ್ಲ,  
 ತಿದ್ದೊಂಡು ತಾತುವ ಅಲ್ಲ,  
 ತಪ್ಪುನ ಕಾಟೊಂಡು, ಅವಮಾನ ಮಾಡುವ ಅಲ್ಲ,  
 ಸರಿ ತಪ್ಪು ನೋಟೊಂಡು ಪರೀಕ್ಷೆ ಮಾಡುವ ಅಲ್ಲ,  
 ಸರಿ ಮಾಡೊಂಡು ಬರೇ ತಪ್ಪು ಕಂಡ್ ಪುಡಿಪ ಅಲ್ಲ,  
 ಎಲ್ಲಾ ಆತ್ಮತು ನೀನ್ ಪರಮಾತ್ಮನ ಕಾಣ್,  
 ನೀಕಿಪ್ಪುಲೆ ಕಷ್ಟ ತೊಂದರೆ,

ಪೊಣ್ಣ್ ಒಡಿಯನ, ಒಡಿಯ ಪೊಣ್ಣ್ ನ :

ವಿರೋದ ಮಾಡೊಂಡು ದುಂದ್ ವೆಚ್ಚತ್‌ನ ಖರ್ಚಿ ಮಾಡುವಾನ ಅಲ್ಲ,  
 ಸೋಮಾರಿತನತ್‌ನ ಆರಾಮ್ ಪಡುವಾನ ಅಲ್ಲ  
 ಕುಡ್‌ಕನ ಕುಡಿಪಾನ ಅಲ್ಲ  
 ಕಾರಣತ್‌ನ ಸಕಾರಣತ್‌ನ ಅಲ್ಲ  
 ದುಡ್ಡ್ ಕಳಿವಾನ ದಾನ ಧರ್ಮತ್‌ನ ಅಲ್ಲ,  
 ಪರಸಂಗತ್‌ನ , ಸ್ನೇಹಚಾರತ್‌ನ ಅಲ್ಲ,

ಎನ್ನಂಗ್ ಎಣ್ಣಕ ಅವ/ಅಂವ ನೀಡ ಮಿತ್ರ, ಶತ್ರು ಅಲ್ಲ.

ಮಕ್ಕ : ತಾತ ನೀಡ ಇಂಗ್ಲಿಷ್ ನಂಗಕ್ ಅರ್ಥ ಆಯಿಲೆ, ಆಚೆಂಗಿ ನಂಗಡ  
 ಕೊಡವ ತಕ್ಕ್‌ಲ್ ಎಣ್ಣೆಸದ್ ಚೆನ್ನ ಚೆನ್ನ ಅರ್ಥ ಆಚಿ ತಾತ.

ಮೇದಯ್ಯ : ಇಂದೇ ಎಲ್ಲಾ ತೀತ್‌ರ್ ತೇಂಗಿ ನಾಳೆಕೂ ಬೋಂಡು ಅಲ್ಲ.

ಬೋಜಿ ಬೋಜಮ್ಮ : ಮಕ್ಕಳೆ, ತಾತ ಬರೇ ಕಥೆ ಮಾತ್ರ ಎಣ್ಣುವ ಅಲ್ಲ,  
 ಪಾಟೂ ಪಾಡುವ, ಕೇಟ್ ನೋಟಿ..

ಮಕ್ಕ (ಎಲ್ಲ ಒಕ್ಕಚೆ) : ಒರ್ ಪಾಟ್ ಪಾಡ್ ತಾತ.

ಮೇದಯ್ಯ : ಆಚಿ ಮಕ್ಕಳೆ ನಿಂಗ ಇಚ್ಚಕ್ ಕೇಟ ಪಿಂಚಾ, ನಾನ್ "ಆಂದ್"

ಇಂದ್" ಎಣ್ಣೆತ್ ಒರ್ ಪಾಟ್ ಪಾಡುವಿ, ಇದ್ ನಾನೇ  
ತೋಂದ್‌ನದ್ ಎಳ್ದದ್‌ನದ್, ವಯಸ್ಸಾಚಿ, ರಾಗ ಉಂಡೋ  
ಎನ್ನೋ, ಕೇಳಿ:

ಅಂದ್ ಐನ್ ಮನೆ ಬಲ್ಯ ಮನೆ ಇಂಜತಲ್ಲಾ,  
ಮನೆ ದುಂಬಾ ಜನಳೂ ಮಕ್ಕಳೂ ಇಂಜತಲ್ಲಾ,  
ಒಗ್ಗಟ್ಟ್ ಒತ್ತೋರ್ಮೆ ದುಂಬಿತಿಂಜತಲ್ಲಾ,  
ಇಂದ್ ಬಲ್ಯ ಮನೆ ಖಾಲಿ ಖಾಲಿ ಉಂಡಲ್ಲಾ,  
ಮನೆಕೊಂದ್ ದಂಡ್ ಮಕ್ಕ ಮಾತ್ರ ಉಂಡಲ್ಲಾ,  
ಒಗ್ಗಟ್ಟ್ ಒತ್ತೋರ್ಮೆ ಕಾಂಗತೆ ಉಂಡಲ್ಲಾ.

ಅಂದ್ ಉಂಬಳ ಮನೆಲ್ ಮುಕ್ಕಾಲಿ ಪಲಿಯ ಇಂಜತಲ್ಲಾ,  
ಅವ್ವನೋ ಮೊಮ್ಮನೋ ಬಳ್‌ಂಬುವ ಇಂಜತಲ್ಲಾ,  
ಪುಳ್ಳಿರ ಬೆದತ್ ಚಟ್ಟಿ ಕುಡಿಕೆಲ್ ಬೆಂಜ ಅಡಿಗರ ಚಾಯಿ ಇಂಜತಲ್ಲಾ,  
ಇಂದ್ ಮೇಜ್ ಕುರ್ಚಿ ಎಲ್ಲಾ ಉಂಡಲ್ಲಾ,  
ಬಳ್‌ಂಬುವವು ದಾರು ಇಲ್ಲೆ ನಂಗಳೇ ಬಳ್‌ಂಬಿಯವಂಡು ಅಲ್ಲಾ,  
ಗ್ಯಾಸ್‌ಲ್ ಕುಕ್ಕರ್‌ಲ್ ಬೆಂಜ ಅಡಿಗೇಲ್ ಮಿಂಇತ್ ರಸ ಕಾಂಗತೆ ಉಂಡಲ್ಲಾ.

ಅಂದ್ ನಮ್ಮೆ ನಾಳ್ ಮಂಗಲ ಮುಂಜಿಲ್ ಕುಪ್ಪ, ಬೊಟ್ಟ್ ಪೊಡಿಯ  
ದುಂಬಿತಿಂಜತಲ್ಲಾ,  
ಭಕ್ತಿಲ್ ಬಗ್ಗಿತ್ ಮೂಂದ್ ಕುರಿ ಕಾಲ್ ಪುಡಿಪ ಇಂಜತಲ್ಲಾ,  
ಎಲ್ಲರ್‌ಕೂ ಬಳ್‌ಂಬ್‌ನ ಪಿಂಇ ಒಕ್ಕಚೆ ಉಂಬ ಇಂಜತಲ್ಲಾ,  
ಇಂದ್ ಸೂಟ್ ಪ್ಯಾಂಟ್ ಚೂಡಿ ದಾರವೇ ಕಂಡಂಡುಂಡಲ್ಲಾ, ಕಾಟಾಚಾರಕ್  
ಬಗ್ಗಿತ್ ಮೊಣಕಾಲ್ ಪುಡಿಪದ್ ಕಂಡಂಡುಂಡಲ್ಲಾ,  
ಮೇಲೆ ಬುದ್ದಾ ನಂಗಳೇ ಬಳ್‌ಂಬಿಯವದ್ ಕಂಡಂಡುಂಡಲ್ಲಾ.

ಅಂದ್ ಮನೆ ದುಂಬ ನೆಲ್ಲೆ ಕಳದುಂಬ ಪಿಲ್ಲೆ ಇಂಜತಲ್ಲಾ,  
ತೇನ್ ನೆಯಿ ಕುಡಿಕೆ ದುಂಬ ಇಪ್ಪ ಇಂಜತಲ್ಲಾ,  
ಎತ್ತ ಕಡ್‌ಚಿ ಕೋಳಿ ಪಂದಿ ಚಾಕಿತಿಪ್ಪ ಇಂಜತಲ್ಲಾ,

ಇಂದ್ ನೆಲ್ಲ್ ಪಿಲ್ಲ್ ಕಾಂಗ, ದುಡ್ಡ್ ಕಾಸ್ ದುಂಬಿತುಂಡಲ್ಲಾ,  
ತೇನ್ ನೆಯಿ ಕುಪ್ಪಿಲ್ ಮಾತ್ರ ಕಂಡಂಡುಂಡಲ್ಲಾ,  
ಎತ್ತ ಕಡ್ಚಿ ಕೋಳಿ ಪಂದಿ ಕಾಂಗತೆ ಉಂಡಲ್ಲಾ,

ಅಂದಿಯತ್ ರ ಪ್ರೀತೀ ಇಂದ್ ಕಂಡಂಡಿಲ್ಲೆಲ್ಲಾ,  
ಅಂದಿಯತ್ ರ ಒಗ್ಗಟ್ಟ್ ಒತ್ತೋರ್ಮೆ ಕಂಡಂಡಿಲ್ಲೆಲ್ಲಾ, ಅದ್ ಎಲ್ಲ ಬರಡ್ಂದ್  
ಇಗ್ಗುತಪ್ಪ ಕಾವೆರಮ್ಮನೋ, ಗುರು ಕಾರಣಂಗಳೋ ಬೋಡನಲ್ಲಾ.

ಬೋಜಿ ಬೋಜಮ್ಮ : ಅಲ್ಲ ಮಾಂವ ನಿಂಗ ಎಣ್ಣೆ ನದೆಲ್ಲ, ಮಕ್ಕಕಾ, ಅಲ್ಲ  
ನಂಗಕಾ..

ಮೇದಯ್ಯ : ಎಲ್ಲಾರ್ಕೂ ಆಪವ್ವ, ಅದ್ ಎಡ್ತವಯಿಂಗಡ ಮೇಲೆ  
ಹೊಂದಿಯಂಡಿತ್. ಕ್ಲಾಸ್ಲ್ ಪಾಟ ಒಕ್ಕಚೇ ಮಾಡ್ಚೆಂಗಿನೂ  
ಕೆಲು ಮಕ್ಕ ಮಾತ್ರ ಮಿಂಇಕ್ ಬಪ್ಪ, ಬಾಕಿ ದಾರೂ ಬಪ್ಪಲೆ,  
ಅದೇ ಉದಾಹರಣೆ ಮದಿ, ಎಲ್ಲಾ ಎಡ್ತವಯಿಂಗಡ ಮೇಲೆ  
ಹೊಂದಿಯಂಡಿತ್ಂದ್.

ಬೋಜಿ ಬೋಜಮ್ಮ : ಆಚಿ ಮಾವ, ನಿಂಗ ಎಣ್ಣೆನದ್ ದುಂಬಾ ಅರ್ಥ  
ಉಂಡ್, ಇಂದ್ ಬೈಟ್ ವರ್ಕ್ ಇಪ್ಪುಲೆ ಖಂಡಿತಾ.

ಮೇದಯ್ಯ : ಅಚ್ಚಕ್ ಸೀರಿಯಸ್ ಎಡ್ತವತೆ, ಜೀವನ ಬಂದನ್ನಕೆ ಎಡ್ತವಂಡು,  
ಜೀವನ ಕೈಪು ಅಲ್ಲವ್ವ ನಂಗ ಮಾಡಿಯವ, ಅದ್ ಮೌಪು ನಂಗ  
ಮಾಡಿಯಂಡಕ.

ಬೋಜಿ ಬೋಜಮ್ಮ : ನೇರ್ ಮಾಂವ.

\* \* \* \* \*

## ಸೀನ್ ಒಯಿಂಬದ್

(ಅಕ್ಕಣೆಕ್ ಅಕ್ಕನೂ ತಂಗೆಯೂ ಅಡಿಗೇ ಮನೆಲ್)

ಬೋಜಿ ಬೋಜಮ್ಮ : ಅಲ್ಲ ಅಕ್ಕಯ್ಯ ನಿಂಗ ಉಂಞೂ ಪುಳ್ಳಿಲೇ ಅಡಿಗೇ  
ಮಾಡಿಯಂಡುಳ್ಳಿರಲ್ಲಾ, ಒರ್ ಗ್ಯಾಸ್ ಎಡ್‌ತವಕೆನ್ನ? ಭಾರಿ  
ಸುಲಭ ಆಪ, ಒರ್ ಗ್ಯಾಸ್ ಎಡ್‌ಪ್‌ಚಿಟ್ಟ್.

ಕಾಮುಣಿ ಕಾಮವ್ವ : ಗ್ಯಾಸ್ ಎಡ್‌ಪಕ್ ದುಡ್ಡ್ ಎಚ್ಚಕ್ ಬೋಂಡು. ಇಲ್ಲಿಯೇ  
ಪುಳ್ಳಿ ಪುಕ್ಸಾಟೆ ಕ್‌ಟ್ಟುವ, ಆಂಗ್ ಅದ್‌ಲೇ ಅಡಿಗೇ ಮಾಡೋಲು,  
ನೀನ್ ಮುಂಡತಿರ್.

ಬೋಜಿ ಬೋಜಮ್ಮ : ಅಲ್ಲ ಅಕ್ಕಯ್ಯ, ಪುಳ್ಳಿ ಕೆತ್ತ್‌ಚಿರುವಕ್ ಕಷ್ಟ, ಪೋಗೆ  
ಬೋರೆ ಅಡಿಗೇ ಬೆರಿಯ ಆಪುಲೆ, ಮುಂಡತೆ ಟ್ರೈಮ್ ವೇಸ್ಟ್,  
ಆಂಗ್ ಒರ್ ಗ್ಯಾಸ್ ಎಡ್‌ಪ್‌ಚಿಟ್ಟ್‌ಂದ್ ಎಣ್ಣೆಯಿ, ಬೋಂಡಿಕಿ  
ನಾನೇ ಬಾವಂಗ್ ಎಣ್ಣುವಿ.

- ಕಾಮುಣಿ ಕಾಮವ್ವ : ಬೋಂಡಪ್ಪ, ನೀನ್ ಎಣ್ಣೆಚೆಂಗಿ ಅವ ಗಲಾಟೆ  
ಮಾಡುವ, ನಾನೇ ಎಣ್ಣುವಿ, ನೀನ್ ಮುಂಡತಿರ್ ನಾನೇ ಎಣ್ಣುವಿ.
- ಬೋಜಿ ಬೋಜಮ್ಮ : ಅಕ್ಕಯ್ಯ, ನಾಕ್ ಪುಳ್ಳಿಲ್ ಅಡಿಗೆ ಮಾಡಿತ್ ಅಭ್ಯಾಸ  
ಇಲ್ಲೆ, ಗ್ಯಾಸ್ ಇಂಡಕ್ಸ್ ಸ್ಪಾಲ್ ಅಡಿಗೆ ಮಾಡಿತ್ ಅಭ್ಯಾಸ,  
ಆಂಗ್ ಕಷ್ಟ ಆಕು, ಆಂಗ್ ನೀಕ್ ತರಕಾರಿ ಮುರ್ಚಿತ್ ಈರುಳ್ಳಿ  
ಬೊಳ್ಳುಳ್ಳಿ ತೊಲ್ಚಿ ತಪ್ಪಿ, ಪಾತ್ರೆ ಬೋಂಡಿಕಿ ಕತ್ತಿ ತಪ್ಪಿ.
- ಕಾಮುಣಿ ಕಾಮವ್ವ : ಅದೆಲ್ಲಾ ಬೋಂಡ, ನಾನೇ ಮಾಡಿಯವಿ, ನೀನ್  
ಮುಂಡತೆ ಅಳ್ತತಿರ್.
- ಬೋಜಿ ಬೋಜಮ್ಮ : ಅಕ್ಕಯ್ಯ ನಾಕ್ ಮುಂಡತೆ ಅಳ್ತತಿತ್ ಅಭ್ಯಾಸ ಇಲ್ಲೆ.  
ಎಂತೇಂಗಿ ಮಾಡಿಯಂಡ್ ಇಕ್ಕೊಂಡು, ಆಂಗ್ ನಾಕ್ ಎಂತೇಂಗಿ  
ಕೆಲಸ ತಾ. ನಾನು ನೀಕ್ ಸಹಾಯ ಮಾಡ್‌ನನ್ನಕೆ ಆಪ.
- ಕಾಮುಣಿ ಕಾಮವ್ವ : ನೀನ್ ಮುಂಡತಿರ್ ನಾನ್ ಎಲ್ಲಾ ಮಾಡುವಿ, ನೀನ್  
ಅಲ್ಲಿ ಆಫೀಸ್ ಕೆಲಸ, ಮನೆ ಕೆಲಸ ಮಾಡಿತ್ ಚೋತಿತ್  
ಬಂತುಳ್ಳಿಯಾ ಚೆನ್ನ ಆರಾಮ್ ಪಡ್.
- ಬೋಜಿ ಬೋಜಮ್ಮ : ಅಕ್ಕಯ್ಯ, ಆರಾಮ್ ನಾಡ ಅದೃಷ್ಟತ್ ಎಳ್‌ದಿತಿಲ್ಲೆ,  
ಆಫೀಸ್ ಕೆಲಸ, ಮನೆ ಕೆಲಸ, ಮಕ್ಕಡ ಕೆಲಸ, ವಡಿಯಂಡ ಕೆಲಸತೇ  
ನಾಕ್ ಸ್ವರ್ಗ ಕಾಂಬ, ಆ ಕೆಲಸ ಇಲ್ಲತೆ ಪೋಚೆಂಗಿ ನಾಕ್ ನರಕವೇ  
ಸರಿ.
- ಕಾಮುಣಿ ಕಾಮವ್ವ : ಅದೆಲ್ಲಾ ಬುಡ್, ನೀಕಿಕ್ಕ ಕೆಲಸ ಬೋಂಡು, ಇದಾ  
ಈ ಚೆಟ್ಟೆನ ಪಲ್ಯಕ್ ಮುರಿ.
- ಬೋಜಿ ಬೋಜಮ್ಮ : ಅಕ್ಕಯ್ಯ ಈ ಚೆಟ್ಟೆ ದುಂಬಾ ಜಾಯಿ ಉಂಡ್, ನಂಗಕ್  
ಇಂತ ಚೆಟ್ಟೇ ಕ್‌ಟ್ಟುಲೆ, ಅಲ್ಲಿ ಬರೀ ನೀರ್ ಚೆಟ್ಟೆ, ರಸೇ ಇಪ್ಪುಲೆ.
- ಕಾಮುಣಿ ಕಾಮವ್ವ : ಈ ಚೆಟ್ಟೆ ನಂಗ ಬೊಳ್‌ತ್‌ನದ್,
- ಬೋಜಿ ಬೋಜಮ್ಮ : ಓ ಸರಿ ಆನುಂಡೇ ಇನ್ನನೆ ಉಳ್ಳ.
- ಕಾಮುಣಿ ಕಾಮವ್ವ : ನಿಂಗಕ್ ಕಂಪನಿ ಗೊಬ್ಬರ ಇಟ್ಟ ತರಕಾರಿ ಕ್‌ಟ್ಟುವ  
ಕಾಂಬ, ನಂಗಡಲ್ಲಿ ನಂಗ ಬೊಳ್‌ಂದ ತರಕಾರಿ ಮಾತ್ರ.
- ಬೋಜಿ ಬೋಜಮ್ಮ : ಅಕ್ಕಯ್ಯ ಚೆಟ್ಟೆ ಮುರಿಚಿತಾಚಿ, ಬೋರೆ ಎನ್ನೇಂಗಿ  
ಉಂಡೇಂಗಿ ತಾ.

ಕಾಮುಣಿ ಕಾಮವ್ವ : ಅದ್ ಆಜಾ ಇದಾ ಚೆನ್ನ ತೆರ್ಮೆ ತೊಪ್ಪು ಉಂಡ್ ಈನ ಪೊಳ್ಚೆ ತಾ.

ಬೋಜಿ ಬೋಜಮ್ಮ : ತೆರ್ಮೆ ತೊಪ್ಪು ನಂಗಕ್ ಕ್ಕಟ್ಟುವದೇ ಇಲ್ಲೆ, ದುಂಬಾ ನೆಯಿ, ಈರುಳ್ಳಿ, ತೆಂಗೆ ಇಟ್ಟಿತ್ ಒಟ್ಟಿಕ್ ಮಾಡ್ಚೆಂಗಿ ದುಂಬಾ ರಸ ಇಪ್ಪ, ನಂಗಡವಂಗೂ ಮಕ್ಕಕೂ ಕುಶಿ ಆಪ.

ಕಾಮುಣಿ ಕಾಮವ್ವ : ಆಚಿ, ಆಂಗೆನ್ನ ನಾಳೆ ಪೊಲಾಕಕ್ ಒಟ್ಟಿ ಮಾಡಿತ್ ತೆರ್ಮೆ ತೊಪ್ಪು ಬರ್ಕನ.

(ಅಕ್ಕಣೆ ಮುದ್ದವ್ವ ಅಡಿಗೇ ಮನೆರೊಳ್ಕ ಬಪ್ಪ)

ಮುದ್ದವ್ವ : ಅಲ್ಲ ಮೋಳೆ, ನಾಳೆ ಮಕ್ಕಕ್ ಪೊಲಾಕಕ್ ಎಂತ ಮಾಡಿಯಂಡು ಳ್ಳಿಯಾ, ಎನ್ನೇಂಗಿ ಸ್ವೆಶಲ್ ನೂಪುಟ್ ಕೋಳಿ ಕರಿ ಅಥವಾ ಪಂದಿ ಕರಿ ತಳಿಯ ಪುಟ್ ಮಾಡಿಯಾ?

ಕಾಮುಣಿ ಕಾಮವ್ವ : ಇಲ್ಲೆ ಮಾಯಿ, ಅಯಿಂಗಕ್ ಒಟ್ಟಿ ತೆರ್ಮೆ ತೊಪ್ಪು ಬರ್ತದ್ ಮಾಡಿಯೆ.

ಮುದ್ದವ್ವ : ಎಂತವ್ವ, ಅವು ಎಣ್ಣುವಾ ಎಣ್ಣಿಯಂಡ್ ತೆರ್ಮೆ ತೊಪ್ಪು ಒಟ್ಟಿ ಮಾಡುವಿ ಎಣ್ಣುವಿಯಲ್ಲಾ.

ಬೋಜಿ ಬೋಜಮ್ಮ : ಇಲ್ಲೆ ಮಾಯಿ, ನಾನೆ ಅಕ್ಕಯ್ಯಂಗ್ ಎಣ್ಣಿಯೆ, ನಿಂಗಡ ಮೋಂವಂಗ್ ಅದೇ ಕುಶೀಂದ್, ಅದೇ ಮದೀಂದ್, ಅಕ್ಕಯ್ಯ ಎಂತೆಲ್ಲೋ ಮಾಡುವಿ ಎಣ್ಣೆ ಚಿ, ನಾನೆ ಬೋಂಡಾಂದ್ ಎಣ್ಣಿಯೆ.

ಮುದ್ದವ್ವ : ಸರಿ ಮಕ್ಕಕ್ ಚಾಯಾಂಡು ಅಲ್ಲಾ,

ಬೋಜಿ ಬೋಜಮ್ಮ : ಮಕ್ಕಕ್ ಪುದಿಯದ್ ದುಂಬಾ ಕುಶಿ ಆಪ, ತೆರ್ಮೆ ತೊಪ್ಪು ಬೆಂಗಲೂರ್ಲ್ ಕ್ಕಟ್ಟುಲೆ, ಅಯಿಂಗಕೂ ಕುಶಿ ಆಪ, ನಿಂಗ ಒಂದೂ ಬೇಜಾರ ಮಾಡಂಡಾ, ಮಜ್ಜಣಕ್ ಸ್ವೆಶಲ್ ಮಾಡನ ಪೊಲಾಕಕ್ ನಂಗ ಎರ್ಚಿ ಮೀನ್ ತಿಂಬುಲೆ ಮಾಯಿ.

ಮುದ್ದವ್ವ : ಸರಿ ಅವ್ವ ನಿಂಗಡ ಇಷ್ಟ, ನಿಂಗ ಸಂತೋಷತ್ ಇಕ್ಕೊಂಡು.

ಕಾಮುಣಿ ಕಾಮವ್ವ : (ಮನಸ್ಸಲೇ) ಅಯಿಂಗ ಮಾತ್ರ ಸಂತೋಷತ್ ಇಂಜಕ ಮದಿ, ಈ ಮುದಿ ಮಾಯಿಕ್ ಮುನ್ನೂಯಿಟ ಅರುವತ್ತಂಜಿ ದಿವಸ ಸೇವೆ ಮಾಡಿಯಂಡುಳ್ಳ ನಂಗಡ ಸಂತೋಷ ಲೆಕ್ಕಕೇ ಇಲ್ಲೆ.

ಮುದ್ದವ್ವ : (ಮನಸ್ಸಕ್ ಅರ್ಥ ಆಪಂಜಿ ಮೂಡ್ ಚೆರಿಯದ್ ಮಾಡಿಯವ).



## ಸೀನ್ ಪತ್ರ್.

(ಪುತ್ತರಿ ಎಲ್ಲಾ ಕಯಿಂಜತ್, ತಮ್ಮಣ ಪೊಣ್ಣ್ ಮಕ್ಕ ಬೆಂಗಳೂರ್ಕ್ ಪೊರಟಂಡ್ ಇಪ್ಪ)

ಪ್ರೇಮ್ ಪೊನ್ನಪ್ಪ : ನೋಟ್‌ರಾ ಎಲ್ಲಾ ಪ್ಯಾಕ್ ಮಾಡಿಯಾ, ನಾಡ ಮಕ್ಕಡ  
ಬಟ್ಟೆ ಎಲ್ಲಾ ಪ್ಯಾಕ್ ಮಾಡಿಯೆ?

ಬೋಜಿ ಬೋಜಮ್ಮ : ಅದೆಲ್ಲ ಪ್ಯಾಕ್ ಆಯಿತ್ ನಿಂಗ ಒಂದೂ ವರೀಸ್  
ಮಾಡಂಡ.

ಮುದ್ದವ್ವ : ಚೆನ್ನ ಪುಳಿ, ಬಾಳೆ ಎಡ್‌ತ ಪೋಯಿ, ಅಲ್ಲಿ ನಿಂಗಕ್ ಈ ರಸ  
ಕ್‌ಟ್ಟುಲೆ.

ಕಾಮುಣಿ ಕಾಮವ್ವ : ಅದೆಲ್ಲ ಗೋಣಿ ಚೀಲತ್ ಇಟ್ಟಿಯೆ ಮಾಯಿ.

ಮುದ್ದವ್ವ : ಪೂಬಾಳೆ ಪುಳಿ ಎಲ್ಲಾ ಇಟ್ಟಿಯಾ?

ಕಾಮುಣಿ ಕಾಮವ್ವ : ಪೂಬಾಳೆ, ಪುಳಿ ಎಲ್ಲಿ ಉಂಡ್ ಮಾಯಿ, ಮರ ಬಾಳೆ

ಕೈಪುಳಿ ಇಟ್ಟಿಯೆ.

ಮುದ್ದವ್ವ : ಎನ್ನಂಗವ್ವ ಪೂಬಾಳೆ ಮೂಂದ್ ಕೊಲೆ ಕೆತ್ತಿತಿಂಜತಲ್ಲ, ಪುಳಿ ಬಟ್ಟಿ  
ದುಂಬಾ ಕೊಂಡ ಬಂದಿತಿಂಜತಲ್ಲಾ.

ಕಾಮುಣಿ ಕಾಮವ್ವ : ಅದೆಲ್ಲಾ ತೀಂದೋಚೆ ಚೆನ್ನ ಉಂಡ್, ನಾಡ ಮಕ್ಕಕ್  
ಬೋಂಡವಾ, ಅದ್‌ಂಗ್ ಅದ್‌ನ ಬೆಚ್ಚಂಡಿಯೆ, ಕೈಪುಳಿ, ಮರ  
ಬಾಳೆ ಇಟ್ಟಿಯೆ.

ಮುದ್ದವ್ವ : (ಮನಸ್ಸಲೇ) ಇವ ಭಾರಿ ಘಾಟಿ, ಏಡ ಅಳಿಯ ಕುಂಇಕ್  
ಒಂದೂ ಕೋಡ್‌ಪುಲೆ, ಅವನೋ ಒಂದೂ ಎಡ್‌ತ ಪೋಪುಲೆ,  
ಕೇಪದೂ ಇಲ್ಲೆ, ಇವ ಕೋಡ್‌ಪದೂ ಇಲ್ಲೆ.

ಪ್ರೇಮ್ ಪೊನ್ನಪ್ಪ : ಆಚವ್ವ ನಂಗ ಈ ಮರ ಬಾಳೆ ಕೈಪುಳಿ ಕೊಂಡ  
ಪೋಚೆಂಗಿ ಆಟೋಕೆ ದುಡ್ಡ್ ಪಾಳ್, ಅದೊಂದೂ ಬೋಂಡ  
ಬೆಂಗೂರ್‌ಲ್ ಎಲ್ಲಾ ಕ್‌ಟ್ಟುವ ಈ ಸಾಮಾನ್ ಇಲ್ಲತೆ ಪೋಚೆಂಗಿ  
ನಂಗ ಬಸ್‌ಲ್ ಪೋಯಿರೋಲು, ಇಲ್ಲೆಂಗಿ ಆಟೋತೆ ಪೋಂಡು,  
ಆಂಗ್ ದುಡ್ಡ್ ಪಾಳ್, ಆಟೋಕ್ ಕೋಡ್‌ಪ ದುಡ್ಡ್‌ಲ್ ಅಲ್ಲಿಯೇ  
ಈ ಸಾಮಾನ್ ಎಡ್‌ತವಲು. ಅದೊಂದೂ ಬೋಂಡ.

ಮುದ್ದವ್ವ : ಅಂದಕ ಒರ್ ಕುಪ್ಪಿ ತೇನ್, ಒರ್ ಕುಪ್ಪಿ ಪುಳಿ ನೀರ್ ಕೊಡವ್ವ.  
ಕಾಮುಣಿ ಕಾಮವ್ವ : ಅಯ್ಯೋ ಮಾಯಿ, ಪುಳಿ ನೀರ್ ಒರ್ ಕುಪ್ಪಿ ಆಯೆ,  
ತೇನ್ ದಂಡ್ ಕುಪ್ಪಿ ಆಯೆ, ಮದ್ದ್ ಕೂಳ್ ಉಂಬಕೇ ಒರ್  
ಕುಪ್ಪಿ ತೇನ್ ತೀಂದತ್, ಇಂಇಸೋರ್ ಕುಪ್ಪಿ ಮಕ್ಕ ಒಟ್ಟಿ ತಿಂಬಕ  
ತೀತತ್, ಇಂಇಲಿ ತೇನ್ ಇಪ್ಪ.

ಮುದ್ದವ್ವ : ಅಲ್ಲವ್ವಾ, ವಾರ ವಾರ ತೇನ್ ಕೊಯ್ಯುವ ಇಂಜಿರಾ ಇಕ್ಕ ದಂಡೇ  
ಕುಪ್ಪಿ ಕ್‌ಟ್ಟಿಯೇಂದ್ ಎಣ್ಣುವಿಯಾ.

ಕಾಮುಣಿ ಕಾಮವ್ವ : ಅದೇ ಮಾಯಿ ಎಲ್ಲಾ ಆಯಿತ್ ದಂಡ್ ಕುಪ್ಪಿಯೇ  
ಕ್‌ಟ್ಟಿಯೆ.

ಬೋಜಿ ಬೋಜಮ್ಮ: ಬುಡಿ ಮಾಯಿ, ಪುಳಿ ನೀರ್ ಎಟ್ಟ್ ನೂರ್ ಉರ್‌ಪಿಯ  
ಕೋಡ್‌ತಕ ಟೌನ್‌ಲ್ ಕ್‌ಟ್ಟುವ ನೂಯಿಟ ಅಯಿಂಬದ್ ಕೋಡ್‌ತಕ  
ತೇನ್ ಕ್‌ಟ್ಟುವ, ನಿಂಗ ಆಂಗೆನ್ನಂಗ್ ಅಕ್ಕಯ್ಯಂಗ್ ವರಾತ  
ಮಾಡುವಿರ, ನಂಗ ಪೋಪಕ ಎಡ್‌ತವ, ನಿಂಗ ಬೇಜಾರ ಮಾಡತಿ.

ಮುಂಡತಿರಿ ಇಕ್ಕ.

ಮುದ್ದವ್ವ : ಆಚವ್ವ, ಉಳ್ಳಾನ ಎಣ್ಣಾನ.

ಬೋಜಿ ಬೋಜಮ್ಮ : ಪರೋಲೆ ಬುಡಿ ಮಾಯಿ, ನಂಗ ಎನ್ನನೆಯೋ ಅಡ್ಡಸ್ವ  
ಮಾಡಿಯವ, ನಿಂಗ ಮುಂಡತೆ ಜಗಳ ಮಾಡತಿ.

ಮೇದಯ್ಯ : (ಅದೆಲ್ಲ ಕೇಟಂಡ್ ಇಂಜತ್) ನಂಗಡ ಪ್ರೇಮ್ ಒಂದೂ ಬೋಂ  
ಡಾಂದ್ ಎಣ್ಣುವ ಆಚೆಂಗಿ ನಂಗಡ ಕರ್ತವ್ಯ ಮರ್ಪಕಾಗ ಅಲ್ಲ.

ಕಾರಿ ಕಾರ್ಯಪ್ಪ : ಕಾಮುಣಿ ಅರೆ ಕುಪ್ಪಿ ತೇನ್ ಅರೆ ಕುಪ್ಪಿ ಪುಳಿ ನೀರ್  
ಕೊಡ್,

ಕಾಮುಣಿ ಕಾಮವ್ವ : ಆಚಿ ಆಚಿ ಕಾಲ್ ಕಾಲ್ ಕುಪ್ಪಿ ಕೊಡ್ಪಿ. ನಂಗ  
ಬಯ್ಯ ಕ್ರಯಕ್ ಎಡ್ತವನ.

ಬೋಜಿ ಬೋಜಮ್ಮ : ಅಕ್ಕಯ್ಯಾ ನಿಂಗ ಎಡ್ಪದೂ ಒಂದೇ, ನಂಗ  
ಎಡ್ಪದೂ ಒಂದೇ, ನಂಗಲೇ ಟೌನ್‌ಲ್ ಎಡ್ತವ ನೀನ್ ತಪ್ಪದೂ  
ಬೋಂಡ.

ಕಾಮುಣಿ ಕಾಮವ್ವ : ಆಚಿ, ಕೈಪುಳಿ ಮರ ಬಾಳೆ ಕೊಂಡೋಯಿ.

ಬೋಜಿ ಬೋಜಮ್ಮ : ಬೋಂಡ ಅಕ್ಕಯ್ಯಾ, ಭಾರ ಜಾಸ್ತಿ ಆಪ, ಈಂಗಾಯಿತ್  
ಆಟೊಕ್ ಕೊಡ್ಪ ದುಡ್ಡಲ್ ನಂಗ ಅಲ್ಲೇ ಎಡ್ತವಲು,  
ಅದೊಂದೂ ಬೋಂಡ.

ಕಾಮುಣಿ ಕಾಮವ್ವ : ಆಚಿ ಅಂದಕ.

ಮೇದಯ್ಯ/ಮುದ್ದವ್ವ : (ಮನಸ್ಸಲೇ.. ಚಿ ಎನ್ನನೆ ಆಯೋಚಿ ನಂಗಡ ಮಕ್ಕ  
ಮೈಮಕ್ಕ)

\* \* \* \* \*

## ಸೀನ್ ಪನ್ನಂದ್..

(ಪ್ರೇಮ್ ಬೋಜಿ ಗ್ಯಾನ್ ಕಾವ್ಯ ಬೆಂಗೂರ್ಕ್ ಪೋಪ)(ಅಯಿಂಗಡ ಮನೆಲ್)

ಪ್ರೇಮ್ ಪೊನ್ನಪ್ಪ : ಅಲ್ಲರಾ ಬೋಜಿ, ಮೊಮ್ಮ ದುಂಬಾ ಕಳಿಪ, ನಂಗಡ  
ಮಕ್ಕಕ್ ಮರ ಬಾಳೆ ಕೈಪುಳಿ ತಪ್ಪಲೋ,

ಬೋಜಿ ಬೋಜಮ್ಮ : ಅಲ್ಲಿ ಇಂಜಿತಿರ ಆಂಗೆನ್ನಂಗ್ ನಿಂಗ ಇನ್ನನೆ ತಕ್ಕ  
ಪರೆವ

ಪ್ರೇಮ್ ಪೊನ್ನಪ್ಪ : ಅಲ್ಲರಾ ಕಾಲ್ ಕಾಲ್ ಕುಪ್ಪಿ ತೇನ್ ಪುಳಿ ನೀರ್  
ತಪ್ಪಿಂದ್ ಎಣ್ಣೆಚಲ್ಲಾ ನಂಗೆನ್ನ ಭಿಕ್ಷೆ ಕಾರಳಾ.

ಬೋಜಿ ಬೋಜಮ್ಮ : ಅಯಿಂಗಡ ಪಕ್ಕ ಅಚ್ಚಕೇ ಇಂಜಿತಿಕ್ಕು, ನಂಗ  
ಎನ್ನನೆಯೋ ಟೌನ್‌ಕಾಲೆ ಬಪ್ಪಕ ಒರೋರ್ ಕುಪ್ಪಿ ಎಡ್‌ತ ಬಾತಲ್ಲ  
ನಂಗಡ ಮಕ್ಕ ಉಪವಾಸ ಆಪುಲೆ.

ಪ್ರೇಮ್ ಪೊನ್ನಪ್ಪ : ಅಕ್ಕು ದೇವ ನಂಗಡ ಕಡೆ ಉಂಡ್, ಧರ್ಮ ಎಕ್ಕೋಲು

ಗೆಲ್ಲುವ, ಆಚೆಂಗಿ ಈ ಚೆಲ್ಲರೆ ಬುದ್ದಿ ನಾಕೆನ್ನಂಗೋ ಆಪುಲೆ.

ಬೋಜಿ ಬೋಜಮ್ಮ : ನಿಂಗ ಬೇಜಾರ್ ಮಾಡತಿ, ಚೆಡಿ ಮಾಡತಿ, ನಂಗಕ್ ನಿಂಗಡ ಸಂಬಳ ನಾಡ ಸಂಬಳ ದೇವ ತಂದಿತ್, ಮಕ್ಕಳೂ ಚಾಯಿತೆ ಓದಿಯಂಡುಂಡ್, ಅದೇ ಭಾಗ್ಯ ನಿಂಗ ಬೇಜಾರ್, ಚೆಡಿ ಮಾಡತಿ.

ಪ್ರೇಮ್ ಪೊನ್ನಪ್ಪ : ನಾಕ್ ಚೆಡಿಕುಂಜಿ ಬೇಜಾರ್ ಜಾಸ್ತಿ ಆಪ, ಎಂತ ಚೆಲ್ಲರೆ ಕಳೀಂದ್.

ಬೋಜಿ ಬೋಜಮ್ಮ : ಅದ್ ಚೆಲ್ಲರೆ ಕಳಿ ಅಲ್ಲಾ, ಎಲ್ಲಾರ್ಕೂ ಇಪ್ಪ ಸ್ವಾರ್ಥ್, ಅದ್‌ಂಗ್ ನಂಗ ನಂಗಡ ಪಾಡ್‌ಕ್ ಇಕ್ಕನ.

\* \* \* \* \*

(ಪ್ರೇಮ್/ ಬೋಜಿ ದಂಡಾಳ್‌ಕೂ ಅಯಿಂಗಡ ಕೆಲಸ ಮೆಚ್ಚಿತ್ ಅಯಿಂಗಡ ಆಫೀಸ್‌ಲ್ ಮುಂಬಡ್ತಿ ಆಪ)

ನಂಗ ದಂಡಾಳ್‌ಕೂ ಪ್ರೊಮೋಷನ್ ಆನಾನಗುಂಡ್ ಉಂಇು ದುಡ್ಡ್ ಕಾಸ್‌ಕ್ ತೊಂದರೆ ಆಪುಲೆ ನಂಗ ಕಷ್ಟ ಪಡನ, ಮಕ್ಕಳ ಚಾಯಿತೆ ಓದ್‌ಚಿರನ ನಂಗ ಪಟ್ಟ ಕಷ್ಟ ಅವು ಪಡಂಡ.

ಬೋಜಿ ಬೋಜಮ್ಮ : ಅದ್ ಸರಿ ಮಕ್ಕ ಎನ್ನನೆಯೋ ಇಕ್ಕಲೂ ಸ್ಕೂಲ್‌ಕ್ ಬಸ್‌ಲೇ ಪೋಪದ್ ದುಂಬಾ ಟೈಮ್ ವೇಸ್ಟ್ ನಂಗ ದಂಡಾಳೂ ಬಸ್‌ಲ್ ಆಫೀಸ್‌ಕ್ ಪೋಪದ್ ಸಹ ಟೈಮ್ ವೇಸ್ಟ್, ಆಂಗ್ ನಾಡ ಅಭಿಪ್ರಾಯ ಎಣ್ಣಡಾ ನಿಂಗ ಎಣ್ಣೆಚೆಂಗಿ ಮಾತ್ರ ಎಣ್ಣುವ. ನಾನ್ ಎಣ್ಣುವದ್, ನಂಗಕ್ ಸಾಧ್ಯ ಉಂಡ್, ಆನುಂಡ್ ಎಣ್ಣುವ.

ಪ್ರೇಮ್ ಪೊನ್ನಪ್ಪ: ನೀಡ ಅಭಿಪ್ರಾಯತ್‌ನ ನಾನೆಕ್ಕ ತೆರ್‌ಕಿಯೆ, ಬೆರಿಯ ಎಣ್ಣೆ.

ಬೋಜಿ ಬೋಜಮ್ಮ : ನಿಂಗ ಒರ್ ಕಾರ್ ಎಡ್‌ತೋಳಿ, ನಾಕೋರ್ ಸ್ಕೂಟಿ ಎಡ್‌ತವಿ, ನಂಗಕ್ ಆಫೀಸ್‌ಕ್ ಪೋಪಕ್ ಭಾರಿ ಸುಲಭ ಆಪ, ಬೆರಿಯ ಮನೆಕ್ ಎತ್ತೋಲು, ಮಕ್ಕಡ ಕೂಡೆ ಇರೋಲು, ಅಯಿಂಗಡ ಹೋಮ್ ವರ್ಕ್, ಎಲ್ಲಾ ನೋಟೋಲು ಮಕ್ಕಳೂ ಅಭ್ಯಾಸಾರಿಯ ಳನ್ನಕೆ ಇಪ್ಪದ್ ಬೋಂಡ.

ಪ್ರೇಮ್ ಪೊನ್ನಪ್ಪ : ಅಚ್ಚಕ್ ದುಡ್ಡ್ ಎಲ್ಲಿ ಉಂಡ್‌ರಾ,

ಬೋಜಿ ಬೋಜಮ್ಮ : ಅಯ್ಯೋ ನಂಗಡ ಬ್ಯಾಂಕ್‌ಂಜಿ ದಂಡಾಳೂ ಸಾಲ

ಎಡ್‌ತವನ, ಬ್ಯಾಂಕ್‌ಕಾರಳೂ ತಂದಿತೇ ತಪ್ಪ.

ಪ್ರೇಮ್ ಪೊನ್ನಪ್ಪ : ನೋಟನ ಬ್ಯಾಂಕ್‌ಕಾರಳ ಕೇಟಿ ನೋಟಿತ್ ತೀರ್ಮಾನ ಮಾಡನ, ಮಾರ್ಜಿನ್ ಮನಿ ಕೆಟ್ಟೊಂಡು ಆಂಗ್‌ನ್ನ ಮಾಡೊಂಡು ನೋಟೊಂಡು. ದುಂಬಾ ಸಾಲ ಮಾಡಿಯವಕಾಗ ಬಯ್ಯ ತೊಂದರೆ ಆಕು.

ಬೋಜಿ ಬೋಜಮ್ಮ : ನಿಂಗಡ ಬ್ಯಾಂಕ್‌ಲ್ ಕೇಳಿ ಎಚ್ಚಕ್ ಮಾರ್ಜಿನ್ ಮನಿ ಬೋಂಡೊಂದ್, ದೇವ ಎನ್ನೇಂಗಿ ಕಣ್ಣ್ ತೊರಕು.

ಪಿತ್ಯಾಂದ್....

ಪ್ರೇಮ್ ಪೊನ್ನಪ್ಪ : ಬ್ಯಾಂಕ್‌ಕ್ ಪೋನ, ಅವು ಸಾಲ ತಪ್ಪಕ್ ತುದಿ ಕಾಲ್‌ಲ್ ಉಂಡ್, ನಂಗ ಒರ್ ಚೆರಿಯ ಕಾರ್ ಪುದಿಯದೇ ಎಡ್‌ತವನ, ಪಳಿಯದ್ ಬೋಂಡ, ಮುಂಡತೆ ತೊಂದರೆ, ಪುದಿಯ ಆಲ್ಟೊ ಕಾರ್ಕ್ ಮೂಂದ್ ಲಕ್ಷ ಇರುವದಾಯಿರ ಆಪಲೋ, ಆಂಗ್ ಎಂಬದಾಯಿರ ಮಾರ್ಜಿನ್ ಮನಿ ಕೆಟ್ಟೊಂಡು, ಅದ್ ಸರಿ ನೀಡ ಸ್ಕೂಟಿಕ್ ನೀಡ ಬ್ಯಾಂಕ್‌ಲ್ ಎನ್ನ ಎಣ್ಣೆಚಿ.

ಬೋಜಿ ಬೋಜಮ್ಮ : ನಾಡಾಂಗ್ ನಾಪದಾಯಿರ ಆಪಲೋ, ಆಂಗ್ ಪತ್ತಾಯಿರ ಮಾರ್ಜಿನ್ ಮನಿ ಕೆಟ್ಟೊಂಡು.

ಪ್ರೇಮ್ ಪೊನ್ನಪ್ಪ : ಒಟ್ಟಾರೆ ಒರ್ ಲಕ್ಷ ಬೋಂಡು, ಎನ್ನ ಮಾಡೊ ಅಚ್ಚಕೆಲ್ಲಿಂಜಿ ಕೊಂಡ ಬಪ್ಪ.

ಬೋಜಿ ಬೋಜಮ್ಮ : ಅದೇ ಎಣ್ಣೆಯೆ, ದೇವ ಕಣ್ಣ್ ತೊರ್ ಪಾಂದ್, ಎನ್ನನೆಯೋ ಪಪ್ಪ ಮಂಗಲತ್ ನಾಡ ಕೈಕ್ ಕೆಟ್ಟ್ ನದ್ ಬೆಚ್ಚಿತ್, ಅದ್ ಒರ್ ಲಕ್ಷ ಆಯಿತಿಕ್ಕು, ಅದ್‌ನ ಬಳಸನ, ಬಯ್ಯ ನಾಡ ದುಡ್ಡ್ ನಾಕ್ ತರೊಂಡು ಇಕ್ಕ ಕಾರ್ ಸ್ಕೂಟರ್ ಎಡ್‌ತವನ.

ಪ್ರೇಮ್ ಪೊನ್ನಪ್ಪ : ನೀಡ ಉದಾರ ಮನಸ್ಸನ, ನಿನ್ನ ಎನ್ನನೆ ಹೊಗಳಡ್ ಗೊತ್ತಾಯಂಡಿಲ್ಲೆ(ಅನ್ನನೆ ತಬ್ಬಿಯವ)

\* \* \* \* \*

(ಪಿತ್ಯಾಂದ್)

(ಮನೆಕ್ ಕಾರ್ ಸ್ಕೂಟಿ ಬಪ್ಪ)

ಬೋಜಿ ಬೋಜಮ್ಮ : ಕಾರ್ ಸ್ಕೂಟಿ ಬಾತ್, ಇಕ್ಕ ನಂಗ ಪಕ್ಕತ ಗಣಪತಿ  
ದೇವಸ್ಥಾನಕ್ ಪೋಯಿತ್ ಆದ್ಯ ಪೂಜೆ ಮಾಡಿಯ ಬಕ್ಕನ.

ಪ್ರೇಮ್ ಪೊನ್ನಪ್ಪ : ಅಕ್ಕು ದೇವ ಒರ್ ಬಲ್ಯ ಆಸೆನ ತೀತತ್.

ಬೋಜಿ ಬೋಜಮ್ಮ : ಅಂದಕ ನಿಂಗಡ ದಂಡನೇ ಆಸೆ ಎಂತದೋ?

ಪ್ರೇಮ್ ಪೊನ್ನಪ್ಪ : ನಂಗ ಬೆಂಗಳೂರ್ಕ್ ಬಂದಿತಾಚಿ, ಇಲ್ಲಿ ಮಂಡೆ  
ಬೆಪ್ಪಕ್ ಒರ್ ನೆಲೆ ಬೋಂಡು ಅಲ್ಲ ಅದೇ ನಾಡ ಮಿಂಞತ ಆಸೆ.

ಬೋಜಿ ಬೋಜಮ್ಮ : ನಾಡದೂ ಅದೇ, ನಂಗಕೂ ನಂಗಡ ಮಕ್ಕಕೂ  
ಬೆಂಗಳೂರ್ ಜೀವನ ಒಗ್ಗಿ ಪೋಯಿತ್, ಆಂಗ್ ಇಲ್ಲೇ ಒರ್ ನೆಲೆ  
ಮಾಡಿಯವನಾಂದ್, ನಾಡದೂ ನಿಂಗಡದೂ ಆಸೆ ಒಂದೇ.

ಪ್ರೇಮ್ ಪೊನ್ನಪ್ಪ : ಅದೊಂದ್ ಆಚೆಂಗಿ ಪಿಂಞ ಮಕ್ಕಡ ವಿದ್ಯಾಭ್ಯಾಸ  
ಮಂಗಲ ಮುಂಜಿ.

ಬೋಜಿ ಬೋಜಮ್ಮ : ದೇವ ಉಂಡ್ ಪೆರಿಯಯಿಂಗಡ ಆಶೀರ್ವಾದ  
ಉಂಡ್, ಎಲ್ಲಾ ಆಪ ಬುಡಿ.

ಪ್ರೇಮ್ ಪೊನ್ನಪ್ಪ : ನೀನ್ ಎಣ್ಣುವದ್ ಸರಿ, ನೀನ್ ನಾಡ ಕೂಡೆ  
ಉಂಡೇಂಗಿ ಎಲ್ಲಾ ಆಪ, ನನ್ನೊಬ್ಬನ ಗುಂಡ್ ಒಂದೂ ಆಪುಲೆ,  
ನಾನೊರ್ ಯೂಸ್ ಲೆಸ್.

ಬೋಜಿ ಬೋಜಮ್ಮ : ಎನ್ನಂಗ್ ಅನ್ನನೆ ಎಣ್ಣುವಿರಾ? ನಿಂಗಡ ನಲ್ಲ  
ಬುದ್ಧಿನಗುಂಡೇ ಎಲ್ಲಾ ಆಪ ನಾನ್ ಎಣ್ಣ್ ಚೆಂಗಿನೂ ನಿಂಗ  
ಕೇಕತೆ ಪೋಚೆಂಗಿ ಎನ್ನನೆ ಆಪ, ನಿಂಗ ಉಳ್ಳಾಂಗ್ ಸಂಸಾರ  
ಉಂಡ್.

ಪ್ರೇಮ್ ಪೊನ್ನಪ್ಪ : ಇಲ್ಲೆರಾ, ನೀನುಳ್ಳಾಂಗ್ ನಾಡ ಸಂಸಾರ ಉಂಡ್.

ಬೋಜಿ ಬೋಜಮ್ಮ : ಮದಿ ಮದಿ, ನಿಂಗ ಅನ್ನನೆ ಒಂದೂ ಎಣ್ಣಂಡ, ಆಚಿ  
ನಂಗ ದಂಡಾಳು ಉಳ್ಳಾಂಗ್ ನಂಗಡ ಸಂಸಾರ, ಆಚ್..

\* \* \* \* \*

## ಸೀನ್ ಪನ್ನೆರಂಡ್

(ನಾಡ್ ಮನೆಲ್)

- ಮೇದಯ್ಯ : ಪ್ರೇಮ್ ಎಂತೋರ್ ಕಣ್ಣ, ಒಂದೂ ಬೋಂಡಾಂದ್ ಎಣ್ಣುವಲ್ಲಾ, ಅವು ಎಚ್ಚಕ್ ಕಷ್ಟ ಪಡುವೋ ಎನ್ನೋ.
- ಮುದ್ದವ್ವ : ನಾಡ ದಂಡನೆ ಮೈಮ ಬುದ್ದಿವಂತತಿ, ಅವ ಜಾಯಿತೇ ಸಂಸಾರ ನಡತುವ, ಆನುಂಡೇ ಕುಂಞಿ ಒಂದೂ ಬೋಂಡಾಂದ್ ಎಣ್ಣುವ, ಅಲ್ಲತೆ ಅಯಿಂಗ ದಂಡಾಳಕೂ ದುರಾಸೆ ಇಲ್ಲೆ, ಸ್ವಾರ್ಥ ಇಲ್ಲೆ, ಅಯಿಂಗಕ್ ಖಂಡಿತಾ ದೇವ ನಲ್ಲದ್ ಮಾಡುವ.
- ಮೇದಯ್ಯ : ನಂಗಡ ಆಶೀರ್ವಾದ ಉಂಡೇ ಉಂಡ್, ಆಂಡ ಕೂಟ್ಕ್ ದೇವಡ ದಯವೂ ಉಂಡ್, ಕೂಟ್ಕ್ ಮಕ್ಕಡ ಬುದ್ದಿವಂತಿಕೆಯೂ ಉಂಡ್,



ಅಯಿಂಗ ಖಂಡಿತಾ ನಂದಾಪ.

ಕಾಮುಣಿ ಕಾಮವ್ವ : ಅಯಿಂಗ ಮಾತ್ರ ನಂದಾಚೆಂಗಿ ಮದಿಯಾ, ನಂಗ ನಂಗಡ ಮಕ್ಕ ಎನ್ನಾಂಡು ಮಾವ.

ಮೇದಯ್ಯ : ಪ್ರೇಮ್ ಎಣ್ಣೆಚಲ್ಲವ್ವ, ನಿಂಗಡ ಮಕ್ಕಳ ತೋಟ ಕೆಲಸಕ್ ಬುಡತೆ ಸ್ಕೂಲ್ಕ್ ಅಯೆರೀಂದ್, ಮಕ್ಕಳ ಸ್ಕೂಲ್ಕ್ ಅಯೆರಿ, ಮಕ್ಕ ಮಿಂಇಕ್ ಬರಡ್, ನಿಂಗ ಮನೆ ಕೂಲಿಕ್ ಅಯಿಚಕ ಎನ್ನನೆ ನಂದಾಪ?

ಕಾಮುಣಿ ಕಾಮವ್ವ : ಈ ತೋಟ ತೊಡಿಯ ಬೇಲ್ ಪಣಿ ದಾರ್ ಮಾಡುವ ಮಾವ, ಕೂಲಿಕ್ ಕೊಡ್ಪಕ್ ಎಚ್ಚಕ್ ದುಡ್ಡ್ ಬೋಂಡು ಆಂಗ್ ದುಡ್ಡೆಲ್ಲಿ ಉಂಡ್.

ಮೇದಯ್ಯ : ಇಕ್ಕ ಬೇಲ್ ಬೊಳೆ ಚಾಯಿತೆ ಬಂದಂಡುಂಡ್, ದೇವಡ ದಯತ್ ಕಾಪಿ ನಲ್ಲ ಮಳು ಚಾಯೋಡೆ ಉಂಡ್, ಆಂಡ ದುಡ್ಡಲ್ ಕೂಲಿಕ್ ಕೊಡಿ, ಆಚೆಂಗಿ ಮಕ್ಕಳ ಮಾತ್ರ ಸ್ಕೂಲ್ಕ್ ಅಯಿಕತೆ ಇರಂಡ.

ಕಾಮುಣಿ ಕಾಮವ್ವ : ಅನ್ನನೆ ಕೂಲಿಯಕ್ ಕೊಡ್ಪಕ್ ದುಡ್ಡ್ ಎಲ್ಲಿ ಉಂಡ್ ಮಾವ ನಂಗಡ ದಿನ ಖರ್ಚೆಕೇ ಕಷ್ಟ ಪಟ್ಟುಂಡುಂಡ್ ನಂಗ, ಇಂಇ ಕೂಲಿಯಕ್ ಕೊಡ್ಪಕ್ ದುಡ್ಡ್ ಎಲ್ಲಿಂಜಿ ಬಪ್ಪ.

ಮೇದಯ್ಯ : ಅಲ್ಲವ್ವ, ಅಚ್ಚಕ್ ಕಾಪಿ ಮಳು ಆಯಿತ್, ಆಂಡ ದುಡ್ಡ್ ಸುಮಾರ್ ಇರುವದ್ ಲಕ್ಷ ಎನ್ನಾಚಿ ಪ್ರೇಮ್ ಮನೆಂಜಿ ಒಂದೂ ಎಡ್ತ ಪೋಪುಲೆ, ಎಲ್ಲಾ ನಿಂಗಲೆ ಉಪಯೋಗ್ ಚಿಡುವ, ಇಕ್ಕ ದುಡ್ಡ್ ಇಲ್ಲೇಂದ್ ಎಣ್ಣುವಿಯ. ಎನ್ನ ಅವಸ್ಥೆ

ಕಾಮುಣಿ ಕಾಮವ್ವ : ಅಕ್ಕು ಮಾವ, ನಂಗಡ ಪಕ್ಕ ದುಡ್ಡ್ ಇಲ್ಲೆ, ಆಂಗ್ ನಂಗಡ ಮಕ್ಕಳ ಪಣಿಕ್ ಕೂಟಿಯವ.

ಮೇದಯ್ಯ : ಕಾಪಿ ಮಳುರ ದುಡ್ಡ್ ಎಲ್ಲಾ ಎನ್ನಾಚವ್ವ.

ಕಾಮುಣಿ ಕಾಮವ್ವ : ನಂಗಡ ಖರ್ಚೆಕೇ ಬೋಂಡು ಅಲ್ಲ ಮಾವ.

ಮುದ್ದವ್ವ : ನಿಂಗ ಎನ್ನಂಗ್ ಆಂಡ ವಿಷಯತ್ ಮುಂಡತೆ ತಕ್ಕ ಪರೆವಿರಾ, ನಿಂಗ ಮುಂಡತಿರಿ ಕಾಮುಣಿ ಎಣ್ಣೆಚಲ್ಲ, ದುಡ್ಡ್ ಇಲ್ಲೇಂದ್, ಆಚೆಂಗಿ ಮಕ್ಕಳ ಸ್ಕೂಲ್ಕ್ ಅಯಿಕತೆ ಇಪ್ಪದ್ ಸರಿ ಅಲ್ಲ ನೀನ್ ನೀಡ ವಡಿಯಂಗ್ ಎಣ್ಣೆತ್ ಮಕ್ಕಳ ಸ್ಕೂಲ್ಕ್ ಅಯಿಪ ಏರ್ಪಾಡ್

ಮಾಡ್, ಓದ್ ಚೆಂಗಿ ಮಾತ್ರ ಮಕ್ಕಕ್ ಭವಿಷ್ಯ ಮಕ್ಕ ಓದಡ್.  
ಕಾರಿ ಕಾರ್ಯಪ್ಪ/ಕಾಮುಣಿ ಕಾಮವ್ವ: ಅದ್ ಬಯ್ಯನೋಟನ, ಅದ್ಯಪ್ಪ  
ಉಳ್ಳನ್ನಕೆ ಆಪ.

ಮೇದಯ್ಯ : ಇಂಇ ನಿಂಗಡ ಇಪ್ಪ, ನಿಂಗಡ ಮಕ್ಕ ನಿಂಗ ನೋಟಿಯೊಳಿ,  
ನಂಗ ಎಣ್ಣವದ್ ನಂಗಡ ಧರ್ಮ, ನಲ್ಲಾಂಗ್ ಎಣ್ಣಾಚಿ, ಕೇಪದೂ  
ಬುಡುವದೂ ನಿಂಗಕ್ ಬುಟ್ಟದ್,

\* \* \* \* \*

## ಸೀನ್ ಪದಿಮೂಂದ್

ಮೇದಯ್ಯ : ಅಲ್ಲಪ್ಪ ಕಾರಿ, ಇಕ್ಕ ನಂಗಡ ಪದ್ಧತಿ ಪೋಲೆ ಒಕ್ಕೆಲ್ಲಾ ಕೂಡಿತ್  
ನಾಗ(ಪೂದ)ಂಗ್ ಕೊಡ್ಪ ಗುರು ಕಾರಣಂಗ್ ಮೀದಿ ಬೆಪ್ಪ  
ಎಕ್ಕ, ಮನೆಕಾರ ಎನ್ನೇಂಗಿ ತೀರ್ಮಾನ ಮಾಡಿತಾ ಎಕ್ಕ  
ಕೊಡ್ಪಾಂದ್..

ಕಾರಿ ಕಾರ್ಯಪ್ಪ : ಓ! ನಾನ್ ಮರ್ಂದ್ ಪೋಯೆ, ತಡ್ಡಿಯಪ್ಪ ನಿನ್ನಾಂದೇ  
ಎಣ್ಣಾಚಿ, ತೊಲಿಯಾರ್ ಪತ್ತಾಂಗ್ ಗುರು ಕಾರಣಂಗ್ ಕೊಡ್ಪ,  
ಆಂಗ್ ಒರ್ ದಿನ ಮಿಂಜಾ ನಾಗಂಗ್ ಕೊಡ್ಪಲೊ.

ಮೇದಯ್ಯ : ಏ ಅದಾನ ಬೆರಿಯ ನೀಡ ತಮ್ಮಣಂಗ್ ಎಣ್ಣೆ. ಅಯಿಂಗಡ ಮಕ್ಕಕೂ ಅಯಿಂಗಕೂ ರಜ ಉಂಡೇಂಗಿ ಅನುಕೂಲ ಆಪಚೆಂಗಿ ಅವೂ ಬರಡ್ ಚೆನ್ನ ಬೆರಿಯ ಅರಿವಿಕೆ ಕೊಡ್ತಕ ಅಯಿಂಗಕೂ ತಯಾರಿ ಮಾಡಿಯವಕ್ ಚೆನ್ನ ಸುಲಭ ಆಕು.

ಕಾಮುಣಿ ಕಾಮವ್ವ : (ಮನಸ್ಸಲೇ.. ಅಯಿಂಗಕ್ ಬೆರಿಯ ಎಣ್ಣೊಂಡು ತಯಾರಿಕ್ ಟೈಮ್ ಕೊಡ್ಕೊಂಡು, ಎಂತಾ ಮುದಿಯ)..

ಕಾರಿ ಕಾರ್ಯಪ್ಪ : ಆಚಿ ಅಪ್ಪಯ್ಯ, ನಾಳೆ ಫೋನ್ ಮಾಡಿತ್ ಎಣ್ಣುವಿ.

ಮುದ್ದವ್ವ : ಅಲ್ಲಾ, ನಾಳೆ ಅವು ದಂಡಾಳೂ ಕೆಲಸಕ್ ಪೋಯಿತಿಪ್ಪ, ಮಕ್ಕಕೂ ಸ್ಕೂಲ್ ಹೋಮ್ ವರ್ಕ್ ಎಲ್ಲ ಇಪ್ಪ ಇಂದ್ ರಜ ಆಂಗ್ ಇಂದೇ ಎಣ್ಣೇರ್.

ಕಾಮುಣಿ ಕಾಮವ್ವ : (ಪುನಹ ಮನಸ್ಸಲೇ.. ಈ ಮುದಿರ ಕೊಣಿ ನೋಟಿ, ಅಯಿಂಗಡ ಆಫೀಸ್ ಮಕ್ಕಡ ಚಿಂತೆ ನಂಗಡ ಬಗ್ಗೆ ಎಳ್ಳಚ್ಚಕೂ ಚಿಂತೆ ಇಲ್ಲೆ) ಇದಾ ನಾನೆ ಫೋನ್ ಮಾಡಿತ್ ತಪ್ಪಿ ನಿಂಗಲೇ ಎಣ್ಣೆಯೊಳಿ, (ಫೋನ್ ಮಾಡಿತ್ ರಿಂಗ್ ಆನ ಪಿಂಞ ಮಾವಂಗ್ ಕೊಡ್ಪ)

ಮೇದಯ್ಯ : ನಾಡ ಕೆಮಿ ಸರಿಯಾಯಿತ್ ಕೇಪುಲೆ ಈ ಫೋನೂ ಗರಗರ ಎಣ್ಣುವ ನಾನಂತ ಎಣ್ಣುವ ನೀನೇ ಎಣ್ಣೆಯ..

ಕಾರಿ ಕಾರ್ಯಪ್ಪ : ಇಲ್ಲೆ ಅಪ್ಪ, ನೀನ್ ಎಣ್ಣುವದೇ ಸರಿ ನಾನ್ ಎಣ್ಣೆ ಚೆಂಗಿ ಸರಿ ಆಪುಲೆ, ನೀನ್ ಎಣ್ಣುವದ್ ಸರಿ..

ಮುದ್ದವ್ವ : ಅದ್‌ಂಗೆನ್ನ ನಿಂಗಡ ವಾದ, ನಿಂಗಲೇ ಎಣ್ಣೆ, ಕಾರಿ ಎಣ್ಣಾನನ್ನಕೆ ನಿಂಗಲೇ ಎಣ್ಣೆ, ಅಯಿಂಗಡ ಸ್ವರ ಕೇಟನ್ನಕೆ ಆಪ ಮೂಡಂತೂ ಕಾಂಬುಲೆ ತಕ್ಕೇಂಗಿ ಕೇಟವನ..

ಕಾಮುಣಿ ಕಾಮವ್ವ : (ಮನಸ್ಸಲೇ.. ನೋಟಪ್ಪ ಇದ್ ಸಂಗತಿ ಅಯಿಂಗಡ ಮೂಡ್ ಕಾಂಬುಲೇಂದ್ ಸ್ವರ ಕೇಪ ಆಸೆ) (ಫೋನ್ ರಿಂಗಾಪ.. ಬೋಜಿ ಬೋಜಮ್ಮ ತಕ್ಕ ಪರೆವ)

ಮೇದಯ್ಯ : ಇಲ್ಲಿ ನಾನ್ ತಕ್ಕ ಪರೆವ ಅಲ್ಲಿ ದಾರ್?

ಬೋಜಿ ಬೋಜಮ್ಮ : ಮಾವ ಇಲ್ಲಿ ನಾನ್ ಅವು ರಜ ಆಚೆಂಗಿನೂ ಕೆಲಸಾಂದ್ ಪೋಯಿತ್ ಇಕ್ಕ ಆಫೀಸ್‌ಂಜಿ ಬಂದಿಯೆ, ಕಾಲ್ ಕೈ

ಕತ್ತುವಂಜಿ, ತೊಪ್ಪಕ್ ದೇವಡ ಕೋಂಬರೆಕ್ ಪೋಯಿತ್, ಎಂತ ವಿಷಯ ಮಾವ..

ಮೇದಯ್ಯ : ಒಂದೂ ಇಲ್ಲೆವ್ವ, ನೀಕ್ ಎಣ್ಣೆಚೆಂಗಿ ಎನ್ನ ಅಂವಂಗ್ ಎಣ್ಣೆಚೆಂಗಿ ಎನ್ನ, ನಂಗಡ ಪತ್ತಾಂಡ ನಾಗ ಪೂಜೆ ಇರುವತ್ತಾರ್ ಅಕ್ಪೋಬರ್ಲ್, ಗುರು ಕಾರಣಂಗ್ ಮೀದಿ ಬೆಪ್ಪ ಇರುವತೇಳ್ ಅಕ್ಪೋಬರ್ಲ್, ನಿಂಗಕ್ ಅನುಕೂಲ ಉಂಡೇಂಗಿ ಬಾರಿ ನಿಂಗಳೂ, ಆಂಗೆಲ್ಲ ಬರತೆ ಮೂಂದ್ ನಾಲ್ ಕಾಲ ಆಯಿ ಪೋಚಲ್ಲಾ ಆಂಗ್ ಬಾರೀಂದ್ ಎಣ್ಣುವಕ್ ಪೋನ್ ಮಾಡಿಯೆ. ಅಲ್ಲಿ ಪ್ರೇಮ್ ಗ್ಯಾನ್ ಕಾವ್ಯ ಎಲ್ಲಾ ಚಾಯಿತೆ ಉಂಡಾ. ಮಕ್ಕ ಎಕ್ಕೋಲು ಸ್ಕೂಲ್ಕ್ ಪೋಯೆಂಡುಂಡಾ..

ಬೋಜಿ ಬೋಜಮ್ಮ : ಎಲ್ಲಾ ನಿಂಗಡ ಆಶೀರ್ವಾದತೂ ದೇವಡ ದಯತೂ ಚಾಯಿತೇ ಉಂಡ್ ಮಾವ ಮಕ್ಕ ಊಟ ಬೋಂಡಿಕಿ ಬುಟ್ಟರು ಆಚೆಂಗಿ ಸ್ಕೂಲ್ ಮಾತ್ರ ತಪ್ಪುಚಿಡುಲೆ. ಅಲ್ಲ ಮಾವ ಅಲ್ಲಿ ಮಾಯಿ ಬಾವ ಅಕ್ಕಯ್ಯ ಚಾಂಗ್ ಸೀತೆ ಎಲ್ಲಾ ಚಾಯಿತೆ ಉಂಡಾ, ಮಕ್ಕ ಸ್ಕೂಲ್ಕ್ ತಪ್ಪತೆ ಪೋಯೆಂಡುಂಡಾ.

ಮೇದಯ್ಯ : ನಂಗೆಲ್ಲಾ ಇಲ್ಲಿ ಚಾಯಿತೆ ಉಂಡವ್ವ, ಚಾಂಗ್ ಸೀತೆ ಸರಿಯಾಯಿತ್ ಸ್ಕೂಲ್ಕ್ ಪೋಯೆಂಡಿಲ್ಲೆ, ಆ ಪಣಿ ಈ ಪಣೀಂದ್ ಬೇಲ್ಕೋ ತೋಟಕೋ ಪೋಯಿರುವ

ಬೋಜಿ ಬೋಜಮ್ಮ : ಚೆ ಚೆ ಮಕ್ಕಳ ಎಂತ ಬೇಲ್ ತೋಟ ಪಣಿಕ್ ಅಯಿಪ ಸ್ಕೂಲ್ಕ್ ಅಯಿಪ ಬುಟ್ಟಿತ್ ನಿಂಗ ಬಾವಂಗು ಅಕ್ಕಯ್ಯಂಗು ಎಣ್ಣೆತ್ ಸ್ಕೂಲ್ಕ್ ಮಕ್ಕಳ ತಪ್ಪತೆ ಅಯಿಪ್ಚಿಡಿ.

ಮೇದಯ್ಯ : ನಂಗ ಎಣ್ಣುವದ್ ಎಣ್ಣೆತ್ ಪ್ರೇಮೂ ಅಂದ್ ಬಂದಿತಿಪ್ಪಕ, ಎಣ್ಣೆಚೆ ಮಕ್ಕಡ ಅಪ್ಪ ಅವ್ವಂಗ್ ಬುಟ್ಟದ್ ನಂಗಕ್ ಒಂದೂ ಮಾಡುವ ಕಯ್ಯಲೆ. ಇದಾ.. ಮಾಯಿ ತಕ್ಕ ಪರೆವಲೋ.

ಮುದ್ದವ್ವ : (ಕಣ್ಣಲ್ ನೀರ್) ಎನ್ನನೆ ಉಳ್ಳಿಯವ್ವ, ಪ್ರೇಮ್ ಎನ್ನನೆ ಉಂಡ್, ಮಕ್ಕ ಎನ್ನನೆ ಉಂಡ್.

ಬೋಜಿ ಬೋಜಮ್ಮ : ಎಲ್ಲಾರು ಚಾಯಿತೆ ಉಂಡ್ ಮಾಯಿ, ನಿಂಗ ಎನ್ನನೆ ಉಳ್ಳಿರಾ, ಬಾವ ಅಕ್ಕಯ್ಯ ಮಕ್ಕ ಎಲ್ಲ ಎನ್ನನೆ ಉಂಡ್, ಚಾಯಿತೆ

ಉಂಡಾ, ಅಯಿಂಗಳ ಎಲ್ಲಾ ಕೇಟಿತ್ ಎಣ್ಣೆ, ಇದೋಳಿ ನಿಂಗಡ  
ಮೋಂವ ಬಾತ್ ಅಯಿಂಗಳ್ ಕೊಡ್ಪಿ.

ಪ್ರೇಮ್ ಪೊನ್ನಪ್ಪ : ಎಂತವ್ವಯ್ಯ, ಚಾಯಿತೆ ಉಳ್ಳ, ನೀನ್ ಎನ್ನನೆ  
ಉಳ್ಳಿಯಾ..

ಮುದ್ದವ್ವ : ಮೂಡ್ ಕಂಡ್ಲೇಂಗಿ ಸ್ವರೇಂಗಿ ಕೇಟಿತ್ ದುಂಬಾ ಕುಶಿ ಆಚಿ,  
ಅಪ್ಪ ಎಂತೋ ಎಣ್ಣೆಚಲ್ಲ, ನಾಗಂಗೂ ಗುರು ಕಾರಣಂಗು ಕೊಡ್  
ಪಾನ ನಿಂಗ ಬಾರೀಂದ್ ಕಾಕುವಕ್ ಪೋನ್ ಮಾಡಿಯೆ..

ಪ್ರೇಮ್ ಪೊನ್ನಪ್ಪ : ಅವ್ವಯ್ಯ, ನಾಕೂ ಬೋಜಿಕೂ ಪ್ರೊಮೋಸನ್ ಆಯಿತ್,  
ನಾನೂ ಮನಸ್ಲೇ ಗ್ಯಾನ ಮಾಡಿಯೆಂಡಿಂಜ, ಪ್ರೊಮೋಸನ್  
ಆಚೆಂಗಿ ಕಾರಣಂಗ್ ಇಡೊಂಡೂಂದ್, ಇಕ್ಕ ದಂಡ್ ದಿವಸ ರಜ  
ಮಾಡಿತ್ ಎಲ್ಲಾರು ಬಪ್ಪ, ಎನ್ನನೆಯೋ ಇಕ್ಕ ನಂಗ ಕಾರ್ ಎಡ್ತಿತ್  
ಅದ್ಲೇ ಬಂದನ್ನಕೆ ಆಪ.

ಮುದ್ದವ್ವ : ನಿಂಗ ಕಾರ್ ಎಡ್ತಿತುಳ್ಳಿರಾ, ನಲ್ಲದಾಚಪ್ಪ, ದೇವ ನಲ್ಲದ್  
ಮಾಡಡ್(ಅಕ್ಕಣೆಕ್ ಮೇದಯ್ಯ ಎಂತಲೋ) ಅದ್ ನಿಂಗಡ  
ಮೋಂವ ಪುದಿಯೆ ಕಾರ್ ಎಡ್ತಿತಲೋ ಅದ್ಲೇ ಬಪ್ಪಲೋ.

ಮೇದಯ್ಯ : ದೇವ ನಲ್ಲದ್ ಮಾಡಡ್

ಕಾರಿ ಕಾರ್ಯಪ್ಪ : (ಮನಸ್ಲೇ) ಎಲ್ಲಾ ನಲ್ಲದ್ ಅಯಿಂಗಳೇ  
ಮಾಡಡ್ಂದ್ ಎಲ್ಲಾ ಆಶೀರ್ವಾದ ಅಯಿಂಗಳೇ ಆಚೆಂಗಿ  
ನಂಗಕೆಂತಾ)..

\* \* \* \* \*

## ಸೀನ್ ಪದಿನಾಲ್

(ಬೆಂಗಳೂರ್‌ಂಜಿ ಆಲ್ಟೋ ಕಾರ್ಲ್ ಪ್ರೇಮ್ ಪೊನ್ನಪ್ಪ, ಬೋಜಿ ಬೋಜಮ್ಮ ಗ್ಯಾನ್ ಗಣಪತಿ ಕಾವ್ಯ ಕಾವೇರಿ ಕೊಡಗ್‌ಕ್ ಬಂದಂಡುಂಡ್)(ಮದ್ದೂರ್‌ಲ್ ಉಂಬಕ್ ನಿಪ್ಪುಚಿಡುವ)

(ಪ್ರೇಮ್‌ರ ಸಿನೇತ ರಜತ್ ಕರುಂಬಯ್ಯ ಕಟ್ಟುವ)

ರಜತ್ : ಏಯಿ ಪ್ರೇಮ್ ಚೆನ್ನ ಪೆಗ್ ಇಟ್ಟುಂಡ್ ಡ್ರೈವ್ ಮಾಡಂಗ ಚಾಯಿ ಇಪ್ಪ..

ಪ್ರೇಮ್ ಪೊನ್ನಪ್ಪ : ಅಲ್ಲ ರಜತ್, ಕಾನೂನೇ ಉಂಡ್, ಕುಡ್‌ಚಿತ್ ಡ್ರೈವ್ ಮಾಡುವಕಾಗಾಂಡ್, ಅಲ್ಲತೆ ಎನ್ನೇಂಗಿ ಆಕ್ಸಿಡೆಂಟ್ ಆಯಿರ್‌ತೇಂಗಿ ದುಂಬಾ ತೊಂದರೆ ಆಪ ಕುಡ್‌ಚಿತುಂಡೇಂಗಿ, ಆಂಗೇ ಕುಡ್‌ಚಿತ್ ಡ್ರೈವ್ ಮಾಡತೆ.

ರಜತ್ : ನೀಡ ಗೊಡ್ಡ ಪುರಾಣ ಎಲ್ಲ ಬೋಂಡ, ದಂಡ್ ಪೆಗ್ ಇಟ್ಟುಂಡ್ ಡ್ರೈವ್ ಮಾಡ್‌ಚೆಂಗಿ ಆಂಡ ಖುಶಿಯೇ ಬೋರೆ, ನೀಕೆಂತ ಗೊತ್ತ.

ಪ್ರೇಮ್ ಪೊನ್ನಪ್ಪ : ಅಲ್ಲ ರಜತ್, ನೀಡ ಪೊಣ್ಣ್ ಮಕ್ಕ ಎಲ್ಲಾ ಕಾರ್ಲ್ ಉಂಡ್, ಅಯಿಂಗಡ ಪ್ರಾಣವೂ, ಬೋರೆ ಪಾಪತಯಿಂಗಡ ಪ್ರಾಣವೂ ನೀಡ ಕೈಲ್ ಇಪ್ಪ, ಚೆನ್ನ ಎಚ್ಚರತ್ ಇರ್, ನಾಡ ಅಭಿಪ್ರಾಯತ್ ನೀನ್ ಕುಡಿಪದ್ ತಪ್ಪು.

ರಜತ್ : ಅದೆಲ್ಲಾ ನಾಕ್ ಅಭ್ಯಾಸ ಉಂಡ್, ಡ್ರೈವಿಂಗ್ ಎಣ್ಣೆಚೆಂಗಿ, ನಾಡ ಎಡ್‌ತೆ ಕೈರ ಕೆಲಸ, ನೀನೊಂದು ವರೀಸ್ ಮಾಡತೆ, ನೀನ್ ಬೋಂಡಿಕಿ, ನೀಡ ಪೊಣ್ಣ್‌ಕ್ ಬೊತ್ತಿಯುಂಡ್ ಕುಡಿಕತೆ ಇರ್, ನಾಕೆನ್ನ, ನಾನ್ ಮಾತ್ರ ದಂಡ್ ಪೆಗ್ ಇಟ್ಟಿತೇ ಪೋಪ, ಬೆರಿಯ ಇಟ್ಟವಂಡು, ಇಲ್ಲೇಂಗಿ ಮಕ್ಕ ಗಲಾಟೆ ಮಾಡುವ.

ಪ್ರೇಮ್ ಪೊನ್ನಪ್ಪ : ನಾನ್ ಪೊಣ್ಣ್‌ಕ್ ಬೊತ್ತಿತ್ ಕುಡಿಕತೆ ಅಲ್ಲ, ಕಾನೂನ್‌ಕ್ ಬೊತ್ತಿತ್, ಅಲ್ಲತೆ ಎನ್ನೇಂಗಿ ಆಕ್ಸಿಡೆಂಟ್ ಆಯಿರ್‌ತೇಂಗಿ ತೊಂದ ರೇಂದ್ ಕುಡಿಕತೆ, ನೀಡ ಇಷ್ಟ, ನೀನ್ ಎನ್ನ ಬೋಂಡಿಕಿ ಮಾಡಿಯ

ಆಚೆಂಗಿ ನಾಡ ಅಭಿಪ್ರಾಯತ್ ಕುಡ್ಚೆತ್ ಡ್ರೈವ್ ಮಾಡುವದ್  
ತಪ್ಪು.

ರಜತ್ : ಬೈ ಬೈ ...

(ಪ್ರೇಮ್ ಮಕ್ಕ ಉಂಡಿತ್ ಪೊರಡುವ) (ಶ್ರೀರಂಗ ಪಟ್ಟಣ -  
ಇಲವಾಲ ಬೈ ಪಾಸ್‌ಕಾಲೆ ಬಂದಂಡಿಪ್ಪಕ ಒರ್ ಕಾರ್ ದುಂಬಾ  
ಸ್ಪೀಡ್‌ಲ್ ಓವರ್ ಟೇಕ್ ಮಾಡುವ)

ಬೋಜಿ ಬೋಜಮ್ಮ : ಅದ್ ನೀಡ ಸಿನೇತಂಡ ಕಾರ್ ಅಲ್ಲಾ..

ಪ್ರೇಮ್ ಪೊನ್ನಪ್ಪ : ಅಕ್ಕು ಅವಂಡದೇ ಕಾರ್, ಅವಂಡ ಸ್ಪೀಡ್ ನೋಟುವಕ,  
ಅಂವ ಕುಡ್ಚೆಯೆ ದಂಡ್ ಪೆಗ್ ಅಲ್ಲ ಚೆನ್ನ ಜಾಸ್ತಿ ಕುಡ್ಚೆತ್  
ಕಾಂಬ

ಬೋಜಿ ಬೋಜಮ್ಮ : ಸೇಫ್ ಆಯಿತ್ ಮನೆಕ್ ಎತ್ತಚೆಂಗಿ ಮದಿ ಅಪ್ಪ.  
(ಅವು ಬಿಳಿಕೆರೆಕ್ ಎತ್ತುವಕ ಜನ ದುಂಬಾ ಕೂಡಿತಿಪ್ಪ)

ಪ್ರೇಮ್ ಪೊನ್ನಪ್ಪ : ಎನ್ನಾಚೆಂದ್ ನೋಟನ, ಎನ್ನಂಗ್ ಟ್ರಾಫಿಕ್ ಬಂದ್  
ಮಾಡಿಯೇಂದ್ ಗೊತ್ತಾಪುಲೆ, ಎಚ್ಚ ನೇರ ಆಪ ಎನ್ನೋ.

ಬೋಜಿ ಬೋಜಮ್ಮ : ನೋಟ್, ಆ ಕಾರ್ ನೀಡ ಸಿನೇತ ರಜತ್‌ರದೇ..

ಪ್ರೇಮ್ ಪೊನ್ನಪ್ಪ : ಕಾರ್‌ಂಜಿ ಇಳ್‌ಂಜಿತ್ ನೋಟುವ.. ರಜತ್ ಪೊಲೀಸ್‌ರ  
ಎದಿಕೆ ನಿಂದಿತಿಪ್ಪ)

ರಜತ್ : ಹೈ ಪ್ರೇಮ್ ನೀನ್ ಬಂದಿಯಾ, ನಾನೋರ್ ಮಲ್ಲ ಕೋಳಿನ  
ಕೊಂದ್‌ಟ, ಆಂಗ್ ಈ ಜನ ಇಚ್ಚಕ್ ಗಲಾಟೆ ಮಾಡಿಯಂಡುಳ್ಳ,  
ಅಯಿಂಗಕ್ ಅಯಿಂಬದಾಯಿರ ಉರ್‌ಪಿಯ ಕೊಡ್‌ಕೊಂಡುಲೋ  
ಆ ಕೋಳಿ ಕೊಂದಾಂಗ್.

ಪ್ರೇಮ್ ಪೊನ್ನಪ್ಪ : ಎಸ್. ಐ. ರ ಪಕ್ಕ ಪೋಯಿತ್, ಏನು ವಿಷಯ ಸರ್,  
ಏನಿಷ್ಟು ಗಲಾಟೆ.

ಎಸ್. ಐ. : ಇವರು ಕುಡಿದು ಡ್ರೈವ್ ಮಾಡಿ ಈ ಕೋಳಿ ಕೊಂದಿದ್ದಾರೆ,  
ಅದಕ್ಕೆ ಈ ಜನ ಐವತ್ತು ಸಾವಿರ ಕೇಳುತಿದ್ದಾರೆ, ಅದು ಕೊಟ್ಟರೆ  
ಕೇಸ್ ಹಾಕಲ್ಲಾ..

ಪ್ರೇಮ್ ಪೊನ್ನಪ್ಪ : ಅಲ್ಲ ಸರ್, ಒಂದು ಹುಂಜ ಕೋಳಿ ಸತ್ತರೆ ಐವತ್ತು  
ಸಾವಿರ ಏನು ನ್ಯಾಯ.

ಎಸ್. ಐ. : ಈ ಜನ ಹಾಗೇನೆ, ಏನೂ ಮಾಡಕ್ಕಾಗಲ್ಲ..

ಪ್ರೇಮ್ ಪೊನ್ನಪ್ಪ : ಆಯಿತು ಸರ್, ಎಫ್. ಐ. ಆರ್. ಫೈಲ್ ಮಾಡಿ, ಏನಾಗುತ್ತೆ ಕೋರ್ಟ್‌ನಲ್ಲಿ ನೋಡೋಣ. ಅವನು ಕುಡಿದಿರಬಹುದು, ಆದರೆ ಸತ್ತದ್ದು ಕೋಳಿ ಮಾತ್ರ, ಅದರ ಬೆಲೆ ಐದುನೂರು ಅಥವಾ ಆರುನೂರು ಮಾತ್ರ, ಕೋರ್ಟ್‌ನಲ್ಲೇ ನೋಡುವ ಬಿಡಿ. ನ್ಯಾಯ ಪ್ರಕಾರ ಕಡಿಮೆ ಮಾಡಿದರೆ ಎಮಿಕೇಬಲ್ ಸೆಟ್ಲೆಮೆಂಟ್ ಮಾಡಿ ಅಷ್ಟೇ.

ಎಸ್. ಐ. : (ಜನಡ ಕೂಡೆ ಚರ್ಚೆ ಮಾಡಿತ್ ಬಪ್ಪ) ಸರ್ ನೀವು ಹೇಳಿದಿರಿ ಅಂತ ಐದು ಸಾವಿರಕ್ಕೆ ಒಪ್ಪಿಸಿದ್ದೇನೆ, ಅದು ಕೊಟ್ಟರೆ ಅವರು ಹೋಗ ಬಹುದು.

ಪ್ರೇಮ್ ಪೊನ್ನಪ್ಪ : ರಜತ್ ಅಂಜಿ ಆಯಿರ ಕೊಡ್ತಕ ಕೇಸ್ ಫೈಲ್ ಮಾಡುಲೆಲೋ, ಅದ್ ಅಚ್ಚಕ್ ಕೊಡ್ತರ್.

ರಜತ್ : ಪ್ರೇಮ್ ನಾಡ ಪಕ್ಕ ಅಚ್ಚಕ್ ಇಲ್ಲೆರೇ, ನೀಡ ಪಕ್ಕ ಉಂಡೇಂಗಿ ತಂದಿತಿರ್, ಬಯ್ಯ ನಾನ್ ನೀಕ್ ತಪ್ಪಿ, ಇದೋರ್ ಸಹಾಯ ಮಾಡ್.

ಪ್ರೇಮ್ ಪೊನ್ನಪ್ಪ : ನಾಡ ಕೈಲ್ ಅಚ್ಚಕ್ ಇಲ್ಲೆ, ಚೆನ್ನ ಕಮ್ಮಿ ಉಂಡ್, ನಿಲ್ಲ ನಾಡ ಪೊಣ್ಣಾರ ಕೈಲ್ ಇಕ್ಕು ಅವಡ ಕೈಂಜಿ ಕೇಟಿತ್ ಅಡ್ಡನ್ನ್ ಮಾಡುವಿ. ನಿಂದ..

ಪ್ರೇಮ್ ಪೊನ್ನಪ್ಪ : ಏ ಬೋಜಿ ನೀಡ ಕೈಲ್ ಚೆನ್ನ ದುಡ್ಡ್ ಉಂಡೇಂಗಿ ತಾ.

ಬೋಜಿ ಬೋಜಮ್ಮ : ಇದೋಳಿ ನಾನ್ ಎಂತಾಂಗೋ ಎಡ್‌ತಂಡಿತಿಂಜ, ಈನ ಕೊಂಡೋಯಿತ್ ಕೊಡಿ, ಅಯಿಂಗಳ ಈ ಕಷ್ಟತಿಂಜ ಒಮ್ಮೆತೆ ಪಾರ್ ಮಾಡಿ..

ಪ್ರೇಮ್ ಪೊನ್ನಪ್ಪ : (ದುಡ್ಡ್ ಎಡ್‌ತಂಡ್ ಪೋಯಿತ್ ಎಸ್.ಐ.ಕ್ ಕೊಡ್‌ತಿತ್ ರಜತ್‌ನ ಬುಡ್‌ತುವ)

ರಜತ್ : ಪ್ರೇಮ್ ನೀಡ ತಕ್ಕ ಕೇಕತೆ, ಕುಡ್‌ಚಿತ್ ಡ್ರೈವ್ ಮಾಡ್‌ನಾಂಗ್ ಈ ತೊಂದರೆ, ನೀಡ ತಕ್ಕ ಕೇಟತುಂಡೇಂಗಿ ಈ ತೊಂದರೆ ಇಪ್ಪಕಿಂಜಿಲೆ ಇಂಚ್ ಮಿಂಚ್‌ಕ್ ಕುಡ್‌ಚಿತ್ ಡ್ರೈವ್ ಮಾಡುಲೆ,



ಇದ್ ನಾಡ ಆಣೆ, ಖಂಡಿತಾ ಮಾಡುಲೆ. ನೀಡ ದುಡ್ಡ್  
ಬೆಂಗಳೂರ್‌ಕ್ ಬಯ್ಯಕ್ ಎತ್ತನದು ತಂದುರಿ.

ಪ್ರೇಮ್ ಪೊನ್ನಪ್ಪ : ಆಚೆ ನಾಡ ದುಡ್ಡಾರ ವಿಷಯ ಬಯ್ಯ, ನೀನ್ ಇಂಞ್  
ಮಿಂಞಕ್ ಕುಡ್‌ಚಿತ್ ಡ್ರೈವ್ ಮಾಡತೆ, ಅಚ್ಚಕ್ ಮದಿ, ಕಳ್ಳ  
ಕುಡಿಪದ್ ತಪ್ಪು ಅಲ್ಲಾ, ಆಚೆಂಗಿ ಕುಡ್‌ಚಿತ್ ಡ್ರೈವ್ ಮಾಡುವದ್  
ಖಂಡಿತಾ ತಪ್ಪು. ಕಳ್ಳರ ಗುಲಾಮ ಆಪಕಾಗ, ಒರ್ ನಿರ್ಕ್  
ಬೋಂಡು.

ರಜತ್ : ಖಂಡಿತ ಪ್ರೇಮ್, ಇಂಞ್ ಮಿಂಞಕ್ ಕುಡ್‌ಚಿತ್ ಡ್ರೈವ್  
ಮಾಡುಲೆ... ಮಾಡುಲೆ.

ರಜತ್ ರ ಪೊಣ್ಣೆ : ದುಂಬಾ ತ್ಯಾಂಕ್ಸ್ ನಿಂಗಳಗುಂಡ್, ಇವಂಡ ಕಳ್ಳ  
ಅಭ್ಯಾಸ ಕಮ್ಮಿ ಆಕು, ನಿಂಗಳಗುಂಡ್ ದುಂಬಾ ಸಹಾಯ ಆಚೆ,  
ದುಂಬಾ ತ್ಯಾಂಕ್ಸ್.

ಪ್ರೇಮ್ ಪೊನ್ನಪ್ಪ : ಅದ್‌ಲ್ ಎಂತ, ಒರ್ ಮನುಷ್ಯನಾಯಿತ್  
ಇಂಞೊಬ್ಬಂಗ್, ಮಾಡುವ ಕಯ್ಯುವಾನ ಮಾಡಿಯೆ ಅಚ್ಚಕೆ,  
ಅದ್‌ಂಗೆಲ್ಲ ಎಂತ ತ್ಯಾಂಕ್ಸ್ ಚಾಯಿತೆ ಪೋಯಿ, ಸೇಫಾಯಿತ್  
ಮನೆಕ್ ಎತ್ತಿ, ಮನೆಲ್ ಎಲ್ಲಾರು ಕಾತಂಡ್ ಇಕ್ಕು.

ರಜತ್ : ಬೈ ಪ್ರೇಮ್ ಬೈ....

\* \* \* \* \*

## ಸೀನ್ ಪದಿನಂಜಿ

(ನಾಡರ ಮನೆ ಕಾರಲ್ ಪ್ರೇಮರ ಸಂಸಾರ ಬಂದೆತ್ತಚಿ) ಅಪ್ಪ ಅವ್ವಂಡ ಅಣ್ಣ  
ಮೊಮ್ಮಂಡ ಕಾಲ್ ಪುಡಿಪ)(ಕಾಮುಣಿಯೂ ಮಕ್ಕಳೂ ಕಾರನೇ ನೋಟುವ)

ಮೇದಯ್ಯ : ಮಕ್ಕ ಕಾರ್ ಡ್ರೈವ್ ಮಾಡಿಯೆ ಬಂದದ್ ಅಲ್ಲ, ಸುಸ್ತಾಯಿತಿಕ್ಕು,  
ಪೋಯಿತ್ ಕಾಲ್ ಕೈ ಕತ್ತಿಯ ಬಾರಿ, ಅಕ್ಕಣೆ ಕಾಪಿ ಆಪ,

ಮುದ್ದವ್ವ : ಕಾಮುಣಿ ಚೆನ್ನ ಕಾಪಿ ಮಾಡವ್ವ, ಮಕ್ಕ ಬಂದದ್, ತಿಂಬಕ್ ಎನ್ನೇಂಗಿ  
ಬೆಯಿ, ಕೆಲ ಬಯಿಚಿತಿಕ್ಕು..

ಪ್ರೇಮ್ ಪೊನ್ನಪ್ಪ : ನಂಗ ಮದ್ದೂರ್ಲ್ ಉಂಡತವ್ವಯ್ಯ, ಕೆಲ ಒಂದೂ  
ಬಯಿಪುಲೆ

ಮುದ್ದವ್ವ : ನಿಂಗಕ್ ಬಯಿಪಕಿಲ್ಲೆ, ಚುಮ್ಮಿಯಕ್ ಅನ್ನನೆ ಅಲ್ಲಾ...

ಗ್ಯಾನ್/ಕಾವ್ಯ: ಅಕ್ಕು ಅವ್ವಯ್ಯ, ನಂಗಕ್ ಪೇಟೆ ತಿಂಡಿ ತಿಂದ್ ತಿಂದ್ ನಾಡ್  
ತಿಂಡಿ ದುಂಬಾ ಕುಶಿ ಆಪ ಅದ್‌ಂಗಾಯಿತ್ ಕೆಲ ಬಯಿಚಿ  
ತಿಲ್ಲೇಂಗಿನೂ ತಿಂಬ

ಬೋಜಿ ಬೋಜಮ್ಮ : ತಿಂಡಿ ಪೋತ ಮಕ್ಕ, ಕೂಳ್ ಕರಿ ಬೋಂಡ, ತಿಂಡಿ  
ಕ್ಟ್ಚೇಂಗಿ ಮದಿ, ಎಂತೆಲ್ಲೋ ಎಚ್ಚಕೋ ತಿಂದಿತ್ ಕೆಲ ಪಾಳ್  
ಮಾಡಿಯವತಿ.

ಕಾಮುಣಿ ಕಾಮವ್ವ : ನಂಗ ತಿಂಬುಲಿಯಾ, ನಂಗಡ ಕೆಲ ಪಾಳಾಪಾ? ನೀಡ  
ಮಕ್ಕ ಮಾತ್ರ ಎನ್ನ ವಿಶೇಷವಾ..

ಬೋಜಿ ಬೋಜಮ್ಮ : ಅನ್ನನೆ ಅಲ್ಲ ಅಕ್ಕಯ್ಯ, ನಿರ್ಕ್ ಕುಂಜಿ ಜಾಸ್ತಿ ತಿಂದಕ  
ಕಟ್ಟೆ ಆಕು, ಆಂಗ್ ಎಣ್ಣಾನ.

ಕಾಮುಣಿ ಕಾಮವ್ವ : ಹ್ ಮ್.... ಪೋಪ(ಎಲ್ಲಾರು ಕಾಲ್ ಕೈ ಕತ್ತಿತ್ ಡೈನಿಂಗ್  
ಟೇಬಲ್‌ಕ್ ಬಪ್ಪ)

ಕಾಮುಣಿ ಕಾಮವ್ವ : ತಿಂಡಿ ಕಾಪಿ ಬೆಚ್ಚಿಯೆ, ಬಾರಿ ಮಾವ, ಬಾವನೋ  
ಮಕ್ಕಳೋ ಕೂಟಿಯ ಬಾರಿ.

ಮೇದಯ್ಯ : ಬಾರಿ ಮಕ್ಕಳೇ ತಿಂಡಿ ತಿನ್ನಿ.

(ಗ್ಯಾನ್/ ಕಾವ್ಯ ತಾತ ಅವ್ವಯ್ಯಂಡ ಕೈ ಪುಡ್‌ಚಂಡೇ ಟೇಬಲ್‌ಕ್ ಬಪ್ಪ)

ಗ್ಯಾನ್/ಕಾವ್ಯ: ಚಾಂಗ್‌ಕ್.. ಅಣ್ಣಯ, ನಂಗಡಲ್ಲಿ ಮಮ್ಮಿ ಇಂತ ತಿಂಡಿ ಒಂದೂ ಮಾಡುಲೆ,

ಚಾಂಗ್ : ಮಮ್ಮಿಕ್ ಟೈಮ್ ಇಪ್ಪಕಿಲ್ಲೆ ಆಂಗ್ ಮಾಡುವಕಿಲ್ಲೆ, ನಂಗಡ ಮಮ್ಮಿಕ್ ಎಂತ ಕೆಲಸ,..

(ತಿಂಡಿ ತಿಂದಿತ್ ನಾಲ್ ಮಕ್ಕಳೂ ಕಾರ್‌ರ ಪಕ್ಕ ಓಡುವ)

ಚಾಂಗ್/ಸೀತೆ :ಕುಂಇಪ್ಪ, ನಂಗಳ ಒರ್ ಸುತ್ತ ಕಾರ್‌ಲ್ ಕೂಟಿಯ ಪೋ.

ಪ್ರೇಮ್ ಪೊನ್ನಪ್ಪ : ನಿಂಗಳ ನಾಳೆ ಪೊಲಾಕ ನಾಗ ಪೂಜೆಕ್ ಪೋಪಾಂಗ್ ಮಿಂಇ ದೇವಸ್ಥಾನಕ್ ನಾನೇ ಕೂಟಿಯ ಪೋಪಿ, ಇಕ್ಕ ಬೈಟಾಪಕಾಚಿ, ನಾಳೆ ಪೋಕ ಎನ್ನ..

ಚಾಂಗ್/ಸೀತೆ : ಆಚಿ ಕುಂಇಪ್ಪ ನಾಳೆ ಪೋಕ..

ಕಾಮುಣಿ ಕಾಮಪ್ಪ : (ಮನಸ್ಸಲೇ ಇಕ್ಕ ಒರ್ ಸುತ್ತ ಕೂಟಿಯ ಪೋಯಿತುಂಡೇಂಗಿ ಎನ್ನ ಆಪಕಿಂಜತ್).

ಪ್ರೇಮ್ ಪೊನ್ನಪ್ಪ : ಅಣ್ಣಯ್ಯ ನಾಳೆತ ಪ್ರೋಗ್ರಾಮ್ ಎಂತ, ಎಚ್ಚಕ್ ಗಂಟೆಕ್ ನಾಗ ಪೂಜೆ

ಕಾರಿ ಕಾರ್ಯಪ್ಪ : ಅದ್ ಪನ್ನಂದ್ ಗಂಟೆಕ್, ಪೂಜೆ ಸುರು ಆಪಕ ಪನ್ನಂದರೆ ಆಯಿರುವ.

ಪ್ರೇಮ್ ಪೊನ್ನಪ್ಪ : ಅಂದಕ ಪೊಲಾಕ ಒಯಿಂಬದ್ ಗಂಟೆಕ್ ದೇವಸ್ಥಾನತ್‌ರ ಮಾಪೂಜೆಕ್ ನಂಗ ಪೋಯಿತ್ ಹಣ್ಣಾ ಕಾಯಿ ಮಾಡ್‌ಚಿಟ್ಟಂಡ್, ಅಲ್ಲಂಜಿ ನಾಗ ಪೂಜೆಕ್ ಪೋಲು, ಬಪ್ಪಕ ಮಕ್ಕಳೋ ಬೋಜಿನೋ ಅಲ್ಲಿ ಬುಟ್ಟಿತ್ ಬಂತ ನಿಂಗಳೋ ಅಪ್ಪವ್ವನೋ ಕೂಟಿಯ ಪೋಲು, ಚಾಂಗ್ ಸೀತೆ ನಂಗಡ ಕೂಡೇ ಪೊಲಾಕಲೇ ಬಂದ್‌ರಡ್. ಅಕ್ಕ ಸರಿ ಆಪ..

ಕಾರಿ ಕಾರ್ಯಪ್ಪ : ಅಕ್ಕುರಾ ಒಮ್ಮತೇ ಕಾರ್‌ಲ್ ಒಕ್ಕಚೆ ಎಲ್ಲಾರು ಪೋಪಕ್ ಕಯ್ಯಲೆ, ಅದೇ ಸರಿ.

(ಪಿತ್ಯಾಂದ್ ಪೊಲಾಕ ಎಲ್ಲಾರು ಕುಳ್‌ಚಿತ್ ಪ್ರೇಮ್, ಬೋಜಿ ಗ್ಯಾನ್ ಕಾವ್ಯ ಚಾಂಗ್ ಸೀತೆ ದೇವಸ್ಥಾನಕ್ ಪೋಪ)(ದೇವಸ್ಥಾನತ್

ಪೂಜೆಕಾರನ ಕಾಂಬುಲೆ)

ಪ್ರೇಮ್ ಪೊನ್ನಪ್ಪ : ಚಾಂಗ್ ಚೆನ್ನ ಪೂಜೆಕಾರನ ಕೂಟಿಯ ಬಾಪ್ಪ.

(ಚಾಂಗ್ ಪೂಜೆಕಾರ ಸ್ವಾಮಿನ ಕೂಟಿಯ ಬಪ್ಪ)

ಪ್ರೇಮ್ ಪೊನ್ನಪ್ಪ : ಸ್ವಾಮಿ ನಂಗಡ ಪೆದತ್ ಒರ್ ಮಂಗಳಾರತಿ ಹಣ್ಣಾ  
ಕಾಯಿ ಮಾಡಿ

ಪೂಜೆ ಕಾರ: ನಿಂಗ ಎಕ್ಕ ಬಂದಿಯೆ, ಚಾಯಿತೆ ಉಳ್ಳಿರಾ ನಿಂಗಳ ಕಾಂಗತೆ  
ಸುಮಾರ್ ಕಾಲ ಆಚಿ, ನಿಂಗಡ ಮಂಗಲಕ್ ನಾನ್ ಬಂದಿಯೆ,  
ಅಕ್ಕ ಕಂಡದೇ, ಇವು ದಂಡ್ ಮಕ್ಕಳಾ,, ದೇವ ನಿಂಗಕ್ ನಲ್ಲದ್  
ಮಾಡಡ್, ನಿಂಗ ಊರ್ ದೇವಳ ಮರ್ಂದಿತಿಲ್ಲೆಲ್ಲಾ..

ಪ್ರೇಮ್ ಪೊನ್ನಪ್ಪ : ಅದೆನ್ನನೆ ಮರ್ಂದ್‌ರೋ ಸ್ವಾಮಿ, ನಾಕು ನಾಡ  
ಸಂಸಾರಕು ರಕ್ಷಣೆ ಆಯಿತ್ ಉಳ್ಳ ಈ ಊರ್ ದೇವಳು, ನಂಗಡ  
ಗುರು ಕಾರಣನೂ, ಅಯಿಂಗಳ ಎನ್ನನೆ ಮರ್ಂದ್‌ರೋ, ಪೊಲಾಕ  
ಬೈಟ್ ಬೊಳ್‌ಚ ಬೆಪ್ಪಕ ನಂಗ ತೊಪ್ಪದೇ ಈ ಎಲ್ಲ ದೇವಳ  
ಸ್ವಾಮಿ.

ಪೂಜೆ ಕಾರ: ಸಿಟಿಲ್ ಉಳ್ಳಯಿಂಗ ದೇವಳ ತೊಪ್ಪದೇ ಕಮ್ಮಿ, ನಾಡ್ ಮನೆ,  
ದೇವ ಕಾರಣನ ಎಲ್ಲಾ ಮರ್ಂದ್‌ರುವಾ ಅಚೆಂಗಿ ನಿಂಗಕ್ ಓರ್ಮೆ  
ಉಳ್ಳದ್ ನೋಟಿತ್ ದುಂಬಾ ಕುಶಿ ಆಚಿ, ದೇವ ನಿಂಗಕೂ ನಿಂಗಡ  
ಮಕ್ಕಕೂ ನಲ್ಲದ್ ಮಾಡುವ, ಅಂದಕ ಪೂಜೆ ಮಾಡನಲ್ಲ.

ಪ್ರೇಮ್ ಪೊನ್ನಪ್ಪ : ಪೂಜೆ ಆನ ಪಿಂಇ ನಾಡ ಕಾರ್‌ರದೂ ಒರ್ ಪೂಜೆ  
ಮಾಡಿರಿ ಸ್ವಾಮಿ.

ಪೂಜೆ ಕಾರ: ನಿಂಗ ಪುದಿಯ ಕಾರ್ ಎಡ್‌ತಿರಾ, ಖಂಡಿತಾ ಪೂಜೆ ಮಾಡನ,  
ನಂಗಡ ಊರ್‌ರ ಮಕ್ಕ ಎಳಿಗೆ ಆಪದ್ ನಂಗಡ ಊರ್‌ಕೇ  
ಸಂತೋಷ.

ಪ್ರೇಮ್ ಪೊನ್ನಪ್ಪ : ನಿಂಗಡೆಲ್ಲ ಆಶೀರ್ವಾದ, ದೇವಡ ದಯ ಸ್ವಾಮಿ.

ಪೂಜೆಕಾರ : ಬಲ್ಯಯಿಂಗಡ ಬಲ್ಯ ತಕ್ಕ್ ಆಂಗೆ ಎಣ್ಣುವ " ದುಂಬ್ ನ ಕೊಡ  
ತುಳ್ ಕುಲೆ"

ಪ್ರೇಮ್ ಪೊನ್ನಪ್ಪ : ನಂಗಡದ್ ಎಂತ ಉಂಡ್ ಸ್ವಾಮಿ ಎಲ್ಲಾ ದೇವ  
ತಂದದೇ, ಇಕ್ಕ ಪೂಜೆ ಮಾಡಿ ಸ್ವಾಮಿ..

(ಪ್ರೇಮ್, ಬೋಜಿ ಗ್ಯಾನ್ ಕಾವ್ಯ ನಕ್ಷತ್ರ ರಾಶಿ ಎಣ್ಣುವ, ಚಾಂಗ್ ಸೀತೆಕ್ ರಾಶಿ ನಕ್ಷತ್ರ ಗೊತ್ತಿಪ್ಪಲೆ)

ಪ್ರೇಮ್ ಪೊನ್ನಪ್ಪ : ಚಾಂಗ್, ಸೀತೆ ನಿಂಗಕ್ ನಿಂಗಡ ರಾಶಿ ನಕ್ಷತ್ರ ಗೊತ್ತಿಕ್ಕೊಂಡು, ಅದ್ ಅಲ್ಲತೆ ನಿಂಗಡ ಬ್ಲಡ್ ಗ್ರೂಪ್, ಮನೆರ ಪೋನ್ ನಂಬರ್ ಗೊತ್ತಿಕ್ಕೊಂಡು, ಮನೆಕ್ ಪೋನದು ಪಡ್ಚವಂಡು ಗೊತ್ತಾಚ..

ಚಾಂಗ್/ಸೀತೆ: ಆಚಿ ಕುಂಞಪ್ಪ.

(ಮಾ ಪೂಜೆ, ಕಾರ್ ಪೂಜೆ ಆನದು ಪೊಣ್ಣಾ ನೋ ಮಕ್ಕಳೋ ಕೂಟಿಯಂಡ್ ಬಲ್ಯ ಮನೆಕ್ ಪೋಪಂಜೆ ಅಯಿಂಗಳೆಲ್ಲ ಅಲ್ಲಿ ಬುಟ್ಟಿತ್, ಮನೆಕ್ ಪೋಯಿತ್ ಅಪ್ಪವನೋ ಅಣ್ಣ ಮೊಮ್ಮನೋ ಕೂಟಿಯಂಡ್ ಬಲ್ಯ ಮನೆಕ್ ಪೋಪ)(ಅಲ್ಲಿ ಮನೆಕಾರಡ ಕಾಲ್ ಕೈ ಪುಡಿಪ)

\* \* \* \* \*

## ಸೀನ್ ಪದಿನಾರ್

ಮಂದಯ್ಯ : ಎನ್ನಪ್ಪ ಪ್ರೇಮ್, ನೀನ್ ಕಾರ್ ಎಡ್ತಿಯಲೋ, ನಂಗಡ ಮನೆಲ್ ಕಾರ್ ಜಾಸ್ತಿ ಆನಕ ನಲ್ಲದಲ್ಲಾ,

ಪ್ರೇಮ್ ಪೊನ್ನಪ್ಪ : ಅಕ್ಕು ಬಲ್ಯಪ್ಪ, ಎನ್ನೋ ದೇವಡ ದಯ, ನಿಂಗಡೆಲ್ಲಾ ಆಶೀರ್ವಾದತ್ ಒರ್ ಕಾರ್ ಸಾಲತ್ ಎಡ್ತ.

ಮಂದಯ್ಯ : ಅದೆನ್ನಪ್ಪ, ಸಾಲತ್ ಎಡ್ತಿಯೆ ಎಣ್ಣುವಿಯ,

ಪ್ರೇಮ್ ಪೊನ್ನಪ್ಪ : ಅಕ್ಕು ಬಲ್ಯಪ್ಪ, ನಂಗ ದಂಡಾಳೂ ಕೆಲಸಕ್ ಪೋಚೆಂಗಿನೂ ಮನೆ ಬಾಡಿಗೇ, ನೀರ್, ಎಲೆಕ್ಟ್ರಿಕ್ ಬಿಲ್ಲ್, ಪೋನ್, ಟೀ ವಿ, ಪೇಪರ್, ಜಿನಸಿ, ತರಕಾರಿ, ಮಕ್ಕಡ ಫ್ಲೀಸ್, ಪಾಲ್ ಅದ್ ಇದ್ ಎಣ್ಣಿಯಂಡ್ ಬೆಂಗಳೂರ್ಲ್ ದುಡ್ಡೇ ಎತ್ತುಲೆ..

ಮಂದಯ್ಯ : ಆಂಗೇ ಎಣ್ಣುವ" ದೂರತ ಕುಂದ್ ನುಣ್ಪಂದ್, ನಂಗ ಇಲ್ಲಿ ಅಳತಂಡ್ ಗ್ಯಾನ ಮಾಡುವ ನಿಂಗ ಸಿಟಿಲ್ ದುಂಬಾ ಜಾಯಿತೆ ಉಳ್ಳಿರಾಂದ್, ನೀಡ ತಕ್ಕ ಕೇಪಕ ಗಾಳಿ ಬುಟ್ಟಿತ್ ಎಲ್ಲಾಂಗೂ ದುಡ್ಡೇ ನೀನ್ ಎಣ್ಣುವದ್ ಸರಿ, ಎಚ್ಚಕ್ ದುಡ್ಡ್ ಉಂಡೇಂಗಿನೂ ಪೋರ, ಆಚೆಂಗಿ ನಿಂಗ ಸಿಟಿಕಾರ ಒಂದಾನೋ ಕಾಟಿಯವಲೆ ಬಾರಿ ನಿರ್ಕಲ್ ತಿಂಗ ಕಯಿಪಿರಾ ಕಾಂಬ.

ಪ್ರೇಮ್ ಪೊನ್ನಪ್ಪ : ಅಕ್ಕು ಬಲ್ಯಪ್ಪ, ನಿರ್ಕ ಇಲ್ಲತೆ ಪೋಚೆಂಗಿ ಸಾಲ, ಇಲ್ಲೇಂಗಿ ಮನೆಲುಳ್ಳಯಿಂಗಕ್ ತೊಂದರೆ ಕೊಡ್ಕೊಂಡು, ಅದ್ ದಂಡೂ ನಾನ್ ಮಾಡುಲೆ, ಉಳ್ಳಾಲ್ ಕಂಬಳಿ ಉಳ್ಳಚ್ಚಕ್ ಕಾಲ್ ನೀಟಿಯಂಡ್ ಬದ್ಕುವಂಡು ಆಂಗೇ ಸಾಸ ಮಾಡುವ..

(ಅಕ್ಕಣೆ ಪಟ್ಟೇದಾರ ಕಾರಣಂಗ್ ಕೊಡ್ಪಕ್ ಆಚಿ, ಎಲ್ಲಾರು ಕಾಲ್ ಕೈ ಕತ್ತಿಯ ಬಾರಿ, ಆಣು ಪೊಣ್ಣು ಕುಂಇಯ ಮಕ್ಕ ದಂಡ್ ಕಡೆ ನಿಲ್ಲಿ)

ಪಟ್ಟೇದಾರ : ಸದ್.. ಎಂಗಡೊಕ್ಕಡ ಎಲ್ಲಾ ಆಣು ಪೊಣ್ಣು ಕುಂಇ ಮಕ್ಕ ಬೆಂದು ಚಂಇಾದಿಯ ಊರ್ ನೆರೆ ಕೆರೆ ಬಂದ್ ಕೂಡಿರಲ್ಲಾ,

ಕಾಲೊದಿರನ್ನಕೆ ಎಂಗಡ ಗುರು ಕಾರಣಂಗೂ ಚತ್ತ್ ಸ್ವರ್ಗತ್  
 ಉಳ್ಳಯಿಂಗಕೂ ಎಡೆ ಬೆಪ್ಪ ಪದ್ಧತಿ ಪೋಲೆ ಎಂಗಕ್ ಗೊತ್ತುಳ್ಳನ್ನಕೆ,  
 ಎಲ್ಲಾ ಸಾಮಾನ್ ಕೋಪು ಕೂಟಿತ್ ಭಯ ಭಕ್ತಿಲ್ ಇಕ್ಕ ಎಡೆ  
 ಬೆಚ್ಚವ ಅಲ್ಲಿಕ್ ಒರ್ ಅಡೆ ತಡೆ ಇಲ್ಲತೆ ಮಾಡುವಕ್ ಶ್ರೀ ಗಣಪತಿನ  
 ಆದ್ಯತ್ ತೊತ್ತಿತ್ ಗುರು ಕಾರಣಂಗಳ ಅಜ್ಜಪ್ಪನ ನೆನೆತಿಯಂಡ್  
 ಎಂಗಡ ತಲೆ ಬಲ್ಯ ಇಗ್ಗುತಪ್ಪ, ಕುಲದೇವಿ ಕಾವೇರಮ್ಮನ ತೊತ್ತಿತ್,  
 ಊರ್ ದೇವಳ, ಕಲ್ಯಾಟಜ್ಜಪ್ಪ ಸಾರ್ತಾವುನ ತೊತ್ತಿತ್ ಎಂಗಡ  
 ಕಾರಣಂಕ್ ಎಡೆ ಬೆಪ್ಪ ಪದ್ಧತಿ ನಡತಿಯವ ಅಲ್ಲಿಕ್ ಏದೇ ತಪ್ಪು  
 ಕೊಪ್ಪು ಉಂಡೇಂಗಿ ಪೋರ್ ಪೋಯಿತ್ ಪೂರ್ತ್ ಮಾಡಿತ್  
 ತಪ್ಪುನ ಮನ್ನಚಿಟ್ಟಿತ್ ಕೆಲಕ್ಟ್ಟಂಡ್ ಎಂಗಡೊಕ್ಕಡ ಎಲ್ಲಾ ಕುಂಇ  
 ಮಕ್ಕಕೂ ಎಲ್ಲಾ ಮನೆ ಸಂಸಾರಕೂ ಎತ್ತ ಕಡ್ಚಿಯಕೂ ಬಿತ್ತ  
 ಬೊಳೆಕೂ ಪೋನಲ್ಲಿ ಬಂದಲ್ಲಿ ಕೈ ಇಟ್ಟ ಕೆಲಸಕ್ ಜಯ ತಂದ್  
 ನಲ್ಲದ್ ಮಾಡೊಂಡೊಂದ್ ಅಡ್ಡ ಬುದ್ಧ ಬೋಡಿಯವ.(ಅಕ್ಕಿ  
 ಕನ್ಚಿ ಬೆಮ್ಮಾರಿಯೋಳಿ)

(ಪೂಜೆ ಎಲ್ಲ ಆನ ಪಿಂಇ....

ಬೋಡನಾ, ನಂಗ ಎಲ್ಲ ದೇವಳ ತೊಕ್ಕನಾ,  
 ಕಾವೇರಮ್ಮನಾ, ಇಗ್ಗುತಪ್ಪನಾ, ಗುರು ಕಾರಣ ಅಜ್ಜಪ್ಪಂಗಳಾ,  
 ಈ ಊರ್ ದೇವಳ, ನಂಗಡೆಲ್ಲಾ ದೇವಳ ತೊಕ್ಕನಾ.

ಏದ್ ದೇವಳ ತೊತ್ತಕ್ಕೆನ್ನ, ಭಕ್ತಿ ಇಲ್ಲತೆ,  
 ಏದ್ ಪೂಜೆ ಮಾಡ್ಚೆಂಗೆನ್ನ ನಿಷ್ಪೆ ಇಲ್ಲತೆ,  
 ಎಂತ ಕೆಲಸ ಮಾಡ್ಚೆಂಗೆನ್ನ ಮನಸಿಲ್ಲತೆ.

ಕೆಲಸ ಇಷ್ಟತ್ ಮಾಡಿ ಕಷ್ಟತ್ ಅಲ್ಲಾ,  
 ಸೇವೆ ಸೇವೇಂದ್ ಮಾಡಿ, ಮೆಚ್ಚ್ಚಿರುವಕಾಯಿತ್ ಅಲ್ಲಾ,  
 ಸಹಾಯ ಸಹಾಯಾಂದ್ ಮಾಡಿ, ಪೆದಕಾಯಿತ್ ಅಲ್ಲಾ,

ಉಳ್ಳವು ಎಲ್ಲಾ ದಾನಿಯ ಅಲ್ಲಾ, ದಾನಿಯ ಎಲ್ಲ ಉಳ್ಳವು ಅಲ್ಲಾ,

ವಿದ್ಯೆ ಉಳ್ಳವು ಎಲ್ಲಾ ಜ್ಞಾನಿಯ ಅಲ್ಲ.

ಇಕ್ಕತ ಕಾಲತ್ ಸಹಾಯ ಮಾಡ್ನವನೇ ಶತ್ರು,

ಕೆಟ್ಟದ್ ಬಯಂದವನೇ ಮಿತ್ರ್,

ಇದ್ ಕಾಲ ಮಹಿಮೆ ಅಲ್ಲ ನಂಗಡದೇ ಎಲ್ಲಾ,  
ಆಂಗೇ ಎಣ್ಣುವ ಬಲ್ಯ ಬಲ್ಯ ಪೂಜೆ ಮಾಡ್‌ಚೆಂಗೆನ್ನ ಭಕ್ತಿ ಇಲ್ಲತೆ...  
ಭಕ್ತಿಲ್ ಬೋಡನಾ ನಂಗ ಎಲ್ಲಾ ದೇವಳ ತೊಕ್ಕನಾ

(ಉಂಡಿತಾಪ, ಎಲ್ಲಾ ಆಪಕ ಬೈಟ್ ಒಯಿಂಬಬ್ ಗಂಟಿ ಆಯಿ  
ಪೋಪ)(ಆದ್ಯತ್ ಪ್ರೇಮ್ ಪೋಣ್ಣ್ ಮಕ್ಕಳ ಮನೆಕ್ ಬುಟ್ಟಿತ್ ಅಪ್ಪನೋ  
ಅಪ್ಪನೋ ಅಣ್ಣನೋ ಮೊಮ್ಮನೋ ಕೂಟಿಯ ಪೋಪ, ಪೋಪಕ  
ಬಟ್ಟಿಲ್) (ಒರ್ ಜೀಪ್ ರಭಸತ್ ಬಂತ್ ರೋಡ್ ಮಧ್ಯ  
ನಿಪ್ಪುಚಿರುವ) (ಪ್ರೇಮ್ ಜಾಗ ಇಲ್ಲತೆ ಅವನೂ ಕಾರ್ ನಿಪ್ಪುಚಿಡುವ)

ಜೀಪುಲಿಂಜವು : ಇದೋರ್ ಬೆಂಗಳೂರ್‌ಕಾರಡ ಕಾರ್ ರೋಡ್ ಮಧ್ಯ  
ನಿಪ್ಪುಚಿಟ್ಟಿತ್ ಚೆನ್ನ ಬಯ್ಯನ..

ಪ್ರೇಮ್ ಪೊನ್ನಪ್ಪ : ಅಲ್ಲ ನಿಂಗ ಅನ್ನನೆ ರಭಸತ್ ಬಂತ್ ಮಧ್ಯ  
ನಿಪ್ಪುಚಿಟ್ಟತೇಂಗಿ ನಾನ್ ಏಲೇ ಪೋಪ..

ಜೀಪುಲಿಂಜವು : ನೀವು ಬೆಂಗಳೂರಿನವರು ಸುಮ್ಮನೆ ಮಾತಾಡ ಬೇಡಿ  
ಕಾರ್ ಸೈಡಿಗೇ ತೆಗೆಯಿರಿ.

ಪ್ರೇಮ್ ಪೊನ್ನಪ್ಪ : ನಿಂಗ ಮಾತ್ರ ಕೊಡಗ್‌ಕಾರ ನಂಗ ಬೆಂಗಳೂರ್‌ಕಾರ  
ಎನ್ನನೆ ಆಪ.

ಜೀಪುಲಿಂಜವು : ನೀವು ನಮ್ಮ ಭಾಷೆ ಮಾತಾಡಿ ಬಿಟ್ಟರೆ ನೀವು  
ಕೊಡಗಿನವರೋ, ಕಾರ್ ಸೈಡಿಗೇ ತೆಗೆಯಿರಿ.

(ಮೇದಯ್ಯ ಕಾರಿ ಕಾರ್‌ಂಜಿ ಇಳಿವಂಜಿ ಜೀಪುರ ಪಕ್ಕ ಪೋಪ)

ಮೇದಯ್ಯ : ಅಲ್ಲ ಮೋನೆ, ಇಂವ ನಾಡ ಮೋಂವ, ಇಂವ ಎನ್ನನೆ  
ಬೆಂಗಳೂರ್‌ಕಾರ ಆಪ.

ಜೀಪುಲುಳ್ಳವು : ಅಪ್ಪನ ಅಣ್ಣನ ಪರಿಚಯ ಇಪ್ಪು)

ಈ ಅಂಕಲ್ ಮೇದಯ್ಯ ಅಂಕಲ್ ಅಲ್ಲಾ, ಅಂಕಲ್‌ರ ಮೋಂವಾಂದ್  
ಕಾಂಬ, ಬೆಂಗಳೂರ್ ರಿಜಿಸ್ಟ್ರೇಸನ್ ಕಾರ್‌ಂದ್ ಗ್ಯಾನ ಮಾಡಿತ್  
ಅನ್ನನೆ ಎಣ್ಣೆಯೆ. ನಿಂಗ ಪೋಯಿ.

ಮೇದಯ್ಯ : ಬರೀ ಕಾರ್‌ರ ನಂಬರ್ ನೋಟಿತ್ ಅದತ್ ಉಳ್ಳ ಜನ ಆ  
ಊರ್‌ಕಾರಾಂದ್ ಗ್ಯಾನ ಮಾಡತಿ. ಕೆ.ವಿ. ಪನ್ನೆರಂದ್ ಉಳ್ಳವು  
ಎಲ್ಲಾ ಕೊಡಗ್‌ಕಾರಳಾ, ಕೊಡವ ಸಿಂಬಲ್ ಇಟ್ಟಂಡವು ಎಲ್ಲಾ



ಕೊಡವಳಾ, ಕಣ್ಣಲ್ ಕಂಡತೆಂಗಿಯೂ ತವುಡಿ ನೋಟೊಂಡುಂದ್  
ಎಣ್ಣುವ.

ಜೇಪುಕಾರ : ಅಯ್ಯೋ ಬುಡಿ ಅಂಕಲ್ ನಿಂಗ ಚಾಯಿತೆ ಪೋಯಿ, ತಪ್ಪಾಚಿ  
ನಿಂಗ ಪೋಯಿ.

ಪ್ರೇಮ್ ಪೊನ್ನಪ್ಪ : ಬಾ ಅಪ್ಪಯ್ಯ ನಂಗ ಪೋಕ, ಅಯಿಂಗಡ ತಪ್ಪು  
ಅಯಿಂಗಕ್ ಅರಿವಿಕೆಕ್ ಬಾತ್ ಅದ್ ಮದಿ, ಬಾ ಪೋಕ..

\* \* \* \* \*

## ಸೀನ್ ಪದಿನೇಳು

(ಪ್ರೇಮ್‌ರ ಸಂಸಾರ ಬೆಂಗಳೂರ್ ಮನೆಕ್ ಎತ್ತುವ.. ಬೆಂಗಳೂರ್ ಮನೆಲ್)  
ಪ್ರೇಮ್ ಪೊನ್ನಪ್ಪ: ಈ ರಜತ್ ಸುಮಾರ್ ದುಡ್ಡ್ ಖರ್ಚಿ ಆಯೋಚಿ. ಈ  
ತಿಂಗಳೆಂಜಿ ನಂಗ ಉಂಇು ನಿರ್ಕ್ ಮಾಡೊಂಡು.

ಬೋಜಿ ಬೋಜಮ್ಮ: ನಂಗ ಎಂತ ದುಂದ್ ವೆಚ್ಚ ಮಾಡಿಯೆಂಡ್ ಇಲ್ಲೆಲ್ಲಾ,  
ನಾನೇ ಎಲ್ಲ ಖರ್ಚ್ ಮಾಡ್‌ನನ್ನಕೆ ಎಣ್ಣುವಿಯಾ.

ಪ್ರೇಮ್ ಪೊನ್ನಪ್ಪ: ಅಯ್ಯೋ ನಾನೆಲ್ಲಿ ಅನ್ನನೆ ಎಣ್ಣಾನ. ಈ ಕುರಿ ಖರ್ಚಿ ಜಾಸ್ತಿ  
ಆಚೀಂದ್ ಎಣ್ಣಾನ.

ಬೋಜಿ ಬೋಜಮ್ಮ: ನಾನೂ ಕೆಲಸಕ್ ಪೋಪಾಂಗ್ ನಿಂಗಕ್ ಅಚ್ಚಕೇಂಗಿ ಸಹಾಯ  
ಆಪ, ನಿಂಗಡೊಬ್ಬಂಡ ಸಂಬಳತ್ ಕಷ್ಟ ಆಪ ಇಂಜತ್.

ಪ್ರೇಮ್ ಪೊನ್ನಪ್ಪ: ಅದ್ ಸರಿ ಬೋಜಿ, ನೀಡ ಸಂಬಳ ಇಲ್ಲತೆ ಪೋಯಿತುಂಡೇಂಗಿ  
ನಂಗ ಇಚ್ಚಕ್ ಏಳಿಗೆ ಆಪಕಿಂಜಿತಿಲ್ಲೆ ಇದ್ ಖಂಡಿತ, ಅದ್‌ಂಗೇ  
ನಾನ್ ಅಕ್ಕಾಕ್ಕ ಎಣ್ಣುವ " ಕಂಬಳಿ ಉಳ್ಳಚ್ಚಕ್ ಕಾಲ್ ನೀಟೊಂಡು"  
ನೀಕ್ ಗೊತ್ತುಳ್ಳನ್ನಕೆ ನಾನ್ ಒಂದೂ ಅನಾವಶ್ಯ ಖರ್ಚಿ  
ಮಾಡಿಯೆಂಡಿಲ್ಲೆಲ್ಲ. ಅದ್ ಬುಡ್, ಇಂದ್ ಡ್ರೈವ್ ಮಾಡಿತ್  
ಬಂದದ್, ಸುಸ್ತಾಯಿತ್, ನಾಳೆ ಅಫೀಸ್‌ಕ್ ಬೋರೆ ಪೋಂಡು,  
ಬೆರಿಯ ಅಡಿಗೇ ಮಾಡ್ ಉಂಡಿತ್ ಬೆರಿಯ ಬುದ್ಧವನ.

ಬೋಜಿ ಬೋಜಮ್ಮ : ನಾನು ನಿಂಗಡ ಕೂಡೆ ಬಂದಿಯೆ, ನಾಕೂ ನಾಳೆ  
ಅಫೀಸ್ ಉಂಡ್, ನಾನೊಬ್ಬಳೇ ಎಚ್ಚಕ್‌ಂದ್ ಮಾಡುವ, ನೀನ್  
ಚೆನ್ನಂಗೂ ಸಹಾಯ ಮಾಡುಲೆ, ನಾಕೂ ಕಯ್ಯತಾಪ(ಮೊರ್ಡುವ).

ಪ್ರೇಮ್ ಪೊನ್ನಪ್ಪ : ಬೋಜಿ ಅದ್‌ಂಗ್ ಮೊರ್ಡುವಕ್ ಎಂತ ಉಳ್ಳೋ,  
ಒರ್ ಕೂಳ್ ಕಣ್ಣಿ ಮಾಡ್, ಮೋರ್ ಪಾರತ್ ಉಂಗನ ಮದಿ,  
ಮಕ್ಕಕೂ ವರ್ಕ್ ಬಂತ್.

ಬೋಜಿ ಬೋಜಮ್ಮ : ಅದ್ ಮಾಡುವಕೂ ಅಚ್ಚಕೇ ಕೆಲಸ ಆಪ. ನೀನ್  
ಬರೀ ಆರ್ಡರ್ ಮಾಡಿಯೆಂಡ್ ಅಳ್ತಂಡಕ ನಾಕ್ ದುಂಬಾ

ಕಷ್ಟ ಆಪ, ನಾಕೂ ಕಯ್ಯಲೆ(ಅಂತೂ ಅಡಿಗೆ ಮಾಡಿತ್ ಎಲ್ಲ  
ಉಂಡಿತ್ ಬುದ್ಧವ)(ಪ್ರೇಮ್ s ಬೋಜಿ ಚೆಡಿಲೇ ಇಪ್ಪ)  
(ಇರ್ ಮಧ್ಯ- ದಂಡಾಳೂ ವರ್ಕ್ ಇಲ್ಲತೆ ಅಪ್ಪರ ಇಪ್ಪರ  
ತಿರಿಯೆಂಡಿಪ್ಪ)

ಒಕ್ಕಚೆ ಪ್ರೇಮ್ ಪೊನ್ನಪ್ಪ : ನಾನ್ ಅನ್ನನೆ.....

ಬೋಜಿ ಬೋಜಮ್ಮ : ನಾನ್ ಅನ್ನನೆ.....

ದಂಡಾಳೂ ಎಂತ ಎಂತಾಂದ್ ಕೇಪ..

ಬೋಜಿ ಬೋಜಮ್ಮ : ನಾನ್ ಅಕ್ಕಲೆ ಅನ್ನನೆ ಎಣ್ಣಾನದ್ ತಪ್ಪಾಚೀಂದ್ ಕಾಂಬ  
ನೀಕ್ ಬೇಜಾರ ಆಚೋ ಎನ್ನೋ.

ಪ್ರೇಮ್ ಪೊನ್ನಪ್ಪ : ನಾನೂ ಅನ್ನನೆ ತಕ್ಕ ಪರ್ಂದದ್ ಸರಿ ಅಲ್ಲ, ನೀಕೂ  
ಬೇಜಾರ ಆಚೋ ಎನ್ನೋ, ನಂಗ ದಂಡಾಳೂ ದುಡಿಯೊ ನಂಗಡ  
ಮಕ್ಕಡ ನಲ್ಲಾಮೆಕಾಯಿತಲ್ಲ, ನಂಗ ದಂಡಾಳ್ ಇನ್ನನೆ ಕಳಿಪದ್  
ಸರಿ ಅಲ್ಲ.

ಬೋಜಿ ಬೋಜಮ್ಮ : ಅಕ್ಕು ನಂಗ ಇನ್ನನೆ ಜಗಳ ಮಾಡಿಯೆಂಡಿಂಜಕ ನಂಗಡ  
ಮನಸಕೂ ನೆಮ್ಮದಿ ಇಪ್ಪುಲೆ, ವರ್ಕೂ ಇಲ್ಲೆ, ಮಕ್ಕಡ ಮನಸರ್  
ಮೇಲೆ ಎಂತ ಪರಿಣಾಮ ಆಕು, ಓರ್ ಎತ್ತ್ ಬೇಲ್ಕ್ ಬಲ್ಚಕ  
ಉಂಇೋರ್ ಎತ್ತ್ ನೀರ್ಕ್ ಬಲ್ಚತ್ಂದ್. ಒರ್ ಗಾಡಿರ  
ದಂಡ್ ಚಕ್ರೋಲೆ ಸರಿಯಾಯಿತ್ ಪೋಚೇಂಗಿ ಮಾತ್ರ ನೆಮ್ಮದಿ  
ಏಳಿಗೆ.

ಪ್ರೇಮ್ ಪೊನ್ನಪ್ಪ : ಎನ್ನ ಫಿಲಾಸಫಿ ತಕ್ಕ ಪರ್ಂದಂಡುಳ್ಳಿಯಾ, ಆಚೆಂಗಿ  
ನೀನ್ ಎಣ್ಣುವದ್ ಮಾತ್ರ ನೇರ್. ನಂಗ ದಂಡಾಳೂ  
ನೆಮ್ಮದಿಕಾಯಿತ್, ನಂಗಡ ಏಳಿಗೆ ಕಾಯಿತ್ ಒತ್ತ ನಡಕೊಂಡು,  
ಅಪ್ಪರಿಪ್ಪರ ಮನ್ನಚಿಟ್ಟಂಡ್ ಸಹಾಯ ಸಹಕಾರ ಮಾಡಿಯೆಂಡ್  
ನಾಡದಂದ್ ಗ್ಯಾನ ಮಾಡತೆ ನಂಗಡದಂದ್ ಅರ್ಂಜಂಡ್  
ನಡಕೊಂಡು.

ಬೋಜಿ ಬೋಜಮ್ಮ : ಅದೇ ಸರಿ, ನಾನನ್ನನೆ ಎಣ್ಣಾಚೀಂದ್ ನೀನ್ ಬೇಜಾರ  
ಮಾಡತೆ, ಮನ್ನಚಿಟ್ಟಿರ್.

ಪ್ರೇಮ್ ಪೊನ್ನಪ್ಪ : ನಾನೂ ಎಣ್ಣಾನಾನ ಮನಸಲ್ ಬೆಚ್ಚವತೆ ಮನ್ನಚಿಟ್ಟಿರ್.

ಬೋಜಿ ಬೋಜಮ್ಮ : ನೋಟ್ ನಂಗ ಇಂದ್ ಒನ್ನಾಂದ್ ಸಿಲ್ಲಿ ಕಾರಣಕ್  
ಜಗಳ ಮಾಡಿಯೇ, ಗಂಟೆ ಒಂದಾಚೆಂಗಿಯೂ ವರುವ ಕಯ್ಯತೆ  
ಒದ್ದಾಡಿಯೆಂಡುಂಡಲ್ಲ, ನೆಮ್ಮದಿಯೇ ಇಲ್ಲತಾಯೋಚಿ.

ಪ್ರೇಮ್ ಪೊನ್ನಪ್ಪ : ಅಕ್ಕು ಇಚ್ಚೆ ಚೆರಿಯ ವಿಷಯಕ್ ಇಚ್ಚೆಕ್ ನೆಮ್ಮದಿ  
ಪಾಳಾಚಿ, ಎಕ್ಕಲೂ ಜಗಳ ಮಾಡುವಯಿಂಗಡ ಪಾಡ್ ನೋಟಂಡ,  
ನಂಗಕ್ ಬೋಂಡಪ್ಪ, ಆ ಪಾಡ್,

ಬೋಜಿ ಬೋಜಮ್ಮ : ಜಗಳ ಮಾತ್ರ ನಂಗಕ್ ಬೋಂಡಾ, ಬೋರೆ ಉಳ್ಳದ್  
ಬೋಂಡು ಅಲ್ಲಾ ..ಬಾರೀ.....

ಪ್ರೇಮ್ ಪೊನ್ನಪ್ಪ : ನೀನ್ ಪರೋಲೆ, ನಾನೂ ಮರ್ಂದೋಯಿತಿಂಜ...  
ಬಾ.....

\* \* \* \* \*

## ಸೀನ್ ಪದಿನೆಟ್ಟ್

(ಪ್ರೇಮ್ ಪೊನ್ನಪ್ಪ ಆಫೀಸ್‌ಂಜಿ ಬಾತ್, ಮೂಡ್ ಚೆನ್ನ ಬೇಜಾರತ್ ಇಪ್ಪ)  
ಬೋಜಿ ಬೋಜಮ್ಮ : ಏನ್ನಾಚಿ, ಎನ್ನ ನೀಡ ಮೂಡ್ ಇನ್ನನೆ ಉಂಡ್  
ಎಂತ ವಿಷಯ.

ಪ್ರೇಮ್ ಪೊನ್ನಪ್ಪ : ಬೋಜಿ ಇಂದ್ ಮನೆಂಜಿ ಫೋನ್ ಬಂದಿತಿಂಜತ್,  
ಅವ್ವಯ್ಯಂಗ್ ಸಧ್ಯ ಕಯ್ಯುಲೆಲೋ, ನಾಡ್‌ಲೇ ಶೋಕ್, ಬೆಲಿ  
ಎಲ್ಲಾ ಎಡ್‌ತತ್‌ಲೋ ಒಂದೂ ಕಮ್ಮಿ ಆಯಿತಿಲ್ಲೆಲೋ, ಸಧ್ಯ  
ಕಯ್ಯುತಾಯೆಂಡ್ ಉಂಡ್ ಎಣ್ಣೆಚಿ.

ಬೋಜಿ ಬೋಜಮ್ಮ : ಅಯಿಂಗಕೆನ್ನ ಸೊಯ ಇಲ್ಲಿಯಾ, ಇಕ್ಕತ ಕಾಲತ್  
ಶೋಕ್ ಬೆಲಿ ಕಣಿಯ ಮಲಿಯ ಎಣ್ಣೆಯೆಂಡ್ ಪೋಪ, ನಲ್ಲ  
ಡಾಕ್ಟರ್‌ಕ್ ಕಾಟುವದ್ ಬುಟ್ಟಿತ್, ನಂಗಳೇ ಮಾವಂಗ್ ಫೋನ್  
ಮಾಡಿತ್ ಕೇಕ.

ಪ್ರೇಮ್ ಪೊನ್ನಪ್ಪ : ಅದೇ ಸರಿ, ಅವ್ವಯ್ಯಂಗೇ ಫೋನ್ ಮಾಡಿತ್ ಕೇಕ.  
(ಮನೆಕ್ ಅಪ್ಪಂಗ್ ಫೋನ್ ಮಾಡುವ)

ಪ್ರೇಮ್ ಪೊನ್ನಪ್ಪ : ಅಲ್ಲ ಅವ್ವಯ್ಯ, ಅವ್ವಯ್ಯಂಗ್ ದುಂಬಾ ಕಯ್ಯುಲೆಂಡ್  
ಶೋಕ್ ಬೆಲಿ ಎಡ್‌ತತ್, ಕಮ್ಮಿ ಆಯಿತಿಲ್ಲೆಂಡ್ ಅಣ್ಣಯ್ಯ ಎಣ್ಣೆಚಿ,  
ನಲ್ಲ ಡಾಕ್ಟರ್‌ಕ್ ಕಾಟುವ ಕಯ್ಯುಲಿಯಾ?

ಮೇದಯ್ಯ : ನಾನೆಂತ ಎಣ್ಣುವ ಕುಂಇ, ನೀಡ ಅಣ್ಣನೂ ಮೊಮ್ಮನೂ ಕೂಟಿಯ  
ಪೋಂಡು ಅಲ್ಲ, ನನ್ನೆಂಡ್ ಕಯ್ಯುವಾ ಈ ವಯಸ್‌ಲ್,

ಪ್ರೇಮ್ ಪೊನ್ನಪ್ಪ : ಅಂದಕ ನಾನ್ ಬಪ್ಪಿ ಅಲ್ಲಿ ಸರಿಯಾನ ಡಾಕ್ಟರ್ ಕೊಟ್ಟೆ  
ಪೋಚೆಂಗಿ ಇಲ್ಲಿಕೇ ಕೂಟಿಯ ಬಂದ್‌ರುವಿ. ನೋಟನ, ಇಂದ್  
ಬೊಳ್ಳ್ಯಾಚಿ, ನಾಳೆ ಚೆನಿಯಾಚೆ, ಮಕ್ಕಡ ಸ್ಕೂಲ್ ಆನ ಪಿಂಇ  
ಬೈಟಿಯಕ್ ನಂಗ ಬಂದೆತ್ತುವ, ಪಿಂಇ ನೋಟನ..

ಮೇದಯ್ಯ : ಅದೇ ಸರಿ ಕುಂಇ, ಇನ್ನನೇ ಉಂಡೇಂಗಿ ಅವ್ವನ ಕಳೆಂದವೆಂಡು  
ಕಾಂಬ.

ಪ್ರೇಮ್ ಪೊನ್ನಪ್ಪ : ನೀನ್ ಒಂದೂ ಬೇಜಾರ್ ಮಾಡತೆ, ನಂಗ ಬಪ್ಪ, ಅಲ್ಲಿ ಆಯಿಲೇಂಗಿ ಬೆಂಗಲೂರ್ಕ್ ಕೂಟಿಯ ಪೋಪ, ನಿಲ್ಲ ನೀಡ ಮೈಮ ತಕ್ಕ ಪರೆವಲೋ.

ಮೇದಯ್ಯ : ಆಚಿ ಅವಕ್ ಫೋನ್ ಕೂಡ್..

ಬೋಜಿ ಬೋಜಮ್ಮ : ಮಾವ ನಂಗಕ್ ಇಂದೇ ವಿಷಯ ಗೊತ್ತಾಯೆ, ನಿಂಗ ಆಚೆಂಗು ಎಣ್ಣಂಡ, ಅದ್ ಬುಡಿ, ನಂಗ ನಾಳೆ ಬಪ್ಪ, ಅಲ್ಲಿ ಡಾಕ್ಟರ್ ಸರಿ ಆಕತೆ ಪೋಚೆಂಗಿ ಬೆಂಗಲೂರ್ಕ್ ಕೂಟಿಯ ಪೋಪ ನಿಂಗಲೂ ಬಾರಿ ನಂಗಡ ಕೂಡೆ, ಮಾಯಿರ ಕೂಡೆ ಇಂಜನ್ನಕೆ ಆಪ.

ಮೇದಯ್ಯ : ನೋಟನವ್ವ, ನಿಂಗ ಬಾರಿ ಪಿಂಇ ತಕ್ಕ ಪರೆಯನ..

ಬೋಜಿ ಬೋಜಮ್ಮ : ಆಚಿ ಮಾವ, ನಿಂಗ ಬೇಜಾರ್ ಮಾಡತಿ, ಮಾಯಿಕ್ ಒಂದೂ ಆಪುಲೆ.

ಮೇದಯ್ಯ : ನೀನ್ ಎಣ್ಣಾನನ್ನಕೆ ಆಡ್. (ಫೋನ್ ಕಟ್ ಆಪ)

ಪ್ರೇಮ್ ಪೊನ್ನಪ್ಪ : ನೀನ್ ಎಣ್ಣತೆ ಪೋಚೆಂಗಿ ನಾಕ್ ಈ ಐಡಿಯಾವೆ ಬಪ್ಪಕೆಂಜಿಲೆ.

ಬೋಜಿ ಬೋಜಮ್ಮ : ಏದ್ ಐಡಿಯ..

ಪ್ರೇಮ್ ಪೊನ್ನಪ್ಪ : ಅದೇ ಅಪ್ಪಂಗ್ ಫೋನ್ ಮಾಡಿತ್ ಕೇಪದ್, ಅಲ್ಲಿ ಡಾಕ್ಟರ್ ಇಲ್ಲೇಂಗಿ ಇಲ್ಲಿಕ್ ಕೂಟಿಯ ಬಪ್ಪದ್, ಇಲ್ಲಿಕ್ ಕೂಟಿಯ ಬಾತೇಂಗಿ ನಂಗಡ ಆಫೀಸ್ ಪಾಳಾಪುಲೆ, ಮಕ್ಕಡ ಸ್ಕೂಲ್ಕೂ ತೊಂದರೆ ಆಪುಲೆ.

ಬೋಜಿ ಬೋಜಮ್ಮ : ಆಂಗೇ ನಾನ್ ಇಲ್ಲಿಕ್ ಕೂಟಿಯ ಬಕ್ಕ ಎಣ್ಣೆಯೆ, ನಂಗ ಅಲ್ಲಿ ಪೋಯಿತ್ ರಜ ಇಟ್ಟಂಡ್, ಮಕ್ಕಡ ಸ್ಕೂಲ್ ಪಾಳ್ ಮಾಡಿಯೆಂಡ್ ಇಪ್ಪಾಂಗುಂಇ ಇಲ್ಲಿ ಮಾಯಿಕ್ ನಲ್ಲ ಡಾಕ್ಟರ್ಕ್ ಕಾಟ್ನನ್ನಕೆಯೂ ಆಚಿ, ನಂಗಕೂ ಸುಲಭ ಆಪ.

ಪ್ರೇಮ್ ಪೊನ್ನಪ್ಪ : ಅದ್ ಸರಿ, ನಾಳೆ ಪೊರಡುವಾಂಗ್ ಎಲ್ಲ ಸರಿ ಮಾಡಿಯ, ನಾನ್ ಇಂದ್ ಕಾರ್ ಸರ್ವೀಸ್ ಮಾಡ್ಚಿಟ್ಟಿತ್ ರೆಡಿ ಮಾಡಿಯವಿ.

ಬೋಜಿ ಬೋಜಮ್ಮ : ಅದ್ ಸರಿ ಮಾಡಿಯೋಳಿ, ನಿಂಗಡ ಬಟ್ಟೆ ಬರೆ ಪ್ಯಾಕ್

ಮಾಡಿಯೊಳಿ, ಬಾಕಿ ನಾಡ ಮಕ್ಕಡ ನಾನೇ ಪ್ಯಾಕ್ ಮಾಡಿಯವಿ,  
ಎನ್ನನೆಯೂ ಎಲ್ಲರ್‌ಕೂ ಬೋರೆ ಬೋರೆ ಬ್ಯಾಗ್, ಅಲ್ಲಿ ಪೋಯಿತ್  
ಬರ್ಜಿ ಕಳಿಪಕಾಗ..

ಪ್ರೇಮ್ ಪೊನ್ನಪ್ಪ : ಅಂದಕ ಮಕ್ಕಡ ಸ್ಕೂಲ್ ಬುಡುವ ಟೈಮ್‌ಕ್  
ಪೋಯಿತ್ ಅಯಿಂಗಳ ನಾನೆ ಕೂಟಿಯ ಬಂದ್‌ರುವಿ, ಅವು  
ಎನ್ನನೆಯೂ ಕಲರ್ ಡ್ರೆಸ್, ನೀನೂ ಅಕ್ಕಣೆ ಬಂದಿತಿರ್, ಮನೆಲ್  
ಉಂಡ್‌ರೋಂಜಿ ಪೊರಟ್‌ರನ. ಬಟ್ಟೆಲ್ ಹೋಟೆಲ್ ಊಟ ಸರಿ  
ಆಪುಲೆ, ಮನೆಲ್ ನೀಡ ಕೈಲ್ ಕಂಜಿ ಕುಡ್‌ಚತೇಂಗಿ ನೆಮ್ಮದಿ  
ಆರೋಗ್ಯ.

ಬೋಜಿ ಬೋಜಮ್ಮ : ಅಕ್ಕು ಅಕ್ಕು, ನಿಂಗಕೆಕ್ಕಲೂ ಮನೆ ಅಡಿಗೆ ಬೋಂಡು  
ಕೆಲಕ್ ಹೋಟೆಲ್ ಊಟ ಆಪುಲೆ ಎಣ್ಣಿಯಂಡ್ ಒರ್ ನೆವನ,  
ನನ್ನುಂಡೇ ಮಾಡ್‌ಚೆಡೊಂಡು.

ಪ್ರೇಮ್ ಪೊನ್ನಪ್ಪ : ಅಲ್ಲ ಬೋಜಿ, ನೀಕೇ ಗೊತ್ತುಂಡ್, ಹೋಟೆಲ್‌ಲ್  
ಒರ್ ದಿವಸ ಉಂಡತೇಂಗಿ ಮೂಂದ್ ದಿವಸ ಒದ್ದಾಡುವದ್,  
ದುಡ್ಡ್ ಖರ್ಚಾಪಾಂದ್ ಮಾಡುವದಲ್ಲ, ಆರೋಗ್ಯ ಪಾಳಾಪಾಂದ್.  
ಅದೂ ಅಲ್ಲತೆ ನೀಡ ಕೈ ರಸ ಒರ್ ನೇರ ತಪ್ಪಿ ಪೋಪಲ್ಲಾಂದ್.

ಬೋಜಿ ಬೋಜಮ್ಮ : ಆಚಿ ಬುಡಿ, ಇಲ್ಲಿಯೇ ಉಂಡಿತ್ ಪೋಕ, ನಾಲ್  
ಗಂಟೆರ ಕಾಪಿ ತಿಂಡಿಯೇಂಗಿ ತಪ್ಪಿರಾ.

ಪ್ರೇಮ್ ಪೊನ್ನಪ್ಪ : ಖಂಡಿತಾ, ನಾನ್ ಕಂಜೂಸ್ ಒಂದೂ ಅಲ್ಲ  
ಗೊತ್ತಾಚಾ..

ಬೋಜಿ ಬೋಜಮ್ಮ : ತೆಳ್‌ಚಂಡ್, ಗೊತ್ತುಂಡ್ ಗೊತ್ತುಂಡ್ ಬುಡಿ ಅಪ್ಪ.  
(ಚೆನಿಯಾಚೆ ಮಜ್ಜಣ ಪ್ರೇಮ್ ಆಫೀಸ್‌ಂಜಿ ಬಪ್ಪಕ ಮಕ್ಕಳ ಕೂಟಿಯ  
ಬಪ್ಪ, ಮನೆಲ್ ಡೈನಿಂಗ್ ಟೇಬಲ್‌ಲ್ ಊಟ ರೆಡಿ ಇಪ್ಪ:

ಪ್ರೇಮ್ ಪೊನ್ನಪ್ಪ : ಅದ್‌ಂಗೇ ಎಣ್ಣುವ ನೋಟ್ " ವಡಿಯನ ಅರ್ಥ  
ಮಾಡಿತ್ ನಡ್‌ಪ ಪೊಣ್ಣೊಂದ್ ಮನೆಲ್ ಉಂಡೇಂಗಿ ಸ್ವರ್ಗಕ್  
ತಿತ್ತ ಬೆಕ್ಕೋಲಾಂದ್. ಸರ್ವಜ್ಞ ಎಣ್ಣಿಯೆ. ನಾನಲ್ಲಾ.....

ಬೋಜಿ ಬೋಜಮ್ಮ : ಅದೇ ಅದೇ ನಾಕ್ ಪೂಸಿ ಒಂದೂ ಇಡಂಡ, ಬೆರಿಯ  
ಉಣ್ಣೆ, ಮಕ್ಕಳೋ ಕೂಟಿಯೊಳಿ, ನಾನೂ ಉಂಡಿತ್ ಪಾತ್ರ ಕತ್ತಿತ್,

ಅಡಿಗೆ ಮನೆ ತೀಟಿತ್ ಪೊರಡೊಂಡು..

ಎಲ್ಲ ಉಂಡಿತ್ ಕಾರ್ಲ್ ಪೊರಡುವ.

ಬೋಜಿ ಬೋಜಮ್ಮ : ಇಲ್ಲಿ ನಲ್ಲ ಡಾಕ್ಟರ್‌ರಡ ನಂಬರ್ ಎಡ್‌ತೋಳಿ, ಅಲ್ಲಿ ಪೋನದು ಸಿಂಟಂಸ್ ಎಣ್ಣುವಂಜಿ ಅಯಿಂಗಡ ಅಭಿಪ್ರಾಯ ಕೇಕೊಲು.

ಪ್ರೇಮ್ ಪೊನ್ನಪ್ಪ : ಅದೂ ಸರಿ, ನಂಗಡ ಆಫೀಸರ್ ಫಿಸಿಸಿಯನ್‌ಕ್ ಎಣ್ಣೆಯೆ, ಅವಂಡ ಕಾರ್ಡ್ ತಂತ್, ಅಲ್ಲಿಕ್ ಪೋನ ಪಿಂಚಾ ನೋಟನ. ಕಾರ್ ಸರ್ವೀಸ್ ಮಾಡಿತ್, ಗಾಳಿ ಪೆಟ್ರೋಲ್ ಎಲ್ಲಾ ಇಟ್ಟಂಡಿಯೆ, ಬಟ್ಟೆಲ್ ನೀಕ್ ಕಾಪಿ ತಿಂಡಿಕ್ ಮಾತ್ರ ನಿಪ್ಪುಚಿಡುವ.

ಬೋಜಿ ಬೋಜಮ್ಮ : ನಾಡ ಪೆದ, ನಿಂಗೆಲ್ಲಾ ಬಾಟುವಿರ..

ಪ್ರೇಮ್ ಪೊನ್ನಪ್ಪ : ಅದೇ ಒರ್ ಮಜ ನೀಡ ಪೆದತ್ ಒರ್ ಮಜಾ.

ಬೋಜಿ ಬೋಜಮ್ಮ : ಏಳಿ ಪೊರಡನ ನೇರ ಆಪ.. (ಪೊರಡುವ)

\* \* \* \* \*



## ಸೀನ್ ಪತ್ತಾಯಿಂಬದ್

(ನಾಡ್ ಮನೆ- ಅಪ್ಪ ಅಣ್ಣ ಮೊಮ್ಮ ಮಕ್ಕ ಇಪ್ಪ- ಅಪ್ಪ ಕೋಂಬರೆಲ್ ಬುದ್ದಂಡಿಪ್ಪ)

(ಪ್ರೇಮ್‌ರ ಸಂಸಾರ ಮನೆಕ್ ಎತ್ತುವ. ಅಪ್ಪಂಡ ಅಣ್ಣಂಡ ಕಾಲ್ ಪುಡಿಪ.)

ಮೇದಯ್ಯ : ಬಂದಿರಾ ಮಕ್ಕಳೆ, ಬಪ್ಪಕ ತೊಂದರೆ ಒಂದೂ ಆಯಿಲೆಲ್ಲಾ..

ಪ್ರೇಮ್ ಪೊನ್ನಪ್ಪ & ಬೋಜಿ ಬೋಜಮ್ಮ(ಒಕ್ಕಚೆ) : ಎಲ್ಲ ಚಾಯಿತೆ ಉಂಡ್,  
ಮಾಯಿ ಎನ್ನನೆ ಉಂಡ್...

ಕಾರಿ ಕಾರ್ಯಪ್ಪ : ಅಪ್ಪಯ್ಯ ಕೋಂಬರೆಲ್ ಬುದ್ದಂಡಿತ್ ಕಣಿಯ ಬಂದಿತ್  
ಬೆಲಿ ಎಡ್ತಿತ್ ತಾತಿ ಕೆಟ್ಟಿತ್.

ಪ್ರೇಮ್ ಪೊನ್ನಪ್ಪ : ಇಕ್ಕತ ಕಾಲತೂ ನಿಂಗ ತಾತಿ ತಗಡ್ ಬೆಲಿ ಎಲ್ಲಾ  
ನಂಬಿಯಂಡ್ ಆಸ್ತೆಕ್ ಪೋಕತೆ ಇಪ್ಪಿರಲ್ಲಾ, ನಿಂಗ ಬೋಂಡೀಕಿ  
ನಿಂಗಡ ನಂಬಿಕೆ ಪ್ರಕಾರ ತಾತಿ ತಗಡ್ ಮಾಡಿಯೋಳಿ, ಆಚೆಂಗಿ  
ಕಾಯಿಲಕ್ ಸರಿಯಾಯಿತ್ ಡಾಕ್ಟರ್‌ಕ್ ಕಾಟುವಂಜಿ ಮದ್ದ  
ಎಡ್ತವಂಡು ಅಲ್ಲ..

ಕಾಮುಣಿ ಕಾಮವ್ವ : ಈ ತಾತಿ ತಗಡ್‌ಕೇ ಸುಮಾರ್ ಖರ್ಚಿ ಆಚಿ, ಇಂಚು  
ಪೇಟಿ ಡಾಕ್ಟರ್ ಪಕ್ಕ ಎಚ್ಚಕಾಪೋ ಎನ್ನೋ ಅಚ್ಚಕ್ ದುಡ್ಡ್ ಎನ್ನಂಗ್  
ಖರ್ಚ್ ಮಾಡೋ.

ಬೋಜಿ ಬೋಜಮ್ಮ: ಅಲ್ಲ ಅಕ್ಕಯ್ಯ ಕಾಯಿಲಕ್ ಮದ್ದ ಮಾಡತೆ ಇಪ್ಪ  
ಕಯ್ಯವಾ, ಏದೇದ್‌ಂಗ್ ಖರ್ಚ್ ಮಾಡೊಂಡು ಅದ್‌ಂಗ್  
ಮಾಡೊಂಡು ಅನಾವಶ್ಯಕ ದುಂದ್ ವೆಚ್ಚ ಆಗ, ಆಚೆಂಗಿ  
ಕಾಯಿಲತ್‌ರ ವಿಷಯತ್ ಕಂಜೂಸ್ ಕಳಿ ಸರಿ ಅಲ್ಲ.

ಕಾಮುಣಿ ಕಾಮವ್ವ : ಅಯ್ಯೋ ನಂಗಡ ಪಕ್ಕ ಅಚ್ಚಕ್ ದುಡ್ಡ್ ಇಲ್ಲೆಲ್ಲಾ ಎನ್ನ  
ಮಾಡನ..

ಪ್ರೇಮ್ ಪೊನ್ನಪ್ಪ : ಬೋಜಿ ನೀನ್ ಮುಂಡತಿರ್, ಅಪ್ಪಯ್ಯನ ನೋಟಿತ್

ಗ್ಯಾನ ಮಾಡನ.

(ಅವ್ವಂಡ ಕೋಂಬರೆಕ್ ಪೋಪ)

ಬೋಜಿ ಬೋಜಮ್ಮ : ಎನ್ನನೆ ಉಳ್ಳಿರಾ ಮಾಯಿ

ಪ್ರೇಮ್ ಪೊನ್ನಪ್ಪ : ಎನ್ನನೆ ಉಳ್ಳಿಯವ್ವಾ..

ಮುದ್ದವ್ವ : ಸದ್ಯ ತ್ರಾಣ ಇಲ್ಲೆ ಕುಂಚೆ ಈ ಕೋಂಬರೆಲ್ ಉಸಿರೇ ಎಡ್‌ಪಕ್ ಕಯ್ಯಲೆ.

ಬೋಜಿ ಬೋಜಮ್ಮ : ಅಲ್ಲ ನಂಗ ಮಾಯಿನ ಬೆಂಗಳೂರ್‌ಕ್ ಕೂಟಿಯ ಪೋಯಿತ್ ನಂಗಡ ಡಾಕ್ಟರ್‌ಕ್ ಕಾಟನ, ಎನ್ನ ಎಣ್ಣುವ ನೋಟನ, ಮಾಯಿರ ಕೂಡೆ ಮಾವನೋ ಕೂಟಿಯಂಡ್ ಪೋಕ ವಯಸ್ ಕಾಲತ್ ಬೋರೆ ಬೋರೆ ಇಪ್ಪದ್ ಬೋಂಡ.

ಪ್ರೇಮ್ ಪೊನ್ನಪ್ಪ : ನೀನ್ ಎಣ್ಣಾನದೇ ಸರಿ, ಎಲ್ಲಾಂಗು ನಾನ್ ಅಪ್ಪ ಅಣ್ಣಂಡ ಕೂಡೆ ತಕ್ಕ ಪರೆವಿ.

(ಈನ ಕೇಟಂಡ ಕಾಮುಣಿ ಕಾಮವ್ವ, ಕಾರಿ ಕಾರ್ಯಪ್ಪಂಗ್ ಕೆಮಿಕ್ ಪಚ್ಚುವ): ಅವು ಕೂಟಿಯ ಪೋಪೆಂಗಿ ಪೋಡ್ ಮಾವನೂ ಪೋಡ್, ನಂಗಕ್ ಕಾಯಿಲಕರ್ತಿನ ನೋಟುವ ಕೆಲಸವೂ ಇಲ್ಲೆ ಅಯಿಂಗಳ ನೋಟುವಕ್ ಬಪ್ಪ ಬೆಂದ್‌ಕಡ ತಕ್ಕಾರವೂ ಬೋಂಡ, ಚೆನ್ನ ನೆಮ್ಮದಿಲ್ ಇಕ್ಕನ.

ಕಾರಿ ಕಾರ್ಯಪ್ಪ : ನೀನೆಂತ ಎಣ್ಣುವ ನಾಡ ಅವ್ವ ಅಲ್ಲಾ, ತಮ್ಮಣ ಕೂಟಿಯ ಪೋಪೆಂಗಿ ಪೋಡ್, ಆಚೆಂಗಿ ನೀನ್ ಇನ್ನನೆ ತಕ್ಕ ಪರೆವಕಾಗ.

ಕಾಮುಣಿ ಕಾಮವ್ವ : ಅದೆಂತೇಂಗಿ ಆಡ್ ನಿಂಗಡ ತಮ್ಮಣ ಕೂಟಿಯ ಪೋಚೆಂಗಿ, ನಿಂಗ ಮಾತ್ರ ಮುಂಡತಿರಿ ಅದ್ ಮದಿ.

ಕಾರಿ ಕಾರ್ಯಪ್ಪ : ಇವಡ ಕೆಟ್ಟ ಮನಸ್‌ನಗುಂಡ್ ನಂಗಕೇ ಪಾಳ್..

ಕಾಮುಣಿ ಕಾಮವ್ವ : ಎಂತ ಗೊಣಗುವ.. ಆಪಚ್ಚಕ್ ಮುಂಡತಿರಿ...

ಪ್ರೇಮ್ ಪೊನ್ನಪ್ಪ : ಅಪ್ಪಯ್ಯ ನಂಗ ನಾಳೆ ನೇರ್ತೆ ಅವ್ವಯ್ಯನ ಕೂಟಿಯಂಡ್ ಬೆಂಗಳೂರ್‌ಕ್ ಪೋಪ, ನೀನೂ ಬಂದರ್ ನೀನ್ ಜೊತೆಲ್ ಉಂಡೇಂಗಿ ಅವ್ವಯ್ಯಂಗೂ ಧೈರ್ಯ ನಂಗಕೂ ನೆಮ್ಮದಿ, ನಾನ್ ಫೋನ್ ಮಾಡಿತ್ ನಾಳೆ ನಾರಾಚೆ ಬೈಟಾಪಕ ಡಾಕ್ಟರ್‌ರ

ಅಪಾಯಿಂಟ್‌ಮೆಂಟ್ ಎಡ್‌ತವಿ, ನಾಳೆಂಜೇ ಟ್ರೀಟ್‌ಮೆಂಟ್ ಸುರು ಆಡ್.

ಮೇದಯ್ಯ : ನಾನೆನ್ನಂಗಪ್ಪ ಬಪ್ಪ, ಅವ್ವಯ್ಯನ ಕೂಟಿಯ ಪೋಯಿ, ನಿಂಗಕೂ ಕಷ್ಟ ಆಪ.

ಕಾಮುಣಿ ಕಾಮವ್ವ : ಅಯಿಂಗಕೆಂತ ಕಷ್ಟ ಇಲ್ಲಿ ನಂಗ ದಂಡಾಳ್‌ನೋ ಚಾಕಿಯೆಂಡಿಂಜಿಲಿಯಾ.

ಪ್ರೇಮ್ ಪೊನ್ನಪ್ಪ : ಈ ಆರ್ಗ್ಯುಮೆಂಟ್ ಒಂದೂ ಬೋಂಡ ನಾಳೆ ಅಪ್ಪ ಅವ್ವ ದಂಡಾಳ್‌ನೋ ಕೂಟಿಯ ಪೋಪ, ಅಣ್ಣಯ್ಯ ನೀಡ ತಕರಾರ್ ಒಂದೂ ಇಲ್ಲೆಲ್ಲ ಕಾಯಿಲ ವಾಸಿ ಆನ ಪಿಂಇ ಇಲ್ಲಿಕೇ ಬುಡುವಿ ಆಪುಲಿಯಾ?

ಕಾರಿ ಕಾರ್ಯಪ್ಪ : ನೀಡ ಇಷ್ಟ ಅವ್ವಯ್ಯ ಚಾಯಾಚೆಂಗಿ ಮದಿ.

ಪ್ರೇಮ್ ಪೊನ್ನಪ್ಪ : ಆಚಿ ಅಂದಕ ನಂಗ ನಾಳೆ ನೇರ್ತೆ ಪೊರಡುವ, ಅಪ್ಪ ನೀಡ ಬಟ್ಟೆ ಬರಿ ಬೋಜಿಕ್ ಕೊಡ್ ಅವ್ವಯ್ಯಂಡ ಬಟ್ಟೆ ಬರೆನೋ ಬೋಜಿಯೇ ಕೇಟಂಡ್ ಪ್ಯಾಕ್ ಮಾಡಿಯವ.

(ಪ್ರೇಮ್ ಪೊನ್ನಪ್ಪ ಬೆಂಗಳೂರ್ ಡಾಕ್ಟರ್‌ಕ್ ಪೋನ್ ಮಾಡಿತ್ ಅಪಾಯಿಂಟ್‌ಮೆಂಟ್ ಎಡ್‌ತವ).

\* \* \* \* \*

## ಸೀನ್ ಇರುವದ್

(ಬೆಂಗಳೂರ್‌ಲ್ ಡಾಕ್ಟರ್‌ಕ್ ಅವ್ವನ ಕಾಟಿತ್ ಟ್ರೇಟ್‌ಮೆಂಟ್ ಸುರು ಮಾಡುವ, ಪತ್ಯ ಎಣ್ಣುವ, ಮನೆಲೇ ಮದ್ದ್ ಕೊಡ್‌ತಕ ಮದಿ ಎಣ್ಣುವ, ಮನೆಲ್ ಅವ್ವನ ಜಾಯಿತೆ ನೋಟಿತ್ ಕಾಯಿಲ ವಾಸಿ ಆಪ)(ಅಪ್ಪನೂ ಅವ್ವನೂ ಮಕ್ಕಡ ಕೂಡ ಕುಶೀಲ್ ಇಂಜತ್)

(ಪ್ರೇಮ್ ಪೊನ್ನಪ್ಪ s ಬೋಜಿ ಬೋಜಮ್ಮ ಆಫೀಸ್ ಂಜಿ ಬಂತ್ ಮಕ್ಕಳೆ ಅವ್ವಯ್ಯಂಗ್ ಪಿಲ್ಸ್ ಕೊಡ್‌ತಿರಾ, ತಾತಂಗ್ ಕಾಪಿ ಕೊಡ್‌ತಿರಾ ತಿಂಬಕ್ ಎನ್ನೇಂಗಿ ಕೊಡ್‌ತಿರಾ, ನಿಂಗಲೂ ತಿಂದಿರಾ.

ಗ್ಯಾನ್/ಕಾವ್ಯ : ಅವ್ವಯ್ಯಂಗ್ ಪಿಲ್ಸ್ ತಾತನೇ ಕೊಡ್‌ತಿತ್‌ಲೋ, ತಿಂಡಿ ನಂಗ ಬಂದ ಪಿಂಞ ತಾತ ಅವ್ವಯ್ಯಂಗ್ ಕೊಡ್‌ತತ್, ನಂಗಲೂ ತಿಂದತ್. ಡ್ಯಾಡಿ ಇಂದ್ ಅವ್ವಯ್ಯ ಕರ್ಜಿ ಕಾಯಿ, ನಿಪ್ಪಿಟ್ ಮಾಡಿತಿಂತ್, ದುಂಬಾ ಚಾಯಿ ಉಂಡ್, ಅದ್‌ನೇ ನಂಗ ತಿಂದಿಯೆ, ನೀಕೂ ಮಮ್ಮಿಕೂ ಸಾಸರ್‌ಲ್ ಬೆಚ್ಚಿತ್, ದುಂಬಾ ಚಾಯಿ ಉಂಡ್, ಬಲ್ಯವ್ವ ಮಾಡ್‌ನನ್ನಕೆ ವಾಸನೆ ಇಲ್ಲೆ.

ಪ್ರೇಮ್ ಪೊನ್ನಪ್ಪ : ಅವ್ವಯ್ಯಂಗ್ ಕೇಮೆ ಇಲ್ಲೆ, ಚೆನ್ನ ಹುಷಾರಾಪದು ಪಣಿ ಕೆಯ್ಯುವಕ್ ಸುರು ಮಾಡಿರ್‌ತ್. ಚೆನ್ನ ಮುಂಡತೆ ಅಳ್‌ತಿತ್ ರೆಸ್ತ್ ಎಡ್‌ಪಕ್ ಕಯ್ಯುಲಿಯಾ.

ಮುದ್ದವ್ವ : ಮುಂಡತೆ ಎಚ್ಚ ದಿನಾಂದ್ ಅಳ್‌ಪ ಕುಂಞೆ, ಚೆನ್ನ ಅದ್ ಇದ್‌ಂದ್ ಕೆಲಸ ಮಾಡಿಯೇಂಡುಂಡೇಂಗಿ ಪರೋಲೆ, ಉಂಡ ಕೂಳ್‌ರ ಅಲ್ಲೇಂಗಿ ಉಪ್ಪುರೇಂಗಿ ಋಣ ತೀಪಕ್ ಪಣಿ ಕೆಯ್ಯೊಂಡೂಂದ್ ಪಳಂಜೊಲ್ಲೆ, ನಾಕೂ ಇಕ್ಕ ಕಾಯಿಲವೂ ವಾಸಿ ಆಯಿತ್ ಚಾಯಿತೇ ಉಳ್ಳಲ್ಲಾ, ಮಕ್ಕಕೂ ಎಂತೇಂಗಿ ಪುದಿಯದ್ ಮಾಡಿ ಕೊಡ್‌ತಕ ಕುಶಿ ಆಪಲ್ಲಾ, ಅವು ಕುಶಿ ಪಟ್ಟಕ ನಂಗಡ ಕೆಲ ದುಂಬುವ.

ಬೋಜಿ ಬೋಜಮ್ಮ : ಸರಿ ಮಾಯಿ, ಕಾಯಿಲ ವಾಸಿ ಆಚೀಂದ್ ಎಲ್ಲಾ

ಕೆಲಸ ಮಾಡೋಕ್ ಸುರು ಮಾಡಿರಾತಿ, ನಾನೂ ಸೋಮಾರಿ ಆಯಿರು.

ಮೇದಯ್ಯ : ನೈಚ ತಡಿ ಅವಡದ್, ಕೆಲಸ ಮಾಡತೆ ಅಳಪಂತ ಜನ್ನ ಅಲ್ಲ ಅವಡದ್, ಇಕ್ಕ ಚೆನ್ನ ದಿವಸತಿಂಜ ಅವಕ್ ಹುಷಾರ್ ಇಲ್ಲತಾನಗುಂಡ್ ಕೆಲಸ ಮಾಡುವ ಇಂಜಿಲೆ, ನಂಗ ಅಲ್ಲಿ ಕಣಿಯ ಪಣಿಕ ಎಣ್ಣಿಯಂಡ್ ಇಪ್ಪಾಂಗುಂಜಿ ನಲ್ಲ ಡಾಕ್ಟರ್‌ಕ್ ಕಾಟಿತುಂಡೇಂಗಿ ಇಚ್ಚಕ್ ನರಳುವ ಅವಸ್ಥೆ ಇಪ್ಪಕಿಂಜಿಲೆ ಇವಕ್.

ಪ್ರೇಮ್ ಪೊನ್ನಪ್ಪ : ಅದಾಂಗೇ ನಂಗ ಡಾಕ್ಟರ್‌ಕ್ ಕಾಟೀಂದ್ ಎಣ್ಣಿಯೆ, ಎಂತೇಂಗಾಡ್, ಅವ್ವ ಚಾಯಾಚಲ್ಲಾ.

(ಬೆಂಗಳೂರ್ ಮನೆಲ್ ಇಪ್ಪಕ ಕಾವೇರಿ ಚಂಗ್ರಾಂದಿ ಬಪ್ಪ..ಬೋಜಿ ಬೋಜಮ್ಮ ಕಾವೇರಿರ ಕಣಿ ಬೆಚ್ಚಿತ್, ಚಾಯಿತೆ ಅಲಂಕಾರ ಮಾಡಿತ್, ಕಣಿ ಪೂಜಿತ್ ಮಾವ ಮಾಯಿರ ಕಾಲ್ ಪುಡಿಪ)  
ಮೋಂವನೂ, ಮಕ್ಕ ಗ್ಯಾನ್ ಕಾವ್ಯನೂ ಕಣಿ ಪೂಜಿತ್ ಎಲ್ಲಾಡ ಕಾಲ್ ಪುಡಿಪ)

ಮುದ್ದವ್ವ : ಅಲ್ಲಾ, ಈ ಮೈಮಡ ಪೂಜೆರ ನಿಷ್ಟೆ ನೋಟಿ, ಎಚ್ಚ ಚಾಯಿತೆ ಪೂಜ್‌ಚಿ, ಮನೆಲುಳ್ಳವಳೂ ಉಂಡ್, ಕಾಟಾಚಾರಕ್ ಪೂಜುವ. ಇನ್ನನೆ ಪೂಜೆ ಮಾಡ್‌ಚೆಂಗಿ ಖಂಡಿತಾ ದೇವಡ ಆಶೀರ್ವಾದ ಕ್‌ಟ್ಟುವ.

ಮೇದಯ್ಯ : ಖಂಡಿತಾ ಅಕ್ಕು.

ಗ್ಯಾನ್/ಕಾವ್ಯ : ತಾತ ತಾತ, ಕಾವೆರಮ್ಮೆರ ಒರ್ ಪಾಟ್ ಪಾಡ್ ತಾತ, ಕೇಸೆಟ್ ಪಾಟ್ ಕೇಟ್ ಕೇಟ್ ಮದಿಯಾಯೋಯಿತ್, ನೀಡ ಸ್ವಂತ ಪಾಟ್ ಪಾಡ್ ತಾತ.

ಮೇದಯ್ಯ : ಆಚಿ ಕುಂಇಯಳೆ, ನಾನೇ ಎಳ್ದನದ್, ನಾಡ ರಾಗತೇ ಪಾಡುವಿ, ನೋಟನ:

(ಪ್ರೇಮ್ ಬೋಜಿ ಮಕ್ಕ ಎಲ್ಲ ಅಳತವ)

"ಕಾವೇರಮ್ಮೆಯೇ ನಂಗಡ ತಾಯೇ,  
ಇಗ್ಗುತಪ್ಪನೇ ಕೊಡಗ್‌ರ ಅಪ್ಪನೇ,

ಕಾರಣಜ್ಞಪ್ಪಂಗಳೇ ಕೊಡವಡ ಗುರುವೇ ಕಾಪಾಡಿ,  
ನಂಗಳೆಲ್ಲಾ ಕಾಪಾಡಿ ಪೊಲ್ತೀ, ಕೈಪುಡ್‌ಚಿ ಮಿಂಇಕ್ ಕೂಟಿ,  
ಮಂಡೆಲ್ ಕೈ ಬೆಚ್ಚ್ ಕಾಪಾಡಿ.

ಬಟ್ಟೆಲ್ ತೊಣೆಯಾಯಿ, ನಡ್‌ಪಕ್ ತಂಡಾಯಿ,  
ಬೆದ್‌ಲ್ ನಳವಾಯಿ, ಕುಯಿಪಲ್ಲಿ ಕೈಂಕಣೆ ತುಣಿಯಾಯಿ,  
ನೀರ್‌ಲ್ ಮರಕುಟ್ಟಾಯಿ, ತಿತ್ತಲ್ ನೀರಾಯಿ ಕಾಪಾಡಿ.  
ಪೋನಲ್ಲಿ ಮಿಗಿಲಾಯಿ, ಕೆಲಸತ್ ಜಯವಾಯಿ,  
ಮನಸ್‌ಲ್ ನೆಮ್ಮದಿ, ಸಂಸಾರತ್ ಸುಖವಾಯಿ,  
ನಲ್ಲ ಬುದ್ಧಿ ವಿಧ್ಯ ತಂದ್ ನಂಗಡಾಮೆ ಉಳಿವಾಯಿ ಕಾಪಾಡಿ,  
ಬಟ್ಟೆ ಕಾಂಬುಲೆ, ದಿಕ್ಕ ತೋಂದುಲೆ, ನಿಂಗಳೇ ಕಾಪಾಡಿ.

ಮಕ್ಕ : ತಾತ ಉಂಇೋರ್ ಪಾಟ್ ಪಾಡ್ ತಾತ, ಪ್ಲೀಸ್ ತಾತ.  
ಮೇದಯ್ಯ : ಆಚಿ ಕುಂಇೆಯಳೆ ನಂಗಡ ದೇಶತ್‌ರ ಬಗ್ಗೆ ಒರ್ ಪಾಟ್:

ಜೈ ಭಾರತ, ಜೈ ಭಾರತ, ಜೈ ಭಾರತ,  
ಈ ದೇಶತ್ ಪುಟ್ಟ್‌ನ ಮಕ್ಕ,  
ದೇಶತ್‌ರ ವೀರ ಪುತ್ರಂಗ,  
ಅದೇ ನಾಡ ಭಾಗ್ಯ ಭರ್ಕತ್ತ್.

ಎಂದೆಂದೂ ಶಾಂತಿಕ್ ಒದ್ದಾಡುವ,  
ದಾಡ ಮೇಲೆ ಬೆಪ್ಪುಲೆ ಪಗೆನ,  
ನಂಗಾಯಿತ್ ಮಾಡುಲೆ ಲಡಾಯಿನ.

ಸನ್ಯಾಸಿ ಸತ್ತುರುಷಂಗ ಪುಟ್ಟ್‌ನ ದೇಶ,  
ಚಾರಿತ್ರ ಸಂಸ್ಕೃತಿಕ್ ಕೇಳಿ ಪೋನ ದೇಶ,  
ಆದ್ಯಾತ್ಮಿಕೆಕ್ ನಂಗಳ ನೋಟುವ ಪರದೇಶ.

ಇಲ್ಲತ ವಸ್ತು ಇಲ್ಲೆ ಈಂಡ ಕೆಲತ್,  
ಬನ ಕಾಡ್ ನೀರ್ ದುಂಬಿತ್ ಮೇಲೆಲ್ಲಾ,  
ದೇವಳೇ ತಂದ ಕುಂದ್ ಸಾಗರ್ ಹದ್ದ್.  
ಇದೋರ್ ಪವಿತ್ರ ಭೂಮಿ,  
ದೇವಳೆಚ್ಚಕೋ, ಎಲ್ಲಾರೂ ಸ್ವಾಮಿ.

ಧರ್ಮ ಜಾತಿಮತ ಮಿಶ್ರ ಚಾಯಿ.

ಇಂತ ಪವಿತ್ರ ಬೂಮಿಲ್ ಪುಟ್ಟಾನ ನಂಗ,

ನೇರಾಯಿತೂ ಎಲ್ಲಾ ಕಾಲಕೂ ಭಾಗ್ಯವಂತಂಗ,

ಇಂಞೊಮ್ಮ ಪುಟ್ಟಿ ಬಕ್ಕ ಈ ದೇಶತ್ ನಂಗ.

\* \* \* \* \*

## ಸೀನ್ ಇರುವತ್ತ ಒಂದ್

(ಒನ್ನಾಂದ್ ಪ್ರೇಮ್ / ಬೋಜಿ ಆಫೀಸ್‌ಂಜಿ ಬಂದದು)

ಮೇದಯ್ಯ : ನಂಗಳ ಬಸ್ ಪತ್ತ್‌ಚಿಟ್ವರಪ್ಪ, ನಂಗ ನಾಡ್‌ಕ್ ಪೋಪ.

ಬೋಜಿ ಬೋಜಮ್ಮ : ಅದೆನ್ನೋ ಅಚ್ಚ ಅರ್ಜೆಂಟ್, ಮನೆಲ್ ಮೊರ್ಡುವ  
ಕುಂಇ ಉಂಡೆನ್ನೋ ಮಾಯಿಕ್, ಚೆನ್ನ ದಿವಸ ಇಲ್ಲಿ ಇರಿ, ಮಕ್ಕಕ್  
ರಜ ಬುಡುವ, ಅಕ್ಕ ನಂಗೆಲ್ಲ ನಾಡ್‌ಕ್ ಪೋಕ.

ಪ್ರೇಮ್ ಪೊನ್ನಪ್ಪ : ಅವ್ವಯ್ಯ ಇಕ್ಕಾಯಿತ್ ಆಸ್ತೆಂಜಿ ಬಂದಿಯೆ ಇಕ್ಕಲೇ  
ಬಸ್‌ಲ್ ಪೋಪದ್ ಬೋಂಡ.

ಮೇದಯ್ಯ : ಎಕ್ಕ ಮಕ್ಕಕ್ ರಜ ಬುಡುವ.

ಪ್ರೇಮ್ ಪೊನ್ನಪ್ಪ : ಎನ್ನ ಅಪ್ಪಯ್ಯ ಅಚ್ಚ ಅರ್ಜೆಂಟ್, ಮಕ್ಕಡ ಟೈಮ್  
ಟೀಬಲ್ ಬಪ್ಪ ಅಕ್ಕ ನೋಟಿತ್ ಎಣ್ಣುವಿ ನಿಂಗ ಇಕ್ಕ ಆರಾಮ್‌ಲ್  
ಇರಿ.

(ಬೈಟ್ ಬುದ್ದಂಡಲ್ಲಿ ಅಪ್ಪನೂ ಅವ್ವನೂ)

ಮೇದಯ್ಯ : ಅಲ್ಲ ಇಲ್ಲಿ ಇವು ದಂಡಾಳೂ ಕತ್ತೆಯಳನ್ನಕೆ ನೈಪ, ಮನೆಂಜೂ  
ಒಂದೂ ಸಹಾಯ ಎಡ್‌ತವಲೆ, ಅವು ಕೊಡ್‌ಪದೂ ಇಲ್ಲೆ, ಇನ್ನನೆ  
ಆಚೆಂಗಿ ಈ ಮೋಂವಂಗ್ ಒಂದೂ ಇಲ್ಲತಾಯಿರು, ಉಂಡ  
ಕೂಳ್ ತಿಂದ ಮಾಂಗೆ ಪೋಲೆ.

ಮುದ್ದವ್ವ : ಅದ್ ನೇರೆ, ಆ ಮೈಮಳೋ ಈಯಂಗಕ್ ಒಂದು ಕೊಡ್‌ಪಕ್  
ಬುಡುವದೂ ಇಲ್ಲೆ, ದುಡ್ಡ್ ಕಾಸೂ ಕಾಂಬುಲೆ ಅನ್ಯಾಯ ಆಪ.

ಮೇದಯ್ಯ : ಆಂಗ್ ನಾನೋರ್ ತೀರ್ಮಾನ ಮಾಡಿಯೆ ಈ ಕಾಪಿ ಮಳು  
ಕೊಜ್ಜಿತಾನದು ನಾಡ ಆಸ್ತಿನ ದಂಡಾಳ್‌ಕೂ ಪಾಲ್ ಮಾಡಿ  
ಕೊಡ್‌ತ್‌ರುವಿ. ಇಲ್ಲಿಂಜಿ ಪೋನದು ಕೊಡ್‌ತೆಂಗೆ ಇಯಂಗಡ



ಮೇಲೆ ತಪ್ಪು ಅಭಿಪ್ರಾಯ ಬಪ್ಪ, ಆಂಗ್ ಈ ಫಸಲ್ ಕೊಜ್ಜಿತಾಕಣೆ ಮುಂಡತಿಕ್ಕ.

ಮುದ್ದವ್ವ : ಅದ್ ಸರಿ ಅವ ನಂಗಡ ಮುಂಬಲ್ಲ್, ಮನೆಲ್ ತೋಟ ತೊಡಿಯ ನೋಟಿಯಂಡುಳ್ಳಂವ, ಅವಂಗೂ ಅನ್ಯಾಯ ಆಪಕಾಗ, ಇಂವನೋ ಮನೆಂಜಿ ಇಕ್ಕಾಕಣೆ ಒಂದೂ ಎಡ್ತ ಬರತೆ ನಂಗಡ ಕಷ್ಟಕೂ ಆಯಂಡ್ ಅವಂಡ ಪಾಡ್ಕ್ ಉಳ್ಳಂವ, ಇಂವಂಗೂ ಅನ್ಯಾಯ ಆಪಕಾಗ.

ಮೇದಯ್ಯ : ನೀನ್ ನಾಡ ಮನಸ್ಸಲ್ ಇಂಜ ತಕ್ಕನೇ ಪರಂದಿಯ. ನಾನೆಂತ ಗ್ಯಾನ ಮಾಡಿಯೆ ಎಣ್ಣೆಚೇಂಗಿ" ಮನೆ, ಮನೆರ ಪಕ್ಕ ಉಳ್ಳ ತೋಟ ಪನ್ನಂದ್ ಏಕ್ರೆ ಪೆರಿಯಂವಂಡ ಪಾಲ್ಕೂ, ಆ ಕರೆ ರೋಡ್‌ರ ಪಕ್ಕ ಉಳ್ಳ ಎಟ್ತ್ ಏಕ್ರೆ ವೈಸಾರಿ ತೋಟ ಇಂವಂಡ ಪಾಲ್ಕೂ ಮಾಡಿರನ, ನಂಗಡ ಪಾಲ್ಕ್ ತೋಟ ಬೆಚ್ಚವದ್ ಬೋಂಡ ಮಕ್ಕಕ್ ನಲ್ಲ ಬುದ್ದಿ ಕೊಡ್ತಿತ್ ನಂಗಳ ನೋಟಿಯವಡ್.

ಮುದ್ದವ್ವ : ಆಕು, ಆಚೆಂಗಿ ನಂಗಡ ಕಾಯಿಲ ಕಸಾಲೆಕ್ ಚೆನ್ನ ದುಡ್ಡ್ ಬೋಂಡು ಅಲ್ಲ.

ಮೇದಯ್ಯ : ಇಕ್ಕ ನಂಗಡ ಪೆದತ್ ಉಳ್ಳ ದುಡ್ಡ್ ಅನ್ನನೆ ಇಕ್ಕಡ್. ಕಷ್ಟ ಕಾಲಕ್ ಬೋಂಡಿಯಾಕು.

ಮುದ್ದವ್ವ : ನಾಡ ನಾಲ್ ಬಳೆ , ಈ ಡಬ್ಬಲ್ ಚೈನ್, ಓಲೆ, ಬ್ರೋಚ್ ನಾಡ ದಂಡ್ ಮೈಮಕೂ ಇರಡ್, ದಂಡಾಳ್ ಕೂ ಮೂಡಿ ಕುಂಇಯ ಉಂಡಲ್ಲ. ತಾಯಿರ ಅಚ್ಚಕೇಂಗಿ ಇರಡ್.

ಮೇದಯ್ಯ : ಅಕ್ಕ ನಾಡ ಕುಪ್ಪಿಯ ಚೇಲೆ ಪೀಚೆ ಕತ್ತಿ ತೋಕ್, ಪೆರಿಯ ಮೊಂವಂಗ್ ಇರಡ್, ಅವ ಅಲ್ಲಿ ಮಂಗಲ ನಮ್ಮೆ ನಾಳ್ ಕ್ ಜಾಸ್ತಿ ಪೋಪಲ್ಲ, ಇಂವ ಆಚೆಂಗಿ ಮಂಗಲಕೇ ಮಾಡಿಯಂಡತ್ ಅಲ್ಲತೆ ಎಕ್ಕೇಂಗಿ ಓರಮ ಮಂಗಲಕ್ ಪೋಪ, ಇಂವಂಡ ಮೋಂವಂಗ್ ಇಂವನೇ ಮಾಡಿಯವಡ್, ದೇವ ಕೊಡ್ಪ ಬುಡ್. ಈ ವಿಷಯ ನಂಗ ಇಲ್ಲಿಂಜಿ ಪೋಪಾಂಗ್ ಮಿಂಇ ಇಂವಂಡ ಕೂಡೆ ಅಥವ ಮೈಮಡ ಕೂಡೆಯಾಡ್ ತಕ್ಕ ಪರಂದಿತ್ ಅಭಿಪ್ರಾಯ ಕೇಟವನ,

- ಮುದ್ದವ್ವ : ಅದೇ ಸರಿ, ಆಚೆಂಗಿ ಅವು ದಾಡ ಕೂಡೆಯೂ ಎಣ್ಣುವಕಾಗ, ನಂಗ ತೀರ್ಮಾನತ್ ನ ಎಲ್ಲಾಡ ಎದಿಕೆ ಎಣ್ಣನ.
- ಮೇದಯ್ಯ : ಅನ್ನನೆ ಅಯಿಂಗಕೂ ಎಣ್ಣನ.  
(ಆ ಚೆನಿಯಾಚೆ ಮಜ್ಜಣ ಪ್ರೇಮ್ s ಬೋಜಿ ಆಫೀಸಾಂಜಿ ಮಕ್ಕ ಸ್ಕೂಲ್‌ಂಜಿ ಬಪ್ಪ)
- ಮೇದಯ್ಯ : ಪ್ರೇಮ್ ನಂಗಕೂ ವಯಸ್ಸಾಚಿ ಅವ್ವಂಗ್ ಈ ಕಾಯಿಲ ಬಂದದೇ ನಂಗಡ ಕಣ್ಣ್ ತೊರಂದಿತ್, ಆಂಗ್ ನಾನ್ ಇಕ್ಕ ಒರ್ ಅಭಿಪ್ರಾಯ ಪಟ್ಟಿಯೆ, ನಿಂಗಡ ಅಭಿಪ್ರಾಯ ಎಣ್ಣೆ, ಒರ್ ಮುಚ್ಚ್ ಮರೆ ಬೋಂಡ.
- ಪ್ರೇಮ್ ಪೊನ್ನಪ್ಪ : ಎಂತಪ್ಪ ಅದ್ ಅಂತ ವಿಷಯ..
- ಮೇದಯ್ಯ : ನಾಡ ಸ್ವಯಾರ್ಜಿತ ಕಿಂಚಿತ್ ಆಸ್ತಿ ಉಂಡ್, ಆನ ಈ ಫಸಲ್ ಕೊಜ್ಜಿತಾನ ಪಿಂಇ ನಾಡ ದಂಡ್ ಕಣ್ಣಾನನ್ನಕೆ ಉಳ್ಳ ಮೋನಿಯಂಗಕ್ ಪಾಲ್ ಇಟ್ಟಿತ್ ಕೊಡ್ಪನ್ನಕೆ, ಬಯ್ಯ ನಂಗಡ ಮರು ದಿನಕ್ ಮಕ್ಕ ಜಗಳ ಬಕ್ಕಣ ಮಾಡಿಯವದ್ ಬೋಂಡಾಂದ್.
- ಪ್ರೇಮ್ ಪೊನ್ನಪ್ಪ : ಎನ್ನಪ್ಪ ಅಚ್ಚ ಅರ್ಜೆಂಟ್, ಇಕ್ಕ ಅಣ್ಣಯ್ಯ ಚಾಯಿತೇ ನೋಟಿಯಂಡುಂಡಲ್ಲ ಪಿಂಇ ಎನ್ನ.
- ಮುದ್ದವ್ವ : ಅಕ್ಕು ಕುಂಇ ಚಾಯಿತೇ ನೋಟಿಯಂಡ್ ಉಂಡ್ ಅಯಿಂಗಡ ಪಾಲ್‌ಕಂದ್ ಕೊಡ್ತಕ ಅಯಿಂಡ ಪಾಲ್‌ನ ಉಂಇೂ ಚಾಯಿತೆ ನೋಟಿಯವದ್ ಮದಿ, ನೀಡ ಪಾಲ್‌ಂಜಿ ನೀಕೂ ಚೆನ್ನ ಆದಾಯ ಇಪ್ಪಲ್ಲಾ. ಇಕ್ಕ ಒಂದೂ ಕಟ್ಟಿಯಂಡ್ ಇಲ್ಲೆಲ್ಲಾ.
- ಬೋಜಿ ಬೋಜಮ್ಮ : ಅಯ್ಯೋ ಬುಡಿ ಮಾಯಿ, ನಂಗಡ ಯೋಗತ್ ಉಳ್ಳದೇ ಕಟ್ಟುವ ಇಕ್ಕ ಅವು ಮಾಡಿಯಂಡುಂಡಲ್ಲ ಅರ್ಜೆಂಟ್ ಒಂದು ಬೋಂಡ ಬುಡಿ.
- ಮೇದಯ್ಯ : ಇಲ್ಲೆವ್ವ, ಈ ಫಸಲ್ ಆನದೂ ಪಾಲ್ ಕೊಡ್ಪದೇ ಅದೇ ತೀರ್ಮಾನ, ಪಾಲ್ ಇನ್ನನೆ ಇಟ್ಟಿತ್: ಅವ ನಂಗಡ ಮುಂಬಲ್ಲ್, ಮನೆಲ್ ತೋಟ ತೊಡಿಯ ನೋಟಿಯಂಡುಳ್ಳಂವ, ಅವಂಗೂ ಅನ್ಯಾಯ ಆಪಕಾಗ, ಇಂವನೋ ಮನೆಂಜಿ ಇಕ್ಕಾಕಣೆ ಒಂದೂ ಎಡ್ತ ಬರತೆ ನಂಗಡ ಕಷ್ಟಕೂ ಆಯಂಡ್ ಅವಂಡ ಪಾಡ್‌ಕ್ ಉಳ್ಳಂವ, ಇಂವಂಗೂ ಅನ್ಯಾಯ ಆಪಕಾಗ.

"ಮನೆ, ಮನೆರ ಪಕ್ಕ ಉಳ್ಳ ತೋಟ ಪನ್ನಂದ್ ಏಕ್ರೆ ಪೆರಿಯಂವಂಡ ಪಾಲ್‌ಕೂ, ಆ ಕರೆ ರೋಡ್‌ರ ಪಕ್ಕ ಉಳ್ಳ ಎಟ್ಟ್ ಏಕ್ರೆ ಪೈಸಾರಿ ತೋಟ ಇಂವಂಡ ಪಾಲ್‌ಕೂ, ನಂಗಡ ಪಾಲ್‌ಕ್ ತೋಟ ಬೆಚ್ಚವದಿಲ್ಲೆ, ಮಕ್ಕಕ್ ನಲ್ಲ ಬುದ್ದಿ ಕೊಡ್‌ತಿತ್ ನಂಗಳ ನೋಟಿಯವಡ್. ಅವ ಮನೆ ತೋಟ ನೋಟಿಯಂಡ್ ಇಂಜಾಂಗ್ ಉಳ್ಳಾಂಗ್ ಅವಂಗ್ ಮೂಂದ್ ಏಕ್ರೆ ತೋಟ ಜಾಸ್ತಿ ಕೊಡ್‌ತಿಯೆ. ಇಕ್ಕ ನಂಗಡ ಪೆದತ್ ಉಳ್ಳ ದುಡ್ಡ್ ಅನ್ನನೆ ಇಕ್ಕಡ್. ಕಷ್ಟ ಕಾಲಕ್ ಬೋಂಡಿಯಾಕು.

ಮಾಯಿರ ನಾಲ್ ಬಳೆ , ಡಬ್ಬಲ್ ಚೈನ್, ಓಲೆ, ಬ್ರೋಚ್ ದಂಡ್ ಮೈಮಕೂ ಇರಡ್, ದಂಡಾಳ್‌ಕೂ ಮೂಡಿ ಕುಂಇಯೆ ಉಂಡಲ್ಲ. ತಾಯಿರ ಅಚ್ಚಕೇಂಗಿ ಇರಡ್.

ನಾಡ ಕುಪ್ಪಿಯ ಚೇಲೆ ಪೀಚೆ ಕತ್ತಿ ತೋಕ್ ಪೆರಿಯ ಮೊಂವಂಗ್ ಇರಡ್, ಅವ ಅಲ್ಲಿ ಮಂಗಲ ನಮ್ಮೆ ನಾಳ್‌ಕ್ ಜಾಸ್ತಿ ಪೋಪಲ್ಲ, ಇಂವ ಆಚೆಂಗಿ ಮಂಗಲಕೇ ಮಾಡಿಯಂಡತ್ ಅಲ್ಲತೆ ಎಕ್ಕೇಂಗಿ ಓರಮ ಮಂಗಲಕ್ ಪೋಪ, ಇಂವಂಡ ಮೋಂವಂಗ್ ಇಂವನೇ ಮಾಡಿಯವಡ್, ದೇವ ಕೋಡ್‌ಪ." ಈಂಗ್ ನಿಂಗಡ ಅಭಿಪ್ರಾಯ ಎಂತ. ಎಂತ ಆಚೆಂಗಿನೂ ಈ ವಿಷಯತ್‌ನ ದಾರ್‌ಕೂ ಎಣ್ಣುವ ಕಯ್ಯ, ನಂಗಳೇ ಈ ವಿಷಯತ್‌ನ ಮನೆಲ್ ಎಣ್ಣುವ ಅಲ್ಲಿ ಕತ್ತಣೆ ದಾರೂ ದಾರ್‌ಕೂ ಎಣ್ಣುವಕಯ್ಯ. ಆಚೆಂಗಿ ನಿಂಗಕ್ ಅನ್ಯಾಯ ಆಚೇಂದ್ ಕಂಡತೇಂಗಿ ಎಣ್ಣೆ, ನಿಂಗಡ ಅಭಿಪ್ರಾಯ ನಾಕ್ ಭಾರಿ ಮುಖ್ಯ.

**ಪ್ರೇಮ್ ಪೊನ್ನಪ್ಪ :** ಅಪ್ಪಯ್ಯ, ಇಕ್ಕಲೆ ನಾಕ್ ಪಾಲ್ ಬೋಂಡಾಂದ್ ನಾಡ ಅಭಿಪ್ರಾಯ, ಆಂಡ ಮೇಲೆ ನಿಂಗ ತಂದದ್ ನಂಗಕ್ ಆಶೀರ್ವಾದಾಂದ್ ನಾನ್ ಎಡ್‌ತವಿ.

**ಬೋಜಿ ಬೋಜಮ್ಮ :** ಮಾವ ಇವು ಎಣ್ಣಾನನ್ನಕೆ ನಂಗಕ್ ಇಕ್ಕಲೇ ಪಾಲ್‌ರ ಮೇಲೆ ಆಸೆ ಇಲ್ಲೆ. ಆಂಡ ಮೀದ ನಿಂಗ ತಂದಾನ ನಂಗ ಪ್ರಸಾದಾಂದ್ ಎಡ್‌ತವ, ನಿಂಗಕ್ ತೋಂದ್‌ನನ್ನಕೆ ಮಾಡಿ.

**ಮೇದಯ್ಯ :** ಈ ವಿಷಯತ್‌ನ ನಿಂಗ ದಾರ್‌ಕೂ ಎಣ್ಣುವಕಯ್ಯ ಸಮಯ ಬಪ್ಪಕ

ನಾನೆ ಈನ ಎಣ್ಣುವಿ. ಪಿಂಞ ನೀಡ ಚಲ್ಲ ಬಾಯಿ ದಾರ್ಕೇಂಗಿ  
ಬಾಯಿ ಬುಟ್ಟರತೆ.(ಮುದ್ದವ್ವಂಗ್ ಎಣ್ಣುವ)

ಮುದ್ದವ್ವ : ಅಕ್ಕ ನಾನೇ ನೋಟಿ ಎಲ್ಲ ಎಣ್ಣೆಯ ಬಪ್ಪ, ನಿಂಗಕ್ ಒರ್ ದಂಡ್  
ಪೆಗ್ ತಾತಿತಾಪದು ಕೆಲತ್ಂಜಿ ವಿಷಯ ಎಲ್ಲ ಪೊರ ಬುದ್ದುರುವ.  
ನಾನೆ ನೋಟಿ..

ಮೇದಯ್ಯ : ಈ ವಿಷಯ ಪೊರ ಬಪ್ಪಲೆ, ಎನ್ನನೆಯೋ ಇಲ್ಲಿ ದಿನಾ ಬೈಟ್  
ಒರ್ ಪೆಗ್ ಕುಡ್ಚಿತ್ ನಲ್ಲ ಪೊದ ಬಂತ್, ಅನ್ನನೆ ಮಾಡುವ,  
ದಂಡನೆ ಪೆಗ್ಕೇ ಪೋಪುಲೆ. ಅಕ್ಕ ನೀನ್ ಬೊತ್ತಿಯಂಡನ್ನಕೆ ವಿಷಯ  
ಪೊರ್ಮೆ ಬಪ್ಪಲೆ.

ಪ್ರೇಮ್ ಪೊನ್ನಪ್ಪ s ಬೋಜಿ ಬೋಜಮ್ಮ : ಚಾಯುಂಡ್ ನಿಂಗಡ ಜಗಳ,  
ಮದಿ, ಇನ್ನನೆ ಇರಿ ಬುಡಿ.

\* \* \* \* \*

## ಸೀನ್ ಇರುವತ್ತ ದಂಡ್

(ನಾಡ್ ಮನೆ, ಕಾಮುಣಿರ ಅಣ್ಣ ಉತ್ತು ಉತ್ತಯ್ಯ ಮೊಮ್ಮ ಮುತ್ತು ಮುತ್ತಮ್ಮ  
ಬಂದಿತಿಪ್ಪ)(ಅಪ್ಪ ಅವ್ವ ಬೆಂಗಳೂರ್ಲ್ ಇಪ್ಪ)

ಉತ್ತು ಉತ್ತಯ್ಯ : ಅಲ್ಲ ಬಾವ ಮಾಯಿಕ್ ಹುಷಾರ್ ಇಲ್ಲೇಂದ್ ಆಸ್ತತ್ತಕ್  
ಕೂಟಿಯ ಪೋಯಿತ್ ಎಣ್ಣಿರ, ನಿಂಗ ನೋಟೋಕೊಂದೂ  
ಪೋಪುಲಿಯಾ, ತಮ್ಮಣ ಕೂಟಿಯ ಪೋಯಿತ್ಂದ್ ನಿಂಗ ಮುಂಡತೆ  
ಇಂಜಿರುವದಾ.

ಕಾರಿ ಕಾರ್ಯಪ್ಪ : ಪೋಂಡು ಇಂಜತ್ ಬಾವ, ಆಚೆಂಗಿ ಇಲ್ಲಿ ಮನೆ  
ಬುಟ್ಟಿತ್ ಪೋಪನ್ನಕೆ ಇಲ್ಲೆ, ಇಲ್ಲಿಯತ ಬದ್ಕ್ ನೋಟೊಂಡು  
ಅಲ್ಲ.

ಕಾಮುಣಿ ಕಾಮವ್ವ : ಅಲ್ಲ ಅಣ್ಣಯ್ಯ, ನಂಗ ಮಾವ ಮಾಯಿನ ಇಚ್ಚ ಕಾಲ  
ನೋಟಿಯಂಡ್ ಇಂಜಿತಿಲ್ಲಿಯಾ, ಅಕ್ಕ ಅವು ನೋಟೊಕ್ ಬಂತಾ,  
ಇಕ್ಕ ನಂಗ ಎನ್ನಂಗ್ ನೋಟುವಕ್ ಪೋಂಡಿಯೆ.

ಉತ್ತು ಉತ್ತಯ್ಯ : ಅದ್ ಅನ್ನನೆ ಅಲ್ಲ, ಕಾಮುಣಿ ನೋಟ್ ಮಾವ  
ಮಾಯಿ ಇಲ್ಲಿ ಇಪ್ಪಕ ಅಯಿಂಗಕ್ ತಡಿಕ್ ಸುಖ ಇಂಜತ್, ಇಕ್ಕ  
ಕಯ್ಯತಾಂಗನ್ನೆ ಡಾಕ್ಟರ್ ಪಕ್ಕ ಕೂಟಿಯ ಪೋಯೆ, ಅಲ್ಲತೆ ಅವು  
ದಂಡಾಳೂ ಆಪ್ಲೀಸ್ಕ್ ಪೋಪವು, ಮಕ್ಕಳೂ ಸ್ಕೂಲ್ಕ್ ಪೋಪವು,  
ಅಯಿಂಗಕೂ ಕಷ್ಟ ಆಪ.

ಕಾಮುಣಿ ಕಾಮವ್ವ : ಅದೆಂತ ಕಷ್ಟ ಅಣ್ಣಯ್ಯ, ನಂಗಕ್ ಕಷ್ಟಾಂದ್ ನಂಗಡ  
ಮಕ್ಕ ಸರೀಕ್ ಸ್ಕೂಲ್ಕೇ ಪೋಪುಲೆ, ತೋಟ ಪಣಿ ಬೇಲ್ ಪಣೀಂದ್  
ಪೋಯಿರುವ.

ಉತ್ತು ಉತ್ತಯ್ಯ : ಮಕ್ಕಳ ಸ್ಕೂಲ್ಕ್ ಅಯಿಕತೆ ಇಪ್ಪದ್ ಮಕ್ಕಡ ತಪ್ಪು  
ಅಲ್ಲ, ಅದ್ ನಿಂಗಡ ತಪ್ಪು, ಇಕ್ಕ ನೋಟ್ ಪ್ರೇಮ್ ನಿಂಗಡಲ್ಲಿಂಜಿ  
ಒಂದೂ ಕೊಂಡೋಪುಲೇಂದ್ ಎಣ್ಣಿಯೆ. ಕಾಪಿ ಮಳು ನೆಲ್ಲರ

ದುಡ್ಡ್ ಉಂಡಲ್ಲಾ, ಆಳ ಕೂಟಿತ್ ಮಾಡಿ, ಮಕ್ಕಳ ಸ್ಕೂಲ್‌ಕ್ ಅಯಿರಿ.

ಕಾರಿ ಕಾರ್ಯಪ್ಪ: ಅದೇ ಬಾವ ಪ್ರೇಮ್ ಸಹ ಅದೇ ಎಣ್ಣೆಚಿ, ನಿಂಗಡ ತಂಗಿ. ಮಕ್ಕಳ ಪಣಿಕ್ ಅಯಿಪಾಲೆ ನೆಮ್ಮದಿ ಕಾಂಬ, ಎಚ್ಚಕ್ ಎಣ್ಣೆಚಿಂಗಿನೂ ಸ್ಕೂಲ್‌ಕ್ ಅಯಿಪುಲೆ. ಅವಕ್ ಇಕ್ಕ ಗೊತ್ತಾಪುಲೆ, ಬಯ್ಯ ಗೊತ್ತಾಪ, ಪ್ರೇಮ್, ಬೋಜಿ ಸಾರಿ ಸಾರಿ ಎಣ್ಣೆತ್ ಮಕ್ಕಳ ಸ್ಕೂಲ್‌ಕ್ ಅಯಿರಿ, ಪಣಿಕ್ ಅಯಿಕಂಡಾಂದ್, ಬಯ್ಯಕ್ ನಿಂಗಲೇ ನಿಂಗಡ ಕಣ್ಣಲ್ ಕಾಂಗೊಂಡು, ಮಕ್ಕಳ ಸ್ಕೂಲ್‌ಕ್ ತಪ್ಪತೆ ಅಯಿರೀಂದ್, ಆಚಿಂಗಿ ಇವ ಅಯಿಪುಲೆ ನಿಂಗ ಎಣ್ಣೆನನ್ನಕೆ ಪ್ರೇಮ್ ಮನೆಂಜಿ ಒಂದೂ ಕೊಂಡೋಪುಲೆ, ಕಾಯೋ ಪುಳಿಯೋ ಬಾಳೆ ಕೊಡ್ತಾನ ಎಡ್ತೋಪ ಅಚ್ಚಕೆ, ಎಂದೂ ಕೇಟಿತಿಲ್ಲೆ, ದುಡ್ಡ್ ಕಾಸೂ ಕೇಪುಲೆ.

ಕಾಮುಣಿ ಕಾಮವ್ವ : ಅಕ್ಕು ಅಲ್ಲಿ ಅವು ದಂಡಾಳೂ ಸಂಬಳ ಎಡ್ಪುಲಿಯಾ ಇಲ್ಲಿ ನಂಗ, ಮನೆರ ಬದ್‌ಕ್ ತೋಟ ತೊಡಿಯ ಎಲ್ಲ ನೋಟಿಯವುಲಿಯಾ.

ಉತ್ತು ಉತ್ತಯ್ಯ : ಅದ್ ಎಂತೇ ಇರಡ್, ಮಾವ ಮಾಯಿ ಮಾಡ್‌ನ ತೋಟ, ನಿಂಗ ಒರ್ ಗಿಡ ನಟ್ಟಿತ್ ಬೊಳ್‌ತ್‌ನದಲ್ಲ, ಕಾಡ್ ಕೆತ್ತಿಯವಿರ ಕಾಪಿ ಕೊಜ್ಜವಿರ, ಮಾರುವಿರ ತಿಂಬಿರ ಆಂಗ್ ಅಪ್ಪ ಮಾಡ್‌ನದ್‌ಂದ್ ದಂಡ್ ಪಾಲ್ ಕೇಟತೆಂಗಿ, ನಿಂಗಡ ಪುಣ್ಯ ಅವ ಅವಂಡ ಪೊಣ್ಣು ನಲ್ಲವು, ಆನುಂಡ್ ಒಂದೂ ಕೇಟಂಡಿಲ್ಲೆ ನಿಂಗಕ್ ಬೀರ್ಚ, ಆಚಿಂಗಿ ಅಯಿಂಗ ಅಯಿಂಗಡ ಧರ್ಮ ಬೆಚ್ಚಂಡಿತ್, ನಿಂಗ ಚೆನ್ನ ಧರ್ಮ ಬೆಚ್ಚವಂಡು, ಇಕ್ಕತ ಕಾಲತ್ "ಉಪ್ಪು ತಿಂದವಂಗ್ ಉಪ್ಪು ತೀತಿ" ಅದ್ ಅಕ್ಕಲೇ, ಫಂಡಾಚಿ ಅದ್ ಮಕ್ಕಡ ಕಾಲಕ್‌ಂದ್. ಇಕ್ಕ, ತಾ ಮಾಡ್‌ನದ್ ತಾನೆ ಅನುಭವ್‌ಚಿರುವ, ಕಾಮುಣಿ ನೀಡ ಮಜ್ಜಿಣ ತಂಗಿರ ವಿಷಯತ್ ಅಚ್ಚಕ್ ಕಡ್‌ಪ ಇಕ್ಕತೆ, ನಲ್ಲದಲ್ಲ.

ಕಾಮುಣಿ ಕಾಮವ್ವ : ಬುಡ್ ಅಣ್ಣಯ್ಯ ಇಕ್ಕ ಮಾವ ಮಾಯಿಯೂ ಇಲ್ಲೆ, ಚೆನ್ನ ನೆಮ್ಮದಿಲ್ ಇಕ್ಕನ.

ಉತ್ತು ಉತ್ತಯ್ಯ : ಮಾವ ಮಾಯಿ ಇಂಜಿತುಂಡೇಂಗಿ ಮನೆರ ಕಡ್

ನಿಂಗ್ ವರೀಸ್ ಇಂಜಿಲೆ. ಮಾಯಿಯೂ ಕಯ್ಯುವ ಕೆಲಸ ಮಾಡಿತ್  
ಸಹಾಯ ಮಾಡುವ ಇಂಜಿತ್, ಅದ್ ಮರ್ಂದರತೆ.

ಕಾರಿ ಕಾರ್ಯಪ್ಪ : ಅಕ್ಕು ಬಾವ, ಅಪ್ಪ ಅಪ್ಪ ಇಪ್ಪಕ ಮನೆ ಕಡೆ ಮಕ್ಕಡ  
ಬಗ್ಗೆ, ಒರ್ ಚಿಂತೆ ಇಂಜಿಲೆ. ಇಕ್ಕು ಗೊತ್ತಾಪ, ಉಳ್ಳಾಂಡ ಬೆಲೆ  
ಅದ್ ಇಲ್ಲತಾಪಕ ಗೊತ್ತಾಪ,

ಉತ್ತು ಉತ್ತಯ್ಯ : ನಾಡ ಅಭಿಪ್ರಾಯತ್ ಎಲ್ಲಾ ಚಾಯಿತೆ ಇಪ್ಪಕಲೇ ನಿಂಗ  
ಆಸ್ತಿ ಪಾಲ್ ಮಾಡಿಯವದ್ ನಲ್ಲದ್, ನಿಂಗಡಡ್ಂದ್ ಆಪಕ,  
ನಿಂಗ ಏರ ಮುತುವರ್ಜಿ ಇಟ್ಟಿತ್ ನೋಟಿಯವಿರ.

ಕಾಮುಣಿ ಕಾಮವ್ವ : ಅದ್ ಸರಿ ಅಣ್ಣಯ್ಯ, ಆಚಿಂಗಿ ಇಕ್ಕು ನಂಗ ಎಲ್ಲಾನೋ  
ಅನುಭವ್ ಚಿಟ್ಟಂಡ್ ಉಂಡಲ್ಲಾ, ಇನ್ನನೆ ಎಚ್ಚ ಕಾಲ ಇಪ್ಪ, ಇರಡ್.

ಕಾರಿ ಕಾರ್ಯಪ್ಪ : ಬಾವ ನಾನೂ ಅದೇ ಎಣ್ಣುವ, ನಂಗಡ ಪಾಲ್ ಕಂದ್  
ತಂದ್ ರ್ತೇಂಗಿ ನಂಗ ಆನ ಚಾಯಿ ವಾಡಿಯೆಂಡ್  
ಬದ್ಕಿಯವಲು.

ಉತ್ತು ಉತ್ತಯ್ಯ : ಅದ್ ಸರಿ ಬಾವ, ಆಚಿಂಗಿ ನಿಂಗಡ ತಮ್ಮಣ ನಲ್ಲವ  
ಆನಾನಗುಂಡ್ ಒಂದೂ ಕೇಟಂಡಿಲ್ಲೆ, ಪಾಲ್ ಆನ ಪಿಂಇ ಅವಂಡ  
ಪಾಲ್ ನ ನಿಂಗಕೇ ವಹಿಸ್ ಚೇಂಗಿ ಆನೋ ನೋಟಿಯೊಳಿ, ಲೆಕ್ಕ  
ಇಟ್ಟಿತ್ ಕೊಡ್ತತೇಂಗಿ ಆಚಿ.

ಕಾಮುಣಿ ಕಾಮವ್ವ : ಅದ್ ಬುಡ್ ಅಣ್ಣಯ್ಯ, ನಾಡ್ ಕೋಳಿ ನೆರ್ಚಿಯೆ,  
ಉಂಬಕ್ ಏಳಿ, ಮಕ್ಕಕೂ ಕೆಲ ಪಯಿಕೂ, ಉಂಗನಾ.

\* \* \* \* \*

# ಸೀನ್ ಇರುವತ್ತಮೂಂದ್

(ನಾಡ್ ಮನೆ)

ಕಾಮುಣಿ ಕಾಮವ್ವ : ಈಯಾಂಡ್ ಕಾಪಿ ಮಳು ಎಲ್ಲ ಕೊಜ್ಜಿತಾಚಿ.

ಕಾರಿ ಕಾರ್ಯಪ್ಪ : ಇಕ್ಕ ಕಾಪಿಕ್ ರೇಟ್ ಕಮ್ಮಿ ಉಂಡ್ ರೇಟ್ ಜಾಸ್ತಿ  
ಆನ ಪಿಂಞ ಮಾರನ.

ಕಾಮುಣಿ ಕಾಮವ್ವ : ಇಲ್ಲೆ ಇಕ್ಕಲೇ ಮಾರೊಂಡು, ಮಾರಿತ್ ದುಡ್ಡ್ಡನ  
ಜಕ್ಕೀಯ್ ಮಾಡಿರೊಂಡು.

ಕಾರಿ ಕಾರ್ಯಪ್ಪ : ನೀಕೆನ್ನ ಅವಸರ, ವಿದೇಶತ್ ಈಯಾಂಡ್ ಕಾಪಿ  
ಇಲ್ಲೆಲೋ, ರೇಟ್ ಬಯ್ಯ ಜಾಸ್ತಿ ಆಪಲೋ, ಬಯ್ಯ ರೇಟ್ ಬಂದ  
ಪಿಂಞ ಮಾರನ.

ಕಾಮುಣಿ ಕಾಮವ್ವ : ಅದ್ ನಿಂಗಕ್ ಅರ್ಥ ಆಪುಲೆ, ಇಕ್ಕಲೇ ಮಾರೊಂಡು.  
ನಿಂಗ ರೇಟ್ ಜಾಸ್ತಿ ಆಡ್ಂದ್ ಕಾತಾಂಡಿರಿ, ಉಳ್ಳದೂ ಇಲ್ಲೆ  
ಉಳ್ಳಿ ಬಾಣಿಯಾಂದ್ ಆಪ. ಬೆರಿಯ ಮಾರನ, ದುಡ್ಡ್ಡನೆಲ್ಲ  
ಜಕ್ಕೀಯ್ ಮಾಡನ, ನಿಂಗ ಬೆರಿಯ ಮಾರಿ ಅಚ್ಚಕೆ.

ಕಾರಿ ಕಾರ್ಯಪ್ಪ : ಆಂಗ್ ನೀನ್ ಎನ್ನಂಗ್ ಅನ್ನನೆ ಕಳಿಪ.

ಕಾಮುಣಿ ಕಾಮವ್ವ : ಅದ್ ನಿಂಗಕ್ ಅರ್ಥ ಆಪುಲೆ.

ಕಾರಿ ಕಾರ್ಯಪ್ಪ : ಆಚಿ ಅನ್ನನೇ ಆಡಪ್ಪ, ನೀಕ್ ವಿರೋದ ಮಾಡಿತ್  
ನಾನ್ ಉಸಿರಾಡುವದ್ ಉಂಡಾ.

(ಪ್ರೇಮ್, ಬೋಜಿ, ಮಕ್ಕಳ, ಅಪ್ಪ ಅವ್ವನ ಕೂಟಿಯಂಡ್ ಮನೆಕ್ ಬಪ್ಪ)

ಪ್ರೇಮ್ ಪೊನ್ನಪ್ಪ : ಅಣ್ಣಯ್ಯ, ದೇವಡ ದಯತ್ ನಲ್ಲ ಡಾಕ್ಟರ್ ಕಟ್ಚಿ,  
ಅವ್ವಯ್ಯಂಡ ಕಾಹಿಲ ವಾಸಿ ಆಚಿ, ಉಂಞಾ ಮಿಂಞಕ್ ಅಪ್ಪಂಗೋ  
ಅವ್ವಂಗೋ ಅಥವ ದಾರ್ಕೇಂಗಿ ಹುಷಾರ್ ಇಲ್ಲತಾಚಿಂಗಿ ಬೆರಿಯ  
ನಲ್ಲ ಡಾಕ್ಟರ್ ಕಾಟಿ, ಮಲಿಯ ಕಣಿಯಂಡ ಸಹವಾಸ ಬುಡಿ.

ಬೋಜಿ ಬೋಜಮ್ಮ : ಅಕ್ಕಯ್ಯ ಮಾಯಿರ ಪಿಲ್ಲೆ ಇಲ್ಲಿ ಉಂಡ್, ಮಾಯಿಕೇ  
ಗೊತ್ತುಂಡ್ ಏದ್ ನೇರಕ್ ಏದ್ ಎಡ್ತವಂಡೂಂದ್. ಆನ



ಟೈಮ್ ಪ್ರಕಾರ ಕೊಡತೊಳಿ. ಚೆನ್ನ ರೆಸ್ ಬೋಂಡು ಅಚ್ಚಕೆ.  
 ಕಾಮುಣಿ ಕಾಮವ್ವ : ಅಲ್ಲ ಬೋಜಿ ನಂಗ ಎನ್ನ ಮಾಯಿನ ಪಣಿ ಕೆಯ್ಯುವಕ್  
 ಎಣ್ಣುವ, ಅದೇ ಎಂತೆಲ್ಲೋ ಮಾಡಿಯಂಡಿಪ್ಪ ಅಚ್ಚಕೇ.  
 (ಪ್ರೇಮ್ s ಬೋಜಿ ಪಿತ್ಯಾಂದ್ ಮಕ್ಕಳ ಕೂಟಿಯಂಡ್  
 ಬೆಂಗಳೂರ್ ಪೋಪ)

(ಅಂದ್ ಬೈಟ್) ಮೇದಯ್ಯ : ಅಲ್ಲಾ, ಇಲ್ಲಿ ನೋಟ್ ಚೆಂಗಿ ಕಾಪಿಯೂ ಇಲ್ಲೆ  
 ಮಳೂ ಇಲ್ಲೆ, ಕಾಮುಣಿ ಎಲ್ಲ ಮಾರ್ ಚೆಟ್ಟಿತ್ ದುಡ್ಡನೆಲ್ಲ ಚೊಟ್ಟಿರುವ  
 ಕಾಂಬ, ಈಯಾಂಡು ಕಯಿಂಜ ಕಾಲತ್ ರನ್ನಕೆ ಮಾಡಿರುವ,  
 ಪ್ರೇಮ್ ಕ್ ಒಂದೂ ಕೊಡಪಕಿಲ್ಲೆ.

ಮುದ್ದವ್ವ : ಅನ್ನನೇ ಕಾಂಬ, ನೋಟನ ಅವು ಎನ್ನ ಮಾಡಿತ್ಂದ್, ನಂಗ  
 ದುಡ್ಡ್ ವದ್ ಬೋಂಡ. ಮುಂಡತೆ ಒಬ್ಬನ ಪಾಳಂದ್ ಗ್ಯಾನ  
 ಮಾಡುವಕಾಗ.

ಮೇದಯ್ಯ : ಅದಲ್ ಗ್ಯಾನ ಮಾಡುವಕ್ ಎಂತ ಉಳ್ಳೋ, ಪಾಳ್ ಉಳ್ಳದೇ  
 ಸತ್ಯ.

ಮುದ್ದವ್ವ : ನೋಟನ, ಇಕ್ಕ ನನ್ನ ವರುವಕ್ ಬುಡಿ.

ಮೇದಯ್ಯ : ನೀಕೋರ್ ವರ್ಕ್, ಆಡ್ ಬುಡ್ ನೀನ್ ಎಣ್ಣಾನನ್ನಕೆ ನೋಟನ.  
 (ಪಿತ್ಯಾಂದ್ ಪಿತ್ಯಾಂದ್)

(ಮೇದಯ್ಯಂಡ ಅಣ್ಣ ಮಂದಯ್ಯ ಮೊಮ್ಮ ಮಂದವ್ವ ಬಪ್ಪ)

ಮಂದಯ್ಯ : ಅಲ್ಲ ಮೇದಯ್ಯ, ಈ ಮೋಂವ ಇಲ್ಲಿ ಆ ಮೋಂವ ಅಲ್ಲಿ  
 ಬೆಂಗಳೂರ್ಲ್, ನೀನ್ ಮಾಡ್ ನ ತೋಟ ತೊಡಿಯ ಆಸ್ತಿನ  
 ಎನ್ನೇಂಗಿ ಪಾಲ್ ಮಾಡಿತ್ ಕೊಡತಿಯ? ನಾನ್ ನೋಟ್,  
 ನಾಡ ಆಸ್ತಿನೆಲ್ಲ ಮೂಂದ್ ಮಕ್ಕಕೂ ಪಾಲ್ ಮಾಡಿ ಕೊಡತಿತ್  
 ಅಯಿಂಗಡ ಪಾಡ್ ಕ್ ಕೊಡತಿತ್ ನೆಮ್ಮದಿಲ್ ಉಳ್ಳೋ, ಮನೆ  
 ಹಿತ್ಲ ನಾಕೇ ಬೆಚ್ಚಂಡಿಯೆ ನಂಗಡ ಖರ್ಚಿಕ್ ದಾರ್ ನ ಕೇಪ.

ಮೇದಯ್ಯ : ಇಲ್ಲೆ ಅಣ್ಣಯ್ಯ, ನಾನ್ ಇಂಞೂ ಪಾಲ್ ಇಟ್ಟಿ ಕೊಡತಿತಿಲ್ಲೆ,  
 ನಾಡ ಮನಸ್ಲೂ ಈ ಅಭಿಪ್ರಾಯ ಬಾತ್, ಕಾಲ ನೇರ ಕೂಡಿ  
 ಬರಡ್ಂದ್ ಗ್ಯಾನ ಮಾಡ್ ನ, ಇಕ್ಕ ನೀನ್ ಎಣ್ಣಾನ ಪಿಂಞ ಆಸ್ತಿ  
 ಪಾಲ್ ಮಾಡಿ ಕೊಡ್ತುರುವಂಜಿ ನೆಮ್ಮದಿಲ್ ಇರೋಲೂಂದ್

ಆಪ, ಬಯ್ಯ ಮಕ್ಕಳೂ ಜಗಳ ಬಕ್ಕಣ ಮಾಡುವನ್ನಕೆ ಇಪ್ಪಕಾಗ,  
ಮಂದಯ್ಯ : ಅಕ್ಕ ಮೇದಯ್ಯ, ಇಕ್ಕ ನಾಡ ಮಕ್ಕ ನೋಟ್, ಎಲ್ಲಾರು ಒಕ್ಕಚೆ  
ಇಪ್ಪಕಾಪಕ ಅವು ತೋಟಕೇ ಪೋಪ ಇಂಜಿಲೆ, ಅಯಿಂಗಡದ್ದಂದ್  
ಆಪಕಾಪಕ ವಡಿಯನೂ ಪೋಣ್ಣು ಬುಡತೆ ತೋಟಕ್ ಪೋಪ,  
ಕೂಪದಿ ಕೆಟ್ಟಿ ಪೋಪ.

ಮೇದಯ್ಯ : ನಾನೂ ಅದೇ ಗ್ಯಾನ ಮಾಡಿಯೆಂಡುಕ್ಕೋ ಅಣ್ಣಯ್ಯ, ನೋಟನ  
ಮಕ್ಕಕ್ ಎಣ್ಣೆ ನೋಟುವಿ.

ಮಂದಯ್ಯ : ಬೆರಿಯ ಮಾಡಿತ್ ನೀಡ ಕೈ ಕತ್ತಿಯ. ನಾನ್ ಬಪ್ಪಿ ...(ಪೋಪ)  
ಕಾಮುಣಿ ಕಾಮವ್ವ : ಈ ಮುದಿ ಮಾಂವಂಗೆನ್ನ ಬೋಂಡು ನಂಗಡ ಆಸ್ತಿ  
ಪಾಲ್ ರ ವಿಷಯ, ಸಂಸಾರತ್ ವಿಷ ಕುರು ಬಿತ್ ಚಿ, ಆಂಗ್  
ಸರಿಯಾಯಿತ್ ನಂಗಡ ಮಾವನೂ, ಅದೇ ಗ್ಯಾನ ಮಾಡಿಯಂಡ್  
ಉಂಡ್ಲೋ.

ಕಾರಿ ಕಾರ್ಯಪ್ಪ : ಅಲ್ಲ ಕಾಮುಣಿ, ಬಲ್ಯಪ್ಪ ಎಣ್ಣಾನಾಲ್ ಎಂತ ತಪ್ಪು,  
ಎಲ್ಲಾ ಚಾಯಿತೆ ಇಪ್ಪಕಾಪಕಲೇ ಪಾಲ್ ಪರಿಕತ್ ಆಯಿರ್ ತೆಂಗಿ  
ಬಯ್ಯ ಜಗಳ ಬಕ್ಕಣ ಇಪ್ಪುಲೆ, ನಲ್ಲದೆ ಅಲ್ಲ, ನಂಗಡಾಂದ್  
ಕ್ಟ್ ಚೇಂಗಿ ಆನ ಚಾಯಿ ಕೂಟಿಯವಲು.

ಕಾಮುಣಿ ಕಾಮವ್ವ: ನಿಂಗ "ಚೂರೊಟ್ಟಿಕ್ ಇಡೀ ಒಟ್ಟಿನೇ ಬುಟ್ಟನ್ನಕೆ", ಇಕ್ಕ ಎಲ್ಲ  
ನಂಗಲೇ ಎಡ್ ತಂಡ್ ಇಲ್ಲಿಯಾ, ಇಕ್ಕಲೇ ಪಾಲಾಯಿರ್ ತೆಂಗಿ  
ನಂಗಡ ಪಾಲ್ ಮಾತ್ರ, ನಿಂಗಕ್ ಒಂದೂ ಅರ್ಥ ಆಪದೇ ಇಲ್ಲೆ.  
ನಾಡ ಕರ್ಮ.

ಕಾರಿ ಕಾರ್ಯಪ್ಪ: ಅಯ್ಯೋ, ಬುಡಪ್ಪ, ನಂಗಡ ಯೋಗತ್ ಉಳ್ಳದೇ ಕ್ಟ್ಟುವ.  
ಕಾಮುಣಿ ಕಾಮವ್ವ: ನಿಂಗಡ ಯೋಗವೂ ನಿಂಗಲೂ, ಎನ್ನೋ ನಾನ್ ಚೆನ್ನ  
ಗ್ಯಾನ ಮಾಡಿತ್ ಕಾಪಿ ಮಳುರ ದುಡ್ಡೆಲ್ಲಾ ಬೆಚ್ಚಿತ್ ಜಕ್ಕೀರ್ಯ  
ಮಾಡಿಯೆಂಡುಕ್ಕಾಂಗ್, ಇಲ್ಲೇಂಗಿ ನಂಗಡ ಮಕ್ಕಕ್ ತಿರುಪತಿ ಚೆಂಬೇ  
ಗತಿ.

ಕಾರಿ ಕಾರ್ಯಪ್ಪ : ಅನ್ನನೆ ಅನ್ಯಾಯತ್ ಪಣ ಕೂಟ್ ನದ್ ತಲೆ ಪತ್ತುಲೆ.  
ಯೋಗತ್, ನಂಗಡ ಭಾಗ್ಯತ್ ಎನ್ನನೆ ಉಂಡ್, ಅದೇ ಆಪ.

ಕಾಮುಣಿ ಕಾಮವ್ವ : ನಿಂಗ ಸಧ್ಯಕ್ ಮುಂಡತಿರಿ, ಯೋಗ ಅದ್ಯಷ್ಟ ನಂಗ  
ಮಾಡ್‌ನನ್ನಕೆ, ಸಧ್ಯಕ್ ಮುಂಡತಿರಿ.

\* \* \* \* \*

(ಪಿತ್ಯಾಂದ್)

- ಮೇದಯ್ಯ : ಬಾ ಕಾರಿ, ನೀನೂ ಬಾ ಕಾಮುಣಿ.  
ಕಾರಿ ಕಾರ್ಯಪ್ಪ : ಎಂತ ಅಪ್ಪಯ್ಯ,  
ಕಾಮುಣಿ ಕಾಮವ್ವ : ಎಂತ ಮಾವ,  
ಮೇದಯ್ಯ : ಬಾರಿ ಅಳೆರಿ, ನಿನ್ನಾಂದ್ ಬಲ್ಯಪ್ಪ ಬಂತ್ ಪಾಲ್ ಪರಿಕತ್‌ರ  
ವಿಷಯ ಎಣ್ಣಾನ ಪಿಂಇ ನಾಕ್ ವರ್ಕೇ ಬಂತಿಲ್ಲೆ, ಅವ ಇಕ್ಕ  
ಪಾಲ್ ಕೊಡ್‌ತಿತ್ ನೆಮ್ಮದಿಲ್ ಉಂಡ್‌ಲೋ, ಅವಂಡ ಪಾಲ್‌ಕ್  
ಚೆನ್ನ ತೋಟ ಬೆಚ್ಚಂಡಿತ್‌ಲೋ, ವಯಸ್ ಆನ ಪಿಂಇ ಇದೇ  
ಮಾಡುವಕ್ ಕಯ್ಯುವ.  
ಕಾಮುಣಿ ಕಾಮವ್ವ : ಇಕ್ಕಲೇ ಎನ್ನಂಗ್ ಮಾವ ಪಾಲ್ ಇಡುವ, ಚೆನ್ನ  
ಕಾಲ ಕಯ್ಯಡ್ ಪಿಂಇ ಇಡಿ, ಇಕ್ಕ ನಿಂಗಕ್ ಎನ್ನ ತೊಂದರೆ.  
ಅರ್ಜೆಂಟ್ ಎನ್ನಂಗ್ ಮಾವ.  
ಮೇದಯ್ಯ : ಇಲ್ಲೆವ್ವ, ಅಣ್ಣ ಬಂತ್ ಎಣ್ಣಾನ ಪಿಂಇ ನಾಕೂ ಅದೇ ಸರೀಂದ್  
ತೋಂದುವ.  
ಕಾರಿ ಕಾರ್ಯಪ್ಪ : ನೀಡ ಮನಸ್‌ಕ್ ಎಂತ ಸರೀಂದ್ ತೋಂದುವ ಅದ್  
ಮಾಡಪ್ಪ.  
ಮೇದಯ್ಯ : ನಾನ್ ಬೈಟೂಡಿ ಗ್ಯಾನ ಮಾಡಿತ್ ಇನ್ನನೆ ತೀರ್ಮಾನ ಮಾಡಿಯೆ"  
ಮನೆ, ಮನೆರ ಪಕ್ಕ ಉಳ್ಳ ತೋಟ ಪನ್ನಂದ್ ಏಕ್ರೆ ತೋಟ ನೀಡ  
ಪಾಲ್‌ಕೂ, ಆ ಕರೆ ರೋಡ್‌ರ ಪಕ್ಕ ಉಳ್ಳ ಪೈಸಾರಿ ಎಟ್ತ್ ಏಕ್ರೆ  
ತೋಟ ಪ್ರೇಮ್‌ರ ಪಾಲ್‌ಕೂ, ನಂಗಡ ಪಾಲ್‌ಕ್ ತೋಟ ಬೆಚ್ಚವದ್  
ಇಲ್ಲೆ, ಮಕ್ಕಕ್ ನಲ್ಲ ಬುದ್ದಿ ಕೊಡ್‌ತಿತ್ ನಂಗಳ ನೋಟಿಯವಡ್.  
ಪೆರಿಯಂವ ನೀನ್ ಮನೆ ತೋಟ ನೋಟಿಯಂಡ್ ಇಂಜಾಂಗ್,  
ಉಳ್ಳಾಂಗ್, ನೀಕ್ ಮೂಂದ್ ಏಕ್ರೆ ತೋಟ ಜಾಸ್ತಿ ಬೆಚ್ಚಿಯೆ.  
ಬೇಲ್: ಮಾನಿ ಕರೆ ಸಾಲ್ ದಂಡಾಳ್‌ಕೂ ಪಾದಿ ಪಾದಿ.

ಇಕ್ಕ ನಂಗಡ ಪೆದತ್ ಉಳ್ಳ ದುಡ್ಡ್ ಅನ್ನನೆ ಇಕ್ಕಡ್, ಅದ್ ಕಷ್ಟ ಕಾಲಕ್ ಬೋಂಡಿಯಾಕು.

ಮಾಯಿರ ನಾಲ್ ಬಳೆ , ಡಬ್ಬಲ್ ಚೈನ್, ಓಲೆ, ಬ್ರೋಚ್ ದಂಡ್ ಮೈಮಕೂ ಇರಡ್, ದಂಡಾಳ್ಕೂ ಮೂಡಿ ಕುಂಇಯ ಉಂಡಲ್ಲ. ತಾಯಿರ ಅಚ್ಚಕೇಂಗಿ ಇರಡ್.

ನಾಡ ಕುಪ್ಪಿಯ ಚೇಲೆ ಪೀಚೆ ಕತ್ತಿ ತೋಕ್ ನೀಡ ಪಾಲ್ಕ್ ಇರಡ್, ಮಂಗಲ ನಮ್ಮೆ ನಾಳ್ಕ್ ಜಾಸ್ತಿ ಪೋಪಲ್ಲ ಅದ್‌ಂಗ್, ಪ್ರೇಮ್ ಆಚೆಂಗಿ ಮಂಗಲಕೇ ಮಾಡಿಯಂಡತ್ ಅಲ್ಲತೆ ಎಕ್ಕೇಂಗಿ ಓರಮ ಮಂಗಲಕ್ ಪೋಪ, ಅವಂಡ ಮೋವಂಗ್ ಅವನೇ ಮಾಡಿಯವಡ್, ದೇವ ಕೋಡ್ ಪ" ಇಕ್ಕ ನಿಂಗ ಎಣ್ಣೆ ನಿಂಗಕನ್ನೇಂಗಿ ಅನ್ಯಾಯ ಆಯಿತಾ, ಕಾಮುಣಿ ನೀನೂ ಎಣ್ಣೋಲು.

ಕಾಮುಣಿ ಕಾಮವ್ವ : (ಮನಸ್ ಲೇ ಕುಶಿ ಪಟ್ಟಂಡ್) ಇಲ್ಲೆ ಮಾವ, ನಿಂಗಡ ಮನಸ್‌ಕ್ ಬಂದನ್ನಕೆ ಮಾಡಿ, ನಂಗ ಮಕ್ಕ, ಎಂತ ಎಣ್ಣುವ.

ಕಾರಿ ಕಾರ್ಯಪ್ಪ : ಅಪ್ಪಯ್ಯ, ನೀನ್ ಇಕ್ಕ ನಾಕ್ ಮನೆ, ಮನೆರ ಸುತ್ತ ಉಳ್ಳ ತೋಟ ಮೂಂದ್ ಏಕ್ರೆ ಜಾಸ್ತಿ ತಂದಿಯಾ, ತಮ್ಮಣಂಗ್ ಅನ್ಯಾಯ ಆಪಕಿಲ್ಲಿಯಾ, ಅವಂಗನ್ನೇಂಗಿ ಬೇಜಾರ್ ಆಕುವಾಂದ್.

(ಕಾಮುಣಿ ಕಾಮವ್ವ : ಕಣ್ಣ್ ಪೋಯ್ಯುವ ಮುಂಡತಿಪ್ಪಕ್ ಎಣ್ಣುವ)

ಮೇದಯ್ಯ : (ಈನ ಕಾಂಬ) ಕಾರಿ ಅದ್ ನಾನ್ ನೋಟಿಯವಿ, ನೀಡ ತಮ್ಮಣಂಡ ತಕರಾರ್ ಒಂದೂ ಇಪ್ಪಕಿಲ್ಲೆ, ನೀನ್ ಮನೆಲ್ ನೈಚಿಯ, ನೀನ್ ನೀಡ ಮಕ್ಕಡ ಭವಿಷ್ಯ ನೋಟೊಂಡು ಅಲ್ಲಾ. ಈ ಪಾಲ್ ಪರಿಕತ್ ನಿಂಗಕ್ ಒಪ್ಪಿಗೆ ಆಚೆಂಗಿ ಪ್ರೇಮ್‌ನೋ, ಬಪ್ಪಕಣ್ಣಿತ್ ಬೆರಿಯ ತೀತ್‌ರನ.

ಕಾರಿ ಕಾರ್ಯಪ್ಪ : ಆಚೆ ಅಪ್ಪಯ್ಯ ಅನ್ನನೆ ಮಾಡ್.

ಕಾಮುಣಿ ಕಾಮವ್ವ : ಆಚೆ ಮಾವ. ಇಚ್ಚಕ್ ಬೆರಿಯ ಬೋಂಡಿಂಜಿಲೆ, ನಿಂಗ ಮಾಡ್‌ನ ಪಿಂಇ ಎಂತ ಎಣ್ಣುವ, ಬೆರಿಯ ಮಾಡಿ.

\* \* \* \* \*

## ಸೀನ್ ಇರುವತ್ತ ನಾಲ್

(ಅಪ್ಪಂಡ ಪೋನ್ ಬಪ್ಪ, ಪ್ರೇಮ್ ಎಡ್ತವ, ಅರ್ಜೆಂಟ್ ಮನೆಕ್ ಪೋಪಕ್  
ಎಣ್ಣವ- ವಿಷಯ ಎಣ್ಣಲೆ)

ಪ್ರೇಮ್ ಪೊನ್ನಪ್ಪ : ಅಲ್ಲ ಬೋಜಿ ಎಂತ ಅರ್ಜೆಂಟ್ ವಿಷಯ, ಅಪ್ಪ  
ಒಂದೂ ಎಣ್ಣಲೆ, ಆಚೆಂಗಿ ಮನೆಕ್ ಬೆರಿಯ ಪೋಪಕೆಣ್ಣಚಿ.  
ಎನ್ನನೆಯೋ ಮಕ್ಕಕೂ ನಂಗಕೂ ಚೆನಿಯಾಚೆ, ನಾರಚೆ ತಿಂಗಲಾಚೆ  
ರಜ ಉಂಡ್ ಪೋಯಿತ್ ಬಂದ್‌ರನ, ಎನ್ನಂಗ್ ಪೋಪಕೆಣ್ಣೆಯೆ  
ಗೊತ್ತಿಲ್ಲೆ, ಅವ್ವಯ್ಯಂಗ್ ಎನ್ನೆಂಗಿ ಪುನಹ ಹುಷಾರ್ ಇಲ್ಲತಾಚೋ  
ಎನ್ನೋ.

ಬೋಜಿ ಬೋಜಮ್ಮ : ವಾಯಿಕ್ ಒಂದೂ ಆಯಿತಿರ, ಅನ್ನನೆ  
ಇಂಜಿತುಂಡೇಂಗಿ ಎಣ್ಣವಕಿಂಜತ್, ನಾಕಾಪ ಮಾವ ಮಾಯಿ  
ಇಲ್ಲಿ ಇಪ್ಪಕ ಎಣ್ಣಚೆಲ್ಲ ಅದ್‌ಂಗೋ ಎನ್ನೋ...

ಪ್ರೇಮ್ ಪೊನ್ನಪ್ಪ : ಎಂತ ವಿಷಯ ನಾಕ್ ಗ್ಯಾನ ಆಪುಲೆ.

ಬೋಜಿ ಬೋಜಮ್ಮ : ನೀನ್ ನಲ್ಲ ಪ್ರೊ ಹುಚ್ಚೂರಾಯ, ಅದೇ ಆಸ್ತಿ ಪಾಲ್‌ರ  
ವಿಷಯ ಆಯಿತಿಕ್ಕುಂದ್ ನಾಡ ಅಭಿಪ್ರಾಯ.

ಪ್ರೇಮ್ ಪೊನ್ನಪ್ಪ : ಓ, ಅಕ್ಕು ಅಲ್ಲ, ಆಚೆಂಗಿ ಅಪ್ಪಯ್ಯನೂ ಅಪ್ಪಯ್ಯನೂ  
ನಂಗಡ ಕೂಡೆ ಈ ವಿಷಯ ತಕ್ಕ ಪರಂದದ್ ಅಣ್ಣಯ್ಯಂಗು  
ಮೊಮ್ಮಂಗು ಗೊತ್ತಾಪಕಾಗ.

ಬೋಜಿ ಬೋಜಮ್ಮ : ಅದ್ ಸರಿ ಬುಡಿ, ಇಕ್ಕ ಮತ್ತಾತ್ಯಂದ್ ನೇರ್ತೆ  
ಪೊರಡುವದಾ ಅಲ್ಲ ನಾಳೆ ಚೆನ್ನ ಬೆರಿಯ ಬಂತ್ ಪೊರಡುವದಾ..

ಪ್ರೇಮ್ ಪೊನ್ನಪ್ಪ : ನಾಳೆ ನಂಗೆಲ್ಲ ನಾಲ್ ಗಂಟೆಕ್ ಪೊರಡೋಲು, ಮನೆಕ್  
ಎತ್ತುವಕ ಒಯಿಂಬದ್ ಗಂಟೆ ಆಯಿರುವ. ಒರ್ ದಿವಸ ಜಾಸ್ತಿ  
ಇಂಜನ್ನಕೆ ಆಪ, ನಾಳೆ ನಾಲ್ ಗಂಟೆಕ್ ಪೊರಡನ.

(ಬೋಳ್ಳಾಚೆ ಬೈತಾಪಕ ಮಕ್ಕ ಸ್ಕೂಲ್‌ಂಜಿ ಬಪ್ಪ ಇವು ಆಫೀಸ್‌ಂಜಿ

ಬಪ್ಪ ಬೆಂಗಳೂರ್‌ಕ್ ಪೊರಟಿತ್ ಒಯಿಂಬದ್ ಗಂಟೆಕ್ ಎತ್ತುವ)

(ಕಾಲ್ ಕೈ ಪುಡ್‌ಚಿತ್ ಆನದು)

ಪ್ರೇಮ್ ಪೊನ್ನಪ್ಪ : ಅಲ್ಲ ಅಪ್ಪಯ್ಯ ಅದೆಂತೋ ಅರ್ಜೆಂಟ್ ಬಪ್ಪಕೆಣ್ಣಿಯೆ ಎಂತ ವಿಷಯ.

ಬೋಜಿ ಬೋಜಮ್ಮ : ಅಕ್ಕು ಮಾವ ಇವು ಮಾಯಿಕ್ ಪುನಹ ಕಯ್ಯತಾಯಿರ್‌ತ್‌ಂದ್ ಬಾರಿ ವರೀಸ್‌ಲ್ ಇಂಜತ್.

ಮೇದಯ್ಯ : ಮಾಯಿ ಚಾಯಿತೆ ಉಂಡ್, ಎಲ್ಲಾ ನಾಳೆ ಪೊಲಾಕ ಒಟ್ಟಿ ಕಾಪಿ ಆನ ಪಿಂಞ ಎಣ್ಣುವಿ, ಇಕ್ಕ ದಣಿದಿತ್ ಬಂದಿತುಳ್ಳಿರ, ಬುದ್ದೋಳಿ, ಚಾಯೋಡೆ ವರಿ, ನಂಗಕೂ ಬುದ್ದವ ನೇರ ಆಚಿ.

ಬೋಜಿ ಬೋಜಮ್ಮ : ಇಂದೇ ಬಾತೇಂಗಿ ಒರ್ ದಿವಸ ಜಾಸ್ತಿ ಮನೆಲ್ ಇರೋಲು ಎಣ್ಣಿಯೆಂಡ್ ಇಂದೇ ಪೊರಡ್‌ಚಿಟ್ಟತ್ ಇವು.

ಮೇದಯ್ಯ : ಆಚಿ, ಇಕ್ಕ ಬುದ್ದೋಳಿ.

(ಪಿತ್ಯಾಂಡ್ ಒಟ್ಟಿ ಒಣಕ್ ಎರ್ಚಿ ಕರಿ ತಿಂದಂಡ್)

ಬೋಜಿ ಬೋಜಮ್ಮ : ಒಣಕ್ ಎರ್ಚಿ ಕರಿ ತಿಂಗತೆ ಸುಮಾರ್ ಟೈಮ್ ಆಯಿರ್‌ತ್, ತಿತ್ತ್ ಬೇಕೆಲ್ ಒಣಕುವಾಂಡ ರಸವೇ ರಸ. ಅಕ್ಕಯ್ಯ ಬಾರಿ ಚಾಯಿತೆ ಮಾಡಿತ್ ಕರಿ.ಒಟ್ಟಿಯೂ ತಿತ್ತ್ ಕಂಡತ್ ಬೆಂಜದ್ ನಲ್ಲ ರಸ, ನಂಗಡ ಗ್ಯಾಸ್ ಲ್ ಬೆಂಜಾಂಗುಂಇ ಬಾರಿ ಚಾಯಿ ಉಂಡ್.

ಗ್ಯಾನ್/ಕಾವ್ಯ : ಅಕ್ಕು ಮಮ್ಮಿ ನೀಡ ಒಟ್ಟಿ ಇಚ್ಚೆ ಚಾಯಿ ಇಪ್ಪುಲೆ.

ಬೋಜಿ ಬೋಜಮ್ಮ : ಅಕ್ಕು ಮಕ್ಕಳೆ ಅಲ್ಲಿ ತಿತ್ತ್ ಕಂಡ ಇಪ್ಪುಲೆ, ಗ್ಯಾಸ್‌ಲೇ ಎಂತೋ ಮಾಡೊಂಡು.

ಮುದ್ದವ್ವ : ಸಂದರ್ಭಕ್ ಸರಿಯಾಯಿತ್ ಉಳ್ಳಾತ್ ಬದ್‌ಕುವದೇ ಜೀವನ, ಎಲ್ಲಾ ಒರೇ ತರ ಇಪ್ಪುಲೆ, ಕ್‌ಟ್ಟುಲೆ.

ಮೇದಯ್ಯ : ಸರಿ ಇಕ್ಕ, ಕಾರಿ ಪ್ರೇಮ್ ಕಾಮುಣಿ ಬೋಜಿ ಎಲ್ಲಾ ಬಾರಿ ಅಳಿರಿ, (ಮುದ್ದವ್ವಂಗ್) ನೀನೂ ಬಾ ನೀಕೆನ್ನ ಬೋರೆ ಎಣ್ಣುವಂಡುವಾ. ನಾಕೂ ಅವ್ವಂಗೂ ವಯಸ್ಸಾಚಿ, ನಿಂಗ ದಂಡಾಳೂ ನಿಂಗಡ ಬದ್‌ಕ್ ಮಾಡಿಯವಚ್ಚಕ್ ವಯಸ್ಸೂ ಆಯಿತ್ ಅನುಭವವೂ ಆಯಿತ್, ನಿಂಗಡ ಬಲ್ಯಪ್ಪ ಮೊನಿಯಾಂದ್ ಮನೆಕ್ ಬಂದಂವ ಅವಂಡ

ಮಕ್ಕಳ ಪಾಲ್ ಮಾಡಿತ್ ಕೊಡ್ತಾನ ಎಣ್ಣೆಚಿ, ನಾಕೂ ಅದೇ ಸರೀಂದ್ ಆಚಿ, ಆನುಂಡ್ ನಾನೂ ನಿಂಗಡ ಅವ್ವನೂ ನೈಚಿತ್ ಮಾಡ್ನ ತೋಟ ತೊಡಿಯತ್ನ ನಿಂಗ ದಂಡಾಳುಕೂ ಪಾಲ್ ಇಡುವ ತೀರ್ಮಾನ ಮಾಡ್ಚಿ, ನಿಂಗಡ ಅಭಿಪ್ರಾಯ ಎನ್ನ?

ಪ್ರೇಮ್ ಪೊನ್ನಪ್ಪ : ಬೋಜಿ ಬೋಜಮ್ಮ: (ಒಕ್ಕಚಿ) ಇಕ್ಕಲೇ ಅರ್ಜೆಂಟ್ ಎನ್ನ ಉಳ್ಳ, ಬಯ್ಯ ಪಾಲ್ ಮಾಡಿ.

ಕಾಮುಣಿ ಕಾಮವ್ವ : ನಾನೂ ಅದೇ ಎಣ್ಣೆನ, ಎನ್ನಂಗ್ ಈ ಅರ್ಜೆಂಟ್‌ಂದ್.

ಮೇದಯ್ಯ : ಮಿಂಇಲೇ ಎಣ್ಣೆನನ್ನಕೆ ನಂಗಕೂ ವಯಸ್ಸಾಚಿ, ಎಲ್ಲ ಚಾಯಿಲ್ ಇಪ್ಪಕಲೇ ಪಾಲ್ ಮಾಡುವ ತೀರ್ಮಾನ ನಾನೂ ನಿಂಗಡ ಅವ್ವನೂ ಮಾಡಿತ್, ದಾರ್ ಎಂತೇಂಗಿ ಎಣ್ಣೆಚಿಂಗಿನು ನಾಡ ಮನಸ್ ಬದಲಾಪುಲೆ, ಆನುಂಡ್ ಪಾಲ್ ಇನ್ನನೆ ಮಾಡಿಯೆ, " ಮನೆ, ಮನೆರ ಪಕ್ಕ ಉಳ್ಳ ತೋಟ ಪನ್ನಂದ್ ಏಕ್ರೆ ಪೆರಿಯಂವಂಡ ಪಾಲ್‌ಕೂ, ಆ ಕರೆ ರೋಡ್‌ರ ಪಕ್ಕ ಉಳ್ಳ ಪೈಸಾರಿ ಎಟ್ತ್ ಏಕ್ರೆ ತೋಟ ಚೆರಿಯಂವಂಡ ಪಾಲ್‌ಕೂ ಮಾಡಿತ್, ನಂಗಡ ಪಾಲ್‌ಕ್ ತೋಟ ಬೆಚ್ಚವದಿಲ್ಲೆ, ಮಕ್ಕಳ ನಲ್ಲ ಬುದ್ಧಿ ಕೊಡ್ತಿತ್ ನಂಗಳ ನೋಟಿಯವಡ್ ಪೆರಿಯಂವ ಮನೆ ತೋಟ ನೋಟಿಯಂಡ್ ಇಂಜಾಂಗ್, ಉಳ್ಳಾಂಗ್, ಅವಂಗ್ ಮೂಂದ್ ಏಕ್ರೆ ತೋಟ ಜಾಸ್ತಿ ಕೊಡ್ತಿಯೆ. ಬೇಲ್: ಮಾನಿ ಕರೆ ಸಾಲ್ ದಂಡಾಳ್‌ಕೂ ಪಾದಿ ಪಾದಿ.

ಇಕ್ಕ ನಂಗಡ ಪೆದತ್ ಉಳ್ಳ ದುಡ್ಡ್ ಅನ್ನನೆ ಇಕ್ಕಡ್. ಕಷ್ಟ ಕಾಲಕ್ ಬೋಂಡಿಯಾಕು.

ಅವ್ವಂಡ ನಾಲ್ ಬಳಿ, ಡಬ್ಬಲ್ ಚೈನ್, ಓಲೆ, ಬ್ರೋಚ್ ದಂಡ್ ಮೈಮಕೂ ಇರಡ್, ದಂಡಾಳ್‌ಕೂ ಮೂಡಿ ಕುಂಇಯೆ ಉಂಡಲ್ಲ. ತಾಯಿರ ಅಚ್ಚಕೇಂಗಿ ಇರಡ್.

ನಾಡ ಕುಪ್ಪಿಯ ಚೇಲೆ ಪೀಚೆ ಕತ್ತಿ ತೋಕ್ ಪೆರಿಯ ಮೋಂವಂಗ್ ಇರಡ್ ಅವ ಇಲ್ಲಿ ಮಂಗಲ ನಮ್ಮೆ ನಾಳ್‌ಕ್ ಜಾಸ್ತಿ ಪೋಪಲ್ಲ, ಚೆರಿಯಂವ ಆಚಿಂಗಿ ಮಂಗಲಕೇ ಮಾಡಿಯಂಡತ್ ಅಲ್ಲತೆ ಎಕ್ಕೇಂಗಿ ಓರಮ ಮಂಗಲಕ್ ಪೋಪ, ಅವಂಡ ಮೋಂವಂಗ್ ಅವನೇ

ಮಾಡಿಯವಡ್, ದೇವ ಕೋಡ್‌ಪ" ಇಕ್ಕ ನಿಂಗ ಎಣ್ಣೆ ನಿಂಗಕೆನ್ನೇಂಗಿ  
ಅನ್ಯಾಯ ಆಯಿತಾ, ಕಾಮುಣಿ ನೀನೂ ಎಣ್ಣೋಲು ಬೋಜಿ  
ನೀನೂ ಎಣ್ಣೋಲು."

ಕಾಮುಣಿ ಕಾಮವ್ವ : ನಿಂಗ ಮಾಡ್‌ನ ಪಿಂಞ ಎಲ್ಲ ಸರಿ ಇಪ್ಪ ಮಾವ  
(ಬೋರೆ ದಾರೇಂಗಿ ಎನ್ನೇಂಗಿ ಎಣ್ಣೆರೂಂದ್ ಬೆರಿಯ ಎಣ್ಣೆರುವ).

ಬೋಜಿ ಬೋಜಮ್ಮ : ಅಕ್ಕಯ್ಯ ಎಣ್ಣೆ ನನ್ನಕೆ ನಿಂಗ ಮಾಡ್‌ನದ್ ನಂಗಕ್  
ಸಂತೋಷವೇ, ನಿಂಗ ನಂಗಡ ಪಾಲ್‌ಕ್ ತಂದದ್ ಪ್ರಸಾದ, ನಿಂಗಡ  
ಆಶೀರ್ವಾದ ಬೋಂಡು ಅಚ್ಚಕೆ.

ಪ್ರೇಮ್ ಪೊನ್ನಪ್ಪ : ಅಕ್ಕು ಅಪ್ಪಯ್ಯ ನೀನ್ ಮಾಡ್‌ನದ್ ನಾಕ್ ತೃಪ್ತಿ,  
ಅಣ್ಣಯ್ಯ ನೀಡ ಅಭಿಪ್ರಾಯ ಎಂತ ಎಣ್ಣೇರ್.

ಕಾರಿ ಕಾರ್ಯಪ್ಪ : ನಾಡ ಅಭ್ಯಂತರ ಒಂದೂ ಇಲ್ಲೆ, ಅಪ್ಪ ಮಾಡ್‌ನಾಂಗ್  
ನಾಡ ಸಂಪೂರ್ಣ ಒಪ್ಪಿಗೆ.

ಮೇದಯ್ಯ : ಅಂದಕ ಈಂಗ್ ಸರಿಯಾಯಿತ್ ಎಳ್ತ ಕುತ್ತ ಮಾಡಿತ್ ರಿಜಿಸ್ಟರ್  
ಮಾಡ್‌ಚಿಟ್ಟುರುವಿ, ಚೆವ್ವಾಚೆ ಒನ್ನಾಂದ್ ಪ್ರೇಮ್ ಪಿಂಞ ಬೋಜಿ  
ರಜ ಇಡಡ್, ರಿಜಿಸ್ಟರ್ ಮಾಡಿತೇ ಪೋಯಿರಡ್.

(ಅನ್ನನೆ ಆಸ್ತಿ ರಿಜಿಸ್ಟರ್ ಆಪ.... ಪ್ರೇಮ್ ಬೋಜಿ ಮಕ್ಕ  
ಬೆಂಗಳೂರ್‌ಕ್ ಪೋಪ).

\* \* \* \* \*



## ಸೀನ್ ಇರುವತ್ತಂಜಿ

(ನಾಡ್ ಮನೆ, ಕಾರಿ ಕಾರ್ಯಪ್ಪ/ ಕಾಮುಣಿ ಕಾಮವ್ವ ಕೋಂಬರೆಲ್)

ಕಾಮುಣಿ ಕಾಮವ್ವ : ಅಂತೂ ಇಂತೂ ಆಸ್ತಿ ಪಾಲಾಚಿ, ನಂಗಕ್ ಮನೆ ಕ್‌ಟ್ಚಿ, ಜಾಸ್ತಿ ತೋಟವೂ ಕ್‌ಟ್ಚಿ, ಆಚೆಂಗಿ ಮಾವ ಮಾವಿ ನಂಗಡ ಕೂಡೆ ಇಪ್ಪಲ್ಲ, ಜಾಸ್ತಿ ತೋಟ ತಂದಾಂಗ್ ಈ ದಂಡ್ ವಯಸ್ಸಾನಯಿಂಗಳ ಚಾಕೊಂಡು ಅಲ್ಲ.

ಕಾರಿ ಕಾರ್ಯಪ್ಪ : ಅಯಿಂಗ ಎಂತ ಭಾರ ನೀಕ್, ಅವು ಮನೆಲ್ ಉಂಡೇಂಗಿ ಒರ್ ಧೈರ್ಯ, ಮಕ್ಕಳೇ ಬುಟ್ಟಿತ್ ನಂಗ ಆಲೆ ಈಲೆ ಪೋಲು.

ಕಾಮುಣಿ ಕಾಮವ್ವ : ಆಚೆಂಗಿನೂ ಪ್ರೇಮ್ ಬಾವಂಗೂ ಬೋಜಿಕೂ ಈ ತೊಂದರೆ ಇಲ್ಲೆಲ್ಲ.

ಕಾರಿ ಕಾರ್ಯಪ್ಪ : ಅದೆಂತ ಕಷ್ಟಾಂದ್ ಎಣ್ಣುವ, ಇಕ್ಕಣೆ ಇಂಜನ್ನಕೆ ಇಪ್ಪ ಬುಡ್..

ಕಾಮುಣಿ ಕಾಮವ್ವ : ಇಕ್ಕಣೆ ಇಂಜನ್ನಕೆ ಇಪ್ಪ ಕಯ್ಯುವಾ, ಆ ಎಟ್ಚ್ ಏಕ್ರೆ ತೋಟ ಬಾವಂಡ ಪಾಲಾಚಿ. ಆಚೆಂಗಿ ಒಂದ್ ಅಯಿಂಗಡ ಪಾಲ್‌ರ ತೋಟ ಪಣಿ ನಿಂಗ ಒತ್ತವಂಡ, ಅವ ಕಯ್ಯುಲೇಂದ್ ಬುಟ್ಟಿತ್ ಪೋಡ್, ಅಕ್ಕ ನಂಗಕೇ ಪುಕ್ಕಟೆ ಮಾಡಿಯವಲು.

ಕಾರಿ ಕಾರ್ಯಪ್ಪ : ಅಲ್ಲ ಅವ ನನ್ನ ಕೇಟಕ ಎನ್ನನೆ ಆಪುಲೇಂದ್ ಎಣ್ಣುವ, ಇಕ್ಕಣೆ ಮಾಡಿಯೇಂಡ್ ಇಂಜಲ್ಲಾ.

ಕಾಮುಣಿ ಕಾಮವ್ವ : ಅದೆಲ್ಲ ನಾಕ್ ಗೊತ್ತಿಲ್ಲೆ, ನಿಂಗ ಆಪುಲೇಂದ್ ಎಣ್ಣೆ ಅವು ಎನ್ನೇಂಗಿ ಮಾಡಿಯವಡ್. ಅಚ್ಚಕೆ, ನಂಗ ಇಕ್ಕ ನಂಗಡ ಪನ್ನಂದ್ ಏಕ್ರೆ ತೋಟ ಪಣಿ ಮಾತ್ರ, ಆನ ಚಾಯಿತೆ ಮಾಡನ, ಪಿಂಞ ಚೆನ್ನ ಟೈಮ್ ಇಪ್ಪ, ಈ ಮನೆ ಬೋರೆ , ಇಚ್ಚಕ್ ಬಲ್ಯದ್ ಸುಮಾರ್ ರೂಮ್, ನಂಗ ಈ ಮನೆನೇ ಒರ್ ಹೋಮ್ ಸ್ಟೇ

ಮಾಡನ, ನಲ್ಲ ದುಡ್ಡಾಪಲ್ಲ.

ಕಾರಿ ಕಾರ್ಯಪ್ಪ : ಆ ಹೋಮ್ ಸ್ಟೇ ಒಂದೂ ಬೋಂಡ, ನಂಗಡ ತೋಟ  
ತೋಡಿಯ ನೋಟಿಯಂಡ್ ನೆಮ್ಮದಿಲ್ ಇಕ್ಕ. ಬುಡ್..

ಕಾಮುಣಿ ಕಾಮವ್ವ : ನಿಂಗಕೆನ್ನ ಸೊಯ ಉಂಡಾ, ನಂಗಕ್ ಆ ಎಟ್ತ್  
ಏಕ್ರೆರ ಆದಾಯ ಕಮ್ಮಿ ಆಯಿಲಿಯಾ, ಆಂಗ್ ಮನೆನೇ ಹೋಮ್  
ಸ್ಟೇ ಮಾಡನ, ಪಣಿಕ್ ಎನ್ನನೆಯೋ ಆಳ ಇಪ್ಪ, ನಂಗಳೂ ಮಾಡನ,  
ಇಕ್ಕ ಚೆನ್ನ ದುಡ್ಡ್ ಮಾಡಿಯವನ.

ಕಾರಿ ಕಾರ್ಯಪ್ಪ : ನೀಡೆಂತೋರ್ ಹರ ಎನ್ನೋ, ಎನ್ನೇಂಗಿ ಮಾಡಿಯ,  
ಎಡವಟ್ತ್ ಆಚೆಂಗಿ ನನ್ನ ದೂಷಣೆ ಮಾಡಂಡ.

ಕಾಮುಣಿ ಕಾಮವ್ವ : ಎಂತಾಪ, ಒಂದೂ ಆಪುಲೆ, ದುಡ್ಡಾಪ ಅಚ್ಚಕೆ.  
(ಪಿತ್ಯಾಂದ್ ಅಪ್ಪ ಅವ್ವಂಗ್ ವಿಷಯ ಎಣ್ಣುವ..ಅವು ಚೆನ್ನ ಬೆಲಕುವ..  
ಕಾಮುಣಿರ ಹರತ್ ರ ಮಿಂಞ ಅವು ಮುಂಡತಾಯಿರುವ)  
(ಹೋಮ್ ಸ್ಟೇ ವ್ಯವಹಾರ ಚಾಯೋಡೆ ನಡಪ, ದುಡ್ಡೂ  
ಆಪ)(ಓರೋರಮ ದುಂಬಾ ಜನ ಬಂದಕ, ಅಪ್ಪ ಅವ್ವನ  
ಪ್ಯಾಸೇಜ್ಲ್ ಬುದ್ದಾಕಿತ್ ದುಡ್ಡ್ ಕಾಯಿತ್ ಬಂದಯಿಂಗಕ್ ರೂಮ್  
ಕೊಡಪ ಇಂಜತ್)

(ಒಮ್ಮ ತಮ್ಮಣನೂ ಅವಂಡ ಸಂಸಾರವೂ ಬಪ್ಪ)(ಅಕ್ಕಲೂ ದುಂಬಾ  
ಜನ ಬಂದಿತಿಪ್ಪ..ಅಪ್ಪ ಅವ್ವ ಪ್ಯಾಸೇಜ್ಲ್ ಬುದ್ದಂಡದ್ ಕಾಂಬ)

ಪ್ರೇಮ್ ಪೊನ್ನಪ್ಪ : ಅಲ್ಲ ಅಣ್ಣಯ್ಯ, ಅಪ್ಪ ಅವ್ವ ಮನೆ ಕೆಟ್ನಲ್ಲಿಂಜಿ ಆ  
ಕೋಂಬರೆಲೇ ಬುದ್ದಂಡಿಂಜವು, ಅಯಿಂಗಳ ಎನ್ನಂಗ್ ಇಲ್ಲಿ  
ಪ್ಯಾಸೇಜ್ಲ್ ಬುದ್ದಾಕಿಯೆ.

ಕಾಮುಣಿ ಕಾಮವ್ವ : ಅದ್ ಬಾವ, ಹೋಮ್ ಸ್ಟೇಕ್ ಜನ ಜಾಸ್ತಿ ಬಪ್ಪಕ  
ಮಾತ್ರ ಅಲ್ಲಿ ಬುದ್ದಾಕುವ.

ಪ್ರೇಮ್ ಪೊನ್ನಪ್ಪ : ಎಕ್ಕೋಲು ಜನ ಜಾಸ್ತಿ ಬಾತೆಂಗಿ ಅಪ್ಪ ಅವ್ವ ಅಲ್ಲಿಯೇ  
ಅಲ್ಲಾ, ನಂಗಳೂ ಕಯ್ಯಾಲೆಯೋ ಕೋಟ್ಲೆಯೋ ಬುದ್ದವಂಡು  
ಕಾಂಬ.

ಕಾಮುಣಿ ಕಾಮವ್ವ : ಇಂದ್ ಜನ ಜಾಸ್ತಿ ಉಳ್ಳಾಂಗ್ ನಿಂಗಕ್ ಔಟ್  
ಹೌಸ್ಲ್ ಬೆಡ್ ಮಾಡಿಯೆ, ಅಲ್ಲಿ ನಿಂಗಲ್ಲ ಒಕ್ಕಚೆ ಬುದ್ದವಲು.

ಪ್ರೇಮ್ ಪೊನ್ನಪ್ಪ : ಈ ಹೋಮ್ ಸ್ಟೇನ ಗುಂಡ್ ನಂಗಕ್ ಬುದ್ಧವಕ್ ಜಾಗ ಇಲ್ಲತಾಚಿ, ನಿಂಗಡ ಪಾಲ್ಕ್ ಬಂದ ಮನೆ, ನಾನೊಂದೂ ಎಣ್ಣಲೆ, ನಾಕ್ ಬೇಜಾರವೂ ಇಲ್ಲೆ, ಆಚೆಂಗಿ ದುಡ್ಡ್ ಕುಂಜಿ ಸಮ್ಮಂದ ತಳ್ಳನೆ ಆಚಿ ಅದೇ ಬೇಜಾರ್(ಔಟ್ ಹೌಸ್‌ಲ್ ಬುದ್ಧವಕ್ ಪೋಪ).

ಪ್ರೇಮ್ ಪೊನ್ನಪ್ಪ : ಅಲ್ಲ ಬೋಜಿ, ನಂಗಡ್ ಆಸ್ತಿನ ಅವು ನೋಟಿಯವಲೇಂದ್ ಮಿಂಇಲೇ ಎಣ್ಣೆಚಿ. ಅಯಿಂಗಡ ಪಾಲ್ಕ್ ಮನೆ ಬಾತ್, ನಂಗಕ್ ನೆಲೆ ಇಲ್ಲತಾಚಿ, ಇಕ್ಕ ನಾಡ ಮನಸ್‌ಲ್ ಉಳ್ಳಾನ ಎಣ್ಣುವಿ, ನೀಡ ಅಭಿಪ್ರಾಯ ಎಣ್ಣೆ.

ಬೋಜಿ ಬೋಜಮ್ಮ : ಎಂತ ಎಣ್ಣೆ ಇಕ್ಕ ನಿಂಗಡ ಮನಸ್‌ಕ್ ಎಂತೋ ನೊಂಬಲ ಆಯಿತ್, ಎಣ್ಣೆ ..

ಪ್ರೇಮ್ ಪೊನ್ನಪ್ಪ : ನಂಗ ನಂಗಡ ತೋಟತ್ ರೋಡ್ ಕರೆಲ್ ಒರ್ ಚೆರಿಯ ಲೈನ್ ಮನೆ ಕೆಟ್ಟನ, ನಾಕ್ ತೋಟ ಕೆಲಸಕ್ ಬಪ್ಪಕ ಇಪ್ಪಕೂ ಆಚಿ, ನಂಗೆಲ್ಲ ಬಂದಕ ಔಟ್ ಹೌಸ್‌ಲ್ ಬುದ್ಧವಾಂಡ ಬದಲ್ ಅಲ್ಲಿ ಆರಾಮಲ್ ಬುದ್ಧವಲು, ಅಪ್ಪ ಅವ್ವಂಗೂ ಪ್ಯಾಸೇಜಲ್ ಬುದ್ಧವದ್ ತಪ್ಪುವ. ನೋಟನ ನಾಳೆ ಅಪ್ಪಂಗ್ ಎಣ್ಣುವಿ.

ಬೋಜಿ ಬೋಜಮ್ಮ : ನಾನೊಂದೂ ಎಣ್ಣಲೆ, ನಿಂಗ ನಲ್ಲದೇ ಮಾಡುವಾಂದ್ ನಾಕ್ ಚಾಯಿತೆ ಗೊತ್ತುಂಡ್, ಆಚೆಂಗಿ ಇದ್ ಅಕ್ಕಯ್ಯಂಡದೇ ಕಿತಾಪತಿ, ಬಾವ ಪಾಪ. ಇಂಇನು ನಂಗಕ್ ಈ ಮನೆರ ಪಡಿ ಮುಚ್ಚನನ್ನಕೆ ಕಾಂಬ, ಇಕ್ಕ ಬುದ್ಧೋಳಿ ನಾಳೆ ನೋಟನ.  
(ಪಿತ್ಯಾಂದ್)

ಪ್ರೇಮ್ ಪೊನ್ನಪ್ಪ : ಅಪ್ಪಯ್ಯ, ನಾಡ ತೋಟ ಕೆಲಸ ಅಣ್ಣಂಗ್ ಮಾಡೋ ಕಯ್ಯಲೇಂದ್ ಎಣ್ಣೆಚಿ, ಅನ್ನನಿಪ್ಪಕ ನಾನೇ ಬರೊಂಡು, ಇಲ್ಲಿ ಹೋಮ್ ಸ್ಟೇಕ್ ಜನ ಬಾತೇಂಗಿ ಬುದ್ಧವಕ್ ಜಾಗ ಇಲ್ಲೆ, ಆಂಗ್ ನಾಡ ಪಾಲ್‌ರ ತೋಟತ್ ರೋಡ್ ಕರೆಲ್ ಒರ್ ಚೆರಿಯ ಲೈನ್ ಮನೆ ಕೆಟ್ಟುವಿ. ನಾಕ್ ಕೆಲಸಕ್ ಬಾತೇಂಗಿ ಬೋಂಡು. ನಾಡ ಸಂಸಾರ ಬಾತೇಂಗಿ ಔಟ್ ಹೌಸ್‌ಲ್ ಬುದ್ಧವಂಡ, ನಿಂಗಲೂ ಔಟ್

ಹೌಸ್‌ಲ್ ಅಥವಾ ಪ್ಯಾಸೇಜ್‌ಲ್ ಬುದ್ಧವಂಡ, ಅಲ್ಲಿ ಬುದ್ಧವಲು, ಆಚೆಂಗಿ ಹೋಮ್ ಸ್ಟೇಕ್ ಮಾತ್ರ ಕೊಡ್‌ತರತಿ.

ಮೇದಯ್ಯ : ನೀನ್ ಎಂತ ಮಾಡ್‌ಚೆಂಗಿಯೂ ಚಾಯಾಪಿಯಾ, ನಾಡದೂ ಅವ್ವಂಡದೂ ಆಶೀರ್ವಾದ ನೀಕ್ ಉಂಡ್, ಎನ್ನಂಗ್ ಎಣ್ಣೆಚೆಂಗಿ ನಿಂಗಡ ನಲ್ಲ ಮನಸ್, ನಂಗಡದೂ ನಲ್ಲ ಆಶೀರ್ವಾದ ಇಪ್ಪ, ದೇವಳೂ ನಲ್ಲದೇ ಮಾಡುವ.

ಮುದ್ದವ್ವ : ನಿಂಗ ಔಟ್ ಹೌಸ್‌ಕ್ ಬುದ್ಧವಕ್ ಪೋನಲ್ಲಿಂಜಿ ಇಕ್ಕಣೆಕೂ ಕಣ್ಣೆ ನೀರ್ ಇಟ್ಟಂಡೆ ಇಂಜಿಯೆ, ನಂಗ ದಂಡಾಳೂ ನೀನ್ ಲೈನ್ ಮನೆ ಕೆಟ್ಟುವಿಯಾಂದ್ ಕೇಟ ಪಿಂಇ ಚೆನ್ನ ನೆಮ್ಮದಿ ಆಚಿ. ಆಪಚ್ಚಕ್ ಬೆರಿಯ ಕೆಟ್ಟಪ್ಪ, ಚಾಯಾಪಿಯ.

ಬೋಜಿ ಬೋಜಮ್ಮ : ಇಂದೇ ಕಂಟ್ರಾಕ್ಟರ್‌ರ ಪಕ್ಕ ಪೋಯಿತ್ ಪಣಿ ಸುರು ಮಾಡ್‌ಚಿಡಿ, ನಂಗ ಉಂಇೂಮ್ಮ ಬರಣೆ ಲೈನ್ ಮನೆ ರೆಡಿ ಆಯಿತಿರೊಂಡೂಂದ್ ಎಣ್ಣೆ.ಅಕ್ಕಣೆ ಕಾಪಿ ಫಸಲೂ ಬಪ್ಪ.

ಪ್ರೇಮ್ ಪೊನ್ನಪ್ಪ : ದುಡ್ಡ್‌ಕ್ ಎನ್ನ ಮಾಡೋಂದ್ ಗ್ಯಾನ ಮಾಡಿಯೆಂಡುಳ್ಳೊ.

ಬೋಜಿ ಬೋಜಮ್ಮ : ಆಂಗೆನ್ನ, ನಂಗ ದಂಡಾಳೂ ಫ್ಲೆಸ್ಟಿವಲ್ ಅಡ್ವಾಂಸ್ ಎಡ್‌ತವನ, ಅದ್ ಮದಿಯಾಕು, ಪೋರೆಂಗಿ ದೇವ ಸಹಾಯ ಮಾಡುವ ಬುಡಿ, ನಿಂಗ ಇಕ್ಕ ಪೋಯಿತ್ ಕಂಟ್ರಾಕ್ಟರ್‌ನ ಕಾಣಿ, ಕೆಲಸ ಒಪ್ಪಾಚಿಡಿ.

ಪ್ರೇಮ್ ಪೊನ್ನಪ್ಪ : ಆಂಗೇ ಎಣ್ಣುವ ನಿನ್ನಂತ ಪೋಣ್ಣೆ ಉಂಡೇಂಗಿ ಭೂಲೋಕ ಜಯಿಸೋಲುಂದ್. ಆಕು ಇಕ್ಕಲೆ ಪೋಯಿತ್ ಅವಂಗ್ ಕೆಲಸ ವಹಿಸುವಿ. ಇದಾ ಪೊಲಾಕ ಎದ್ದದೆ ನಾನ್ ಒರ್ ಪ್ಲಾನ್ ಬುಡ್‌ತಿಯೆ, ನೀನೂ ಒಮ್ಮ ನೋಟ್, ಅಪ್ಪ ಅವ್ವನೂ ನೋಟಡ್.

ಮೇದಯ್ಯ : ಇದಾ ಪ್ಲಾನ್, ಚಾಯುಂಡಪ್ಪ, ಚೆರಿಯದಾಚೆಂಗಿನು ಎಲ್ಲಾ ಉಂಡ್.

ಮುದ್ದವ್ವ : ಅದೆಂತ ಒಮ್ಮ ನಾಕೂ ಎಣ್ಣೆ ತಾರಿ.

ಮೇದಯ್ಯ : ಇದಾ ಇದ್ ಕಯ್ಯಾಲೆ, ಇದ್ ಒರ್ ಪೋರ್ಮರ ಕೋಂಬರೆ, ಇದ್ ಹಾಲ್, ಇದ್ ಅಡಿಗೇ ಮನೆ, ಇದ್ ಬೆಡ್ ರೂಮ್, ಇದ್ ಲ್ಯಾಟ್ರೀನ್ ಬಾತ್ ರೂಮ್. ಗೊತ್ತಾಚ.

ಮುದ್ದವ್ವ : ಮದಿ ಮದಿ ಅವು ನಲ್ಲ ಮನೆ ಬೆಂಗಳೂರ್‌ಲೇ ಕೆಟ್ಟಡ್, ಇಲ್ಲಿಕ್ ಇದ್ ಮದಿ.

ಮೇದಯ್ಯ : ಎಂತ ಎಣ್ಣೆಯನಾ, ಅವು ಬಲ್ಯ ಮನೆ ಬೆಂಗಳೂರ್‌ಲೇ ಕೆಟ್ಟಿಯವಡ್‌ಂದಾ? ನೀಡ ಬಾಯಿಲ್ ಬುದ್ದನ್ನಕೇ ಆಡ್, ಅಯಿಂಗಕ್ ಇಲ್ಲಿಯತ ನಂಜಿ ಮನಸ್ ಬರತಾಡ್ ಅಚ್ಚಕೇ.

ಬೋಜಿ ಬೋಜಮ್ಮ : ಅಯ್ಯೋ ಬುಡಿ ಮಾಯಿ, ಅದ್ ಬಯ್ಯ ನೋಟನ, ನಿಂಗಡ ಮೋಂವಂಡ ಬಲ್ಯೋರ್ ಆಸೆ ಅದೇ, ಅದ್ ಎಕ್ಕ ಆಪಾಂದ್ ದೇವ ಸಹಾಯ ಮಾಡೊಂಡು ಅಚ್ಚಕೆ.

ಪ್ರೇಮ್ ಪೊನ್ನಪ್ಪ : ಬೆಂಗಳೂರ್‌ಲ್ ಮನೆ ಕೆಟ್ಟುವದ್ ಅಚ್ಚ ಸುಲಭ ಅಲ್ಲ, ಸೈಟ್ ಕೆಟ್ಟೆಚೆಂಗಿ ಮನೆ ಕೆಟ್ಟೋಲು. ನಂಗಡ ಆಫೀಸ್ ಸೊಸೈಟಿಲ್ ಅರ್ಜಿ ಇಟ್ಟಿತ್. ದೇವಡ ದಯತೂ ನಿಂಗಡ ಆಶೀರ್ವಾದತ್ ಅದ್ ಕೆಟ್ಟಿ ಪೋಚೆಂಗಿ ಮದಿ, ಬಯ್ಯ ನಿಂಗ ಎಣ್ಣೆನನ್ನಕೆ ಆಪ.

ಮೇದಯ್ಯ/ಮುದ್ದವ್ವ : ನಿಂಗಡ ಪ್ರಯತ್ನಕ್ ಆ ದೇವ ಖಂಡಿತಾ ನಲ್ಲದ್ ಮಾಡುವ, ಇಂಞೊಮ್ಮ ನಿಂಗ ಇಲ್ಲಿಕ್ ಬರಣೆ ನಲ್ಲ ಸುದ್ದಿಯೇ ಎಣ್ಣುವಿರ, ನೋಟಿಯೊಳಿ, ದೇವ ಖಂಡಿತಾ ನಲ್ಲದ್ ಮಾಡುವ.

ಪ್ರೇಮ್ & ಬೋಜಿ : ಅಪ್ಪವ್ವಂಡ ಕಾಲ್ ಪುಡಿಪ, " ನಿಂಗಡ ಆಶೀರ್ವಾದ ಮದಿ ನಂಗಕ್..

\* \* \* \* \*

## ಸೀನ್ ಇರುವತ್ತಾರ್

(ಬೆಂಗಳೂರ್ ಮನೆಲ್ ಪ್ರೇಮ್ ದುಂಬಾ ಬೇಜಾರತ್ ಇಪ್ಪ)

ಬೋಜಿ ಬೋಜಮ್ಮ : ಎನ್ನಾಚಿ, ಎನ್ನ ಕೋಡ ಚತ್ತ ಕೊರ್ಮನನ್ನಕೆ  
ಅಳ್ತಿತುಳ್ಳಿಯಾ, ಎನ್ನಾಚಿ? ನಾಕೂ ಎಣ್ಣುಲಿಯಾ..

ಪ್ರೇಮ್ ಪೊನ್ನಪ್ಪ : ಅಂತದೊಂದೂ ಇಲ್ಲೆ, ನಂಗಳ ಔಟ್ ಹೌಸ್‌ಲ್  
ಬುದ್ದಾಕ್‌ಚಲ್ಲ ಅದ್ ಪರೋಲೆ, ಆಚೆಂಗಿ ಅಪ್ಪ ಅವ್ವಂಡ ಕೋಂಬರೆ  
ಖಾಲಿ ಮಾಡ್‌ಚಿಟ್ಟದ್ ದುಂಬಾ ಬೇಜಾರ್, ಅವು ಮನೆ ಕೆಟ್ಟನಲ್ಲಿಂಜಿ  
ಆ ರೂಮ್ ಬುಟ್ಟಿತಿಲ್ಲೆ, ಇಕ್ಕ ಪ್ಯಾಸೇಜ್‌ಲ್ ಬುದ್ದಾಕ್‌ಚಲ್ಲಾಂದ್  
ಬೇಜಾರ್.

ಬೋಜಿ ಬೋಜಮ್ಮ : ಅದ್ ನಾಕೂ ಬೇಜಾರ್ ಆಚಿ, ಬಾವನೂ ಅಕ್ಕನೂ  
ಇನ್ನನೆ ಮಾಡಂಡಿಂಜಿಲೆ, ಮಾವ ಮಾಯಿ ನಲ್ಲ ಮನಸ್‌ಲ್ ಮನಿನ  
ಅಯಿಂಗಕ್ ರಿಜಿಸ್ಟರ್ ಮಾಡಿತ್ ಕೊಡ್‌ತತ್ ಆಚೆಂಗಿ ಇಚ್ಚ ಬೆರಿಯ  
ಇನ್ನನೆ ಮಾಡುವಾಂದ್ ಗ್ಯಾನ ಮಾಡ್‌ಲೆ.

ಪ್ರೇಮ್ ಪೊನ್ನಪ್ಪ : ಅಕ್ಕ ಅವು ಇನ್ನನೇ ಮಾಡುವಾಂದ್ ನೀಕ್  
ಗೊತ್ತಿಂಜತಾ?

ಬೋಜಿ ಬೋಜಮ್ಮ : ಇಲ್ಲೆ, ಆಚೆಂಗಿ ಕಾಲ ಕ್ರಮೇಣ ಇನ್ನನೇ ಮಾಡುವಾಂದ್  
ಗ್ಯಾನ ಮಾಡಿತಿಂಜ, ಇಕ್ಕಲೇ ಮಾಡುವಾಂದ್ ಸ್ವಪ್ನತೂ  
ಕಂಡಿತಿಂಜಿಲೆ.

ಪ್ರೇಮ್ ಪೊನ್ನಪ್ಪ : ಆಂಗೆ ಎಣ್ಣುವ ನಲ್ಲಯಿಂಗಕ್ ಕಾಲ ಇಲ್ಲೇಂದ್.

ಬೋಜಿ ಬೋಜಮ್ಮ : ನಂಗಡ ಲೈನ್ ಮನೆ ಬೆರಿಯ ಕೆಟ್ಟಚಿಡಿ, ಇಂಇಸೂಮ್ತೆ  
ಪೂಜೆಕೇ ಪೋಪ, ಮಾವ ಮಾಯಿಯೂ ಮನೆ ಪಣಿ  
ನೋಟಿಯಂಡಿಕ್ಕು..

ಪ್ರೇಮ್ ಪೊನ್ನಪ್ಪ : ಅಕ್ಕು, ಅವು ನೋಟಿಯಂಡುಂಡ್. ಆನುಂಡ್ ಬೆರಿಯ  
ಆಪ, ಇಂಇ ಒರ್ ತಿಂಗತ್ ಮನೆ ಆಪಲೋ, ಬಪ್ಪ ತಿಂಗ ನಲ್ಲ

ದಿನ ಉಂಡ್‌ಂದ್, ಅಪ್ಪ ಎಣ್ಣಿಯಂಡಿಂಜತ್, ನಂಗಡ ಮಕ್ಕಕೂ  
ರಜ ಉಂಡ್, ನಂಗ ಪೋಯಿತ್ ಪೂಜೆ ಮಾಡ್‌ಚಿಟ್ಟಿತ್ ಮನೆ  
ಕೂಡನ. ಪೂಜೆಕ್ ಅಪ್ಪ ಅವ್ವನೇ ಅಳ್‌ಕಡ್. ಅಯಿಂಗ ಮಾಡ್‌ನ  
ತೋಟ, ನಂಗ ಚೆರಿಯ ಮನೆ ಕೆಟ್ಟಿತಿಕ್ಕು, ಆಚೆಂಗಿ ಪೆರಿಯವು  
ಪೂಜೆಕ್ ಅಳ್‌ತಕ ನಲ್ಲದೇ, ಅಯಿಂಡ ಆಶೀರ್ವಾದ ಇಪ್ಪ.

ಬೋಜಿ ಬೋಜಮ್ಮ : ಅದೇ ಸರಿ, ನಾನೂ ಅದೇ ವಿಷಯತ್ ಸ್ವಪ್ನ  
ಕಂಡಂಡಿಂಜ.

(ಚೆನ್ನ ದಿನತ್ ಕಂಟ್ರಾಕ್ಟರ್ ಫೋನ್ ಮಾಡಿತ್ ಮನೆ ಆಚೀಂದ್  
ಎಣ್ಣುವ).

ಪ್ರೇಮ್ ಪೊನ್ನಪ್ಪ : ನೋಟ್‌ರಾ, ಮನೆ ರೆಡಿ ಆಯಿತ್‌ಲೋ, ಪೂಜೆಕ್  
ಪೋಲು, ನಂಗಕ್ ಎನ್ನನೆಯೋ ಆ ವಾರ ರಜ ಉಂಡ್, ನಾನ್  
ಫೋನ್‌ಲೇ ನಂಗಡ ದೇವಸ್ಥಾನ ಪಟ್ಟ ಸ್ವಾಮಿಕ್ ಎಣ್ಣಿತ್ ರೆಡಿ  
ಮಾಡುವಿ, ಜಾಸ್ತಿ ದಾರ್‌ನೋ, ಕಾಕುಲೆ, ನಂಗ ಅಪ್ಪ ಅವ್ವ ಅಣ್ಣ  
ಮೊಮ್ಮ ಮಕ್ಕ ನಂಗಡ ಮನೆಕಾರ ಮಾತ್ರ ಮದಿ.

ಬೋಜಿ ಬೋಜಮ್ಮ : ಸಾಮಾನೆಲ್ಲ ರೆಡಿ ಮಾಡಿಯವಂಡಾ.

ಪ್ರೇಮ್ ಪೊನ್ನಪ್ಪ : ಅಲ್ಲಿ ಪೋನ ಪಿಂಞ ಅಲ್ಲಿಂಜೆ ಸಾಮಾನೆಲ್ಲ ಎಡ್‌ತವನ,  
ಇಲ್ಲಿ ಮಂಡೆ ಬಿಸಿ ಮಾಡಿಯವದ್ ಬೋಂಡ.

ಬೋಜಿ ಬೋಜಮ್ಮ : ಅದೂ ಸರಿ, ಇಲ್ಲಿಂಜೆ ಕೊಂಡೋಪ ಕಷ್ಟಕುಂಜಿ  
ಅಲ್ಲಿಂಜೆ ಎಡ್‌ತವದೇ ಸುಲಭ ಆಚೆಂಗಿ ಮಾವ ಮಾಯಿಕ್ ಪೂಜೆಕ್  
ಅಳ್‌ಪಕ್ ಪುದಿಯ ಬಟ್ಟೆ ಎಡ್‌ತವನ.

ಪ್ರೇಮ್ ಪೊನ್ನಪ್ಪ : ಅದ್ ಸರಿ ನಂಗಕ್ಕೊಂದೂ ಬೋಂಡ. ಅಪ್ಪ ಅವ್ವಂಗ್  
ಮಾತ್ರ ಎಡ್‌ತವನ, ದುಡ್ಡ್ ಎಲ್ಲಾ ಕಂಟ್ರಾಕ್ಟರ್‌ಕ್ ಕೊಡ್‌ತಿತಾಚಿ.  
(ಅವು ನಾಡ್ ಮನೆಕ್ ಬಪ್ಪ) (ಎತ್ತನದು ಪ್ರೇಮ್ ಪಟ್ಟಂಡಲ್ಲಿಕ್  
ಪೋಯಿತ್ ಪಟ್ಟ ಎಣ್ಣಾನ ಸಾಮಾನ ಎಡ್‌ತಂಡ್, ಬೋರೆ  
ಮನೆಕಾರಕ್ ಎಣ್ಣಿತ್ ಬಪ್ಪ)

ಪ್ರೇಮ್ ಪೊನ್ನಪ್ಪ : ಅಣ್ಣಯ್ಯ ಮೊಮ್ಮ, ಮತ್ತ್ಯಂದ್ ನಂಗಡ ಔಟ್  
ಹೌಸ್‌ರ ಪೂಜೆ, ನಿಂಗ ದಯಬೆಚ್ಚಿತ್ ಮಕ್ಕಳ ಕೂಟಿಯಂಡ್  
ಬಾರಿ.

ಅಪ್ಪಯ್ಯ ಅಪ್ಪಯ್ಯ, ಪೂಜೆಕ್ ನಿಂಗಲೇ ಅಲೆಕೊಂಡು.

ಮೇದಯ್ಯ/ಮುದ್ದವ್ವ : ಅದೆಲ್ಲ ಬೋಂಡ, ನಿಂಗಲೆ ಅಲೆರಿ.

ಪ್ರೇಮ್ ಪೊನ್ನಪ್ಪ/ಬೋಜಿ ಬೋಜಮ್ಮ : ಅದೆಲ್ಲ ಆಪುಲೆ, ನಿಂಗಲೆ ಪೂಜೆಕ್ ಅಲೆಕೊಂಡು ಅಚ್ಚಕೆ.

ಮೇದಯ್ಯ : ಆಚಪ್ಪ, ಈ ವಯಸ್ ಕಾಲತ್ ಇದೂ ಆಯೋಡ್.

ಬೋಜಿ ಬೋಜಮ್ಮ : ಇದ್ ಮಾವಂಗ್ ಪಂಜೆ, ಶಲ್ಯ, ಶರ್ತ್, ಇದ್ ಮಾಯಿಕ್ ಪೊಡಿಯ, ಜಾಕೇಟ್, ಪೂಜೆಕ್ ಮಡಿ ಬೋಂಡು ಅಲ್ಲ ಅದ್‌ಂಗ್.

(ಪೂಜೆ ಚಾಯಿತೇ ಆಪ- ಅಕ್ಕಣೆ ಒರ್ ಚೆರಿಯ ಲಾರಿ ಸಾಮಾನೋಡೆ ಬಪ್ಪ, ಪ್ರೇಮ್ ಆನೆಲ್ಲ ಲೈನ್ ಮನೆಲ್ ಉಳ್ಪುವ)

ಬೋಜಿ ಬೋಜಮ್ಮ : ಇದ್ ಎಕ್ಕ ನಿಂಗ ಬುಕ್ ಮಾಡಿಯೆ, ನಾಕ್ ಎಣ್ಣಿತೇ ಇಲ್ಲೆ.

ಪ್ರೇಮ್ ಪೊನ್ನಪ್ಪ : ಸಪ್ರೈಸ್ ಮಾಡನಾಂದ್ ಮಾಡ್‌ನ. ನೀಕ್ ಎಣ್ಣುವ ಕಾಗಾಂದ್ ಅಲ್ಲ, ಈ ಸೋಪ್ಲ, ಒರ್ ಡಬ್ಬಲ್ ಕಟ್, ಪ್ಲಾಸ್ಟಿಕ್ ಟೇಬಲ್ ಕುರ್ಚಿ ಎಲ್ಲ ರೆಡಿ ಆಕಣೆ ನಾಕ್ ನಂಬಿಕೇ ಇಂಜಿತಿಲ್ಲೆ, ನಂಗಡ ಸಿನೇತಕಾರ ಬಾರಿ ಮುತುವರ್ಜಿ ಇಟ್ಟಿತ್ ಅರ್ಜೆಂಟ್ ಮಾಡಿತ್ ಅಯೆಚಿ ತಾತ್, ಅವಂಗ್ ತ್ಯಾಂಕ್ಸ್ ಎಣ್ಣೊಂಡು.

ಮೇದಯ್ಯ : ನಲ್ಲದಾಚಿ ಮೋನೆ, ಇಲ್ಲಿ ಅಲೆಪಕ್, ಬುದ್ದವಕ್ ಉಂಬಕೂ ಎಲ್ಲಾ ಸಾಮಾನ್ ಆಚಿ.

ಪ್ರೇಮ್ ಪೊನ್ನಪ್ಪ : ಅದ್‌ಂಗೇ ಅಪ್ಪ, ಎಲ್ಲ ಕೊಂಡ್ ಬಪ್ಪಚಿಟ್ಟಿಯೆ, ಅಡಿಗೇಕ್ ಪಾತ್ರೆ ಸಾಮಾನ್ ಎಲ್ಲ ನಂಗ ಕೊಂಡ ಬಂದಿತ್, ನಂಗ ಮಂಗಲಾಯಿತ್, ಇಲ್ಲಿಂಜಿ ಪೋನ ಪಿಂಞ ಎಡ್‌ತ ಸಾಮಾನ್ ಎಲ್ಲ ಈ ಮನೆಕ್, ಅದ್ ನಂಗಡ ಸಂಸಾರ ಸುರು ಮಾಡ್‌ನದ್, ಇದ್ ನಂಗಡ ಬದಕ್ ಸುರು ಮಾಡ್‌ನದ್.

ಮೇದಯ್ಯ/ಮುದ್ದವ್ವ : ನಿಂಗಕ್ ದೇವ್ ನಲ್ಲದ್ ಮಾಡ್‌ಡ್ ಕುಂಞಿಯಲೆ(ಕಣ್ಣೆಲ್ ನೀರ್ ದುಂಬಿಯವ)

ಕಾಮುಣಿ ಕಾಮವ್ವ : ಅಲ್ಲ ಅವು ಇಚ್ಚೆ ಬೆರಿಯ ಎನ್ನಂಗ್ ಮನೆ ಕೆಟ್ಟಿಟ್ಟಿ ಎನ್ನನೆ ಕೆಟ್ಟಿಟ್ಟಿಂದ್.



ಕಾರಿ ಕಾರ್ಯಪ್ಪ : ನೀನ್ ಎಣ್ಣಾನನ್ನಕೆ ತೋಟ ಪಣಿ ಮಾಡುಲೇಂದ್  
ಎಣ್ಣಾನ, ಅವು ಬಾತೆಂಗಿ ಔಟ್ ಹೌಸ್‌ಲ್ ಬುದ್ದಾಕಿಯ, ಅವು  
ಪಿಂಞ ಎಂತ ಮಾಡೋ, ಅದೂ ಅಲ್ಲತೆ ಅವ ನಾಡಪ್ಪಂಡ  
ಮೋಂವ ಎನ್ನೆ, ಪ್ರೇಮ್ ಕಣ್ಣ ಚೆನ್ನ ಹರವಾದಿ, ಅವಂಡ ಪೋಣ್ಣೂ  
ಅನ್ನನೆ ಕಾಂಬ, ಆಂಗೆ ಬೆರಿಯ ಮನೆ ಕೆಟ್ಟಿತ್ ತೊಂದರೆ ಇಲ್ಲತೆ  
ಮಾಡಿಯಂಡತ್.

ಕಾಮುಣಿ ಕಾಮವ್ವ : ನಲ್ಲದಾಚಿ ಬುಡಿ, ನಂಗಡ ಮನೆಕ್ ಬಪ್ಪದೂ ತಪ್ಪಾಚಿ,  
ನಾನ್ ಅಯಿಂಗಕ್ ಬೇವುಚಿಟ್ಟಿತ್ ಇಡುವದೂ ತಪ್ಪಾಚಿ.

ಕಾರಿ ಕಾರ್ಯಪ್ಪ : ಎಂತ ನೀನ್ ಇನ್ನನೆ ತಕ್ಕ ಪರೆಯುವ, ನೀಕೆನ್ನ  
ಪುಚ್ಚಿ ಗಿಚ್ಚಿ ಪುಡ್‌ಚಿತಾ, ತಮ್ಮಣ ಅವಂಡ ಪೋಣ್ಣ ಮಕ್ಕ ಬಾತೆಂಗಿ  
ನೀಕ್ ಭಾರ ಆಪ ಇಂಜತಾ, ಥೂ ನೀಡ ಜನ್ನಕ್..

ಕಾಮುಣಿ ಕಾಮವ್ವ : ನಿಂಗ ಎಂತೆಂಗಿ ಎಣ್ಣಿ ನಾಕ್ ದುಂಬಾ ಕುಶಿ ಆಚಿ.

ಕಾರಿ ಕಾರ್ಯಪ್ಪ : ಇಇಗೊಬ್ಬಂಡ ಕಷ್ಟಕ್ ಕುಶಿ ಪಟ್ಟತೆಂಗಿ ಬಯ್ಯ ನೀಕೂ  
ಕಷ್ಟ.

ಕಾಮುಣಿ ಕಾಮವ್ವ : ಇಂಞೆ ಮಾವ ಮಾಯಿಯೂ ಆ ಮನೆಲ್ ಇಪ್ಪ,  
ಇಲ್ಲಿ ಪ್ಯಾಸೇಜ್‌ಕುಂಜಿ ಆ ರೂಮ್ ನಲ್ಲದ್‌ಂದ್. ಅನ್ನನೆ ಅವು  
ಅಡಿಗೇ ಸುರು ಮಾಡಿರ್‌ತೆಂಗಿ ನಾಕ್ ಬೇವುಚಿರುವದ್ ತಪ್ಪುವ,  
ಹೋಮ್ ಸ್ಪೇನೋ ಚಾಯಿತೆ ಮಾಡೋಲು.

ಕಾರಿ ಕಾರ್ಯಪ್ಪ : ನೀಡ ಎಂತ ದುರಾಸೆ, ನಾನ್ ಸಾರಿ ಸಾರಿ ಎಣ್ಣುವಿ  
" ದುರಾಸೆ ನಲ್ಲದಲ್ಲ ನಲ್ಲದಲ್ಲಾ..

\* \* \* \* \*

## ಸೀನ್ ಇರುವತ್ತ ಏಳು

ಮುದ್ದವ್ವ : ಪ್ರೇಮ್ ಕುಂಞಿ ಎಣ್ಣಾನನ್ನಕೆ, ಇಂಞೊಮ್ಮ ನಂಗಳ ರೂಮ್ ಖಾಲಿ ಮಾಡುವಕ್ ಎಣ್ಣಾನಕ, ನಂಗ ತೋಟತ್ ಲೈನ್ ಮನೆಕೇ ಪೋಯಿರನ, ನಂಗಡ ಮನಸ್ಕ್ ಅಕ್ಕಕ್ಕ ನೊಂಬಲ ಆಚೆಂಗಿ ನಂಗಡ ಮುಂಬಲ್ಕೇ ಕಷ್ಟ ಎನ್ನನೆಯೋ ಅಲ್ಲಿ ಪಾತ್ರೆ ಎಲ್ಲ ಉಂಡ್, ಜಿನಸಿ ತರಕಾರಿ ಎಡ್ತವನ, ಅಲ್ಲೇ ಅಡಿಗೆ ಸುರು ಮಾಡಿರನ, ಪ್ರೇಮ್ ಕುಂಞಿ ಬಪ್ಪಕ ಅವಂಗೂ ಸುಲಭ ಆಪ.

ಮೇದಯ್ಯ : ಇಕ್ಕಲೇ ದುಡ್ಕತೆ, ನೋಟನ ಎನ್ನಾಪಾಂದ್.

(ಚೆನ್ನ ದಿನತೇ ಹೋಮ್ ಸ್ಟೇಕ್ ಜಾಸ್ತಿ ಜನ ಬಪ್ಪ, ಮಾವ ಮಾಯಿನ ಪ್ಯಾಸೇಜ್‌ಲ್ ಬುದ್ದವಕ್ ಎಣ್ಣುವ ಕಾಮುಣಿ, ಮಾವ ಮಾಯಿ ಒಂದೂ ಎಣ್ಣತೆ ಒಂದೂ ಎಡ್ತವತೆ ಪ್ರೇಮ್‌ರ ಲೈನ್ ಮನೆಕ್ ಇರ್ಲೇ ಪೋಯಿರುವ, ಪ್ರೇಮ್‌ಕ್ ಫೋನ್ ಮಾಡುವಂಜಿ ಎಣ್ಣುವ)

ಕಾಮುಣಿ ಕಾಮವ್ವ : ಇನ್ನನೇ ಜನ ಜಾಸ್ತಿ ಬಂದಂಡ್ ಉಂಡೇಂಗಿ ನಂಗಳೂ ರೂಮ್ ಖಾಲಿ ಮಾಡುವಂಜಿ ಔಟ್ ಹೌಸ್‌ಕ್ ಪೋಪದೇ ನಲ್ಲದ್

ಕಾರಿ ಕಾರ್ಯಪ್ಪ : ನೀಕೆನ್ನ ಈ ತರ ದುರಾಸೆ, ನಂಗಡ ಅಪ್ಪ ಅಪ್ಪನ ರೂಮ್ ಪೋಯಿತ್ ಮನೇ ಖಾಲಿ ಮಾಡ್‌ಚಿಟ್ಟಿಯ, ತಮ್ಮಣಂಡ ಯಿಂಗಳೋ ಖಾಲಿ ಮಾಡ್‌ಚಿಟ್ಟಿಯ, ಇಕ್ಕ ನಂಗಳೊ ಖಾಲಿ ಮಾಡ್‌ಚಿಟ್ಟತೇಂಗಿ ದೇವ ಖಂಡಿತಾ ಮೆಚ್ಚುಲೆ, ದೇವಕ್ ಬೊಳ್‌ಚ ಬೆಚ್ಚಂಡ್ ಇದೇ ಮನೆಲ್ ಇಕ್ಕನ, ನೀಡ ಅತಿ ಆನ ದುರಾಸೆನ ಬುಡ್, ನೀನ್ ಮಾಡ್‌ನ ಕೇತರೆ ಮದಿ.

ಕಾಮುಣಿ ಕಾಮವ್ವ : ನಾನೆಂತ ಕೇತರೆ ಮಾಡಿಯೆ, ಎಲ್ಲಾ ನಾಕಾಯಿತ್ ಮಾಡ್‌ನನ್ನಕೆ ಎಣ್ಣುವಿರಲ್ಲ, ನಾನ್ ನಂಗಳೆಲ್ಲಾಕಾಯಿತ್ ಮಾಡಿಯೇಂ ಡುಳ್ಳಲ್ಲಾ.

ಕಾರಿ ಕಾರ್ಯಪ್ಪ : ಅದೇ ನಾನ್ ಎಣ್ಣುವ, ನೀನ್ ಈ ತರ ಮಾಡುವದ್ ಬೋಂಡಾಂದ್. ಇಕ್ಕಲೇ ತಮ್ಮಣಂಡಯಿಂಗಳ ಕಳ್‌ಂದಂಡತ್,

ಇಕ್ಕ ಅಪ್ಪ ಅವ್ವನೋ ಕಳ್ಂದನ್ನಕೇ ಕಾಂಬ.

ಕಾಮುಣಿ ಕಾಮವ್ವ : ನಂಗ ಹೋಮ್ ಸ್ಟೇಕ್ ಜನ ಜಾಸ್ತಿ ಬಂದಂಡುಳ್ಳಾಂಗನ್ನೆ  
ಕೋಂಬರೆ ಖಾಲಿ ಮಾಡ್ ಚಿಟ್ಟಿಯೆ, ಅದ್ ಬುಡಿ, ಇಕ್ಕಿಕ್ಕ ಜನ  
ಜಾಸ್ತಿ ಜಾಸ್ತಿ ಬಂದಂಡುಂಡ್, ಆಂಗ್ ನಂಗ ಔಟ್ ಹೌಸ್ ಕೆ  
ಶಿಫ್ಟ್ ಮಾಡಿರನ.

ಕಾರಿ ಕಾರ್ಯಪ್ಪ : ನೀಡ ಎಂತ ಹಠ, ನೀಡ ಈ ಪುಚ್ಚಿ ಹಠ ಕಾಂಬಕ  
ನಂಗ ಔಟ್ ಹೌಸ್ ಕೇ ಪೋಯಿರುವನ್ನಕೆ ಆಪ.

ಕಾಮುಣಿ ಕಾಮವ್ವ : (ತೆಳಿಪಂಜಿ) ನಾನ್ ಎಲ್ಲ ಶಿಫ್ಟ್ ಮಾಡಿಯೆ, ಬೈಟ್  
ನಂಗ ಅಲ್ಲೇ ಬುದ್ದವ, ಎಲ್ಲಾ ರೆಡಿ ಮಾಡಿಯೆ.

(ಹೋಮ್ ಸ್ಟೇರ ವ್ಯವಹಾರ ಕೆಲಸಕ್ ಚಾಂಗ್ ಸೀತೆನೋ ಬುಡುವ..  
ಊಟ ತಿಂಡಿ ನೀರ್ ಕೊಡ್ ಪಕ್}(ಮಕ್ಕ ಬಲ್ ಇನೆ ಆಪ ಹೋಮ್  
ಸ್ಟೇಲೆ ಜಾಸ್ತಿ ಟೈಮ್ ಕಳಿಯುವ, ಸ್ಕೂಲ್ ಕೆ ಚಕ್ಕರ್) (ಹೋಮ್  
ಸ್ಟೇಕ್ ಬಪ್ಪ ಜನಳಗುಂಡ್ ಮೂಡಿರ ಚೆನ್ನ ಲವ್ ಕಳಿ ಸುರು  
ಆಪ, ಕಣ್ಣ ಡ್ರಗ್ಸ್ ಅಭ್ಯಾಸ ಮಾಡಿಯವ- ಇದ್ ಆಂಗೇ ಸಹವಾಸ  
ದೋಸಾಂದ್ ಎಣ್ಣುವ).

\* \* \* \* \*

## ಸೀನ್ ಇರುವತ್ತೆಟ್

(ಅಪ್ಪನು ಅವ್ವನೂ ಚೆರಿಯ ಮೋವಂಡ ಲೈನ್ ಮನೆಲೇ  
ಅಡಿಗೇ ಮಾಡಿಯಂಡ್ ಅಲ್ಲೇ ಬುದ್ದವ)

ಮೇದಯ್ಯ : ನಂಗಡ ದಂಡ್ ಮೈಮಕ್ಕಳ ನೋಟುವಕ ನಾಕ್ ಮಹಾಭಾರತ  
ಯುದ್ಧ ಗ್ಯಾನ ಬಪ್ಪ,

ಮುದ್ದವ್ವ : ನಂಗಡ ಮೈಮಕ್ಕಕೂ ಮಹಾಭಾರತ ಯುದ್ಧಕೂ ಎನ್ನ ಸಮ್ಮಂದ,  
ನಾಕೊಂದು ಗೊತ್ತಾಪುಲೆ.ಬುಡ್ ತಿ, ಎಣ್ಣೆ ಒಮ್ಮತೆ..

ಮೇದಯ್ಯ : ಮಹಾಭಾರತ ಯುದ್ಧತ್ ದಂಡ್ ಥರ ಸಾರಥಿಯ ಇಪ್ಪ, ಒಂದ್  
ಶ್ರೀ ಕೃಷ್ಣ ಅರ್ಜುನಂಡ ಸಾರಥಿ, ದಂಡ್ ಶಲ್ಯ ಮಹಾರಾಜ.

ಕರ್ಣಂಡ ಸಾರಥಿ.ಇವು ದಂಡಾಳೂ ಲೋಕಕೇ ಕೇಳಿ ಪೋನ ಸಾರಥಿಯ, ಅನ್ನನೆ ಅರ್ಜುನ ಕರ್ಣಂಗಳು ಕೆಳಿ ಪೋನ ವೀರಂಗ, ಶೂರಂಗ, ಬಲ್ಯ ಬಿಲ್ವಕಾರ.

ಮುದ್ದವ್ವ : ಆಚಿ ಸರಿ ಅದ್‌ಂಗೂ ನಂಗಡ ಮೈಮಕ್ಕಕೂ ಎನ್ನ ಸಾಮ್ಯ

ಮೇದಯ್ಯ : ಚೆನ್ನ ತಾಳೈ, ಕಥೆ ಪೂರ ಕೇಳ್ ಅಕ್ಕ ನೀಕೇ ಅರ್ಥ ಆಪ. ಅಲ್ಲಿಕತ್ತಣೆ ತಾಳೈ ಇರಡ್.

ಮುದ್ದವ್ವ : ಆಚಪ್ಪ ಎಣ್ಣೆ.

ಮೇದಯ್ಯ : ಅರ್ಜುನ ಸಂಸಾರ ಮೋಹತೋ, ಸ್ವಾರ್ಥತೋ, ಭಕ್ತಿಯೋ, ಭಯತೋ, ಬೊತ್ತಿತೋ ಬೊರಂಡಿತೋ ತಾಂಡ ತಾತ, ಗುರು, ಆಚಾರ್ಯ, ಅಣ್ಣ ತಮ್ಮಣಂಗಳ, ಬೆಂದು ಚಾಚಿನ ಕೊಲ್ಲುವ ಕಾಗಾಂದೋ, ಬಿಲ್ಲ ಬಾಣ ತೊಡುಲೆ ಎಣ್ಣೆತ್ ಬಿಲ್ಲ ಬಾಣ ಅಡಿಲ್ ಬೆಚ್ಚೆರುವ. ಅಂತ ಒರ್ ಮನುಷ್ಯನ, ತಾಂಡ ಬುದ್ಧಿವಂತಿಕೆ ತಕ್ಕಲ್ ಭಗವದ್ಗೀತೆ ರೂಪತ್ ಎಣ್ಣೆತ್ ನಲ್ಲ ಬಟ್ಟೆಕ್ ಕೊಂಡ ಬಂತ್ ಯುದ್ಧ ಗೆಲ್ಲುವನ್ನಕೆ ಮಾಡುವ. ಇದೇ ಶ್ರೀ ಕೃಷ್ಣ ಸಾರಥಿರ ವಿಶೇಷ.

ಆಚಿಂಗ್ ಶಲ್ಯ, ಪಾಂಡವಡ ತಮ್ಮಾವ, ಪಾಂಡವ ಪಕ್ಷಪಾತಿ, ಮೊಟ್ಟೆ ಮೊಟ್ಟೆಲ್, ಕರ್ಣಂಡ ವಿರೋದಿ ಅರ್ಜುನನ ಮೆಚ್ಚಿಯಂಡ್, ಕರ್ಣನ ಹಂಗ್ ಚಿಟ್ಟಂಡ್, ಹೀಯಾಳ್ ಚಿಟ್ಟಂಡ್, ನಲ್ಲ ಬಟ್ಟೆ ಕಾಟತೆ ಕರ್ಣಂಡ ಧೈರ್ಯ ಕಮ್ಮಿ ಆಯಿತ್ ಕೈ ಗ್‌ಡ್‌ಪನ್ನಕೆ ಮಾಡಿರುವ ಯುದ್ಧ ಚೋತ್ ಪೋಪ. ಅನ್ನನೆ ನಂಗಡ ಪೆರಿಯ ಮೈಮ ಶಲ್ಯ ನನ್ನಕೆ ಮೋಂವನ ಮೂಲೆ ಕೂಟಿಯಂಡುಂಡ್.

ಮುದ್ದವ್ವ : ಅಕ್ಕ ಬೋಜಿ ಶ್ರೀ ಕೃಷ್ಣಂಡ ಮಾದರಿಯಾ,

ಮೇದಯ್ಯ : ಪರೋಲೆ, ನೀಕೂ ಅರ್ಥ ಆಯಿರ್ತ್, ಅಕ್ಕು ಬೋಜಿ ಶ್ರೀ ಕೃಷ್ಣ ಪೋಲೆ ಮೋಂವನ ನಲ್ಲ ಬಟ್ಟೆಕ್ ಕೂಟಿಯ ಪೋಯೆಂಡುಂಡ್. ಆಂಗೇ ಎಣ್ಣುವ ಒರ್ ವೀರಂಗ್ ನಲ್ಲ ಸಾರಥಿ ಎಚ್ಚಕ್ ಮುಖ್ಯವೋ, ಒರ್ ಒಡಿಯಂಗ್ ನಲ್ಲ ಪೋಣ್ಣ ಅಚ್ಚಕೇ ಮುಖ್ಯ. " ಒರ್ ಪೋಣ್ಣ ಸಂದಾಚಿಂಗಿ ಒರ್ ಮನೆ ತಾಂಗುವ" ಇಲ್ಲೇಂಗಿ.....

ಮುದ್ದವ್ವ : ನಿಂಗ ಮೈಮಕ್ಕ ಮಹಾಭಾರತ ಎಣ್ಣುವಕ ನಾಕೋಂದೂ ಅರ್ಥ

ಆಯಿಲೆ, ಆಚೆಂಗಿ ಇಕ್ಕ ಅರ್ಥ ಆಚಿ.

ಮೇದಯ್ಯ : ಇದ್ ಬರೀ ಯೋಧ ಸಾರಥಿ, ಒಡಿಯ ಪೊಣ್ಣಾಕ್ ಮಾತ್ರ ಸಂಬಂಧ ಅಲ್ಲ, ಅವ್ವ - ಮಕ್ಕ, ಅಪ್ಪ-ಮಕ್ಕ, ಗುರು- ಶಿಷ್ಯ, ಸಿನೇತ ಕಾರಂಗ, ಏದೇ ದಂಡ್ ಜೀವ, ಎನ್ನನೆ ತಿದ್ದೋಲೂಂದ್ ಈ ಸಾರಥ್ಯ ಎಣ್ಣುವ. ಎಲ್ಲಾ ಮನೆರ ಪೊಣ್ಣಾ ನಂದಾಚೆಂಗಿ ಈ ಸಮಾಜ, ದೇಶ ಎನ್ನಂಗ್, ಪ್ರಪಂಚತೇ ನೆಮ್ಮದಿ ಇಪ್ಪ. ಆಂಗ್ ನಂಗ ಕೊಡವ ಅವ್ವಂಗ್ ಪೊಣ್ಣಾಳಕ್ ಬಲ್ಯ ಸ್ಥಾನ ಕೊಡಪ, ಪೊಣ್ಣಾಳಕ್ ಸರಿ ಸಮಾನ ಸ್ಥಾನ ಮಾನ ಕೊಡಪ.

ಮುದ್ದವ್ವ : ಓ ಅನ್ನನೆ ಅಲ್ಲಾ, ನಾಡ ಜಡ್ಡ ಮಂಡೆಕ್ ಇದೊಂದೂ ಅರ್ಥ ಆಪುಲೆ, ಅದ್ ಸರಿ ಇಕ್ಕ ನಾಡ ಸಾರಥ್ಯ ಏದ್ ತರವೋ?

ಮೇದಯ್ಯ : ನೀಡ ಸಾರಥ್ಯ ಖಂಡಿತವಾಯಿತೂ ಶ್ರೀ ಕೃಷ್ಣಂಡದೇ, ಅಲ್ಲಾ ಎಣ್ಣಾಚೆಂಗಿ ನಾನ್ ಬದ್ಕಂಡಾ....

ಮುದ್ದವ್ವ : ನೋಟಿ ನೋಟಿ.. ಅದ್ ಬುಡಿ, ನಿನ್ನಾಂದ್ ಬೋಜಿ ಎಂತೋ ಪೋನ್ ಮಾಡಿಂಜತ್, ಎಂತ ವಿಷಯ ನಿಂಗ ಒಂದೂ ಎಣ್ಣಿತಿಲ್ಲೆ.

ಮೇದಯ್ಯ : ಅದಾ, ಅಯಿಂಗಡ ಸೊಸೈಟಿಲ್ ಅಯಿಂಗಕ್ ಒರ್ ಸೈಟ್ ಅರುವದ್ ನಾಪದ್ ರಾಜ ರಾಜೇಸ್ವರಿನಗರತ್ ಅಲಾಟ್ ಆಯಿತ್ಲೋ, ಇಕ್ಕ ಚೆನ್ನ ದುಡ್ಡ್ ಕೆಟ್ಟೊಂಡು, ಬಯ್ಯ ತಿಂಗ ತಿಂಗ ಕೆಟ್ಟೊಂಡು ಎಣ್ಣಾಚಿ, ಸೈಟ್ ಅಲಾಟ್ ಆನದ್ ಅಯಿಂಗಕ್ ದುಂಬಾ ಮಿಶೀಲ್ ಉಂಡ್. ದೇವ ನಲ್ಲದ್ ಮಾಡಡ್ ಬುಡ್, ಇಕ್ಕ ಕಷ್ಟ ಪಟ್ಟತೇಂಗಿ ಬಯ್ಯ ಸುಖ ಪಡುವ.

ಮುದ್ದವ್ವ : ಅದ್ ನೇರ್, ಬುಡಿ, ಇಂವ ಇಲ್ಲಿ ನಂಗಳ ಮನೆಂಜಿ ದವುತ್ಚಿ, ಪಾಪ ಅವು ಈ ಲೈನ್ ಮನೆ ಕೆಟ್ಟನಾಂಗ್ ನಂಗ ನೆಮ್ಮದಿಲ್ ಉಂಡ್, ಇಲ್ಲೇಂಗಿ ನಂಗಡ ಪಾಡ್.

ಮೇದಯ್ಯ : ನಾಯಿ ಪಾಡ್ ಎಣ್ಣಾ, ಎಲ್ಲಾ ದೇವಡ ಚಿತ್ತ, ಧರ್ಮ ಕಾಪಾಡುವ ಬೊತ್ತತೆ, ಒರ್ ಮೋಂವ ದವುತ್ಚೇಂಗಿ ಇಂಇಸಾರ್ ಮೋಂವ ಕೂಟಿಯವ. ಆಂಗೇ ಎಣ್ಣುವ "ದಾರ್ ಧರ್ಮತ್ ನ ಕಾಪಾಡುವೋ ಅಯಿಂಗಳ ಧರ್ಮವೇ ಕಾಪಾಡುವ. ಬೊತ್ತತೆ...

\* \* \* \* \*

## ಸೀನ್ ಇರುವತ್ತ ಒಯಿಂಬದ್

(ಕಾಪಿ ಕೊಯ್ಯುವಕ್ ಪ್ರೇಮ್ ಲೈನ್ ಮನೆಕ್ ಬಪ್ಪ)

(ಅಣ್ಣಂಡ ಮೋವ ರಸ್ತೆ ಕರೆಲ್ ಒರ್ ಕಣ್ಣಂಡ ಕಾರಲ್ ತಕ್ಕ ಪರಂದಂಡ್ ಇಪ್ಪ)

ಪ್ರೇಮ್ ಪೊನ್ನಪ್ಪ: ಅಮ್ಮ ಸೀತೆ ಇಂವ ದಾರ್, ಇಂತ ನೇರಕ್ ನೀನೆಂತ ಮಾಡೋ?

ಸೀತೆ ಸೀತಮ್ಮ: ಕುಂಇಪ್ಪ ಇದ್ ನಾಡ ಪ್ಲೆಂಡ್, ಇಂವ ಬೆಂಗಳೂರ್‌ಂಜಿ

ಬಂತಿಂಜತ್, ಅನ್ನನೆ ತಕ್ಕ ಪರಂದಂಡ್ ಉಳ್ಳ,

ಪ್ರೇಮ್ ಪೊನ್ನಪ್ಪ: ಇವಂಡ ಪೆದ ಎಂತ, ಬೆಂಗಳೂರ್‌ಲ್ ಎಲ್ಲಿ ಉಳ್ಳ.

ಸೀತೆ ಸೀತಮ್ಮ: ಇವಂಡ ಪೆದ ಕಿರಣ್, ಗೋವಿಂದ ಪಾಳ್ಯಲೋ ಬೆಂಗಳೂರ್‌ಲ್.

ಪ್ರೇಮ್ ಪೊನ್ನಪ್ಪ : ಗೋವಿಂದ ಪಾಳ್ಯಾ, ಇಂವ ತಮಿಳನಾ,

ಸೀತೆ ಸೀತಮ್ಮ : ಅಕ್ಕು ಕಾಂಬ ನಾಕ್ ಗೊತ್ತಿಲ್ಲೆ.

ಪ್ರೇಮ್ ಪೊನ್ನಪ್ಪ : ನೀಕ್ ಗೊತ್ತಿಲ್ಲೆ ಎಣ್ಣುವಿಯಾ, ಇಲ್ಲಿ ಇಚ್ಚ ಬೈಟ್ ನೇರತ್

ತಕ್ಕ ಪರಂದಂಡುಳ್ಳಿಯ, ಪೋ ಮನೆಕ್, ಇಲ್ಲಿ ನಿಕ್ಕಂಡ ಪೋ,

ಸೀತೆ ಸೀತಮ್ಮ : ಆಚಿ ಕುಂಇಪ್ಪ, ಇಕ್ಕ ಪೋಪಿ, (ಚೆನ್ನ ನೇರ ಕಿರಣ್‌ರ ಕೂಡೆ

ತಕ್ಕ ಪರೆವಂಜಿ ಪೋಪ)

(ಪಿತ್ಯಾಂದ್)

ಪ್ರೇಮ್ ಪೊನ್ನಪ್ಪ: ಅಣ್ಣಯ್ಯ, ನಿನ್ನಾಂದ್ ಸೀತೆ ಬೈಟ್ ಏಳ್ ಗಂಟೆಕ್ ಏದೋ

ಕಣ್ಣಂಡ ಕೂಡೆ ರೋಡ್‌ಲ್ ತಕ್ಕ ಪರಂದಂಡ್ ಇಂಜತ್. ಆ

ಕಣ್ಣ ದಾರೋ ತಮಿಳ್‌ಕಾರಲೋ, ಇವಕ್ ಅವನ ದಾರ್‌ಂದೇ

ಗೊತ್ತಿಲ್ಲೆಲೋ, ನಾನ್ ದುಂಬಾ ಗ್ಯಾನ ಮಾಡಿತ್ ಎಣ್ಣೆಯೆಂಡುಳ್ಳ,

ತಪ್ಪು ಗ್ಯಾನ ಮಾಡತೆ.

ಕಾರಿ ಕಾರ್ಯಪ್ಪ : ನಾಕೂ ಗೊತ್ತುಂಡ್ ಪ್ರೇಮ್, ನಾನೂ ಒಂದೂ

ಮಾಡೊ ಕಯ್ಯತ ಸ್ಥಿತಿಲ್ ಉಳ್ಳೊ, ಎಲ್ಲ ಅವಡ ದರ್ಬಾರ್,

ಮೋಂವನೂ ಅಂವನಗುಂಡೇ ಡ್ರಗ್ಸ್ ಅಭ್ಯಾಸ

ಮಾಡಿಯಂಡಿತ್‌ಲೋ,

ಪ್ರೇಮ್ ಪೊನ್ನಪ್ಪ : ಅವನ ಡ್ರಗ್ಸ್ ಬುಡ್‌ತುವ ಸೆಂಟರ್‌ಕ್ ಇಡ್. ನಾನ್

ಬೆಂಗಳೂರ್‌ಲ್ ಏರ್ಪಾಡ್ ಮಾಡುವಿ, ಮೋಂವ ಪಾಳಾಪದ್  
ಮೋಂಡ. ಮೋವಳ ಚೆನ್ನ ಬಂದೋಬಸ್ತಲ್ ಬೆಯಿ.

ಕಾರಿ ಕಾರ್ಯಪ್ಪ : ನಾಕೂ ಇಕ್ಕಿಕ್ಕ ತಡಿಕ್ ದುಂಬಾ ಸೌಖ್ಯ ಇಲ್ಲೆ, ಪಣತ್‌ರ  
ವ್ಯವಹಾರ ಎಲ್ಲಾ ಅವಡ, ಮಕ್ಕಳೂ ಅವ ಎಣ್ಣೆನನ್ನಕೆ , ನಾಕ್  
ಒಂದು ಬೋಂಡಾಂದ್ ಆಯಿತ್.

ಪ್ರೇಮ್ ಪೊನ್ನಪ್ಪ : ಅಣ್ಣಯ್ಯ ನೀನ್ ಅನ್ನನೆ ಎನ್ನಂಗ್ ಎಣ್ಣುವಿಯಾ,,  
ನೀಡ ಮೋಂವನ ಬೆಂಗಳೂರ್‌ಕ್ ಆಯೆ, ಅಲ್ಲಿ ಡಿಅಡ್‌ಕ್ಸ್‌ನ್  
ಸೆಂಟರ್‌ಕ್ ಇಡನ. ನಾನ್ ಇಕ್ಕ ಕಾಪಿ ಮಳು ಕೊಯ್ಯುವಕ್  
ಬಂದಿಯೆ, ಇಂಚು ನಾಲಂಜಿ ದಿನತ್‌ರ ಪಣಿ ಉಂಡ್ ಅದ್  
ಆನ ಪಿಂಚ ನಾನ್ ಬೆಂಗಳೂರ್‌ಕ್ ಪೋಪಕ ಅವನ ಅಯ,  
ನೋಟನ ಎನ್ನಾಪಾಂದ್.

ಕಾರಿ ಕಾರ್ಯಪ್ಪ : ನೋಟುವಿ ಪ್ರೇಮ್, ಕಾಮುಣಿ ಎನ್ನ ಎಣ್ಣುವಾ  
ನೋಟೊಂಡು.

ಪ್ರೇಮ್ ಪೊನ್ನಪ್ಪ : ಆಚಿ ನಿಂಗಡ ಇಷ್ಟ, ನಾಡ ಅಭಿಪ್ರಾಯತ್ ಅಲ್ಲಿಕ್  
ಅಯಿಚಕ ಚಾಂಗ್ ನಂದಾಕು, ಇಲ್ಲೇಂಗಿ ಅವಂಡ ಜೀವನ  
ಪಾಳಾಯಿರು.

ಕಾರಿ ಕಾರ್ಯಪ್ಪ : ಆಚಿ ಪ್ರೇಮ್, ನೋಟನ ಇಂಚ್ ನಾಲಂಜಿ ದಿನ  
ಉಂಡಲ್ಲಾ,  
(ಪ್ರೇಮ್ ಲೈನ್ ಮನೆಕ್ ಬಪ್ಪ)

ಪ್ರೇಮ್ ಪೊನ್ನಪ್ಪ : ಅಪ್ಪಯ್ಯ, ಅಣ್ಣಯ್ಯನ ಕಂಡ, ಅವಂಡ ತಡಿಕೂ ಸೌಖ್ಯ  
ಇಲ್ಲೆಲೋ, ಮನಸ್‌ಕೂ ಸೌಖ್ಯ ಇಲ್ಲೆಲೋ, ಬಾರಿ ಬೇಜಾರತ್  
ಇಂಜತ್.

ಮೇದಯ್ಯ : ಎನ್ನಾಯೆ, ಅವಂಗ್, ಚಾಯಿತೇ ಇಂಜತಲ್ಲ.

ಪ್ರೇಮ್ ಪೊನ್ನಪ್ಪ : ಸೀತೆ ನಿನ್ನಾಂದ್ ಬೈಟ್ ಏಳ್ ಗಂಟೆಕ್ ದಾಡೋ  
ಕೂಡೆ ರೋಡ್ ಕರೆಲ್ ತಕ್ಕ ಪರಂದಂಡ್ ಇಂಜತ್. ಆ ವಿಷಯ  
ಅವಂಗ್ ಎಣ್ಣೆನ. ಅವಂಗು ಆ ವಿಷಯ ಗೊತ್ತುಂಡಲೋ,  
ಚಾಂಗ್ ಸಹ ಡ್ರಗ್ಸ್ ಅಭ್ಯಾಸ ಆಯಿತ್‌ಲೋ, ಬಾರಿ ಬೇಜಾರತ್  
ಉಂಡ್.

ಅಪ್ಪಯ್ಯ : ಆಂಗ್ ಒಂದೂ ಮಾಡುವ ಕಯ್ಯುಲಿಯಾ.

ಪ್ರೇಮ್ ಪೊನ್ನಪ್ಪ : ನಾನಂತೂ ಎಣ್ಣಾನ, ಅವಂಡ ವೋಂವನ ಬೆಂಗಳೂರ್‌ಕ್ ನಾಡ ಕೂಡೆ ಅಯಿಚಕ ಅವನ ಡಿ ಅಡಿಕ್ಸನ್ ಸೆಂಟರ್‌ಕ್ ಇಡನ. ಮೋಂವ ಚಾಯಾಕೂಂದ್, ಮೊಮ್ಮನ ಕೇಟಿತ್ ಎಣ್ಣುವಲೋ.

ಮುದ್ದವ್ವ : ಅವಳುಂಡ್ ಅವಂಡ ಬದ್‌ಕೇ ಪಾಳಾಯಿರ್‌ತ್, ಅವಡ ದುರಾಸೆಕ್ ಸಂಸಾರೇ ಪಾಳಾಯಿರ್‌ತ್.

ಮೇದಯ್ಯ : ಅವ ಎಣ್ಣುವ ಎಣ್ಣೆಯೆಂಡ್ ನೀಡ ಮೋಂವಂಗ್ ಸ್ವಂತ ಬುದ್ದಿ ಇಲ್ಲಿಯ್ಯಾ, ಅವ ಎನ್ನ ಪೆದ್ದನಾ?

ಪ್ರೇಮ್ ಪೊನ್ನಪ್ಪ : ಅಣ್ಣಯ್ಯನ ಕಾಂಬಕ ಬೇಜಾರ ಆಪ.

ಮೇದಯ್ಯ : ಸ್ವಂತ ಬುದ್ದಿ ಇಲ್ಲತವು ಅನುಭವ್ ಚಿರುವ, ನಂಗ ಎಂತ ಮಾಡುವ ಕಯ್ಯುವ.

ಪ್ರೇಮ್ ಪೊನ್ನಪ್ಪ : ಅವಂಡ ಮೋಂವನ ನಾಡ ಕೂಡೆ ಅಯಿಚಿ ತಾತೆಂಗಿ ಅವಂಡ ಡ್ರಗ್ಸ್ ಅಭ್ಯಾಸ ನಿಪ್ಪು ಚಿರೋಲು.

ಮೇದಯ್ಯ : ನೀನ್ ನಲ್ಲದಾಡ್‌ಂದ್ ಕೂಟಿಯ ಪೋಪ. ಅಲ್ಲಿ ಅವ ಎನ್ನೇಂಗಿ ಮಾಡಿಟಕ ನೀಕ್ ಕಷ್ಟ, ಪೆದವೂ ಪಾಳ್, ಸೋಟ್ ಅವ ಬರತ ಪೋಚೆಂಗಿ ನಲ್ಲದ್, ಅವ ತಿದ್ದುವ ಮಟ್ಟತ್ ಇಲ್ಲೆ. ಅಲ್ಲತೆ ಕಾಮುಣಿ ಅವನ ನೀಡ ಕೂಡೆ ಬುಡುವಕೂ ಇಲ್ಲೆ, ಅವ ಬುಡತೆ ಪೋಚೆಂಗಿ ನಿಂಗಕ್ ನಲ್ಲದ್, ಬುಟ್ಟತೆಂಗಿ ಅವಕ್ ನಲ್ಲದ್, ನೋಟನ.

\* \* \* \* \*

## ಸೀನ್ ನುಪ್ಪದ್

ಕಾರಿ ಕಾರ್ಯಪ್ಪ : ಕಾಮುಣಿ, ಸೀತೆ ಎಲ್ಲಿಯ, ಅವಳೋ ಬಪ್ಪಕೆಣ್ಣಾ,

ಕಾಮುಣಿ ಕಾಮಪ್ಪ : ಸೀತೆ ಎನ್ನಂಗ್, ಅವ ಗೆಸ್ತ್‌ಕ್ ಊಟ ತಿಂಡಿ ಕೊಡ್‌ಪಕ್ ಪೋಯಿತ್.



ಕಾರಿ ಕಾರ್ಯಪ್ಪ : ನಾನ್ ಎಚ್ಚಕ್ ಕುರಿ ನೀಕ್ ಎಣ್ಣುವ ಮಕ್ಕಳ ಅದತೂ  
ಸೀತೆನ ಅದ್‌ಂಗ್ ಅಯಿಕ್ತೇಂದ್.

ಕಾಮುಣಿ ಕಾಮವ್ವ : ಪಿಂಇ ನಾನ್ ಎಡ್‌ತಂಡ್ ಪೋಡಾ ಎಣ್ಣಿ,

ಕಾರಿ ಕಾರ್ಯಪ್ಪ : ನೀನ್ ಎಡ್‌ತ ಪೋಂದ್ ಎಣ್ಣಲೆ, ಆಳಡ ಕೈಲ್  
ಅಯಿಕ್ೋಲು ಅಲ್ಲ. ಸೀತೆನ ಎನ್ನಂಗ್ ಅಯಿಪ, ಇಕ್ಕ ನೋಟ್  
ಎಂತ ಅನರ್ಥ ಆಯಿತ್‌ಂದ್.

ಕಾಮುಣಿ ಕಾಮವ್ವ : ಎಂತಾಯೇಂದ್ ನಿಂಗ ಇನ್ನನೆ ಕಳ್‌ಚಂಡುಳ್ಳ.

ಕಾರಿ ಕಾರ್ಯಪ್ಪ : ಇಂದ್ ಅಪರೂಪತ್ ಪ್ರೇಮ್‌ನ ಕಾಂಬಕ್ ಕಟ್ವಚಿ,  
ನಂಗಡ ಸೀತೆ ಏದೋ ಕಣ್ಣಂಡ ಕೂಡೆ, ಬೈಟ್ ಏಳರೆ ಗಂಟೆಕ್,  
ರಸ್ತೆ ಕರೆಲ್ ತಕ್ಕ ಪರಂದಂಡ್ ಇಂಜಾನ ಅವ ಕಂಡಿತ್ ನನ್ನ  
ಕೇಟತ್.

ಕಾಮುಣಿ ಕಾಮವ್ವ : ಆಂಗಿನ್ನಾಚಿ, ಇಂವಂಡ ಪೋಣ್ಣ ಮೋವ ದಾಡ ಕೂಡೆ  
ತಕ್ಕ ಪರೆಯುಲೆಯೋ ಎನ್ನೋ?

ಕಾರಿ ಕಾರ್ಯಪ್ಪ : ನೀಡ ಮೋವಕ್ ಅವ ದಾರ್‌ಂದೇ ಗೊತ್ತಿಲ್ಲೆ, ಏದೋ  
ತಮಿಳ್ ಕಾರಲೋ, ಕಿರಣ್, ಗೋವಿಂದ ಪಾಳ್ಳ, ಬೆಂಗಳೂರ್‌ಲೋ,

ಕಾಮುಣಿ ಕಾಮವ್ವ : ದಾರ್ ಕಿರಣ್ ಕಣ್ಣನಾ.

ಅವ ಇಲ್ಲಿಕ್ ಸುಮಾರ್ ಕುರಿ ಒಳಿವಕ್ ಬಂತ್, ಅವನ ಚಾಯಿತೆ ಗೊತ್ತುಂಡ್.

ಕಾರಿ ಕಾರ್ಯಪ್ಪ : ಅವನೇ, ಅದ್‌ಂಗೇ ಅವ ಅಕ್ಕಕ್ಕ ಇಲ್ಲಿಕ್ ಬಂತ್  
ಹೋಮ್ ಸ್ಟೇಲ್ ಇಪ್ಪ, ನೋಟ್ ಇದ್ ನಲ್ಲದಲ್ಲ.

(ಅಕ್ಕಣೆ ಸೀತೆ ಬಪ್ಪ)

ಕಾರಿ ಕಾರ್ಯಪ್ಪ : (ಚೆಡಿಲ್), ನಿನ್ನಾಂದ್ ದಾಡ ಕೂಡೆ ಪಂಚಾಯಿತಿಗೆ  
ಪರಂದಂಡ್ ಇಂಜಿಯೆ,

ಕಾಮುಣಿ ಕಾಮವ್ವ : ದಾಡ ಕೂಡೆ ಕುಂಇ, ಆ ಕಿರಣ್‌ರ ಕೂಡೆಯಾ.

ಸೀತೆ : ಅಕ್ಕ ಮಮ್ಮಿ, ಕುಂಇಪ್ಪ ಕಂಡತ್, ಎಂತೆಲ್ಲೋ ಕೇಟತ್ ಪಪ್ಪಂಗ್  
ಕುತ್ತಿ ಬುಟ್ಟಿತಿಕ್ಕು, ಅದೇ ಇಕ್ಕ.

ಕಾರಿ ಕಾರ್ಯಪ್ಪ : ಅವ ಕುತ್ತಿತ್ ಬುಟ್ಟಿಯೆ ಅಲ್ಲ, ಉಳ್ಳಾನ ಎಣ್ಣಿಯೆ,  
ನಿಂಗಡ ತಪ್ಪುನ ನಾಡ ತಮ್ಮಣಂಡ ಮೇಲೆ ಇಡಂಡ. ನಿಂಗ ಚೆನ್ನ  
ಎಚ್ಚರತ್ ಇಪ್ಪದ್ ನಲ್ಲದ್, ಎಂತೇಂಗಿ ಮಾಡಿತ್ ನಂಗಡ ಸಂಸಾರಕೇ

ಅವಮಾನ ಮಾಡಿರಂಡ ಅಚ್ಚಕೇ.

ಕಾಮುಣಿ ಕಾಮವ್ವ : ನಂಗ ಮಾಡುವ ಎಲ್ಲಾ ಅವಮಾನ ಕೆಲಸ, ನಿಂಗಡ ತಮ್ಮಣನೂ ಅವಂಡ ಸಂಸಾರ ಮಾಡುವದೆಲ್ಲ ಖನ ಪಟ್ಟ ಕೆಲಸಾನಾ.....

ಕಾರಿ ಕಾರ್ಯಪ್ಪ : ನೀನ್ ಒಂದನೆ, ಮಕ್ಕಳ ಪಾಳ ಮಾಡಿಟಿಯ. ಅದ್ ಸರಿ ಚಾಂಗ್ ಎಲ್ಲಿಯಾ?

ಕಾಮುಣಿ ಕಾಮವ್ವ : ಅವ ಅಲ್ಲಿ ಔಟ್ ಹೌಸ್‌ಲ್ ಉಂಡ್.

ಕಾರಿ ಕಾರ್ಯಪ್ಪ : ಅವ ಎನ್ನಂಗ್ ಅಲ್ಲಿ ಒಬ್ಬನೇ ಉಳ್ಳ, ಡ್ರಗ್ ಎಡ್‌ತಂಡ್ ಇಕ್ಕು, ಅದ್‌ನೋ ಆ ಕಿರಣ್ ಕಣ್ಣನೇ ಪಡ್‌ಪ್‌ಚಿಟ್ಟಿಯೆ ಅಲ್ಲ, ನಾಡ ಮೋವ ಒರ್ ತರ ಆಚೆಂಗಿ, ಮೋವ ಇಂಚೋರ್ ತರ.ಅದ್‌ಂಗೂ ಪಾಪತ ತಮ್ಮಣ ಎಣ್ಣೆಚಿ, ಚಾಂಗ್‌ನ ಬೆಂಗಳೂರ್‌ಕ್ ಕೂಟಿಯ ಪೋಯಿತ್ ಡಿಅಡಿಕ್ಸ್‌ನ್ ಸೆಂಟರ್‌ಲ್ ಇಡುವಂಜಿ ಅವಂಡ ಡ್ರಗ್ಸ್ ಅಭ್ಯಾಸ ಬುಡ್‌ತನಾಂದ್ ಎಣ್ಣೆಚಿ, ಅವನೇ ಕೂಟಿಯ ಪೋಪಲೋ. ಅವಂಡ ಪಣಿ ಉಂಚು ನಾಲಂಜಿ ದಿನ ಉಂಡ್‌ಲೋ, ಅದ್ ತೀಂದದು ಬೆಂಗಳೂರ್‌ಕ್ ಪೋಪಕ ಚಾಂಗ್‌ನ ಅಯಿಚಿ ತಾರೀಂದ್ ಎಣ್ಣೆಚಿ.,

ಕಾಮುಣಿ ಕಾಮವ್ವ : ಚೆಡಿಲ್, ಅವಂಗೆನ್ನ ಜಂಬಾರ ನಂಗಡ ಮಕ್ಕಡ ವಿಷಯ, ನಂಗ ಎನ್ನನೇಂಗಿ ಚಾಕಿಯವ, ಅವ ಎಂತ ಅಲ್ಲಿ ಆ ಸೆಂಟರ್‌ಕ್ ಇಡುವ. ಚಾಂಗ್ ಅನ್ನನೆ ಒಂದೂ ಇಲ್ಲೆ, ಅವ ಇಲ್ಲಿಯೇ ಇರಡ್ ಇಲ್ಲಿಯೇ ಚಾಯಾಪ.

ಕಾರಿ ಕಾರ್ಯಪ್ಪ : ಅವ ಇಲ್ಲಿಯೇ ಇರಡ್ ಎಣ್ಣೆಯಂಡ್ ಇಕ್ಕ ಡ್ರಗ್ಸ್ ಸಿಗರೇಟ್ ಅದ್ ಇದ್‌ಲೇ ಉಂಡ್ ಇಂಚು ಇಂಜೆಕ್ಸ್‌ನ್ ಕುತ್ತಿಯವಕಾಪಕ ಅಕ್ಕ ಒಂದೂ ಮಾಡುವಕಯ್ಯಲೆ, ಇಕ್ಕ ಪ್ರೇಮ್ ಎಣ್ಣೆನನ್ನಕೆ ಅವನ ಆ ಸೆಂಟರ್‌ಕ್ ಅಯಿಚಿತ್ ಅವಂಡ ಡ್ರಗ್ಸ್ ಅಭ್ಯಾಸ ಬುಡ್‌ತುವದ್ ನಲ್ಲದ್, ಅವನಾಯಿತೇ ಕೂಟಿಯ ಪೋಪಿ ಎಣ್ಣೆತ್.

ಕಾಮುಣಿ ಕಾಮವ್ವ : ಒಂದೂ ಬೋಂಡ, ನಾಡ ಕುಂಚೆನ ದಾಡ ಕೂಡೆಯೂ ಅಯಿಪುಲೆ, ಇಲ್ಲೇ ಇರಡ್, ಎಲ್ಲರ್‌ಕೂ ನಾಡ ಮಕ್ಕಡದೇ

ಚಿಂತೆ, ಅಯಿಂಗಡ ಚಿಂತೆ ಅವು ಮಾಡಿಯವಡ್, ನಾಡ ಮಕ್ಕಡ  
ಚಿಂತೆ ಬೋಂಡ ಅಯಿಂಗಕ್ ನಿಂಗ ಎಣ್ಣಿರಿ, ಇಲ್ಲೇಂಗಿ ನಾನೆ  
ಮರ್ಯಾದಿ ಮಾಡುವಿ.

ಕಾರಿ ಕಾರ್ಯಪ್ಪ : ನೀನ್ ಅಂತ ಅನಾಹುತ ಮಾಡಿರತೆ, ನೀಕ್ ಇಷ್ಟ  
ಇಲ್ಲೇಂಗಿ ಬುಡ್, ಇಕ್ಕ ಅಯಿಕಂಡ ಬಯ್ಯ ನೀನ್ ಅನುಭವಿಚಿಡು  
ವಿಯ, ಆಚೆಂಗಿ ಪಾಪತ ತಮ್ಮಣಂಡ ತಪ್ಪುಂದ್ ಮಾತ್ರ ಎಣ್ಣಿತೆ.  
ಅಂವ ನಲ್ಲಾಂಗೆ ಎಣ್ಣಿಯೆ, ನೀಕ್ ಅರ್ಥ ಆಯೆಂಡ್ ಇಲ್ಲೆ,

ಕಾಮುಣಿ ಕಾಮವ್ವ : ನಾಕ್ ಅರ್ಥ ಆಂಡ, ನಲ್ಲಾಂಗೋ ಕೆಟ್ಟಾಂಗೋ ನಾಡ  
ಮಕ್ಕ ಇಲ್ಲೇ ಇರಡ್. ದಾರ್ಕೂ ಅಯಿಂಗಡ ಜಂಬಾರ ಬೋಂಡ,  
ಅಚ್ಚಕೆ.

ಕಾರಿ ಕಾರ್ಯಪ್ಪ:ನೀಡ ಪುಚ್ಚಿ ಹಠ, ಅತಿ ದುರಾಸೆ ನೀಕೇ ಪಾಳ್ ನಾನೊಂದು  
ಎಣ್ಣಿಲೆ, ಎನ್ನೇಂಗಿ ಮಾಡಿಯ, ನಾಕಂತು ಇಕ್ಕಿಕ್ಕ ತಡಿಕೂ ಸೌಖ್ಯ  
ಕಮ್ಮಿ ಆಯಿತ್, ತಡಿಯೂ ಸರಿ ಇಲ್ಲೆ ಮನಸ್ಸೂ ಸರಿ ಇಲ್ಲೆ.

ಕಾಮುನಿ ಕಾಮವ್ವ : ನಿಂಗಡ ಮನಸ್ಸನ ಪ್ರೇಮ್ ಬಾವ ಪಾಳಾಕಿತ್  
ಆನುಂಡ್ ನಿಂಗಡ ತಡಿಕೂ ಸೌಖ್ಯ ಇಲ್ಲೆ.

ಕಾರಿ ಕಾರ್ಯಪ್ಪ : ನೀನ್ ಮುಂಡತೆ ತಮ್ಮಣನ ದೂಷಣೆ ಮಾಡತೆ, ಅಂವ  
ಪಾಪ ನಲ್ಲದಾಡ್ಂದ್ ಎಣ್ಣಿಯೆ, ನೀಕ್ ಬಯ್ಯ ಅರ್ಥ ಆಪ,

ಕಾಮುಣಿ ಕಾಮವ್ವ : ಆಡ್ ಆಡ್ ಬಯ್ಯ ಅರ್ಥ ಆಡ್ ಇಕ್ಕ ಮುಂಡತಿರಿ.

\* \* \* \* \*

## ಸೀನ್ ನುಪ್ಪತ್ತೊಂದ್

(ರಸ್ತೆ ಕರೆ- ಪ್ರೇಮ್‌ನ ಕಾಂಬದು ಕಾರಿ ಮೊರ್‌ಡುವಕ್ ಸುರು ಮಾಡುವ)  
ಎನ್ನಂಗಣ್ಣಯ್ಯ ಮೊರ್‌ಡುವ, ಎಂತ ಆಯೆ, ಮೊರ್‌ಡತೆ, ದೇವ ಉಂಡ್.

ಕಾರಿ ಕಾರ್ಯಪ್ಪ : ದೇವ ನಲ್ಲಯಿಂಗಕ್ ಇಪ್ಪಪ್ಪ, ನಂಗಳಂತಯಿಂಗಕಲ್ಲ,  
ನೀಡ ಮೊಮ್ಮ ಚಾಂಗ್‌ನ ಅಯಿಪುಲೆಲೋ, ಮಕ್ಕಳ ಅವ ಪಾಳ್  
ಮಾಡಿರ್‌ತ್.

ಪ್ರೇಮ್ ಪೊನ್ನಪ್ಪ : ಮಕ್ಕಳ ಪಾಳ್ ಮಾಡುವಕ್ ಕಯ್ಯುಲೆ, ಅವುವೇ  
ಆಯವ, ಆಚೆಂಗಿ ನಾಡ ಕೂಡೆ ಅಯಿಚ್‌ಲೇಂಗಿ ನಿಂಗಳೇ ಕೂಟಿಯ  
ಪೋಯಿತ್ ಅಲ್ಲಿ ಬುಡಿ, ಅವಂಡ ಡ್ರಗ್ಸ್ ಚಟತ್‌ನ ಒಮ್ಮ ಬುಡ್‌ತಿ,  
ಬೆರಿಯ ಆ ಕೆಲಸ ಮಾಡಿ, ನಾಡ ಸಹಾಯ ಬೋಂಡೇಂಗಿ  
ಬೋಂಡ, ನಿಂಗಳಾಚೆಂಗಿ ಪೋಯಿತ್ ಅವಂಡ ಡ್ರಗ್ಸ್ ಬೆರಿಯ  
ಬುಡ್‌ತಿ ಅಚ್ಚಕೆ.

ಕಾರಿ ಕಾರ್ಯಪ್ಪ : ನೀನ್ ಬೇಜಾರ್ ಮಾಡತೆ ಪ್ರೇಮ್, ನಾಡ ಅದೃಷ್ಟತ್  
ಉಳ್ಳನ್ನಕೆ ಆಪ, ನೀನ್ ನಲ್ಲ ಮನಸ್‌ಲ್ ನಾಕ್ ಸಹಾಯ ಮಾಡುವಿ  
ಎಣ್ಣುವಿಯ, ಆಚೆಂಗಿ ನಾಕ್ ಆನ ಎಡ್‌ತವ ಯೋಗವೂ ಇಲ್ಲೆ,  
ಯೋಗ್ಯತೆಯೂ ಇಲ್ಲೆ, ಬುಡ್, ನೀನ್ ಚಾಯಿತೆ ಇರ್. (ಮನೆಕ್  
ಪೋಪ).

ಪ್ರೇಮ್ ಪೊನ್ನಪ್ಪ : (ಲೈನ್ ಮನೆಲ್): ಅಪ್ಪಯ್ಯ ಇಂದೂ ಅಣ್ಣಯ್ಯನ  
ಕಂಡ, ಅವ ಭಾರಿ ಕುಗ್ಗಿ ಪೋಯಿತ್, ಚಾಂಗ್‌ನ ನಾಡ ಕೂಡೆ  
ಅಯಿಪುಲೆಲೋ, ಮೊಮ್ಮ ಒತ್ತವಲೆಲೋ, ಆಚೆಂಗಿ ಅಯಿಂಗಳೇ  
ಕೂಟಿಯ ಪೋಯಿ ಅವಂಡ ಡ್ರಗ್ಸ್ ಬುಡ್‌ತೀಂದ್ ಎಣ್ಣೆನ,  
ಅಣ್ಣಯ್ಯ ನೀಡ ಸಹಾಯ ಎಡ್‌ತವ ಯೋಗ ಯೋಗ್ಯತೆ ದಂಡೂ  
ಇಲ್ಲೆ, ನಾಕೇ ನೀನ್ ಚಾಯಿತೆ ಇರ್ ಎಣ್ಣೆರುವಂಜಿ ಭಾರಿ ಬೇಜಾರತ್  
ಇಂಜತ್.

ಮುದ್ದವ್ವ : ನಂಗ ಆಸ್ತಿ ಪಾಲ್ ಇಟ್ಟಿಲ್ಲೆಂಜಿ, ಅದೂ ಮನೆ ಆಸ್ತಿ ರಿಜಿಸ್ಟ್ರೇಷನ್

ಮಾಡಿ ಕೊಡ್ತಿತ್ ಅಯಿಂಗಡ ಪೆದಕ್ ಆನ ಪಿಂಞ ಅವ ಇಚ್ಚಕ್ ಬದಲಾಯಿಟ.

ಮೇದಯ್ಯ : ಅವ ಎಂತೆಂಗಿ ಆಡ್, ನೀಡ ಮೊಂವಂಗೇಂಗಿ ಬುದ್ಧಿ ಬೋಂಡವಾ, ಮಾಡ್ನಾನ ಅನುಭವ್ಚಿರಡ್.

ಮುದ್ದವ್ವ : ನಂಗ ನಂಗಡ ಮಕ್ಕಕ್ ಎನ್ನಂಗ್ ಶಾಪ ಇಡುವ ನಂಗ ಒಂದೂ ಎಣ್ಣಂಡ, ಎಲ್ಲಾ ದೇವಕ್ ಬುಟ್ಟರನ, ನಂಗಕ್ ವಯಸ್ಸಾಚಿ, ನಂಗಡ ಕೈಲ್ ಒಂದೂ ಆಪುಲೆ, ನಂಗ ಮುಂಡತೆ ಇಪ್ಪದೇ ನಲ್ಲದ್. ಇಕ್ಕ ಪ್ರೇಮ್ ಅವೆಂಡ ಮೋಂವನ ಬೆಂಗಳೂರ್ಕ್ ಕೂಟಿಯ ಪೋಪಿ ಅಲ್ಲಿ ಚಾಂಗ್ ರ ಡಗ್ಸ್ ಬುಡ್ತುವಿ ಎಣ್ಣೆಚೇಂಗೂ ಕೇಕತೆ ಪಿಂಞ ನಂಗ ಎಂತ ಮಾಡುವ, ಅದ್ ಬುಡಿ, ಪ್ರೇಮ್, ನೀಡ ಫಸಲ್ ಎನ್ನನೆಪ್ಪಾ.

ಪ್ರೇಮ್ ಪೊನ್ನಪ್ಪ : ಈಯಾಂಡ್ ಪರೋಲೆ ಅವ್ವಯ್ಯ, ಮುನ್ನೂರ್ ಮುನ್ನೂಯಿಟ ಇರುವದ್ ಬ್ಯಾಗ್ ಕಾಪಿ ಆಕು, ಮಳುರ ಬಯ್ಯ ಬುದ್ಧಾಂಗ್ ಈಯಾಂಡ್ ಮಳು ಚೆನ್ನ ಜಾಸ್ತಿಯೇ ಆಚಿ, ಅದ್ ನಾಡ ಕೈ ಪುಡ್ಚತ್, ಸೈಟ್ ಅಲಾಟ್ ಆಯಿತ್, ಈಯಾಂಡ್ ಮನೆ ಕೆಟ್ಟುವಕ್ ಸುರು ಮಾಡೊಂಡೊಂದ್ ಉಳ್ಳೋ. ಎಲ್ಲಾ ದೇವಡ ಸಹಾಯ.

ಮೇದಯ್ಯ/ಮುದ್ದವ್ವ : ನೀನ್ ಮನೆ ಕೆಟ್ಟುವಕ್ ಸುರು ಮಾಡ್, ದೇವ ಖಂಡಿತಾ ನಲ್ಲದ್ ಮಾಡುವ, ಧರ್ಮ ಪ್ರಕಾರ ಉಳ್ಳ ನಲ್ಲಯಿಂಗಕ್ ದೇವ ಖಂಡಿತಾ ನಲ್ಲದೇ ಮಾಡುವ.

ಮುದ್ದವ್ವ : ಅಪ್ಪ ಕುಂಞಿ, ನೀನ್ ಕಾಮುಣಿರ ಬಗ್ಗೆ ಜಾಸ್ತಿ ಗ್ಯಾನ ಮಾಡತೆ, ನೀನ್ ನೀಡ ಕೆಲಸ ಮಾಡ್, ನೀನ್ ಚಾಂಗ್ನ ಬೆಂಗಳೂರ್ಕ್ ಕೂಟಿಯ ಪೋಪಿ ಎಣ್ಣೆತುಳ್ಳಿಯ, ನೀಡ ನಲ್ಲರಿಮೆ ಅವಕ್ ಕಾಂಬುಲೆ "ಕಾಮಾಲೆ ಉಳ್ಳಯಿಂಗಕ್ ಕಾಂಬದೆಲ್ಲ ಮಂಜೆ". ಅನ್ನನೆ,

ಮೇದಯ್ಯ : ಅದ್ಂಗ್ ಮಹಾಭಾರತತೋರ್. ವಿಷಯ ನಡಪ; ವಿಧ್ಯಾಭ್ಯಾಸ ಆಯೆಂಡ್ ಇಪ್ಪಕ ಗುರು ದ್ರೋಣ ತಾಂಡ ಪಾಂಡವ ಕೌರವ ಶಿಷ್ಯಂಗಕ್ ಒರ್ ಪರೀಕ್ಷೆ ಬೆಪ್ಪ. ಅದ್ಲ್ ದುರ್ಯೋಧನ್‌ಂಗೂ ಯುಧಿಷ್ಟಿರಂಗು ಪರೀಕ್ಷೆ : ಯುಧಿಷ್ಟಿರಂಗ್ ಎಣ್ಣುವ "ನೀನ್

ಇಂದ್ ಪೊಲಾಕಂಜಿ ಬೈಟಿಯ ಕತ್ತನೆ ಈ ನಗರ ಸುತ್ತಿತ್, ಉಳ್ಳ ಕೆಟ್ಟಯಿಂಗಡ ಪೆದ ಎಳ್‌ದಿಯ ಬಾ, ಅವನ ಅಯಿಪಂಜಿ, ದುರ್ಯೋಧನನ ಕಾಕಿತ್ " ನೀನ್ ಇಂದ್ ಪೊಲಾಕಂಜಿ ಬೈಟಿಯ ಕತ್ತನೆ ನಗರ ಸುತ್ತಿತ್ ಉಳ್ಳ ನಲ್ಲಯಿಂಡ ಪೆದ ಎಳ್‌ದಿಯ ಬಾ , ಅವನೋ ಅಯಿಪ.

(ಬೈಟಾಪಕ ದಂಡಾಳೂ ಗುರುರ ಪಕ್ಕ ಬಪ್ಪ)

(ದಂಡಾಳ್‌ರ ಪಾಳೆ ಖಾಲಿ ಇಪ್ಪ.. ಗುರು ತೆಳಿಪ)

ದ್ರೋಣ ಕೇಪ ದುರ್ಯೋಧನನ: ಎನ್ನಪ್ಪ ನೀಕ್ ಈ ನಗರತ್ ದಾರು ನಲ್ಲಯಿನ ಕಂಡ್‌ಲಿಯಾ, ಇಲ್ಲೆ ಗುರುಜಿಂದ್ ದುರ್ಯೋಧನ ಎಣ್ಣವ, ಅಲ್ಲಿಂಜಿ ಯುಧಿಷ್ಟಿರನ ಕೇಪ: ಅಲ್ಲಪ್ಪ ಯುಧಿಷ್ಟಿರ, ನೀಕ್ ದಾರು ಕೆಟ್ಟಯಿನ ಕಂಡ್‌ಲಿಯಾ ಈ ನಗರತ್‌ಂದ್, ಯುಧಿಷ್ಟಿರನೂ ದಾರ್‌ನೋ ಕಂಡ್‌ಲೇಂದ್ ಎಣ್ಣವ. ಅಕ್ಕ ಗುರು ಎಣ್ಣವ : ಅದ್ ನೋಟುವಯಿಂಡ ಮೇಲೆ ಹೊಂದಿಯವ, ನಂಗಡ ನೋಟ ಪ್ರಕಾರ ಅದ್ ನಂಗಕ್ ಕಾಂಬಾಂದ್. ಅನ್ನನೆ ಇಕ್ಕ ನೀಡ ಪೆರಿಯ ಮೈಮ.

ಮುದ್ದವ್ವ : ನಿಂಗ ತಕ್ಕ ತಕ್ಕಕ್ ಮಹಾಭಾರತನ ಕೊಂಡ ಬಪ್ಪಿರ, ಇನ್ನನೆ ಎಣ್ಣಚೆಂಗಿ ನಾಕ್ ಅರ್ಥ ಆಪ, ಅಲ್ಲಾ ನಿಂಗ ತಕ್ಕ ತಕ್ಕಕ್ ನೀಡ ಮೈಮ ನೀಡ ಮೈಮಾಂದ್ ಎಣ್ಣವಿರಲ್ಲ, ಎನ್ನ ..

ಮೇದಯ್ಯ : ಪೆರಿಯವ ನೀಡ ಮೈಮ ಅಲ್ಲಾ ಅದ್‌ಂಗೆ ಎಣ್ಣೆಯೆ..

ಮುದ್ದವ್ವ : ಪಾಳಾಪಕ ಪೆರಿಯ ಮೈಮ ನಾಡ, ನಲ್ಲ ಅಳಿಯ ಮೈಮ ನಿಂಗಡದಾ..

ಮೇದಯ್ಯ : ಎಲ್ಲಾ ನಂಗಡದೇ ನಾಡ ನೀಡ ಬೋಂಡ,, ಆ ಮಹಾಭಾರತ ಬುಡ್, ಒರ್ ಇಂಗ್ಲಿಷ್ ಪುಸ್ತಕತೇ ಇನ್ನನೆ ಉಂಡ್:

ಒಬ್ಬ ಎಣ್ಣವ "ನಾನ್ ಸರಿ ಇಲ್ಲೆ, ಬಾಕಿ ಎಲ್ಲಾ ಸರಿ ಉಂಡ್",

ಇಂಚೊಬ್ಬ ಎಣ್ಣವ "ನಾನ್ ಸರಿ, ಬಾಕಿ ದಾರೂ ಸರಿ ಇಲ್ಲೆ,

ಇಂಞೊಬ್ಬ ಎಣ್ಣುವ "ನಾನು ಸರಿ ಇಲ್ಲೆ, ಬೋರೆ ದಾರೂ ಸರಿ ಇಲ್ಲೆ"  
 ಕಡೇಕೊಬ್ಬ ಎಣ್ಣುವ " ನಾನ್ ಸರಿ, ಬಾಕಿ ಎಲ್ಲಾ ಸರಿ"  
 ಇದತ್ ನೀಡ ಪೆರಿಯ ಮೋಂವ ಒಂದನೆ ವರ್ಗ,  
 ಪೆರಿಯ ಮೈಮ ದಂಡನೆ ವರ್ಗ  
 ನೀಡ ದಂಡನೆ ಮೋಂವ ನಾಲನೆ ವರ್ಗ ಗೊತ್ತಾಚಾ.  
 ಮುದ್ದವ್ವ : ಗೊತ್ತಾಚಿ, ತಾನ್ ಸರಿ ಉಂಡೇಂಗಿ ಇಡೀ ಪ್ರಪಂಚವೇ ಸರಿ ಇಪ್ಪ,  
 ಅದೇ ನೇರ್ ಅಲ್ಲ..

\* \* \* \* \*

## ಸೀನ್ ನುಪ್ಪತ್ತ ದಂಡ್

ಕಾರಿ ಕಾರ್ಯಪ್ಪ : ನಾನ್ ಮೊನಿಯಾಂದ್ ಸೀತೆರ ವಿಷಯ ಎಣ್ಣಾನ,  
 ಎನ್ನಲೋ ಅವಡ ಅಭಿಪ್ರಾಯ.

ಕಾಮುಣಿ ಕಾಮವ್ವ : ಕಿರಣ್ ನಲ್ಲ ಕಣ್ಣ, ನಲ್ಲ ದುಡ್ಡ್ ಉಳ್ಳವನನ್ನಕೆ ಕಾಂಬ,  
 ಆಪೇಂಗಿ ಆಡ್.

ಕಾರಿ ಕಾರ್ಯಪ್ಪ : ನೀಕೆನ್ನಾಯೆ, ಆ ತಮಿಳ್ ಕಣ್ಣನ ಸೀತೆ ಎನ್ನಂಗ್  
 ಕೂಡಂಡಿಯೆ, ಆ ಕಣ್ಣಂಡ ಆರ ಬೇರ ಒಂದೂ ಗೊತ್ತಿಲ್ಲೆ, ಇಲ್ಲಿ  
 ಹೋಮ್ ಸ್ಟೇಕ್ ಬಪ್ಪ, ದಂಡ್ ದಿವಸ ಇಪ್ಪಂಜಿ ಪೋಪ,  
 ಚಾಂಗ್ನೋ ಅವನೇ ಡ್ರಗ್ಸ್ ಪಡ್ಪ್ ಚಿಟ್ಟಿತ್ ಪಾಳ್ ಮಾಡಿಯೆ,  
 ನೀಕೂ ಗೊತ್ತುಂಡ್ ಅಕ್ಕ ಅವಂಗ್ ಆ ಅಭ್ಯಾಸ ಇಲ್ಲತಿಪ್ಪ.  
 ಸೀತೆರ ಜೀವನ ಪಾಳ್ ಮಾಡತೆ, ನೀಡ ದುರಾಸೆಲ್.

(ಸೀತೆ ಕೇಟಂಡಿಪ್ಪ) (ಅವಕ್ ಅಪ್ಪ ಎಣ್ಣುವದ್ ಅರ್ಥ ಆಪ)(ಕಿರಣ್ನ  
 ಬೋಂಡಾಂದ್ ಆಪ)

ಸೀತೆ : ಮಮ್ಮಿ ನೀನೆನ್ನಂಗ್ ಆ ಕಿರಣ್ಣರ ಬಯ್ಯ ಇನ್ನನೆ ಬುದ್ಧಿಯೆ, ನಾನ್ ತಕ್ಕ ಪರಂದದ್ ನೇರೆ, ಆಚೆಂಗಿ ಅವನೇ ಮಂಗಲ ಆಪೀಂದ್ ಅಲ್ಲ, ಅಪ್ಪ ಎಣ್ಣೆನನ್ನಕೆ ಅವನೇ ಅಣ್ಣಯ್ಯಂಗ್ ಬೋಂಡತ ಚಟ ಪಡ್ಪ್ ಚೆಟ್ಟಿಯೆ, ಅಕ್ಕ ಅವಂಗೂ ಆ ಅಭ್ಯಾಸ ಎಲ್ಲಾ ಇಕ್ಕು, ನಾಕ್ ದಾರೇಂಗಿನ ನಿಂಗಳೇ ನೋಟಿ, ನಾನ್ ನಿಂಗ ಕಾಟ್‌ನವನ ಮಂಗಲ ಆಪಿ. ಗರೀಬ ನಾಚೆಂಗಿನೂ ಪರೋಲೆ. ಅಪ್ಪ ಎಣ್ಣೆನನ್ನಕೆ ಆಡ್.

ಕಾಮುಣಿ ಕಾಮವ್ವ : ಗರೀಬ ಮದಿಲೋ, ಇಲ್ಲಿ ಇಚ್ಚೆ ಚಾಯಿತೆ ಇಂಜಿ ರೋಂಜಿ ಗರೀಬನ ಕೂಡಿತ್ ಕೂಲಿ ಮಾಡುವಿಯಾ, ಕಂಜಿ ಕುಡಿಪಿಯಾ.

ಸೀತೆ : ಆ ಕಿರಣ್ಣನ ಕೂಡುವಾಂಗುಂಜಿ ಗರೀಬನ ಕೂಡಿತ್ ನೆಮ್ಮದಿಲ್ ಗತ್ತಲ್ ಇಪ್ಪದ್ ನಲ್ಲದಲ್ಲಾ.

ಕಾರಿ ಕಾರ್ಯಪ್ಪ : ಕುಂಇನಿ ನೀನ್ ಅರ್ಥ ಮಾಡಿಯಂಡಿಯ ಅಲ್ಲ, ಅದ್ ಮದಿ. ಒರ್ ಗಾದೆ ಉಂಡ್ " ತೌಡ್ ತಿಂದತೆಂಗಿನೂ ತಗರ್‌ದಿ ಬುಡತೆ" ನೀಡ ತಾತ ಎಣ್ಣುವ ಇಂಜತ್ ಒರ್ ಪಾಟ್ ರೂಪತ್:

ಕೊಡವ ಕುಂಇನಿಯ ಎಂಗ,  
 ಕಾವೇರಮ್ಮೆರ ಮಕ್ಕ ನಂಗ,  
 ವಿಶ್ವತೇ ಕೇಳಿ ಪೋನ ಜನಾಂಗ.  
 ಊರ್‌ಲ್ ತಕ್ಕಂಡ ದರ್ಬಾರ್,  
 ಮನೆಲ್ ಮೂಪಂಡ ಕಾರ್ಬಾರ್,  
 ಒತ್ತೋರ್ಮೆ ಪ್ರೀತಿ ಜೋರ್,  
 ಇಂದ್ ಅದೆಲ್ಲ ಕಾಂಗ,  
 ಎಲ್ಲಿಕ್ ಪೋಕಡ್ ಎಂಗ,  
 ದಾರ್‌ನ ತೊಕ್ಕಡ್ ನಂಗ.  
 ಕಾವೇರಮ್ಮೆಯೇ ಅವ್ವ,  
 ಇಗ್ಗುತಪ್ಪನೇ ಅವ್ವ,



ಕಾರಣಜ್ಞನೇ ಗುರು,

ನಿಂಗಳ ಬೋಡುವ ಕೈ ತೊತ್ತ,

ನಿಂಗಡ ಕಾಲ್‌ಕ್ ಬೂವ ಅಡ್ಡ ಬುದ್ಧ.

ಕೊಡವ ಕುಂಞಿಯ ಎಂಗ.....

ಕಾಮುಣಿ ಕಾಮವ್ವ : ಎನ್ನೋ ಮೋವ ಚಾಯಿತೆ ಇರಡ್‌ಂದ್ ನಾನ್ ಗ್ಯಾನ  
ಮಾಡ್‌ನ, ನೋಟನ.

(ಆ ವಾರ ಕಿರಣ್ ದಂಡ್ ದಿವಸಕ್ ಬಪ್ಪ) (ಕಾಮುಣಿ ಸೀತೆನ ಅವಂಗ್ ತಿಂಡಿ  
ಕೊಡ್‌ತಿತ್ ಅಯಿಪ)

(ಕಿರಣ್ ಸೀತೆನ ಮಂಗಲ ಕಯಿಪಕ್ ಕೇಪ- ಸೀತೆ ಒತ್ತವಲೆ- ಅವಳ ಬಲಾತ್ಕಾರ  
ಮಾಡುವಕ್ ನೋಟುವ)

(ಈನ ಕಾಂಬ ಚಾಂಗ್, ಡ್ರಗ್ಸ್‌ರ ಅಮುಲ್‌ಲ್, ಕಿರಣ್‌ನ ಪೊಜ್ಜ ಪೋಯಿತ್‌ಕ್,  
ಕಿರಣ್ ಚತ್ತ್ ಪೋಪ, ಚಾಂಗ್ ಶಾಕ್ ಆಯಿತ್ ಅಳುತುವ ) (ಅಲ್ಲಿಕ್ ಕಾರಿ  
ಕಾರ್ಯಪ್ಪ ಬಪ್ಪ)

ಕಾರಿ ಕಾರ್ಯಪ್ಪ : ನೋಟ್ ಮೋನೆ ಚಾಂಗ್, ನೀನ್ ಬದ್‌ಕುವಕ್  
ಉಳ್ಳವ, ನಾಡ ಜೀವನ ಎಲ್ಲಾ ಆಚಿ, ನಾನ್ ಕೊಂದಿಯೇಂದ್  
ಎಣ್ಣುವಿ, ನಾನೇ ಜೈಲ್‌ಕ್ ಪೋಪಿ, ನೀನ್ ಡ್ರಗ್ಸ್ ಬುಟ್ಟಿತ್, ತಂಗೇರ  
ಮಂಗಲ ಮಾಡಿತ್ ಚಾಯಿತೆ ಇರ್. ಜೈಲ್ ಕಯಿಂಜ ಪಿಂಞ  
ಬಪ್ಪಿ, ಬದ್‌ಕಿತುಂಡೇಂಗಿ.

ಚಾಂಗ್ ಚಂಗಪ್ಪ : ನಾನೆಂತ ಮುಟಾಳ ಮೂರ್ಖ, ನಿನ್ನ ಅರ್ಥ  
ಮಾಡಿಯಂಡದೇ ಇಲ್ಲೆ, ಮಮ್ಮಿರ ತಕ್ಕ ಕೇಟಂಡ್ ಪಾಳಾನ, ಇಕ್ಕ  
ನೀನ್ ಮಾಡತ ಕೊಲೆನ ನೀನ್ ಒತ್ತಂಡ್ ಜೈಲ್‌ಕ್ ಪೋಪಕ್  
ತಯ್ಯಾರ್ ಆಯಿತುಳ್ಳಿಯ, ಇಲ್ಲೆಪ್ಪ, ನಾನೆ ಜೈಲ್‌ಕ್ ಪೋಪಿ, ನೀನ್  
ಪೊರ್‌ಮೆ ಇಂಜಂಡ್ ತಂಗೇರ ಮಂಗಲ ಮಾಡ್, ನಾನೆ ಪೋಲೀಸರ್  
ಎದಿಕೆ ಸರೆಂಡರ್ ಆಪಿ..

ಕಾರಿ ಕಾರ್ಯಪ್ಪ : ಇಲ್ಲೆ ಮೋನೆ, ನಾಡ ತಡಿಕೂ ಸೌಖ್ಯ ಇಲ್ಲೆ, ನೀಡ

ಮಮ್ಮಿನ ಎದ್‌ರಾಟ್ವವಕೂ ನಾಕ್ ಕಯ್ಯಲೆ, ಅವ ಬೋಂಡಿಕಿ  
ತಂಗಿ ಕುಂಇನಿ ಮಾರಿರು ದುಡ್ಡಾರ ಆಸೆಕ್, ನಾನೊರ್ ಅಸಾಹಯಕ,  
ಆಂಗಾಯಿತ್ ನೀನ್ ದಯಬೆಚ್ಚಿತ್ ಪೊರ್‌ಮೆ ಇರ್, ನಾನೇ ಜೈಲ್‌ಕ್  
ಪೋಪಿ, ಇದ್ ನಾಕೂ, ನೀಕೂ, ನೀಡ ತಂಗಿ ಕುಂಇಕೂ ನಲ್ಲದ್.  
ನೀನ್ ಅರ್ಥ್ ಮಾಡಿಯ, ಇದ್ ನಾಕ್ ನೀಕ್ ದಂಡಾಳ್ ಕೇ  
ಗೊತ್ತುಕ್ಕೋ, ನೀನ್ ಒಂದೂ ವರೀಸ್ ಮಾಡತೆ, ನಾನ್ ಎಲ್ಲಾ  
ಗ್ಯಾನ ಮಾಡಿತೇ ಈ ತೀರ್ಮಾನಕ್ ಬಂದಿಯೆ,

ಚಾಂಗ್ : ಅಲ್ಲಪ್ಪಾ..

ಕಾರಿ ಕಾರ್ಯಪ್ಪ : ನೀನ್ ಮುಂಡತಿರ್, ನಾನೇ ಕಿರಣ್‌ನ ಕೊಂದಿಯೆ  
ಅಚ್ಚಕೆ, ಇದ್‌ಲೇಂಗಿ ನಾಡ ಬದ್‌ಕ್ ಸಾರ್ಥಕ ಆಡ್.

( ಕಾರಿ ಕಾರ್ಯಪ್ಪ ಪೋಲೀಸ್ ಸ್ಟೇಷನ್‌ಕ್ ಪೋಯಿತ್ ಸರೆಂಡರ್ ಆಪ)

\* \* \* \* \*



ಆಸರೆ  
(ತಾಕಕೂತ್ ಕೂತ್)

## ಪಾತ್ರ ಪರಿಚಯ.

ಅಪ್ಪ	:	ಬಿದ್ಧಪ್ಪ
ಅವ್ವ	:	ಬೊಳ್ಳಿಯವ್ವ(ಗಂಗು)
ಪೆರಿಯ ಮೋಂವ	:	ಚಿಂಗಪ್ಪ
ಪೊಣ್ಣ್	:	ಮುತ್ತವ್ವ
ದಂಡನೆ ಮೋಂವ	:	ತಿಮ್ಮಯ್ಯ
ಪೊಣ್ಣ್	:	ಸೀತವ್ವ
ಮೂಂದನೆ ಮೋಂವ	:	ಮಾದಪ್ಪ
ಪೊಣ್ಣ್	:	ಹಿಳ್ಡಾ
ನಾಲನೆ ಮೋಂವ	:	ಪೊನ್ನಣ್ಣ
ಪೊಣ್ಣ್	:	ಪೊನ್ನವ್ವ
ಮೋವ	:	ಗೌರು ಗೌರಮ್ಮ
ಮೈಮ	:	ಸುಧಾಕರ್ ರೆಡ್ಡಿ.
ಮನೆ ಆಳ್	:	ಮುತ್ತಕ್ಕಿ
ಡಾಕ್ಟರ್	:	ಸಂಜಯ್

\* \* \* \* \*

## ಸೀನ್ ಒಂದ್

(ಬಿದ್ದಪ್ಪ ತಾಂಡ ಮಕ್ಕಳೆಲ್ಲ ಮನೆಕ್ ಬಪ್ಪಕೆಣ್ಣಾನನ್ನಕೆ ಅವಂಡ ಎಲ್ಲಾ ಮಕ್ಕ ಸಂಸಾರ ಸಮೇತ ಬಂದಿತ್ ಇಪ್ಪ)

ಬಿದ್ದಪ್ಪ : ನಾನ್ ನಿಂಗಳೆಲ್ಲ ಎನ್ನಂಗ್ ಅರ್ಜೆಂಟಾಯಿತ್ ಒಕ್ಕಚೆ ಬಪ್ಪಕೆಣ್ಣೆಯೆ, ಎಣ್ಣುವ ಪುಳು ನಿಂಗಡೆಲ್ಲ ಮಂಡೆಲ್ ಓಡಿ ಆಡಿಯಂಡುಂಡ್ಂದ್ ನಾಕ್ ಚಾಯಿತೆ ಗೊತ್ತುಂಡ್.

ಚಿಂಗಪ್ಪ : ಅಕ್ಕು ಅಪ್ಪಯ್ಯ, ನಾನ್ ಇಕ್ಕ, ಆರ್ಮಿಂಜಿ ರಿಟೈರ್ ಆಯಿತ್ ಪ್ರೈವೇಟ್ ಕಂಪನಿಲ್ ಕೆಲಸತ್ ಉಳ್ಳ, ರಜವೂ ಅನ್ನನೆ ಕಟ್ಟುಲೆ.

ತಿಮ್ಮಯ್ಯ :: ನಾಡದೂ ಅದೇ ಸ್ಥಿತಿ.

ಮಾಧಪ್ಪ : ಅಕ್ಕು ಡ್ಯಾಡಿ, ನಾಕೂ ನಾಡ ಪೊಣ್ಣಾಕೂ ರಜ, ವೀಸ, ಪ್ಲೈಟ್ ಟಿಕೆಟ್ ಅರೆಂಜ್ ಮಾಡುವದೆ ಬಲ್ಯ ಸರ್ಕಸ್. ಇಕ್ಕ ಎನ್ನನೆಯೋ ಪತ್ತ್ ದಿನ ರಜ ಕಟ್ಟಿತ್, ನಾಕೂ ಇಲ್ಲಿ ಸುಮಾರ್ ಕೆಲಸ ಉಂಡ್.

ಗೌರು ಗೌರಮ್ಮ : ಎಣ್ಣಪ್ಪಯ್ಯ, ನಾಕೂ ಹೈದರಾಬಾದ್‌ಲ್ ದುಂಬಾ ಕೆಲಸ ಉಂಡ್.

ಪೊನ್ನಣ್ಣ : ಸರಿ ಅಪ್ಪಯ್ಯ, ಎಂತ ವಿಷಯ ನೀನ್ ಎಣ್ಣಾ.

- ಬಿದ್ದಪ್ಪ : ನಿಂಗಲ್ಲಾ ಅಮ್ಮ ಚತ್ತ ಪಿಂಇ ಮನೆಕ್ ಬಪ್ಪದೇ ಅಪರೂಪ. ಇದ್ ದಂಡೋ ಮೂಂದನೆ ಕುರಿ ಬಂದಿಯೆ ಕಾಂಬ. ಪೊನ್ನೂ ಗೌರೂ ಬಂದಂಡಿಪ್ಪ, ಮಾದಪ್ಪ ಓರಾಂಡಿಯಕೊಮ್ಮೆ ಬಪ್ಪ.
- ಚಿಂಗಪ್ಪ : ಅಪ್ಪಯ್ಯ, ಅಕ್ಕಲೇ ಎಣ್ಣಾನನ್ನಕೆ, ನಂಗಕ್ ರಜ ಕ್ಟ್ಟುಲೆ, ಮಕ್ಕಕೂ ಪುರುಷೊತ್ ಇಪ್ಪುಲೆ..
- ತಿಮ್ಮಯ್ಯ : ಅಣ್ಣಯ್ಯ ಎಣ್ಣಾನನ್ನಕೆ ಎಲ್ಲಾ ಕಷ್ಟ. ನಂಗಕ್ ಟೈಮೇ ಕ್ಟ್ಟುಲೆ.
- ಪೊನ್ನಣ್ಣ : ನಂಗಡದ್ ಉಳ್ಳದೇ, ನೀಡ ವಿಷಯ ಎಂತ ಎಣ್ಣೇರ್.
- ಬಿದ್ದಪ್ಪ : ಎಣ್ಣುವಿ, ಎಣ್ಣುವಿ, ಅದ್‌ಂಗಾಯಿತೇ ನಾನ್ ನಿಂಗಲೆಲ್ಲಾ ಬಪ್ಪಚೆಟ್ಟಿಯೆ. ಇಕ್ಕ ನಿಂಗ ಅಪರೂಪಕ್ ಬಂದಿತುಳ್ಳಿರ, ನಂಗಲ್ಲಾ ಚಾಯಿತೆ ಸಮಯ ಕಳಿಯನ. ಆನುಂಡ್, ನಾನ್ ಎಣ್ಣುವಕುಳ್ಳ ವಿಷಯತ್‌ನ, ಒರ್ ಕಾಗದತ್ ಎಳೆದಿತ್ ನಿಂಗಕೆಲ್ಲ ಒರೊರ್ ಕಾಪಿನ ನಿಂಗ ಬಯ್ಯಕ್ ಪೋಪಕ ತಪ್ಪಿ. ನಿಂಗಡ ಅಭಿಪ್ರಾಯತ್‌ನ ಇಂಇ ಪನ್ನೆರಂಡ್ ತಿಂಗ ಕಯಿಂಜದು ಇದೇ ತಾರೀಕ್‌ಲ್ ನಿಂಗಲ್ಲ ಇಲ್ಲಿಕ್ ಬಂದಿತ್ ಒಕ್ಕಚೆ ಎಣ್ಣೊಂಡು.
- ಚಿಂಗಪ್ಪ : ಎಂತ ವಿಷಯ, ಇಕ್ಕಲೇ ಎಣ್ಣೇರ್ ಅಪ್ಪಯ್ಯ, ಇಲ್ಲೇ ತೀರ್ಮಾನ ಆಯೋಡ್.
- ಬಿದ್ದಪ್ಪ : ಇಲ್ಲೆಪ್ಪ, ಅರ್ಜೆಂಟ್ ತೀರ್ಮಾನ ಎಡ್‌ಪ ಸಂಗತಿ ಅಲ್ಲ, ಆನುಂಡೇ ಪನ್ನೆರಂಡ್ ತಿಂಗ ಟೈಮ್ ತಂದಿಯೆ.
- ಮಾದಪ್ಪ : ನಾನ್ ಇಕ್ಕ ಪುನಹ ಅಮೆರಿಕಾಕ್ ಪೋಚೆಂಗಿ ಬಪ್ಪ ಕಾಲೇ ಬಪ್ಪ ಕಯ್ಯುವ, ಅಕ್ಕಣೆ ನೀಡ ಕಾಗದತ್‌ನ ನಾನೆನ್ನ ಮಾಡಡ್.
- ಬಿದ್ದಪ್ಪ : ಅದ್‌ಂಗೇ ನಾನ್ ಪನ್ನೆರಂಡ್ ತಿಂಗ ಟೈಮ್ ತಂದಿಯೆ, ನಿಂಗಲ್ಲ ಆರಾಮ್‌ಲ್ ಗ್ಯಾನ ಮಾಡಿತ್, ಸಾದಕ ಬಾದಕ ನೋಟಿತ್ ತೀರ್ಮಾನ ಮಾಡಿ.
- ಹಿಳ್ಳಾ : ಲೆಟ್ ಹಿಮ್ ಗಿವ್ ದ ಲೆಟರ್, ಲೆಟ್ ಅಸ್ ಸೀ ವಾಟ್ ಈಸ್ ಇನ್ ಇಟ್, ಇಟ್ ಮಸ್ತ್ ಬಿ ಇಂಪೋರ್ಟೆಂಟ್ ಅಂಡ್ ಸೀರಿಯಸ್, ಡು ನಾಟ್ ತಿಂಕ್ ಹಿ ಈಸ್ ಏಜ್‌ಡ್ ಅಂಡ್ ಇಗ್ನೋರೆಂಟ್, ಹಿ ಹ್ಯಾಸ್ ವಾಸ್ತ್ ಎಕ್ಸ್ಪೀರಿಯನ್ಸ್ ಆಫ್ ಲೈಫ್, ಅಕ್ಸೆಪ್ಟ್ ದ ಲೆಟರ್.
- ಸುಧಕರ್ ರೆಡ್ಡಿ : ಹೌದು, ಹಿಳ್ಳ ಹೇಳುವುದರಲ್ಲಿ ಅರ್ಥ ಇದೆ, ಏನೋ

ಗಹನವಾದ ವಿಚಾರ ಇರಬೇಕು, ಕಾಗದ ಕೊಡಲಿ, ಯೋಚನೆ ಮಾಡಿ ನಮ್ಮ ನಮ್ಮ ನಿರ್ಧಾರ ತಿಳಿಸುವ, ಸಮಯವೂ ಬೇಕಾದಷ್ಟು ಕೊಟ್ಟಿದ್ದಾರೆ, ಸರಿಯಾಗಿ ಯೋಚಿಸಿ ಹೇಳುವ.

ಬಿದ್ದಪ್ಪ : ಅರ್ಥ ಆಪದ್ ಬೋಂಡತಯಿಂಗಕ್ ಅರ್ಥ ಆಚಿ, ಅರ್ಥ ಆಂಡಿಯಯಿಂಗಕ್ ಅರ್ಥ ಆಯಿಲೆ, ಅದೇ ಎಡವಟ್ಟ್.. ಪರೋಲೆ, ನಿಂಗ ಪೋಪಕಾಪಕ ಲೆಟರ್ ತಪ್ಪಿ, ನಿಂಗ ನಿಂಗಡಲ್ಲಿಕ್ ಎತ್ತನ ಪಿಂಞ ಆ ಕಾಗದ ಓದಿ. ಆಚಿಂಗಿ ಒಂದ್, ಈ ವಿಷಯತ್ ನಿಂಗ ಒಡಿಯ ಪೊಣ್ಣ್ ತಕ್ಕ ಪರ್ಂದೋಳಿ, ಆಚಿಂಗಿ ಅಣ್ಣ ತಮ್ಮಣ ತಂಗೆ ಚರ್ಚೆ ಮಾಡತಿ, ನಾಕ್ ನಿಂಗಡ ಸ್ವಂತ ಅಭಿಪ್ರಾಯ ಬೋಂಡು, ಅಪ್ಪರಿಪ್ಪರ ತಕ್ಕ ಪರ್ಂದಕ, ನಿಂಗಡ ಸ್ವಂತ ಅಭಿಪ್ರಾಯ ಬದಲಾಕು, ಆಂಗ್ ಬೋಂಡಾಂದ್ ಎಣ್ಣುವ. ನಿಂಗ ನಿಂಗಡ ಅಭಿಪ್ರಾಯ ಎಣ್ಣಿ.

(ಪಿತ್ಯಾಂದ್ ಎಲ್ಲರು ಪೊರ್ಡುವ.. ಬಿದ್ದಪ್ಪ ಎಲ್ಲಾರ್ಕು ಓರೋರ್ ಕಾಗದ ಕೊಡ್ಪ)....

\* \* \* \* \*

## ಸೀನ್ ದಂಡ್

- ಬಿದ್ದಪ್ಪ : ಮುತ್ತಕ್ಕಿ, ದಂಡ್ ಕಪ್ ಕಾಪಿ ಕೊಂಡ ಬಾ...
- ಮುತ್ತಕ್ಕಿ : ನಿಂಗ ಒಬ್ಬನೇ ಉಳ್ಳ, ದಂಡ್ ಕಪ್ ಕಾಪಿ ಎನ್ನಂಗ್, ಜಾಸ್ತಿ ಕಾಪಿ ಕುಡಿಪಕಾಗ.
- ಬಿದ್ದಪ್ಪ : ದಂಡ್ ಕಪ್ಪು ನಾಕ್ ಕುಡಿಪಕ್ ಅಲ್ಲ, ನೀನ್ ಎಡ್ತ ಬಾ, ಬಯ್ಯ ಎಣ್ಣುವಿ.
- ಮುತ್ತಕ್ಕಿ : ಇದೊಳಿ ಕಾಪಿ, ಇಂಇಫೋರ್ ಕಪ್ .....
- ಬಿದ್ದಪ್ಪ : ಬಾ ಅಳೆ ಇಲ್ಲಿ.
- ಮುತ್ತಕ್ಕಿ : ನಾಕಯ್ಯಪ್ಪ, ನಾನಿಲ್ಲೇ ನಿಂದವಿ.
- ಬಿದ್ದಪ್ಪ : ಬಾ ಇಲ್ಲಿ ಅಳೆ, ನಿನ್ನಾಂದ್‌ಂಜಿ ಕೇಟಂಡಿಂಜಿಯಲ್ಲ, ಮಕ್ಕಳ ಎನ್ನಂಗ್ ಬಪ್ಪಕೆಣ್ಣಿಯೆ, ಅಯಿಂಗಕೆಂತ ಕಾಗದ ಕೊಡ್ತಿಯೆಂದ್, ಎಣ್ಣೆ ತಪ್ಪಿ ಬಾ ಅಳೆ.
- ಮುತ್ತಕ್ಕಿ : ನಾಕಯ್ಯ, ನಾಕಯ್ಯ, ನಾನಿಲ್ಲೇ ನಿಂದವಿ, ನಿಂಗ ಎಣ್ಣೆ.
- ಬಿದ್ದಪ್ಪ : ಇದ್ ನೀಕ್ ಸಂಮ್ಮಂದ ಪಟ್ಟ ವಿಷಯ, ಆಂಗೇ ಎಣ್ಣೆಯೆ, ನೀನ್ ಬಂತ್ ಇಲ್ಲಿ ಅಳೇಂದ್.
- ಮುತ್ತಕ್ಕಿ : ನಿಂಗಡದೂ ನಿಂಗಡ ಮಕ್ಕಡ ವಿಷಯತ್ ಈ ಮನೆ ಆಳ್‌ರ ಎಂತ ಸಂಮ್ಮಂದ.



ಬಿದ್ಧಪ್ಪ : ನೀನ್ ಎಕ್ಕೋಲು ಮನೆ ಆಳ್ ಆಳ್‌ಂದ್ ಎನ್ನಂಗ್ ಎಣ್ಣುವಿಯಾ?,  
ನಿನ್ನ ಎಕ್ಕೇಂಗಿ ಅನ್ನನೆ ನೋಟಿಯನಾ? ನೀಕ್ ಗೊತ್ತಾಪ, ಆಂಗೇ  
ಪನ್ನೆರಂಡ್ ತಿಂಗ ಟೈಮ್ ಕೊಡ್‌ತಿಯೆ, ನೀಕೂ ಅದೇ ಟೈಮ್  
ತಪ್ಪಿ, ನೀಡ ಅಭಿಪ್ರಾಯವೂ ಅಚ್ಚಕೇ ಮುಖ್ಯ.

ಮುತ್ತಕ್ಕಿ : ನಾಡ ಅಭಿಪ್ರಾಯವಾ? ನಾನೋರ್ ಹಳ್ಳಿ ಮುಕ್ಕ, ವಿದ್ಯ ಇಲ್ಲೆ,  
ಬುದ್ದಿ ಇಲ್ಲೆ, ದಾಡೇಂಗಿರ ಮನೆ ಕೆಲಸ ಮಾಡಿಯವ, ತಂದಾನ  
ತಿಂದಂಡ್, ಬದ್‌ಕುವ ಒರ್ ಪಾಪಿ ಜೀವ.

ಬಿದ್ಧಪ್ಪ : ಅದೇ ವಿಶೇಷ, ನೀನ್ ನೀಡ ಬದ್‌ಕ್‌ನ ನೀಕಾಯಿತ್ ಬದ್‌ಕಿತಿಲ್ಲೆ,  
ಬೋರೆ ಅಯಿಂಗಡ ಸುಖಕಾಯಿತೇ ಬದ್‌ಕ್‌ನ ಜೀವ ನೀಡದ್,  
ಆನುಂಡೇ ನೀಡ ಅಭಿಪ್ರಾಯ ಭಾರೀ ಮುಖ್ಯ.

ಮುತ್ತಕ್ಕಿ : ಅದೆಂತ ವಿಷಯ ಎಣ್ಣೆ.

ಬಿದ್ಧಪ್ಪ : ಎಣ್ಣುವಿ ಮುತ್ತಕ್ಕಿ, ಆ ಕಾಗದತ್‌ರ ಒರ್ ಕಾಪಿ ನೀಕೂ ತಪ್ಪಿ,

ಮುತ್ತಕ್ಕಿ : ನಾನ್ ಪೋಯಿ ಪೋಯಿ ಹೆಬ್ಬೆಟ್ತ್, ವಿದ್ಯ ಪಡ್‌ಚವ ಅಲ್ಲ, ಚಿಕ್ಕವ್ವಂಡ  
ಕಾಟತ್ ನನ್ನ ಸ್ಕೂಲ್ ಬುಡ್‌ತಿತ್, ಮನೆ ಪಣಿಕ್ ಅಯಿಚ್‌ರ್‌ತ್.  
ಇಕ್ಕ ನಿಂಗ ನಾಕ್ ಕಾಗದತ್‌ರ ಕಾಪಿ ತಪ್ಪೀಂದ್ ಎಣ್ಣೆಚೇಂಗಿ  
ನಾನೆನ್ನನೆ ಓದುವ. ಅದೊಂದೂ ಬೋಂಡ, ನಿಂಗಲೇ ಎಂತ  
ವಿಷಯಾಂದ್ ಎಣ್ಣೇರಿ.ಅದೂ ಅಲ್ಲತೆ ನಿಂಗಡ ಸಂಸಾರತ್‌ರ  
ವಿಷಯತ್ ನಾಡ ಅಭಿಪ್ರಾಯ ಎನ್ನಂಗ್, ನಿಂಗ ಎಂತ  
ಮಾಡ್‌ಚೆಂಗಿನೂ ಅಳ್‌ಂದ್ ತೂಕಿತ್, ಚಾಯೋಡೆ ಗ್ಯಾನ ಮಾಡಿತ್  
ಮಾಡುವಿರ, ನಲ್ಲದೇ ಆಯಿತಿಕ್ಕು.

ಬಿದ್ಧಪ್ಪ : ಮುತ್ತಕ್ಕಿ, ನಲ್ಲದೋ ಕೆಟ್ಟದೋ, ನೀನ್ ಎಣ್ಣೆಚೆಂಗಿ ಮಾತ್ರ ಆಪ.  
ಆಚೆಂಗಿ ಒಂದ್ ಮುತ್ತಕ್ಕಿ, ಈ ವಿಷಯತ್ ಮಾತ್ರ, ನೀಡ ಅಭಿಪ್ರಾಯ  
ಇಲ್ಲತೆ ನಾನ್ ಒಂದೂ ಮಾಡುಲೆ.

ಮುತ್ತಕ್ಕಿ : ನಿಂಗ ಎಣ್ಣುವದೊಂದು ನಾಕ್ ಅರ್ಥ ಆಯೆಂದ್ ಇಲ್ಲೆ,  
ಸರಿಯಾಯಿತ್ ಬುಡ್‌ತಿ ಎಣ್ಣೆ, ನಿಂಗಕೆ ಗೊತ್ತುಂದ್ ನಾಕ್ ಈ  
ಒಳಿ ಮರೆ, ಪಚ್ಚಿ ಪರೆವ, ಚಾಡಿ ಪಿಲ್ಲಾಟ ಎಲ್ಲ ಇಲ್ಲೆ. ಶುದ್ಧ  
ಮನಸ್ಸಲ್, ಸ್ವಾರ್ಥ ಇಲ್ಲತೆ, ಬೋರೆ ಅಯಿಂಡ ಸೇವೆ ಮಾಡುವದೇ  
ನಾಡ ಧರ್ಮ, ಅದ್‌ಲೇ ನಾಕ್ ಮುಕ್ತಿ, ದೇವ ದೆಯ್ಯ ಕಂಡವಳಲ್ಲ.

ಅರಿಂಜವಳಲ್ಲ, ಶಕ್ತಿ, ಭಕ್ತಿ ನಾಕಿಲ್ಲೆ, ಕೆಲಸತೇ ತೃಪ್ತಿ ಕಾಂಬ ಈ ಬಡ ಜೀವ. ಪೋಪಕ ನರಳತೆ, ಒಯಿಂಗತೆ, ಒಮ್ಮಕೇ ಪೋಯಿರ್ತೇಂಗಿ ಮದಿ, ಪೊಲಾಕ ಬೈಟ್ ದೇವಳ ಅದೊಂದೇ ಬೋಡುವ ನಾನ್, ಇಂಇಸೊಬ್ಬಂಗ್ ಭಾರ ಆಪಕಾಗ, ಅದೂ ಅಲ್ಲತೆ ನಾಕ್ ದಾರ್ ಉಂಡ್(ಕಣ್ಣೀರ್ ಬಪ್ಪ).

**ಬಿದ್ದಪ್ಪ :** ಎನ್ನಂಗ್ ಅನ್ನನೆ ಎಣ್ಣುವಿಯ, ಕಣ್ಣೀರ್ ಇಡತೆ,, ದೇವ ಎಲ್ಲಾರ್ಕೂ ಒರೋರ್ ಬಟ್ಟೆ ಕಾಟುವ, ದಾರ್ನೋ ಕಷ್ಟ ಪಡುವಕ್ಂದೇ ಪುಟ್ಚೆರುಲೆ. ಎಲ್ಲಾಂಗು ನೀನ್ ಈ ಕಾಗದ ಓದಿತ್ ನೀಡ ಅಭಿಪ್ರಾಯ ಎಣ್ಣೆ. ನೀನ್ ಇಕ್ಕಲೇ ಎಣ್ಣಂಡ, ನೀಕೂ ಪನ್ನೆರಂಡ್ ತಿಂಗ ಟೈಮ್ ಎಡ್ತ. ಅಕ್ಕ ಎಣ್ಣೆಚೆಂಗಿ ಮದಿ. ಎನ್ನಂಗ್ ಎಣ್ಣಕ, ಅಕ್ಕಲೇ ಮಕ್ಕಡ ಅಭಿಪ್ರಾಯ ತಾರೀಂದ್ ಕೇಟಿಯೆ, ಅಕ್ಕೇ ಎಣ್ಣೆ ಪರೋಲೆ(ಮುತ್ತಕ್ಕಿಕ್ ಕಾಗದ ಕೊಡ್ಪ)

**ಮುತ್ತಕ್ಕಿ :** ನಿಂಗ ಎಣ್ಣೆನಾಂಗ್ ಈ ಕಾಗದ ಎಡ್ತವಿ, ನಾಕಂತೂ ಓದುವಕ್ ಗೊತ್ತಿಲ್ಲೆ, ಬೋರೆ ದಾಕು ಕೊಡ್ಪುಲೆ,, ನಿಂಗಲೇ ಅಕ್ಕ ಓದಿತ್ ಫಣ್ಣೆ, ನಾಡ ಅಭಿಪ್ರಾಯ ಅಕ್ಕಲೇ ಎಣ್ಣುವಿ.

**ಬಿದ್ದಪ್ಪ :** ಆಕು, ಅದೂ ನಲ್ಲದೆ, ಇಲ್ಲಿ ನಂಗ ದಂಡಾಳೆ ಇಪ್ಪ, ನೀಡ ಅಭಿಪ್ರಾಯ ಕೇಟ ಪಿಂಇ ನಂಗಡ ಮನಸ್ಸ ಕಲ್ಲ ಬುದ್ದ ನೀರ್ನನ್ನಕೆ ಆಪಕಾಗ. ನಂಗಲೂ ಇಕ್ಕತ ಬದ್ಕನ ಇನ್ನನೇ ಬದ್ಕನ, ಚಾವು ಎಲ್ಲಾರ್ಕೂ ಬಪ್ಪದೇ, ಆಚೆಂಗಿ ಚಾವು ಎಕ್ಕಾಂದ್ ಗೊತ್ತಾಯಿರ್ತೆಂಗಿ ಅವಂಡ ಬದ್ಕ ನರಕ ಆಯಿರುವ.

**ಮುತ್ತಕ್ಕಿ :** ನಿಂಗ ಮುಂಡತಿರಿ, ಚಾವ ವಿಷಯ ಎಲ್ಲ ಎನ್ನಂಗಿಕ್ಕ, ಮಕ್ಕ ಇಕ್ಕ ಬಂತ್ ಪೋಯೆ, ಬದ್ಕಕುವಕ್ ನೋಟಿ ನಿಂಗಕ್ಕೆಂತ ವಯಸ್ಸಾಯೆಂದ್, ಚಾವ ವಿಷಯ.

**ಬಿದ್ದಪ್ಪ :** ಅಕ್ಕು ಅಲ್ಲ, ನಾಕೆಂತ ವಯಸ್ಸಾಯೆಂದ್, ಅರುವದಾಂಗ್ ರಿಟ್ಟಿರ್ ಆಯಿತ್ ಆರೇ ಕಾಲ ಆಯೆ, ದೇವಡ ದಯತು, ಗಂಗುರ, ಅಲ್ಲಿಂಜಿ ನೀಡ ಅಡಿಗೇ ಆರೈಕೆಲ್ ತಡಿ ಚಾಯಿತೆ ಉಂಡ್, ಬೊಳ್ತ ತಲ್ಮಿಕು ಕಲರ್ ಇಟ್ಟಂಡ್ ಗೊತ್ತಾಪುಲೆ.

**ಮುತ್ತಕ್ಕಿ :** (ತೆಳಿಪಂಜಿ) ಬಾಲ್ಯ ಬಂದನ್ನಕೆ ಕಾಂಬ, ಮಕ್ಕ ಬಂದ ಬೀರ್ಯವಾ?

ಬಿದ್ಧಪ್ಪ : ಅಲ್ಲ ಮುತ್ತಕ್ಕೆ, ಬಾಲ್ಯಾಂದ್ ಅಲ್ಲ, ಆಚೆಂಗಿ ಮನಸ್ಸ್ ದುಂಬಾ  
ಹಗುರವಾಯಿತುಂಡ್, ಭಾರ ಎಚ್ಚಕೋ ಕಮ್ಮಿ ಆಚಿ, ಆ ಕಾಗದ  
ಮಕ್ಕಕೂ ನೀಕೂ ತಂದ ಪಿಂಞ, ಅದತೂ ನೀಡ ಅಭಿಪ್ರಾಯ  
ಕೊಟ್ಟಿರ್ತೆಂಗಿ ದುಂಬಾ ಸಂತೋಷ ಆಕು.

ಮುತ್ತಕ್ಕೆ : ಎನ್ನನ್ನನೆಯೋ ಮಕ್ಕಡ ಅಭಿಪ್ರಾಯ ಬಪ್ಪ ಕಾಲಕೇ ತಪ್ಪಕೆಣ್ಣಿತುಳ್ಳಿರಾ,  
ಅಕ್ಕಲೇ ನಾನ್ ಕಾಗದ ಓದಿತ್ ನಾಡ ಅಭಿಪ್ರಾಯ ತಾತೆಂಗಿ  
ಮದಿ ಅಲ್ಲ.

ಬಿದ್ಧಪ್ಪ : ಆಚಿ, ಆಚಿ , ಅಕ್ಕೇ ತಾ, ಪಾರ ಕಾತಾಂಡಿಪ್ಪ ಈ ಜೀವ.

\* \* \* \* \*

## ಸೀನ್ ಮೂಂದ್

- ಮುತ್ತಕ್ಕಿ : ನಿಂಗಡ ಮಕ್ಕ ಕಾಗದ ಎಡ್ತ ಪೋಯಿತ್ ಸುಮಾರ್ ದಿವಸ ಆಚಲ್ಲಾ, ದಾಡೋ ಸದ್ ಸುದ್ದಿ ಇಲ್ಲೆ?
- ಬಿದ್ದಪ್ಪ : ನಾನ್ ಖಡಕ್ ಆಯಿತ್ ಎಣ್ಣೆಯೆ ಅಲ್ಲ, ಇಂಚು ಪನ್ನೆರಂಡ್ ತಿಂಗ ಕತ್ತಣೆ ನಾಡ ಕೂಡೆ ಆಂಡ ವಿಷಯ ಚರ್ಚೆ ಪೋಡ್ ತಕ್ಕೂ ಪರೆಯುವಕ್ ಕಯ್ಯಾಂದ್, ಇಕ್ಕ ಅಯಿಂಗ ಅಯಿಂಗಳೆ ಚರ್ಚೆ ಮಾಡಿಯಂಡಿಕ್ಕು.
- ಮುತ್ತಕ್ಕಿ : ಅಚ್ಚಕ್ ಚರ್ಚೆ ಮಾಡೋಕ್ ಎಂತ ವಿಷಯ ನಿಂಗಡ ಕಾಗದತ್.
- ಬಿದ್ದಪ್ಪ : ನೀಕೂ ಕಾಗದ ತಂದಿಯೆ ಅಲ್ಲ, ನೀನೇ ಓದಿಯಾ...
- ಮುತ್ತಕ್ಕಿ : ನಿಂಗ ನನ್ನ ಹಂಗ್ ಚಿರುವ, ನಾನ್ ಓದಿತಿಲ್ಲೆಂದ್.
- ಬಿದ್ದಪ್ಪ : ಮುತ್ತಕ್ಕಿ ನೀಕ್ ಗೊತ್ತುಳ್ಳನ್ನಕೆ ನಾಕ್ ಅಂತ ಕಿಂಚಿತ್ ಬುದ್ದಿ ಇಲ್ಲೆ, ನೀನೇ ಎಣ್ಣೆಯೆ ನಾನ್ ಪನ್ನೆರಂಡ್ ತಿಂಗ ಕಯಿಂಜ ಪಿಂಚಾವೇ ಆ ಕಾಗದ ಓದುವಂದ್, ಇಕ್ಕ ಬೋಂಡಿಕಿ ಓದ್.
- ಮುತ್ತಕ್ಕಿ : ನಾಕ್ ಓದುವ ಅದೃಷ್ಟ ಇಲ್ಲೆ. ಚೆರ್ಪತೇ ಅವ್ವನ ಕಳ್ಂದಂಡ, ನಾಡವ್ವಂಗ್ ನಾನೊಬ್ಬಳೆ ಮೋವ. ಅಪ್ಪ ಚೆರಿಯ ವಯಸ್ಸು, ಬೋರೆ ಮಂಗಲ ಆಚಿ. ಅಪ್ಪಂಗೂ ಕಷ್ಟ ಇಂಜತ್, ನನ್ನೋ ಚಾಕೊಂಡು, ನಾನೂ ಮೂಂದರೆ ವಯಸ್ಸು, ಮನೆ ನಡತೊಂಡು, ಆಂಗ್ ನೋಟಿತ್ ಚಿಕ್ಕವ್ವನ ಮಂಗಲ ಆಚಿ.

ಬಿದ್ದಪ್ಪ : ಚಿಕ್ಕವ್ವ ನಲ್ಲವ ಅಲ್ಲವಾ?

ಮುತ್ತಕ್ಕಿ : ಇಲ್ಲೆ ಸುರೂಲ್ ಚಾಯಿತೇ ಇಂಜತ್, ಅಪ್ಪಯ್ಯನೂ ನನ್ನ ಚಾಯಿತೇ ನೋಟಿಯಂಡಿಂಜತ್.

ಬಿದ್ದಪ್ಪ : ಪಿಂಇ ಎಕ್ಕ ನೀಡ ದುರಾದ್ಯಷ್ಟ ಸುರು ಆನ?

ಮುತ್ತಕ್ಕಿ : ಚಿಕ್ಕವ್ವಂಗ್ ದಂಡನೇ ಕುಂಇ ಆಕಣೆ ಚಾಯಿತೇ ಇಂಜತ್, ಪೆರಿಯ ಕುಂಇ ಕಣ್ಣ ಕುಂಇ, ನಾಡ ತಮ್ಮಣ, ದಂಡನೆ ಮೂಡಿ ಕುಂಇ, ನಾಡ ತಂಗ. ಆ ತಂಗೆ ಪುಟ್ಟನ ಪಿಂಇ ನನ್ನ ಒರ್ ಶತ್ತುರ ಮಾದರಿ ನೋಟುವಕ್ ಸುರುಮಾಡಿರ್ತ್.

ಬಿದ್ದಪ್ಪ : ಅವಡ ಮೋವಕ್ ಪ್ರತಿಸ್ಪರ್ಧಿಂತ್ ಗ್ಯಾನ ಮಾಡಿತ್ ಅನ್ನನೆ ಬದಲಾಯಿತಿಕ್ಕು.

ಮುತ್ತಕ್ಕಿ : ಆಯಿತಿಕ್ಕು ಕಾಂಬ. ನಾನ್ ಸ್ಕೂಲ್ ಪೋಯೆಂಡ್, ಚಾಯಿತೆ ಪಡ್ಚಂಡಿಂಜ, ಅಪ್ಪನೂ ನನ್ನ ಸ್ಕೂಲ್ ಅಯಿಪ ಇಂಜತ್. ಆಚೆಂಗಿ ನಾಡ ಚಿಕ್ಕವ್ವ, ಅಪ್ಪಂಡ ಕೂಡೆ ಜಗಳ ಮಾಡಿತ್, ಮನೆ ಕೆಲಸಕ್ ಬೋಂಡು, ಚೆರಿಯ ಮಕ್ಕಳ ನೋಟಿಯವಕ್ ಬೋಂಡೂ, ಓದಿತ್ ಎಂತ ಆಂಡಿಯೆ, ಎಣ್ಣಿಯೆಂಡ್ ಸ್ಕೂಲ್ ಬುಡ್ತಿರ್ತ್. ನಾಡ ಬದ್ಕೆರ ದಿಕ್ಕೇ ಬದಲಾಕಿರ್ತ್.

ಬಿದ್ದಪ್ಪ : ಬದ್ಕೇ ಬದಲಾಕಿರ್ತ್, ಎನ್ನನೆ.

ಮುತ್ತಕ್ಕಿ : ಪಿಂಇ ಎಂತ, ನಾನೂ ಓದಿತುಂಡೇಂಗಿ, ಈ ಮನೆ ಕೆಲಸ ಮಾಡಿಯೆಂಡ್ ಜೀವನತ್ನ ಚಾಂದ್ ಕುಟ್ಟ ತಯಿತನ್ನಕೆ ತಯಿ ಕೊಂಡಿಂಜತಾ?

ಬಿದ್ದಪ್ಪ : ನೀನ್ ಓದಿತ್ ಎಂತ ಆಂಡೂಂದ್ ಇಂಜಿಯಾ?

ಮುತ್ತಕ್ಕಿ : ನಾನೂರ್ ಎಸ್.ಎಸ್.ಎಲ್.ಸಿ. ಪಾಸಾಯಿತುಂಡೇಂಗಿ ಒರ್ ಟೀಚರ್ ಆಂಡೂಂದ್ ಭಾರಿ ಆಸೆ ಇಂಜತ್. ಟೀಚರ್ ಆಚೆಂಗಿ ಮಕ್ಕಳ ತಿದ್ದೋಲು, ನಲ್ಲದೆ ಪಡ್ಪಚಿರೋಲು, ಅವು ವಿದ್ಯ ಪಡ್ಚಿತ್, ಬಲ್ಯವು ಆಪಾನ ನೋಟುವದೇ ಸಂತೋಷಂದ್ ಇಂಜ. ಆಚೆಂಗಿ ನಾಡ ವಿದ್ಯವೇ ನಿಂದ್ ಪೋಚಿ.

ಬಿದ್ದಪ್ಪ : ನಿಂಗಡ ಮನೆ ಪಣೆ ಮಾಡಿಯೆಂಡ್, ತಮ್ಮಣ ತಂಗೆನ ನೋಟಿಯೆಂಡ್ ಇಂಜಿಯ, ಪಿಂಇ ಎಂತ ತೊಂದರೆ?

ಮುತ್ತಕ್ಕಿ : ಸುರು ಸುರೂಲ್ ತೊಂದರೆ ಇಂಜಿಲೆ. ಆಚೆಂಗಿ ನಾಡ ತಮ್ಮಣ ತಂಗೆ ಸ್ಕೂಲ್‌ಕ್ ಪೋಪಕ್ ಸುರು ಆನಲ್ಲಿಂಜಿ ನಾಡ ಕಷ್ಟವೂ ಸುರು ಆಚಿ. ತಮ್ಮಣ ಪರೋಲೆ, ಚೆನ್ನಂಗೇಂಗಿ ನಲ್ಲಂವ. ಚಿಕ್ಕವ್ವ ಇಲ್ಲತಿಪ್ಪಕ ಚಾಯಿತೆ ತಕ್ಕ ಪರೆವ ಇಂಜತ್. ಚಿಕ್ಕವ್ವಂಡ ಎದಿಕೆ ಮುಂಡತಿಪ್ಪ ಇಂಜತ್. ತಂಗೆ ಮಾತ್ರ ಅವ್ವಂಡ ಎದಿಕೆಯೂ, ಮರೆಲೂ ಭದ್ರಕಾಳಿ, ಅವ್ವಂಗುಂಜಿ ಪಾಳ್, ನನ್ನ ಕಂಡತೇಂಗಿ ಆಗ.

ಬಿದ್ದಪ್ಪ : ಅವಕೆನ್ನಂಗ್ ನೀಡ ಮೇಲೆ ಅಚ್ಚಕ್ ದ್ವೇಷ.

ಮುತ್ತಕ್ಕಿ : ನಾನ್ ಮೂಂದನೆ ಕ್ಲಾಸ್ ಕತ್ತಣೆ ಸ್ಕೂಲ್‌ಕ್ ಪೋಯಿ, ಅಕ್ಕತ ಪಾಟ ನಾನ್ ಚಾಯಿತೆ ಪಡ್‌ಚಾನಗುಂಡ್, ಗೊತ್ತಿಂಜತ್, ಅವ ವಿದ್ಯತ್ ಚೆನ್ನ ಬಯ್ಯ ನಾನ್ ಸುರೂಲ್ ಅವಕ್ ವಿದ್ಯ ಪಡ್‌ಪುಚಿರುವ. ಅವಡ ತಪ್ಪುನ ತಿದ್ದುವ ಇಂಜ.

ಬಿದ್ದಪ್ಪ : ನೀನ್ ಅವಕುಂಜಿ ವಿದ್ಯತ್ ಹುಷಾರಿಂಜದೆ ನೀಕ್ ಶತ್ತು ಆಯಿರ್‌ತ್.

ಮುತ್ತಕ್ಕಿ : ಅದೊಂದೇ ಅಲ್ಲ, ನಾಕ್ ಅಪ್ಪಂಡ ಬೊಳ್‌ಪು ಕಲರ್, ಅವಕ್ ಅವಡ ಅವ್ವಂಡ ಕರ್‌ನೆರ, ಇದೂ ಬಲ್ಯ ತೊಂದರೆ ಆಯಿರ್‌ತ್.

ಬಿದ್ದಪ್ಪ : ನೀನ್ ಅವಕುಂಜಿ ಚಾಯಿಕರ್ತಿ, ಅದ್‌ಂಗೇ ಪೊಣ್ಣಾಳ್‌ಕ್ ಎಣ್ಣುವ "ಜೆಲಸಿ ದೈ ನೇಮ್" ಹೊಟ್ಟೆ ಕಿಚ್ಚಕ್ ನೀಡ ಜೀವನ ಬದಲಾಯಿರ್‌ತ್ ಕಾಂಬ.

ಮುತ್ತಕ್ಕಿ : ನನ್ನ ಮನೆ ಪಣಿಕೇ ಬೆಚ್ಚಂಡಿತುಂಡೇಂಗಿ ಪರೋಲೆ, ಆಚೆಂಗಿ....

ಬಿದ್ದಪ್ಪ : ಆಚೆಂಗಿ ಎಂತ...

ಮುತ್ತಕ್ಕಿ : ಎನ್ನನೆ ಎಣ್ಣುವ, ಏದೇ ಅವ್ವನೂ, ಬೋಂಡ ಏದೇ ಒರ್ ಪೊಣ್ಣಾ ಜೀವ ಇಂಞೋರ್ ಪೊಣ್ಣಾಕ್ ಮಾಡುವಕಾಗತಂತ ಕೆಲಸ ಮಾಡಿರ್‌ತ್. ನಾನೂ ಒರ್ ಪೊಣ್ಣಾ, ಈ ವಯಸ್ಸಲ್ ಸಹ ನಾಕ್ ಆನ ಎಣ್ಣುವ ಕಯ್ಯತಂತ ಸಂಗತಿ (ಮೊರ್‌ಡುವ).

ಬಿದ್ದಪ್ಪ : ಬೋಂಡ ಮುತ್ತಕ್ಕಿ, ಇಕ್ಕ ಎಣ್ಣಂಡ, ನೀಡ ಮನಸ್ಸ ಸಮಧಾನ ಆನ ಪಿಂಞ ಎಣ್ಣಾ ಪೋ ಇಕ್ಕ ಪಣಿ ನೋಟ್, ನಾನೂ ತೋಟಕ್ ಪೋಪಿ..

## ಸೀನ್ ನಾಲ್

(ನಾರಾಚಿ ಪೊಲಾಕ- ಪನ್ನಂದ್ ಗಂಟೆಕ್-ಫೋನ್ ರಿಂಗಾಪ-ಮುತ್ತಕ್ಕಿ ಎಡ್ತವ)

ಮುತ್ತಕ್ಕಿ : ಹೆಲೋ. ದಾರ್ ತಕ್ಕ ಪರೆವ?

ಚಿಂಗಪ್ಪ : ದಾರಾಚಿಂಗಿ ನೀಕೆನ್ನ? ನಾಡಪ್ಪಂಗ್ ಫೋನ್ ಕೊಡ್..

ಮುತ್ತಕ್ಕಿ : ಅವು ಇಕ್ಕ ಪೇಟಿಂಜಿ ಬಂದಿತ್ ಕಾಲ್ ಕೈ ಕತ್ತಿಯಂಡುಂಡ್, ಚೆನ್ನ ನಿಲ್ಲಿ..

ಚಿಂಗಪ್ಪ : ನಿಂದಂಡೇ ಉಳ್ಳ, ಬೆರಿಯ ಕೊಡ್..

ಮುತ್ತಕ್ಕಿ : ಎನ್ನೇಂಗಿ ಅರ್ಜೆಂಟ್ ವಿಷಯಾನ?

ಚಿಂಗಪ್ಪ : ಅರ್ಜೆಂಟೇ, ನೀಕೆನ್ನಂಗ್ ಅದೆಲ್ಲ, ನೀನ್ ಮನೆ ಆಳ್, ನಿನ್ನ ಎಲ್ಲಿ ಬೆಕ್ಕೊಂಡು ಅಲ್ಲೇ ಬೆಕ್ಕೊಂಡಿಂಜತ್, ನೀಕ್ ಜಾಸ್ತಿ ಮರ್ಯಾದಿ ತಂದದೇ ತಪ್ಪು.

ಮುತ್ತಕ್ಕಿ : ನಾನೆಂತ ಮಾಡಿಯೇಂದ್ ನಿಂಗ ಇನ್ನನೆ ರೇಗುವ, ನಿಂಗ ಎಣ್ಣುವದ್ ನಾಕೊಂದು ಅರ್ಥ ಆಯೆಂಡಿಲ್ಲೆ, ನಿಂಗ ಎನ್ನಂಗ್ ಇನ್ನನೆ ತಕ್ಕ ಪರಂದಂಡುಳ್ಳ (ಕಣ್ಣೀರ್ ಬಪ್ಪ)(ಅಕ್ಕಣೆ ಬಿದ್ದಪ್ಪ ಅಲ್ಲಿಕ್ ಬಪ್ಪ)

ಬಿದ್ದಪ್ಪ : ಎನ್ನಂಗ್ ಮುತ್ತಕ್ಕಿ ಮೊರ್ಟಂಡುಳ್ಳ ದಾರ್ ಫೋನ್ಲ್?

ಮುತ್ತಕ್ಕಿ : ನಿಂಗಡ ಪೆರಿಯ ಮೋಂವ, ನಾಕ್ ಎಂತೆಂತೋ ಬಜ್ಜಂಡುಂಡ್, ಎನ್ನಂಗ್ಂದ್ ನಾಕ್ ದೇವಡಾಣೆ ಗೊತ್ತಿಲ್ಲೆ.

ಬಿದ್ದಪ್ಪ : ಆಚಿ ಆಚಿ, ನಾನ್ ನೋಟುವಿ, ನೀನ್ ಪೋ, ಮೊರ್ಡತೆ, ಫೋನ್ ತಂತ್ ಪೋ,

- ಚಿಂಗಪ್ಪ : ನಾಡ ಕೂಡೆ ತಕ್ಕ ಪರೆವ ಬುಟ್ಟಿತ್ ಆ ಆಳ್ ಪೊಣ್ಣಾಳ್ ಕೂಡೆ ಎಂತ ತಕ್ಕ ನೀಡ.
- ಬಿದ್ದಪ್ಪ : ಅದೆಲ್ಲ ನೀಕ್ ಬೋಂಡ.
- ಚಿಂಗಪ್ಪ : ನೀಡ ಕಾಗದತ್ ಎಳ್‌ದಾನ ನೀಡ ಅಭಿಪ್ರಾಯ ಎಂತ.
- ಬಿದ್ದಪ್ಪ : ಎಲ್ಲಾರ್‌ಕು ಎಣ್ಣೆನನ್ನಕೆ ನೀಕೂ ಅಂದೇ ಎಣ್ಣೆಯೆ , ಉಂಚು ಪನ್ನೆರಂಡ್ ತಿಂಗ ಕಯಿಂಜ ಪಿಂಚ ಮಾತ್ರ ಆಂಡ ವಿಷಯ ನಾಡ ಕೂಡೆ ತಕ್ಕ ಪರೆಯೋಲು. ನಿಂಗಡ ಅಭಿಪ್ರಾಯ ಅಕ್ಕ ಎಣ್ಣೆ, ಇಕ್ಕ ಆಂಡ ವಿಷಯ ನಾಡ ಕೂಡೆ ತಕ್ಕ ಪರೆಯಂಡ.
- ಚಿಂಗಪ್ಪ : ಇಲ್ಲೆ, ಇಕ್ಕಲೇ ನೀಡ ಅಭಿಪ್ರಾಯ ಎಣ್ಣೆಂಡು.
- ಬಿದ್ದಪ್ಪ : ನಾನ್ ಎಣ್ಣೆಯೆ, ಸಾರಿ ಸಾರಿ ಎಣ್ಣೆಯೆ, ನಾನ್ ಪನ್ನೆರಂಡ್ ತಿಂಗ ಆಂಡ ವಿಷಯ ತಕ್ಕ ಪರೆಯುಲೇಂದ್. ಇಕ್ಕಲೂ ಅದೇ ಎಣ್ಣುವಿ, ಸೀತವ್ವ ಮಕ್ಕ ಎಲ್ಲಾ ಎನ್ನನೆ ಉಂಡ್?
- ಚಿಂಗಪ್ಪ : ಅವು ಚಾಯಿತೇ ಉಂಡ್, ಅಲ್ಲತೆ ಅವು ಎನ್ನನೆ ಉಂಡೇಂಗಿ ನೀಕೆನ್ನ, ನೀಕ್ ನೀಡದೇ..
- ಬಿದ್ದಪ್ಪ : ಬೋರೆ ವಿಷಯ ಒಂದೂ ಇಲ್ಲೇಂಗಿ ಫೋನ್ ಕಟ್ ಮಾಡುವಿ, (ಫೋನ್ ಕಟ್ ಮಾಡ್‌ಚಿ)
- ಮುತ್ತಕ್ಕಿ : (ಮೊರ್‌ಟಂಡೇ ಇಪ್ಪ) ನಿಂಗಡ ಪೆರಿಯ ಮೋಂವ ಎನ್ನಂಗ್ ಅನ್ನನೆ ಕಳಿಪ, ನಾಕೆನ್ನಂಗ್ ಅನ್ನನೆ ಬಯ್ಯುವ. ನಿಂಗನ್ನಂಗ್ ಅಚ್ಚಕ್ ಚೆಡಿಲ್ ತಕ್ಕ ಪರಂದಿಯೆ, ಎನ್ನ ವಿಶೆಷ.
- ಬಿದ್ದಪ್ಪ : ಚಿಂಗಪ್ಪ ಎಂತ ಎಣ್ಣೆಚಿಂಗಿಯೂ, ನೀನ್ ಬೇಜಾರ್ ಮಾಡತೆ, ಅವ ಮಾತ್ರ ಅಲ್ಲ, ಬೋರೆ ಏದೇ ಮಕ್ಕ ಮೈಮಕ್ಕ ಎಂತ ಎಣ್ಣೆಚಿಂಗಿನೂ ಮುಂಡತಿಂಜಿರ್. ನಾನ್ ಒಂದ್ ಎಣ್ಣಡ, ಸದ್ಯಕ್, ನೀಕ್ ಬಜ್ಜಿಯೆ ಅಲ್ಲ, ಅಯಿಂಗಡ ಮನೆ ಆಳ್‌ಕ್ ಬಜ್ಜಿಯೆ, ಮುತ್ತಕ್ಕಿಕ್ ಅಲ್ಲಾಂದ್ ಮುಂಡತಿಂಜಿರ್.
- ಮುತ್ತಕ್ಕಿ : ಅದೆನ್ನನೆ ಆಪ, ನಾಕ್‌ಂದ್ ಬಜ್ಜ ಪಿಂಚ ಮುತ್ತಕ್ಕಿಕ್ ಅಲ್ಲತೆ ಮನೆ ಆಳ್‌ಕ್ ಎನ್ನನೆ ಆಪ.
- ಬಿದ್ದಪ್ಪ : ಸಂದರ್ಭ ನೋಟಿತ್ ಅನ್ನನೆ ಮಾಡಿಯವಂಡು, ಅಂದಕೇ ನಂಗಕ್ ನೆಮ್ಮದಿ, ಮನ ಶಾಂತಿ, ಆಂಗ್ ಪೆರಿಯವು ಇನ್ನನೆ ಎಣ್ಣೆತ್ ಎಲ್ಲಾಡ



ಆತ್ಮತೂ ಪರಮಾತ್ಮ ಉಂಡ್, ಪರಮಾತ್ಮಂಡ ಅಂಶವೇ ಇಪ್ಪ ಈ ಜನ್ಮತ್ನ, ದಾರೂ ಬಯ್ಯುವ ಕಯ್ಯಲೆ, ಆಚೆಂಗಿ ಎಲ್ಲಾ ಮನುಷ್ಯಂಗೂ, ಈ ಪ್ರಪಂಚತ್ ಬೋರೆ ಬೋರೆ ಪಾತ್ರ ಇಪ್ಪ.

ಮುತ್ತಕ್ಕಿ : ಎಂತ ಅಡಿಗೇಕ್ ಪಾತ್ರವಾ?

ಬಿದ್ದಪ್ಪ : ಅಲ್ಲ ಮುತ್ತಕ್ಕಿ, ನೀಡ ಮುಗ್ಗ ಮನಸ್ಸ, ಆ ಪಾತ್ರ ಅಲ್ಲ, ನೀನಿಕ್ಕ ಮುತ್ತಕ್ಕಿ, ಮನೆ ಆಳ್, ಸಮಾಜತ್ ಒರ್ ಪೊಣ್ಣ್, ನೀಡ ಅಪ್ಪಂಡ ಮೋವ, ತಮ್ಮಣ ತಂಗೆರ ಅಕ್ಕ, ನೀಕ್ ಮಕ್ಕ ಇಂಜಿತುಂಡೇಂಗಿ ಪೊಣ್ಣ್, ಅವ್ವ, ಅಧಿಕಾರತ್ ಉಳ್ಳಯಿಂಗಕ್ ಕೊಡಿಯತ್‌ರವು, ಅಡಿಯತ್‌ರವು, ಕೂಟ್‌ಕಾರ, ಇನ್ನನೆ ತರೋರಿ ಪಾತ್ರ ಇಪ್ಪ, ಆಂಗೇ ಇಂಗ್ಲಿಷ್‌ಲ್ ಎಣ್ಣುವ "ಸಪರೇಟ್ ಸೋಲ್ ಪ್ರಮ್ ರೋಲ್".

ಮುತ್ತಕ್ಕಿ : ಇದೆಲ್ಲಾ ನಾಕೊಂದೂ ಅರ್ಥ ಆಪುಲೆ, ನಾನ್ ಚೆನ್ನ ಜಾಸ್ತಿ ಓದಿತುಂಡೇಂಗಿ ಅರ್ಥ ಆಪಕಿಂಜತೋ ಎನ್ನೋ.

ಬಿದ್ದಪ್ಪ : ನೀಡ ಓದುವ ಕಾತರ ನಾಕ್ ಅರ್ಥ ಆಪ, ಆನ ಬಯ್ಯ ನೋಟನ, ಇಕ್ಕ ನಾನ್ ಎಣ್ಣಾನಾನ ಅರ್ಥ ಮಾಡ್‌ಚೆಡುವಿ.

ಮುತ್ತಕ್ಕಿ : ಎಣ್ಣೆ ನೋಟನ.

ಬಿದ್ದಪ್ಪ : ಇಕ್ಕ ನನ್ನ ನೋಟ್, ಆತ್ಮ ನಾಕೂ ಒಂದೇ, ಆಚೆಂಗಿ ಪಾತ್ರ ಮಾತ್ರ ಅಪ್ಪ, ಒಡಿಯ, ಮಾಂವ, ಯಜಮಾನ, ಸಮಾಜತ್ ಒರ್ ವ್ಯಕ್ತಿ, ಇದೆಲ್ಲ ನಾಡ ಪಾತ್ರ, ದಾರೆಂಗಿ ಒರ್ ಪಾತ್ರಕ್ ಬಜ್ಜಕ ಇಂಇೋರ್ ಪಾತ್ರಕಲ್ಲ, ನಾಡ ಆತ್ಮಕಂತೂ ಖಂಡಿತಾ ಅಲ್ಲ. ಅದ್‌ಂಗೇ ಎಣ್ಣುವ ಆತ್ಮತ್ನ ಪಾತ್ರತ್‌ಂಜಿ ಬೋರೆ ಮಾಡಿರ್, ಅಕ್ಕ ನೀಕ್ ಬೇಜಾರ್ ಆಪುಲೆ. ನಾನ್ ಸರ್ವೀಸ್‌ಲ್ ಇಪ್ಪಕ ಅಕ್ಕಾಕ್ಕ ಎಣ್ಣುವ ಇಂಜ "ಎಕ್ಕೆಕ್ಕ ಕೆಟ್ಟ ಅನುಭವ ಆಪ, ಅಕ್ಕ ನಾನ್ ಕುರ್ಚಿಂಜಿ ಪೋಯಿರುವಿ.

ಮುತ್ತಕ್ಕಿ : ಕುರ್ಚಿಂಜಿ ನಿಂಗ ಪೋಯಿರ್‌ತೆಂಗಿ, ಓಡಿ ಪೋನನ್ನಕೆ ಆಪುಲಿಯಾ?

ಬಿದ್ದಪ್ಪ : "ನಾನ್" ಪೋಯಿರುವಿ ಎಣ್ಣೆಚೆಂಗಿ ನಾಡ ಆತ್ಮತ್ನ ಕುರ್ಚಿಂಜಿ ಬೋರೆ ಮಾಡಿರುವಿ, ಅಕ್ಕ ನಾಡ ಅಕ್ಕತ ಪಾತ್ರಕ್ ಬಜ್ಜನ್ನಕೆ ಆಪ, ನಾಕ್ ಪಡುಲೆ, ಆನುಂಡೇ ನಾಡ ಸರ್ವೀಸ್‌ನೆಲ್ಲಾ ತೆಳ್‌ಚಂಡೇ ಕಯಿಚ. ಒಮ್ಮ ನಾಡ ಆಫೀಸ್‌ಲ್ ನಾಡ ಅಧಿಕಾರಕ್ ಪ್ರಧಾನ ಕಚೇರಿಂಜಿ ಬಜ್ಜತ್, ನಾಡ ಆಫೀಸ್‌ರ ನಾಡ ಸಬಾರ್ಡಿನೇಟ್‌ಸ್

ಬಪ್ಪಂಜಿ ನಾಕ್ "ಸಾರ್ ಟೆಂಸನ್ ಮಾಡ್ಕೊಬೇಡಿ" ಎಣ್ಣೆಚಿ, ಆಂಗ್ ನಾನ್ ತೆಳ್ಚಂಡ್ "ನನಗೆ ಒಬ್ಬ ಸನ್ನೊ ಇಲ್ಲ, ಟೆನ್ ಸನ್ನೊ ಎಲ್ಲಿಂದ ಮಾಡ್ಕೊಳ್ಳಲಿ" ಎಣ್ಣೆನ. ಅಯಿಂಗಕೇ ಶಾಕ್, ಇದೇ ಕುರ್ಚಿಂಜಿ ನಾನ್ ಪೂರ್ಮೆ ಬಪ್ಪ, ಅಂದಕೇ ನೆಮ್ಮದಿ, ಶಾಂತಿ.

ಮುತ್ತಕ್ಕಿ : ಅಕ್ಕ ನಿಂಗಡ ಪೆರಿಯ ಮೋಂವ ಇಕ್ಕ ಅಯಿಂಗಡ ಮನೆ ಆಳ್ಕ್ ಬಜ್ಜಿಯೆ, ನಾಕಲ್ಲ, ಪಿಂಇ ನಾಕೆನ್ನ ಬೇಜಾರ್.

ಬಿದ್ದಪ್ಪ : ನೋಟ್, ಅರ್ಥ ಮಾಡಿಯಂಡ ಪಿಂಇ ಎಚ್ಚಕ್ ಸುಲಭ ಆಚಿ, ನೀಡ ಮನಸ್ಸ ಎಚ್ಚಕ್ ತೂವೆ ಆಚಿ, ಈನ ಪ್ರಪಂಚತ್ ಎಲ್ಲಾರು ಅರ್ಥ ಮಾಡಿಯಂಡಕ ಎಚ್ಚಕ್ ನೆಮ್ಮದಿ, ಶಾಂತಿಲ್ ಬದ್ಕೊಲು.

ಮುತ್ತಕ್ಕಿ : ಅಕ್ಕು ಅಕ್ಕು, ಅಲ್ಲಾ ನಿಂಗಡ ಮೋಂವ ಎಂತ ವಿಷಯ ತಕ್ಕ ಪರ್ಂದಿಯೆ.

ಬಿದ್ದಪ್ಪ : ಕಾಲ ಬಪ್ಪಕ ನೀಕೇ ಗೊತ್ತಾಪ, ಇಕ್ಕ ನೆಮ್ಮದಿಲ್ ಇರ್.

\* \* \* \* \*

## ಸೀನ್ ಅಂಜೆ

(ನಾರಾಚೆ - ಅಂದೇ ಬೈಟಾಪಕ- ಫೋನ್ ರಿಂಗಾಪ)

ಬಿದ್ದಪ್ಪ : ಮುತ್ತಕ್ಕಿ, ನೀನ್ ಫೋನ್ ಎಡ್ಕತೆ, ತಿಮ್ಮಯ್ಯನೋ ಗೌರಿಯೋ ಫೋನ್ ಮಾಡಿತಿಪ್ಪ, ನೀನ್ ಅಯಿಂಗಡ ಕೈಲ್ ಕೆಣ್ಂಜವದ್ ಬೋಂಡ, ನಾನೆ ನೀಸಿಯವಿ..

ಮುತ್ತಕ್ಕಿ : ಅದೂ ನೇರೆ, ಮುಂಡತೆ ಬೀದಿಲ್ ಪೋಪ ಮಾರಿನ ಒಳ್ಕ್ ಕೂಟಿಯಂಡನ್ನಕೆ"

ಬಿದ್ದಪ್ಪ : ಅಲ್ಲಾ "ಬಾ ಎತ್ತ ನಾಕ್ ಕುತ್ತ" ಎಣ್ಣೆನನ್ನಕೆ, ಆಂಗ್ ಫೋನ್ ನೀನ್ ಎಡ್ಕತೆ.

ತಿಮ್ಮಯ್ಯ : ಎಂತಪ್ಪ ನೀಡ ಅವಸ್ಥೆ, ಈ ವಯಸ್ಸಲ್...

ಬಿದ್ದಪ್ಪ : ನಾನ್ ಮಿಂಞಲೇ ಎಣ್ಣೆಯಲ್ಲಾ, ಆಂಡ ವಿಷಯ ಇಂಞಾ ಪನ್ನೆರಂಡ್ ತಿಂಗ ದಾರೂ ತಕ್ಕ ಪರೆಯುವ ಕಯ್ಯಾಂದ್, ಆಂಡ ವಿಷಯ ಬೋಂಡ, ಮುತ್ತಪ್ಪ ಮಕ್ಕ ಎಲ್ಲಾ ಚಾಯಿತೆ ಉಂಡಾ..

ತಿಮ್ಮಯ್ಯ : ಚಾಯಿತೆ ಇಲ್ಲತಿಪ್ಪಕ್, ಅಯಿಂಗಕ್ ಎನ್ನಾಯೆ, ಚಾಯಿತೇ ಉಂಡ್, ನೀಡ ಅವಸ್ಥೆ....

ಬಿದ್ದಪ್ಪ : ಅಕ್ಕಲೇ ಎಣ್ಣೆಯೆ, ಆಂಡ ವಿಷಯ ಚರ್ಚೆ ಬೋಂಡಾಂದ್, ಬೋರೆ ವಿಷಯ ಒಂದೂ ಇಲ್ಲೇಂಗಿ ಪೊಣ್ಣ್ ಮಕ್ಕಳ ಕೇಟತ್ ಎಣ್ಣ್ ಬೆಪ್ಪಿ.

- ತಿಮ್ಮಯ್ಯ : ಅಪ್ಪಯ್ಯ..
- ಬಿದ್ದಪ್ಪ : ಆಂಡ ವಿಷಯ ಬೋಂಡಾ, ಫೋನ್ ಬೆಪ್ಪಿ..(ಫೋನ್ ಬೆಚ್ಚಿರುವ).
- ಮುತ್ತಕ್ಕಿ : ಅದೆಂತ ಅಂತ ವಿಷಯ, ನಿಂಗಡ ಎಲ್ಲ ಮಕ್ಕ ಫೋನ್ ಮಾಡುವ ಕಾಂಬ.
- ಬಿದ್ದಪ್ಪ : ಮಾಡಡ್ ಬುಡ್ ತಪ್ಪಿತ್ ನೀನ್ ಫೋನ್ ಎಡ್ತಂಡತೆಂಗಿನೂ, ಅಯಿಂಗಕ್ ಫೋನ್ ಕೊಡ್ಪೀಂದ್ ಫೋನ್ ಸೈಡ್ಲ್ ಬೆಚ್ಚಿತ್ ನಾಕೆಣ್ಣ್, ನೀನೊಂದೂ ತಕ್ಕ ಪರೆಯಂಡ, ಗೊತ್ತಾಚಾ.
- ಮುತ್ತಕ್ಕಿ : ಆಚಿ ಆಚಿ, ನಿಂಗಡ ಪೆರಿಯಂವಂಡ ಕೈಂಜಿ ಕಟ್ವನದೇ ಮದಿ, ಮಾಹಾಪೂಜೆ ಆಯಿತ್, ಇಂಚಿ ಬೋಂಡಪ್ಪ.
- ಬಿದ್ದಪ್ಪ : ಮಕ್ಕ ಎಲ್ಲ ನೆಮ್ಮದಿಲ್ ಸಂತೋಷತ್ ಉಂಡ್, ಆ ಸಂತೋಷ ಪಾಳ್ ಮಾಡೊಂಡೂಂದ್ ನಾನ್ ಅಯಿಂಗಕ್ ಈ ವಿಷಯ ಕಾಗದ ಕೊಡ್ತಿತ್ತಿಲ್ಲೆ, ಆಚೆಂಗಿ ನಾಡ ಅನುಕೂಲ, ಅವಶ್ಯಕತೆ, ಸುಖ ಸಂತೋಷ, ಶಾಂತಿ, ನೆಮ್ಮದಿ ದಾಕೂ ಬೋಂಡ. ಆಂಗೇ ಈ ವಿಷಯ ಎಲ್ಲಾರ್ಕೂ ಕಾಗದ ಕೊಡ್ತಿಯೆ.
- ಮುತ್ತಕ್ಕಿ : ಅದೆಂತ ವಿಷಯ ಎಣ್ಣೆಚೆಂಗೆನ್ನೆ ಗೊತ್ತಾಪ. ಕಾಗದ ನಾಕ್ ತಂದಿತುಳ್ಳಿರ, ನಾಕೋ ಓದೋಕ್ ಗೊತ್ತಿಲ್ಲೆ, ತಂದಿತ್ ಎನ್ನ ಪ್ರಯೋಜನ.
- ಬಿದ್ದಪ್ಪ : ನೀನೆ ಅಲ್ಲ ಎಣ್ಣೆಯೆ, ಪನ್ನೆರಂಡ್ ತಿಂಗ ಕಯಿಂಜ ಪಿಂಚಾ ಮಕ್ಕ ಬಂದ ಪಿಂಚಾ ಓದುವಂದ್. ಅನ್ನನೇ ಮಾಡ್, ಅಕ್ಕ ಗೊತ್ತಾಪಲ್ಲ, ನೀಕೆನ್ನ ಇಕ್ಕ ಮುಂಡತಿರ್.
- ಮುತ್ತಕ್ಕಿ : ನಾನೆನ್ನೋ ಮುಂಡತಿಪ್ಪಿ, ಆಚೆಂಗಿ ನಿಂಗಡ ಮಕ್ಕ ನಿಂಗಲ ಮುಂಡತಿಪ್ಪಕ್ ಬುಡುವಂಡು ಅಲ್ಲ, ಕಿತಾಪತಿ ಮಾಡಿಯಂಡೇ ಇಪ್ಪ.
- ಬಿದ್ದಪ್ಪ : ಅವು ಎಂತ ಕಿತಾಪತಿ ಮಾಡ್ಚೆಂಗಿನೂ ನಾಕೊಂದೂ ಆಪುಲೆ, ನೀನ್ ಬೇಜಾರ್ ಮಾಡತೆ, ಈಂಡ ವಿಷಯ ಸದ್ಯಕ್ ಮರ್ಂದರ್.
- ಮುತ್ತಕ್ಕಿ : ಆಚಿ, ನಿಂಗಕ್ ಎನ್ನನೆ ತೋಂದುವ ಅನ್ನನೆ ಮಾಡಿ.
- ಬಿದ್ದಪ್ಪ : ನಾನೆನ್ನೋ ಅನ್ನನೆ ಮಾಡುವಿ, ಆಚೆಂಗಿ ನಾಡ ಮಕ್ಕಡ ಮನೆಲೆಲ್ಲಾ ಮಹಾಭಾರತ, ರಾಮಾಯಣ ನಡಪ. ಆಚೆಂಗಿ ಅಯಿಂಗ ಗ್ಯಾನ

ಮಾಡಿಯಂಡುಳ್ಳ ಶತ್ರು ಮಾತ್ರ ಅಯಿಂಗ್ ಕ್ ಟ್ಪಲೆ.

ಮುತ್ತಕ್ಕಿ : ಅಲ್ಲ ಅಯಿಂಗಡ ಶತ್ರು ದಾರ್, ಎನ್ನಂಗ್ ರಾಮಾಯಣ  
ಮಹಾಭಾರತ ನಡಪ.

ಬಿದ್ದಪ್ಪ : ಇಕ್ಕಲೇ ನೀಕ್ ಅದೆಲ್ಲ ಬೋಂಡ, ಕಾಲ ನೇರ ಬಪ್ಪಕ ನೀಕೇ  
ಗೊತ್ತಾಪ, ಆಂಗೇ ನೀಕ್ ಎಣ್ಣೆಯೆ, ನೀಡ ಅಭಿಪ್ರಾಯ ದುಂಬಾ  
ಮುಖ್ಯಾಂದ್.

ಮುತ್ತಕ್ಕಿ : ಎಂತ ವಿಷಯವೋ ಎನ್ನೋ, ನಾನ್ ರಾಮ ಕೃಷ್ಣಾಂದ್ ಮೂಲೆಲ್  
ಇಪ್ಪಿ.

ಬಿದ್ದಪ್ಪ : (ಮನಸ್ಸಲ್..ನೀನ್ ಮೂಲೆಲ್ ಇಪ್ಪುಲೆ, ನೀಡ ಜಾಗವೇ ಬೋರೆ.

\* \* \* \* \*

## ಸೀನ್ ಆರ್

(ಬೆಂಗಳೂರ್ ಚಿಂಗಪ್ಪಂಡ ಮನೆ- ಪೊಣ್ಣ ಮಕ್ಕ ಉಂಡ್)

ಚಿಂಗಪ್ಪ : ಅಲ್ಲ ಮುತ್ತ, ಅಪ್ಪಂಗ್ ಈ ವಯಸ್ಸಲ್ ಇದ್ ಬೋಂಡು ಇಂಜತಾ, ಅಪ್ಪಂಗಂತ ಕಮ್ಮಿ ಆಯೇಂದ್ ಅಪ್ಪ ಈ ತರ ಎಳ್‌ದಿಯೆ.

ಮುತ್ತವ್ವ : ನಾನ್ ಆ ಕಾಗದತ್‌ನ ಒಮ್ಮ ದಂಡ್ ಕುರಿ ಅಲ್ಲ ಅಂಜಿ ಕುರಿ ಓದಿಯೆ, ಮಾಂವಂಡ ಐಡಿಯ ನಾಕ್ ಅರ್ಥ ಆಯಿತಿಲ್ಲೆ. ನಂಗಳ ಅವಮಾನ ಮಾಡೊಂಡೊಂದ್ ಮಾಡ್‌ಚಾಂದ್, ನಂಗಡೆಲ್ಲ ಮಕ್ಕ ಮರಿಕೂ ಅವಮಾನ, ಎನ್ನನೆ ದಕ್ಕಚಿಟ್ಟವ.

ಚಿಂಗಪ್ಪ : ಅದೇ ನಾನ್ ಎಣ್ಣವ, ಪೋನ್ ಮಾಡ್‌ಚೆಂಗಿ ಅಪ್ಪ ಪೋನ್ ಕಟ್ ಮಾಡಿರ್‌ತ್, ಪನ್ನೆರಂಡ್ ತಿಂಗ ಕಯಿಂಜ ಪಿಂಇ ಮಾತ್ರ ತಕ್ಕ ಪರೆವಲೋ, ಎಂತ ಅಹಂಕಾರ, ಆಸ್ತಿ ಎಲ್ಲ ಸ್ವಯಾರ್ಜಿತ, ಪೆನ್ನನ್ ಬೋರೆ ಉಂಡ್ ಅದೇ ಮದ..

ಮುತ್ತವ್ವ : ದುಡ್ಡ್ ಜಾಸ್ತಿ ಆಯಿತ್, ಎಂತ ಕಮ್ಮೀಂದ್ ಇನ್ನನೆ ಮಾಡುವಕ್ ಪೊರ್‌ಟಿಯೆ, ಅದೂ ಈ ವಯಸ್ಸ ಕಾಲತ್, ಮಾಯಿ ಚತ್ತಿತ್ ನಾಲಂಜಿ ಕಾಲ ಆಯಿತಿಕ್ಕು, ಎಂತ ನೆಣ.

ಚಿಂಗಪ್ಪ : ಇದ್ ನೆಣ ಮಾತ್ರ ಅಲ್ಲಾ ಅಹಂಕಾರ, ದುರಹಂಕಾರ, ತಕ್ಕ ಪರೆಯುಲೇಂದ್ ಬೋರೆ ಎಣ್ಣವ.

ಮುತ್ತವ್ವ : ನಂಗ ತಿಮ್ಮಯ್ಯ ಬಾವನೋ, ಪೊನ್ನಣ್ಣ ಬಾವನೋ ಅಥವ ಗೌರಿ ಮೊಮ್ಮನೋ ಪೋನ್ ಮಾಡಿತ್ ಕೇಕನ, ತಿಮ್ಮಯ್ಯ ಬಾವ ಇಲ್ಲೆ ಉಳ್ಳಲ್ಲ, ಅಲ್ಲಿಕ್ ಪೋಯಿತ್ ಖುದ್ ತಕ್ಕ ಪರೆಯನ.

ಚಿಂಗಪ್ಪ : ನಂಗ ದಾಡ ಕೂಡೆ ಈ ವಿಷಯ ಚರ್ಚೆ ಮಾಡುವಕಾಗಾಂದ್ ಎಣ್ಣೆತಲ್ಲ ಅಪ್ಪ, ನಂಗ ತಕ್ಕ ಪರ್‌ಂದದ್ ಗೊತ್ತಾಯಿರ್‌ತೆಂಗಿ ನಂಗಳ ಬೆಪ್ಪುಲೆ, ಬೋಂಡ, ನಂಗಡ ಅಭಿಪ್ರಾಯ ಬದಲಾಪುಲೆ, ಪನ್ನೆರಂಡ್ ತಿಂಗ ಕಯಿಂಜದೇ ಸರಿ, ಇದ್‌ನೇ ಎಣ್ಣನ, ಇಕ್ಕ ಮುಂಡತಿಕ್ಕ.

(ತಿಮ್ಮಯ್ಯಂಡ ಮನೆ --ಬೆಂಗಳೂರ್‌ಲ್)

ಸೀತವ್ವ : ಮಾಂವ ತಂದ ಕಾಗದ ನಿಂಗ ಓದಿರಾ, ನಾನ್ ಓದ್‌ನ, ನಾಕೊಂದೂ

ಅರ್ಥ ಆಯಿತಿಲ್ಲೆ.

ತಿಮ್ಮಯ್ಯ : ನಾನ್ ಸರಿಯಾಯಿತ್ ಓದಿತಿಲ್ಲೆ, ಎಲ್ಲಿಯಾ ಆ ಕಾಗದ ಕೊಂಡ  
ಬಾ.

ಸೀತವ್ವ : ಇದೊಳಿ, ಕಾಗದ ಓದಿತ್ ನಾಕೂ ಎಣ್ಣೆ ತಾರಿ.

ತಿಮ್ಮಯ್ಯ : (ಕಾಗದ ಓದುವ) ಇದಲ್ ಅರ್ಥ ಆಪಕೆಂತ ಉಳ್ಳೆ, ಅಪ್ಪಂಗ್  
ಎಂತ ಕಮ್ಮಿ ಆಯೇಂದ್, ಇನ್ನನೆ ಮಾಡುವಕ್ ಪೊರ್ಟಿಯೆ,  
ನಾಕಂತೂ ಗೊತ್ತಾಪುಲೆ.

ಸೀತವ್ವ : ಅಲ್ಲ, ಮಾಂವಂಗ್ ಒಂಟಿತನ ಬೋರಾಯಿತಿಕ್ಕು, ಒಬ್ಬನೇ ಅಚ್ಚ  
ಬಲ್ಯ ಮನೆಲ್ ಇರಂಡ. ಆಸ್ತಿ ದುಡ್ಡ್ ಎಂತ ಉಂಡೇಂಗಿ ಎನ್ನ,  
ಸುಖ ನೆಮ್ಮದಿ ಬೋಂಡವಾ, ನಂಗಂತ ಅಯಿಂಗಡ ಕಷ್ಟ ಸುಖಕ್  
ಭಾಗಿ ಆಯೆಂದ್, ನಂಗಡದೂ ತಪ್ಪು ಉಂಡ್,

ತಿಮ್ಮಯ್ಯ : ನೀನ್ ಮುಂಡತಿರ್, ಮಾಂವನ ವಹಿಸಿಯೆಂಡ್ ತಕ್ಕ ಪರೆಯಂಡ,  
ಅಪ್ಪ ಇನ್ನನೆ ಮಾಡ್ಚೆಂಗಿ ನಂಗಕೆಲ್ಲ ಅವಮಾನ, ಸಮಾಜತ್  
ಮಂಡೆ ಎಡ್ತಂಡ್ ನಡಪ ಎನ್ನನೆ.

ಸೀತವ್ವ : ಮಾಂವ ಅನ್ನನೆ ಒಂದು ಮಾಡಿತಿಲ್ಲೆ, ಪನ್ನೆರಂಡ್ ತಿಂಗ ಟೈಮ್  
ತಂತ್, ನಂಗ ನಂಗಡ ಅಭಿಪ್ರಾಯವೂ ಕೇಟಿತ್, ಆಂಗ್ ಮಾಂವನ  
ಮೆಚ್ಚೊಂಡು.

ತಿಮ್ಮಯ್ಯ : ನೀಕೆನ್ನ ಪುಚ್ಚಿ ಪುಡ್ಚಿತಾ, ಮಾಂವಂಡ ಕಡೆ ಇಚ್ಚಕ್ ತಕ್ಕ  
ಪರ್ಂದಂಡುಳ್ಳಿಯಾ, ನೀಡ ಮಾಂವ ಮಾಡ್ನದ್ ನೀಕ್ ಇಕ್ಕ  
ಅರ್ಥ ಆಪುಲೆ, ಬಯ್ಯ ಅರ್ಥ ಆಪ, ಅಕ್ಕ ಒಂದೂ ಮಾಡುವ  
ಕಯ್ಯುಲೆ.

ಸೀತವ್ವ : ಮಾಂವ ಎನ್ನಂಗಾಯಿತ್ ಇನ್ನನೆ ಮಾಡಿಯೇಂದ್ ಎಣ್ಣೆತಿಲ್ಲೆ,  
ನಂಗಡ ಅಭಿಪ್ರಾಯ ಎಣ್ಣುವಾಂಗುಂಜಿ ಮಿಂಞ ನಂಗ ಕೇಕನ,  
ಪಿಂಞ ನಂಗಡ ಅಭಿಪ್ರಾಯ ಎಣ್ಣನ.

ತಿಮ್ಮಯ್ಯ : ಅದ್ ಸರಿ, ಆಚೆಂಗಿ ನಂಗಡ ಅಭಿಪ್ರಾಯ ವಿರೋದವೇ, ಅಚ್ಚಕೆ.

ಸೀತವ್ವ : ನಂಗಡ ಬಾವ ಮೊಮ್ಮಂಗಡ ಅಭಿಪ್ರಾಯ ನೋಟನ.

ತಿಮ್ಮಯ್ಯ : ಇಕ್ಕ ಎನ್ನನೆಯೋ ಪನ್ನೆರಂಡ್ ತಿಂಗ ಕಾಕೊಂಡೂ ಅಚ್ಚಕೆ.

\* \* \* \* \*

## ಸೀನ್ ಏಳು

(ಅಮೆರಿಕಾತ್ ಮಾದಪ್ಪನು ಹಿಳ್ಳಾನು)

ಹಿಳ್ಳ : ದ ಓಳ್ಡ್ ಮ್ಯಾನ್ ಹ್ಯಾಸ್ ಟೇಕನ್ ಅ ವೈಸ್ ಐಂಡ್ ಪೊಸಿಟಿವ್ ಡಿಸಿಸನ್ ಯಾಸ್ ಪರ್ ಹಿಸ್ ಲೆಟರ್.(ಈ ವಯಸ್ಸಲ್ ಈ ಮನುಷ್ಯ ನಲ್ಲೊರ್ ತೀರ್ಮಾನ ಎಡ್‌ತಂಡಿತ್).

ಮಾದಪ್ಪ : ನಾಕೂ ಅದೇ ಆಪ, ನಂಗ ಇಲ್ಲಿ ಇಂಜಂಡ್, ಅಪ್ಪಂಗ್ ಏದ್ ತರತೂ ಸಹಾಯ ಮಾಡುವ ಸ್ಥಿತಿಲ್ ಇಲ್ಲೆ. ಇಕ್ಕಣೆ ಮಾಡಿತೂ ಇಲ್ಲೆ, ದುಡ್ಡ್ ಸಹಾಯ ಮಾಡನಾ ಎಣ್ಣೆಚೆಂಗಿ, ಅಪ್ಪಂಗ್ ಆಂಡ ಅವಶ್ಯಕತೆ ಇಲ್ಲೆ, ಅದೂ ಅಲ್ಲತೆ ಇಂಡಿಯಾತೇ ಉಳ್ಳ ನಾಡ ಅಣ್ಣ ತಮ್ಮಣ ತಂಗೆಯಳೂ ಅಪ್ಪಂಡ ಏದೋರ್ ಸಂದರ್ಭತೂ ಆಯೆಂಡಿಲ್ಲೆಂದ್ ಕಾಂಬ, ಆಂಗೇ ಅಪ್ಪ ಇನ್ನನೆ ತೀರ್ಮಾನ ಮಾಡಿತಿಕ್ಕು., ಬುಡ್, ಅಪ್ಪ ಅನ್ನನೇಂಗಿ ಸಂತೋಷತ್ ಇರಡ್. ನಂಗ ಇಂಚೊಬ್ಬಂಡ ಸಂತೋಷಕ್ ಎನ್ನಂಗ್ ಕಲ್ಲ ಇಡುವ.

ಹಿಳ್ಳ : ಈಫ್ ಹಿ ಫೈಂಡ್ಸ್ ಪೀಸ್ ಇನ್ ದಿಸ್, ಲೆಟ್ ಹಿಮ್ ಹ್ಯಾವ್ ಇಟ್. (ಅಕ್ಕು, ಅವಂಗ್ ಇದಲ್ ನೆಮ್ಮದಿ ಕಾಂಬಾಚೆಂಗಿ, ಕಾಂಗಡ್ ಬುಡ್)

ಮಾದಪ್ಪ : ನಂಗ ಎನ್ನನೆಯೋ ಪನ್ನೆರಂಡ್ ತಿಂಗ ಕಾಕೊಂಡು ಅಲ್ಲ, ಅಕ್ಕಣೆ ನೋಟನ ಎನ್ನಾಪಾಂದ್.

ಹಿಳ್ಳ : ಟೈಮ್ ಹ್ಯಾಸ್ ಆನ್ಸರ್ ಟು ಎವರಿ ಕೊಶ್ಚನ್. (ಸಮಯ ಎಲ್ಲ ಪ್ರಶ್ನೆಕೂ ಉತ್ತರ ತಪ್ಪು) ಲೆಟ್ ಅಸ್ ವೈಟ್(ನಂಗ ಕಾಕನ).

ಮಾದಪ್ಪ : ನಂಗಕೂ ಬೋರೆ ಬಟ್ಟೆ ಇಲ್ಲೆಲ್ಲ. ನಂಗ ನಂಗಡ ಉಂಚೋರ್



ರಜ ಕತ್ತಣೆ ಕಾತಿತೇ ಕಾಕೊಂಡು.

ಹಿಳ್ಳೆ : ಯೆಸ್, ವಿ ಹ್ಯಾವ್ ಟು ವೈಟ್, ಲೆಟ್ ಅಸ್ ವೈಟ್. (ಅಕ್ಕು ನಂಗ ಕಾತಿತೇ ಕಾಕೊಂಡು, ಕಾಕನ).

(ಅದೇ ಸಮಯತ್ ಹೈದರಾಬಾದ್‌ಲ್ ಗೌರಿ ಸುಧಾಕರ್‌ರ ಮನೆಲ್)

ಗೌರಿ : ಅಪ್ಪ ಈ ವಯಸ್‌ಲಿನ್ನನೆ ಮಾಡಂಡಿಂಜಿಲೆ.

ಸುಧಾಕರ್ : ಎನ್ನಂಗ್ ಅನ್ನನೆ ಎಣ್ಣುವಿಯಾ, ನಾಕ್ ಇದ್‌ಲ್ ತಪ್ಪೊಂದೂ ಕಾಂಬುಲೆ.

ಗೌರಿ : ನೀಕೊಂಡು ತಪ್ಪು ಕಾಂಬುಲೆ, ಈ ವಯಸ್‌ಲ್ ಇನ್ನನೆ ಮಾಡ್‌ಚೆಂಗಿ, ನಂಗ ಸಮಾಜತ್ ಎನ್ನನೆ ನಡಪ.

ಸುಧಾಕರ್ : ಗೌರಿ, ನೀನ್ ನನ್ನ ಮಂಗಲ ಆಪಕ, ನೀನ್ ನೀಡ ಅಪ್ಪ ಅಮ್ಮ ಅಣ್ಣಂಗಡ ತಕ್ಕ ಕೇಟಿಯಾ? ಅಯಿಂಗಡ ಮರ್ಯಾದಿರ ಬಗ್ಗೆ ನೀನ್ ಎಚ್ಚಕ್ ಬೆಲೆ ಕೊಡ್‌ತಿತುಳ್ಳಿಯ, ಸಮಾಜ ಅಕ್ಕಲೂ ಉಂಡ್ ಇಕ್ಕಲೂ ಉಂಡ್, ಅಕ್ಕ ಆನನ್ನಕೆ ಇಕ್ಕಲೂ ಆಪ.

ಗೌರಿ : ಅಕ್ಕ, ನಾನ್ ನಿನ್ನ ಮಂಗಲ ಆನಾಂಗ್ ಅಪ್ಪ ಇನ್ನನೆ ಮಾಡಿ ಯೆಂಡುಳ್ಳಿದಾ?

ಸುಧಾಕರ್ : ಚೆ, ನೀನ್ ಎನ್ನಂಗ್ ಅನ್ನನೆ ಗ್ಯಾನ ಮಾಡುವಿಯಾ? ನೀನ್ ಅನ್ನನೆ ಗ್ಯಾನ ಮಾಡುವಕಾಗ, ನೀಡಪ್ಪ ಅನ್ನನೆ ಮಾಡುವಾಯಿ ತುಂಡೇಂಗಿ, ಇಕ್ಕಣೆ ಇನ್ನನೆ ಇಪ್ಪಕಿಂಜಿಲೆ, ನೀಡಪ್ಪ ಇಕ್ಕ ಮಾಡಿ ಯೆಂಡುಳ್ಳಾನ, ನೀನ್ ಅಯಿಂಗಡ ಸ್ಥಾನತ್ ನಿಂಶ್ ನೋಟೊಂಡು, ನೀಡ ನೇರೇ ನೋಟ್‌ಚೆಂಗಿ ಪೋರ.

ಗೌರಿ : ಅಪ್ಪಂಗ್ ಎಂತ ಕಮ್ಮಿ ಮಾಡಿಯೇಂದ್ ಅಪ್ಪ ಇನ್ನನೆ ಮಾಡುವಕ್ ಪೋರ್‌ಟಿಯೆ?

ಸುಧಾಕರ್ : ಮಾಂವಂಗ್ ಇಕ್ಕಾಯಿತ್ ಸರ್ಪ ಸುತ್ ಆಚಿ, ಮನೆಲೇ ಒಬ್ಬನೇ ಮದ್ದ್ ಮಾಡಿಯೆಂಡಿಂಜತ್, ನಿಂಗ ದಾರೇಂಗಿ ಪೋಯಿತ್ ಅಂವಂಡ ಚಾಕರಿ ಮಾಡಿರಾ, ಇಲ್ಲೆಲ್ಲಾ, ಇಕ್ಕ ಅವು ಎಂತೋರ್ ತೀರ್ಮಾನ ಎಡ್‌ತಂಡ್ ನೆಮ್ಮದಿ ಕಂಡಕ, ನಿಂಗಕ್ ತೋಲಿಯಕೇಡ್, ನಿಂಗಕೇ ಇಣಾಣ ಆಂಡು, ಅಯಿಂಗಕಲ್ಲ, ನಾನ್ ಖಂಡಿತಾ ಮಾಂವಂಗೇ ಸಪ್ಪೋರ್ಟ್ ಮಾಡುವ.

ಗೌರಿ : ಎಂತ ನೀನ್ ಎಣ್ಣಿಯೆಂದುಳ್ಳಾಂದ್ ನೀಕ್ ಗೊತ್ತುಂಡಾ, ಅಕ್ಕು  
ಸರ್ಪ ಸುತ್ತ್ ಆಯಿತಿಪ್ಪಕ, ನಂಗಕ್ ಪೋಪ ಕಯಿಂಜಿತಿಲ್ಲೆ, ಮಕ್ಕಕ್  
ಪರೀಕ್ಷೆ, ನಂಗಕೂ ರಜ ಕಟ್ಟಿತಿಲ್ಲೆ, ಅದ್‌ಂಗ್.

ಸುಧಾಕರ್ : ಮಕ್ಕಡ ಪರೀಕ್ಷೆ, ನಂಗಡ ರಜತ್‌ನ ಪಾರ ಕಾತಾಂಡ್ ಸರ್ಪ  
ಸುತ್ತ್ ಕಾಯಿಲ ಇಪ್ಪಲೆ, ಅಕ್ಕ್ ಇಂಜ ಒಬ್ಬಂಗ್ ದಾರು ಸಹಾಯ  
ಮಾಡಿತಿಲ್ಲೆ, ಆಂಗ್ ಮಾಂವ ಇಕ್ಕ ಮಾಡುವದ್ ಸರಿ, ಮಾಂವನ  
ನಿಂಗ ಮೆಚ್ಚಂಡು, ನಿಂಗಡ ಅಭಿಪ್ರಾಯ ಕೇಪ ನಲ್ಲರಿಕೆ ಇಂಜೂ  
ಬೆಚ್ಚಂಡಿತ್, ಕೇಕತೆ ಒಂದೂ ಮಾಡಿತಿಲ್ಲೆ.

ಗೌರಿ : ನೀನ್ ಎಂತೇಂಗಿ ಎಣ್ಣೆ, ನಾನಂತು ಬೆಲಕುವದ್ ನೇರ್.

ಸುಧಾಕರ್ : ನಾನ್ ಸಪ್ಪೋರ್ಟ್ ಮಾಡುವದೂ ಅಚ್ಚಕೇ ಸತ್ಯ.

\* \* \* \* \*

## ಸೀನ್ ಎಟ್ಸ್

- ಮುತ್ತಕ್ಕಿ : ನಿಂಗ ಎಣ್ಣೆನ ತಕ್ಕೆಲ್ಲ ಕೇಟಿತ್, ನಿಂಗ ಅರ್ಥ ಮಾಡ್ ಚೆಟ್ಟ ಪಿಂಇ ನಾಡ ಮನಸ್ ಚೆನ್ನ ಹಗುರವಾಯಿತ್.
- ಬಿದ್ದಪ್ಪ : ಅಕ್ಕ, ನೀಡ ಕಥೆ ಎಣ್ಣುವಚ್ಚಕ್ ಹಗುರ ಆಯಿತಿಕ್ಕು ಅಲ್ಲಾ?
- ಮುತ್ತಕ್ಕಿ : ಹಗುರ ಎನ್ನೋ ಆಯಿತ್, ಆಚೆಂಗಿ, ನಾಡ ಕಥೆಲ್ ಉಳ್ಳ ಎಲ್ಲಾ ವ್ಯಥೆಯೇ.
- ಬಿದ್ದಪ್ಪ : ಎಲ್ಲಾಡ ಕಥೆಲೂ ಸುಖ, ಸಂತೋಷ, ವ್ಯಥೆ ಎಲ್ಲಾ ಇಪ್ಪ. ಆಚೆಂಗಿ ಅದೇ ಜೀವನತ್ನ ನಂಗ ವ್ಯಥೆರ ಕಾರಣ ಕಂಡ್ ಪುಡಿಪಂಜಿ, ಆನ ನೀಸಿಯಂಡತೇಂಗಿ ಸಂತೋಷ ನೆಮ್ಮದಿ ನಂಗಡಾಪ, ಆಚೆಂಗಿ ಅತಿ ಆಸೆಕ್, ಬೋಂಡತ ಚಟಕ್, ಹೊಟ್ಟೆ ಕಿಚ್ಚಕ್ ಮದ್ದಿಲ್ಲೆ, ಅದ್ ಬುಟ್ಟಾಕ್, ಇಕ್ಕ ನೀಡ ಕಥೆರ ಮಿಂಇತ ಭಾಗ ಎಣ್ಣೆ.
- ಮುತ್ತಕ್ಕಿ : ನಾನಕ್ಕ ಬಲ್ಯವಳಾಯಿತ್ ಆರೇಳ್ ತಿಂಗ ಆಯೆ, ನಾಕಕ್ಕ ಪದಿಮೂಂದ್ ಪದಿನಾಲ್ ವಯಸ್ ಆಯಿತಿಕ್ಕು.
- ಬಿದ್ದಪ್ಪ : ಅಕ್ಕ ಎಂತಾಚೆ?
- ಮುತ್ತಕ್ಕಿ : ಅಕ್ಕ ಚೆಕ್ಕವ್ವಂಡ ದೂರತ ಬೆಂದ್ಕ ಬೊಂಬಾಯಿಂಜಿ ಬಾತ್, ಅವನ ಮನುಷ್ಯ ಎಣ್ಣುವಾಂಗುಂಜಿ ಪಿಶಾಚಿ ಎಣ್ಣೋಲು. ಅವನೂ ಚೆಕ್ಕವ್ವನೂ ಪಿಸು ಪಿಸೂಂದ್ ತಕ್ಕ ಪರೆವ ಇಂಜತ್, ನಾಕಾಪ ಇಂಜತ್ ಇವು ಎಂತೋ ಮಸಲತ್ ಮಾಡಿಯೇಂಡುಂಡ್ಂದ್. ಆಚೆಂಗಿ ಎಂತ ವಿಷಯಾಂದ್ ಗೊತ್ತಾಯಿಲೆ, ಅವನೋ ನಾಡ ಕೂಡೆ ದುಂಬಾ ನಲ್ಲರಿಕೆಲ್ ಕಳಿಪ ಇಂಜತ್. ಅದ್ ತೋರಿಕೇಂದ್ ನಾಕ್ ಗೊತ್ತಾಪಕ್ ಬಲ್ಯ ಸಮಯ ಬೋಂಡಿಯಾಯಿಲೆ.
- ಬಿದ್ದಪ್ಪ : ಚೆಕ್ಕವ್ವಂಡದು ಅವಡ ಬೆಂದ್ಕಡದೂ ಎಂತ ಮಸಲತ್ ಗೊತ್ತಾಚೆ,

ನೀಡ ಅಪ್ಪಂಗ್ ಎನ್ನೇಂಗಿ ಗೊತ್ತಾಚೆ?

ಮುತ್ತಕ್ಕಿ : ಪಾಪ ಅಪ್ಪಯ್ಯಂಗ್ ಗೊತ್ತಾಯಿಲೆ, ನಾಕೂ ಗೊತ್ತಾಯಿಲೆ, ಆಚೆಂಗಿ, ಒನ್ನಾಂದ್, ಚಿಕ್ಕವ್ವ ಅಪ್ಪಯ್ಯಂಡ ಕೂಡೆ ನಾಡ ಬಗ್ಗೆ ಬಯ್ಯುವಕ್ ಸುರು ಮಾಡ್ಚಿ, ಬಯ್ಯಂಜಿ ನನ್ನ ಬೊಂಬಾಯಿಕ್ ಚಿಕ್ಕವ್ವಂಡ ಬೆಂದ್ಕಡ ಕೂಡೆ ಅಯಿಪಕ್ ಎಣ್ಣೆಚಿ. ಅಪ್ಪ ಸುರೂಲ್ ಒತ್ತಂಡ್ಲೆ, ಬಯ್ಯಂಜಿ ಚಿಕ್ಕವ್ವಂಡ ಬಾಯಿರ ಎದಿಕೆ ಕಯ್ಯತೆ ಮನಸ್ಸಿಲ್ಲತ ಮನಸ್ಸಲ್ ಒತ್ತಂಡತ್.

ಬಿದ್ದಪ್ಪ : ಅಕ್ಕ ನೀನ್ ಎಂತ ಮಾಡಿಯ, ನೀನ್ ಅಪ್ಪಂಗ್ ಎಣ್ಣೆಂಡಿಂಜತ್.

ಮುತ್ತಕ್ಕಿ : ಅಪ್ಪ ಭಾರೀ ಬೇಜರತ್ ನಾಕ್ ಈ ಸುದ್ದಿ ಎಣ್ಣೆಚಿ, ನಾನ್ ಮೊರ್ಟಂಡ್ ನನ್ನ ಅಯಿಕಂಡಾ ಎಣ್ಣೆನ.

ಅಪ್ಪನೂ ಚಿಕ್ಕವ್ವಂಗ್ ನನ್ನ ಅಯಿಪದ್ ಬೊಂಡಾಂದ್ ಎಣ್ಣೆಚಿ. ಚಿಕ್ಕವ್ವಂಗ್ ದುಡ್ಡ್ ಕೊಡ್ತಿತ್, ಅವಡ ಬೆಂದ್ಕ ಒಳ್ಳೆಕ್ಟಿಂಡಿಂಜತ್, ಚಿಕ್ಕವ್ವ ಜಗಳ ಮಾಡಿತ್, ರಂಪ ಮಾಡಿತ್, ಅಪ್ಪನ ಒಪ್ಪಚಿಟ್ಟತ್.

ಬಿದ್ದಪ್ಪ : ನೀನೆನ್ನ ಮಾಡಿಯೆ?

ಮುತ್ತಕ್ಕಿ : ಅಪ್ಪ ಒಬ್ಬನೇ ಇಪ್ಪಕ ನಾನ್ ಮೊರ್ಟಂಡ್ ಪೋಯಿತ್, ನಾನ್ ಪ್ರಾಣ ಎಡ್ತವಿ ಆಚೆಂಗಿ ಅವಂಡ ಕೂಡೆ ಮಾತ್ರ ಪೋಪುಲೆ ಅಥವಾ ಈ ಮನೆಂಜಿ ಓಡಿ ಪೋಯಿತ್ ಎಲ್ಲಿಯೇಂಗಿ ದಾಡೇಂಗಿರಲ್ಲಿ ಕೂಲಿ ನಾಲಿ ಮಾಡಿತ್ ಬದ್ಕುವಿ, ಆಚೆಂಗಿ ಅಲ್ಲಿಕ್ ಮಾತ್ರ ಪೋಪುಲೆ, ಅನ್ನನೆ ನನ್ನ ಅಯಿಚಕ ನಾನ್ ನಾಡ ಪ್ರಾಣ ಎಡ್ತವಿ.

ಬಿದ್ದಪ್ಪ : ಅಕ್ಕ ಅಪ್ಪ ಎನ್ನ ಮಾಡ್ಚಿ.

ಮುತ್ತಕ್ಕಿ : ನಾಡ ಅಪ್ಪ ನನ್ನ ತಬ್ಬಿಯಂಡ್, ಅಪ್ಪಂಗ್ ಗೊತ್ತುಳ್ಳ ಒರ್ ಕೊಡವಂಡಲ್ಲಿಕ್ ನನ್ನ ಬಸ್ಸಕ್ ದುಡ್ಡ್ ತಪ್ಪಂಜಿ ಅಯಿಚಿರತ್. ದಾರ್ಕೂ ಗೊತ್ತಾಯಿಲೆ, ಎಲ್ಲಾರು ನಾನ್ ಓಡಿ ಪೋಯೇಂದ್ ಗ್ಯಾನ ಮಾಡಿಯಂಡತ್.

ಬಿದ್ದಪ್ಪ : ನಿನ್ನ ಅಲ್ಲಿ ಅಪ್ಪಂಡ ಪರಿಚಯಸ್ತ ಜಾಯಿತೆ ನೋಟಿಯಂಡತಾ?

ಮುತ್ತಕ್ಕಿ : ಅವು ಭಾರಿ ನಲ್ಲ ಜನ, ಅಯಿಂಗಡ ಪೋಣ್ಣು ನಲ್ಲ ಲಕ್ಷ್ಮಿ ಕಳೆ ಉಳ್ಳವು, ಭಾರೀ ನಲ್ಲವು, ನಾನ್ ಅಯಿಂಡಲ್ಲಿ ದಂಡ್ ಮೂಂದ್ ಕಾಲ ಸೆಮ್ಮದಿಲ್ ಇಂಜ.

ಬಿದ್ಧಪ್ಪ : ಪಿಂಞ ಎನ್ನಾಚೆ?

ಮುತ್ತಕ್ಕಿ : ನಾಡ ದುರಾದ್ಯಪ್ಪ, ದೂರತ್ ಓದಿಯಂಡಿಂಜ ಅಯಿಂಗಡ ಮೋಂವ ರಜತ್ ಬಾತ್. ಅವನ ಕಾಂಬಕೇ ನಾಕ್ ಒರ್ ತರಾ ಪೋಡಿ ಆಪ ಇಂಜತ್. ಅವಂಡ ಪೂರ್ಪಾಡೂ, ತಲ್ಮಿರ ಕ್ರಾಪ್, ಕಣ್ಣ್ ಕನ್ನಡಿ, ಎಲ್ಲಾ ಬಲ್ಲಾದೆ. ಅಪ್ಪಂಗ್ ಒರೇ ಮೋಂವ, ಕೆಟ್ಟ ವಾಸನೆ ಉಳ್ಳ ಸಿಗರೇಟ್ ಬಲಿಪ ಇಂಜತ್.

ಬಿದ್ಧಪ್ಪ : ವಾಸನೆರ ಸಿಗರೇಟ್ ಅಲ್ಲ, ಅವ ಅಮಲ್ಕ್ ಗಾಂಜವೋ, ಚರಸ್ಸೋ ಉಪಯೋಗ್‌ಚೆರುವ ಇಂಜತ್ ಕಾಂಬ.

ಮುತ್ತಕ್ಕಿ : ಅದ್ ಎನ್ನಂಗ್ ಬಲಿಪ.

ಬಿದ್ಧಪ್ಪ : ಅದ್ ಕಳ್ಳ ಕುಡ್‌ಚನ್ನಕೆ ಚೊಕ್ಕುವ.

ಮುತ್ತಕ್ಕಿ : ಆ ಸಿಗರೇಟ್ ಬಲಿಚದು ಅವ ಬಲ್ಲಾದೆ ಕಳಿಪ ಇಂಜತ್, ಅವಂಡ ನೋಟಲ್ ನಾಕ್ ಸಹಿಸೋ ಕಯ್ಯತಾಪ ಇಂಜತ್.

ಬಿದ್ಧಪ್ಪ : ಆ ಸಿಗರೇಟ್ ಬಲಿಚಕ ಅವಂಡ ಎದೆ ಗೂಡ್ ಪಾಳಾಯಿರುವ,(ಸ್ವಾಸ ಕೋಶ,) ತೊಂಬೆ, ಪೂರ್ವೆ ಎಲ್ಲಾ ಒಣಂಗಿ ಪೋಪ, ಆ ಅಮಲ್ಕ್ ಅವ ಎನ್ನೇಂಗಿ ಎಡವಟ್ಟ್ ಮಾಡ್‌ಚೆ?

ಮುತ್ತಕ್ಕಿ : ಒನ್ನಾಂದ್ ಅವ ದಂಡ್ ಮೂಂದ್ ಸಿಗರೇಟ್ ಬಲಿಚಿತ್, ನನ್ನ ಬಲಾತ್ಕಾರ ಮಾಡುವಕ, ನಾನ್ ಜೋರ್‌ತೆ ಕೂತ್ ಕೊಡ್‌ತ, ಅಕ್ಕ ಅವಂಡ ಅಪ್ಪ ಅವ್ವ ನಾಡ ಪುಣ್ಯಕ್ ಬಂತ್ ನನ್ನ ಬುಡ್‌ತ್‌ಚಿ.

ಅಕ್ಕ ಅಯಿಂಗಕ್ ಗೊತ್ತಾಯೆ ಅಯಿಂಗಡ ಮೋಂವ ಅಂತ ಸಿಗರೇಟ್ ಬಲಿಪದ್. ಪಿಂಞ ಅವನ ಅದ್ ಏದೋ ಆಸ್ಪತ್ರೆಕ್ ಕೂಟಿತ್ ಅವಂಡ ಆ ಅಭ್ಯಾಸತ್‌ನ ಬುಡ್‌ತುವಕ್ ಬುಟ್ಟತ್. ಆ ನಾಡ ಸಾಹುಕಾರ ನಾಕ್ ನಾಡ ಅಕ್ಕಣೆರ ಸಂಬಳ ತಪ್ಪಂಜಿ ಅಯಿಂಗಡ ಪರಿಚಯಸ್ತಂಡಲ್ಲಿಕ್ ಅಯಿಚತ್, ನಾನ್ ಅಲ್ಲೇ ಇಪ್ಪಿ ಎಣ್ಣೆನಾಂಗ್ ಅವು ಎಣ್ಣೆನ ಒರ್ ತಕ್ಕ, ಇಂದೂ ನಾಡ ಮಂಡೆಲ್ ಕೊರ್‌ಂದಂಡೇ ಉಂಡ್.

ಬಿದ್ಧಪ್ಪ : ಅದ್ ಎಂತ ತಕ್ಕ,

ಮುತ್ತಕ್ಕಿ : "ನಂಗಡ ಮೋಂವ ಮಾಡ್‌ನ ತಪ್ಪುನಗುಂಡ್ ನೀಡ ಮೂಡ್

ಪೋಡ್, ನೀಡ ಕಣ್ಣ್ ನೋಟುವ ಧೈರ್ಯ ಕಳ್ಂದಂಡತ್"  
 ನಿನ್ನ ನೋಟುವಕ ನಂಗಳ ಕುತ್ನನ್ನಕೆ ಆಪ. ಆಂಗ್ ನೀನ್  
 ಇಲ್ಲಿಂಜಿ ಪೋಯಿರ್. ನೀಡ ಬದ್ಕ್ ಆ ಸಾಹುಕಾರಂಡಲ್ಲಿ  
 ಚಾಯಾಡ್ಂದ್ ಆಶೀರ್ವಾದ ಮಾಡಿತ್, ಅಯಿಚಿ ತಪ್ಪ, ಎಣ್ಣಿತ್  
 ನನ್ನ ಪುದಿಯ ಸಾಹುಕಾರಂಡಲ್ಲಿಕ್ ಅಯಿಚತ್.

ಬಿದ್ದಪ್ಪ : ಅಕ್ಕ ನೀಕ್ ಪದಿನೇಳ್ -ಪದಿನೆಟ್ ವಯಸ್, ಮಂಗಲತ್ರ ಆಸೆ  
 ನೀಕಾಯಿಲಿಯಾ, ದಾರೇಂಗಿನ ನೀನ್ ಇಷ್ಟ ಪಟ್ಟಿಯಾ, ಅಲ್ಲ  
 ದಾರೇಂಗಿ ನಿನ್ನ ಇಷ್ಟ ಪಟ್ಟಿತಾ?

ಮುತ್ತಕ್ಕಿ : ವಯಸ್ಸಕ್ ಸಹಜವಾನ ಆಸೆ, ನಾಕೂ ಆಚಿ. ಆಚೆಂಗಿ ಆನ  
 ಕಾರ್ಯಗತ ಮಾಡುವಕ್ ನಾಕ್ ಅಪ್ಪ ಚಿಕ್ಕವ್ವ ತಮ್ಮಣ ತಂಗೆ  
 ಇಂಜತೆಂಗಿನೂ, ನಾನ್ ತಬ್ಬಲಿ. ಅಕ್ಕತ್ರ ನಾಡ ಮನಸ್ಸರ  
 ಸ್ಥಿತಿನ ಎಣ್ಣುವಕಯ್ಯತಂದ್, ಪೋಡಿಯೋ, ಒರ್ ತರ  
 ಅಪನಂಬಿಕೆಯೋ, ಒಳ್ಳೆ ಒರ್ ತರ ಕುಷಿ, ತುಮುಲ ದುಮ್ಮಾನ  
 ಗೊತ್ತಪ್ಪಲೆ.

ಬಿದ್ದಪ್ಪ : ಅಕ್ಕ ಎನ್ನಾಚಿ?

ಮುತ್ತಕ್ಕಿ : ನಿಂಗಕ್ ಭಾರಿ ಕಾತರ ಕಾಂಬಲ್ಲಾ?

ಬಿದ್ದಪ್ಪ : ಅನ್ನನೆ ಒಂದೂ ಇಲ್ಲೆ, ಒರ್ ಕೆಟ್ಟ ಕುತೂಹಲ, ಅಚ್ಚಕೆ.

ಮುತ್ತಕ್ಕಿ : ನಾನ್ ಪಣಿ ಕೆಜ್ಜಂಡಿಂಜ ಸಾಹುಕಾರಂಡ ತೋಟತ್ರ ರೈಟರ್,  
 ಕೊಡವನೇ, ನನ್ನ ಇಷ್ಟ ಪಟ್ಟಿತ್, ನಾಡ ಸಾಹುಕಾರಂಗ್ ಎಣ್ಣಿತ್,  
 ಸಾಹುಕಾರ ನಾಕ್ ಎಣ್ಣೆಚಿ. ಒರೇ ಸಾಹುಕಾರಂಡಲ್ಲಿ ಇಪ್ಪಾನಗುಂಡ್  
 ನಾನೂ ಒತ್ತಂಡ. ಧರ್ಮಸ್ಥಳತ್ ಪೋಯಿತ್ ಮಂಗಲ ಆಯೆಂಡ್  
 ಬಾತ್, ಅವಂಗೂ ದಾರೂ ಇಂಜಿಲೆ, ನಾಕೂ ಇಂಜಿತೂ ಇಂಜಿಲೆ,  
 ದಂಡಾಳೂ ತಬ್ಬಲಿಯಲೆ. ಆನುಂಡ್ ಅಲ್ಲಿ ಮಂಗಲ ಆಚಿ.  
 ಸಾಹುಕಾರನು ಸಾಹುಕರ್ತಿಯೂ ದುಂಬಾ ಕುಷಿ ಪಟ್ಟಿತ್ ನಂಗಳ  
 ಆಶೀರ್ವಾದ ಮಾಡ್ಚಿ.ನಂಗಳ ಪುದಿಯ ಕ್ವಾರ್ಟರ್ಸ್ ತಾತ್.

ಬಿದ್ದಪ್ಪ : ಮಂಗಲ ಆನ ಪಿಂಞ ನೀಡ ಬಾಳ್ ನಂದಾಯಿತಿಕ್ಕು ಅಲ್ಲ, ಕಷ್ಟ  
 ತಾಪತ್ರ ಎಲ್ಲಾ ತೀಂದತ್ ಎಣ್ಣೆ.

- ಮುತ್ತಕ್ಕಿ : ಇಲ್ಲೆ, ಅಂದ ಪಿಂಞ ಸುರು ಆಚಿ.  
ಬಿದ್ದಪ್ಪ : ನೀಡ ಕಷ್ಟ ತೀಂದತ್ಂದ್ ಆಪಕ ಪುನಹ ಸುರು ಆಚಿ ಎಣ್ಣುವಿಯಲ್ಲಾ,  
ಎನ್ನ?  
ಮುತ್ತಕ್ಕಿ : ಅದ್ ಬಲ್ಯೋರ್ ಕಥೆ, ಇಕ್ಕ ಉಂಬ ನೇರ ಆಚಿ. ಬಯ್ಯ ಎಣ್ಣುವಿ.  
ಬಿದ್ದಪ್ಪ : ನೀಡ ಕಥೆರ ಮಧ್ಯ ನಾಕ್ ಕೆಲೇ ಬಯಿಚಿತಿಲ್ಲೆ, ನೀನ್ ಎಣ್ಣಾನ  
ಪಿಂಞ ಕೆಲ ಬಯಿಪ್ ಸುರು ಆಚಿ, ಏಳ್ ಉಂಗ.

\* \* \* \* \*

## ಸೀನ್ ಒಯಿಂಬದ್

(ತಿಂಗಕೊಮ್ಮ ಮನೆಕ್ ಬಪ್ಪ ಇಂಜ ಪೊನ್ನಣ್ಣ, ಸಂಸಾರ ಮನೆಕ್ ಬಪ್ಪ)

- ಬಿದ್ದಪ್ಪ : ಬಂದಿಯ ಪೊನ್ನಣ್ಣ, ಬಂದಿಯವ್ವಾ, ಮಕ್ಕಳೆ, ಚಾಯಿತೆ ಉಳ್ಳಿರಾ?
- ಪೊನ್ನಣ್ಣ : ನಂಗ ಎಲ್ಲಾ ಚಾಯಿತೆ ಉಂಡ್ ಅಪ್ಪಯ್ಯ, ನೀನ್ ಎನ್ನನೆ ಉಳ್ಳಿಯಾ.
- ಬಿದ್ದಪ್ಪ : ನಾನ್ ಚಾಯಿತೇ ಉಳ್ಳೆ, ಎಂತೋ ಜೀವನತ್‌ನ ತಳ್ಳಿಯೆಂಡ್ ಉಳ್ಳೆ.
- ಮುತ್ತಕ್ಕಿ : ಬಂದಿರಾ, ನಿಂಗಳೇ ತಿಂಗಕೊಮ್ಮ ಬಪ್ಪ, ಬೋರೆ ದಾರೂ ಬಪ್ಪಲೆಲ್ಲ ನಿಂಗಳೇಂಗಿ ಚಾಯಿತೆ ಇರಿ.
- ಪೊನ್ನಣ್ಣ : ನಾಕೂ ಅಪ್ಪನ ನೋಟೊಂಡೂಂದ್ ಆಪ. ಆಂಗ್ ತಿಂಗಕೊಮ್ಮ ಆಚೆಂಗಿ ಬಕ್ಕಾಂದ್. ಅದೂ ಅಲ್ಲತೆ ನಂಗಕೂ ಒರ್ ಚೇಂಜ್, ಆ ಸಿಟಿ ಲೈಫ್ ಬೋರಾಯಿರುವ.
- ಮುತ್ತಕ್ಕಿ : ಜನ ಎಣ್ಣುವ, ಸಿಟಿ ಜೀವನ ದುಂಬಾ ಚಾಯಿ, ಅಲ್ಲಿ ಟೈಮ್ ಪಾಸಾಪದೇ ಗೊತ್ತಾಪ್ಪಲೇಂದ್. ನಿಂಗ ನೋಟ್‌ಚೆಂಗಿ ಬೋರಾಪ ಎಣ್ಣುವಿರಾ?
- ಪೊನ್ನಣ್ಣ : ಅಪ್ಪ ಮಿಂಞಾಲೇ ಎಣ್ಣುವ ಇಂಜತ್; ಜೀವನ ಎಡ್‌ತಂಡನ್ನಕೆ, ಅಲ್ಲತೆ ನಂಗ ಮಾಡಿಯಂಡನ್ನಕೆ" ನಾಕ್ ಸಿಟಿ ಜೀವನ ಬದ್‌ಕುವಕ್ ಒ.ಕೆ. ಆಚೆಂಗಿ ರಿಲ್ಯಾಕ್ಸ್ ಆಪಕ್ ಹಳ್ಳಿ ಜೀವನವೇ ಕುಷಿ, ಒರ್ ತರ ಆನಂದ ಈ ಕಾಡ್, ಮಾಡ್, ಬೇಲ್, ಬಾಣೆ, ವೆಹಿಕಲ್ ಕಮ್ಮಿ ಉಳ್ಳೆ ರೋಡ್, ಶುದ್ಧ ನೀರ್, ಗಾಳಿ, ದುಂಬಾ ಶಾಂತಿ, ನೆಮ್ಮದಿ ತಪ್ಪ!



- ಮುತ್ತಕ್ಕಿ : ನಿಂಗಡದೋರ್ ತರ. ಅದೇ ನಿಂಗಡ ಪೆರಿಯ ಅಣ್ಣಯ್ಯ, ಮೊನಿಯಾಂದ್ ಪೋನ್ ಮಾಡಿತ್ ಇಂಜತ್. ನಾನ್ ಪೋನ್ ಎಡ್ತಂಡದೇ ತಪ್ಪು ಎಣ್ಣುವನ್ನಕೆ ನಾಡ ಮೇಲೆ ಪಾರಿ ಕಳಿಚತ್.
- (ಬಿದ್ದಪ್ಪ ಅಲ್ಲಿಂಜಿ ಎದ್ದ ಪೋಯಿರುವ)
- ಪೊನ್ನಣ್ಣ : ಎಂತಾಂಗ್ ಬಲ್ಯ ಅಣ್ಣಯ್ಯ ಅನ್ನನೆ ನೀಕ್ ಬಜ್ಜಿಯೆ?
- ಮುತ್ತಕ್ಕಿ : ನಾಕ್ ಗೊತ್ತಿಲ್ಲೆ, ನಾನೆಂತ ತಪ್ಪು ಮಾಡಿಯೇಂದ್, ನಾಕ್ ಗೊತ್ತಿಲ್ಲೆ, ಅವೂ ಎಣ್ಣೆತಿಲ್ಲೆ, ನಿಂಗಡ ಅಪ್ಪನ ಕೇಟಕ ನೀಕ್ ಬಯ್ಯ ಗೊತ್ತಾಪ ಎಣ್ಣೆರ್ತ್.
- ಪೊನ್ನಣ್ಣ : ಅಪ್ಪ ನಂಗಕೆಲ್ಲ ಕಯಿಂಜ ಕುರಿ ಬಂತ್ ಪೋಪಕ ಒರ್ ಕಾಗದ ತಂದಿಂಜತ್, ಆಂಡ ವಿಷಯ ಎನ್ನೇಂಗಿ ಅಣ್ಣಯ್ಯ ಎಣ್ಣಾಚಾ?
- ಮುತ್ತಕ್ಕಿ : ಅಯ್ಯೋ, ಅವು ಒಂದೂ ಎಣ್ಣೆತಿಲ್ಲೆ, ಆಚೆಂಗಿ ನಿಂಗಡ ಅಪ್ಪ ಆಂಡ ಒರ್ ಕಾಪಿನ ನಾಕೂ ತಂದಿತ್, ನಾಕ್ ಆ ಕಾಗದ ಓದುವಕ್ ವಿದ್ಯ ಪಡ್ಚಿತಿಲ್ಲೆ, ನಾಡ ಅಭಿಪ್ರಾಯ ಕೇಟತ್. ನಾನ್ ಪನ್ನೆರಂಡ್ ತಿಂಗ ಕಯಿಂಜ ಪಿಂಞ ನಿಂಗಡ ಮಕ್ಕ ಬಪ್ಪ ಅಲ್ಲ ಅಕ್ಕೇ ಆ ಕಾಗದ್ ಓದ್ಚಿಟ್ಟಿತ್ ನಾಡ ಅಭಿಪ್ರಾಯ ಎಣ್ಣುವಿ ಎಣ್ಣಾನ. ಅದೂ ಅಲ್ಲತೆ ನಿಂಗಡ ಸಂಸಾರತ್ರ ವಿಷಯಕ್ ನಾಡ ಅಭಿಪ್ರಾಯ ಎನ್ನಂಗ್, ಆಂಡ ಅವಶ್ಯಕತೆ ಎಂತ ಅಲ್ಲ.
- ಪೊನ್ನಣ್ಣ : ಅಕ್ಕ ನಿಂಗಕ್ ಆ ಕಾಗದತ್ ಉಳ್ಳ ವಿಷಯ ಗೊತ್ತಿಲ್ಲೇಂದ್ ಆಚಿ.
- ಮುತ್ತಕ್ಕಿ : ಕಾಗದ ನಾಡ ಕೈಲೇ ಉಂಡ್. ಆಚೆಂಗಿ ಓದುವಕ್ ವಿದ್ಯ ಇಲ್ಲೆ, ಇಕ್ಕ ನೀನ್ ಬೋಂಡಿಕಿ ಓದಿತ್ ಎಣ್ಣಾ, ಕೇಟವಿ.
- ಪೊನ್ನಣ್ಣ : ಇಲ್ಲೆ, ಇಲ್ಲೆ, ನಿಂಗ ಅಕ್ಕಲೆ ಎಣ್ಣಾನನ್ನಕೆ ಪನ್ನೆರಂಡ್ ತಿಂಗ ಕಯಿಂಜ ಪಿಂಞ ಓದ್ಚಿರಿ, ಅಕ್ಕೇ ನಿಂಗಡ ಅಭಿಪ್ರಾಯ ಎಣ್ಣೆ. ನಿಂಗಡ ಅಭಿಪ್ರಾಯ ಮುಖ್ಯ.
- ಮುತ್ತಕ್ಕಿ : ನಿಂಗಡಪ್ಪನೂ ಅದೇ ಎಣ್ಣುವ, ನಾಡ ಅಭಿಪ್ರಾಯ ಭಾರೀ ಮುಖ್ಯಾಂದ್, ನಾನ್ ಮನೆ ಪಣಿಕರ್ತಿ, ವಿದ್ಯ ಇಲ್ಲತವ, ನಾಡ ಅಭಿಪ್ರಾಯಕ್ ಎಂತ ಬೆಲೆ.
- ಪೊನ್ನಣ್ಣ : ಅಯ್ಯೋ ಅದ್ ಬುಡಿ, ಬಯ್ಯ ಎನ್ನನೆಯೋ ಗೊತ್ತಾಪಲ್ಲಾ.
- ಬಿದ್ದಪ್ಪ : (ಅಕ್ಕ ಬಪ್ಪ) ಎನ್ನ ಪೊನ್ನಣ್ಣ, ಮುತ್ತಕ್ಕಿರ ಕೂಡೆ ಪಂಚಾತಿಗೆ.

ಪೊನ್ನಣ್ಣ : ಇಲ್ಲೆ ಅಪ್ಪಯ್ಯ ಬಲ್ಯ ಅಣ್ಣಯ್ಯ ತಾರ ಮಾರ ಬಜ್ಜತ್, ಎನ್ನಂಗ್ಂದ್ ಗೊತ್ತಿಲ್ಲೆ ಎಣ್ಣೆಚಿ, ನಾಕೂ ಗೊತ್ತಿಲ್ಲೆ, ಆಚೆಂಗಿ ಬಯ್ಯ ಗೊತ್ತಾಪ, ಇಕ್ಕ ಬೇಜಾರ್ ಒಂದೂ ಮಾಡಂಡಾಂದ್ ಎಣ್ಣೆನ, ಅಚ್ಚಕೆ.

ಬಿದ್ದಪ್ಪ : ನಾನೂ ಅದೇ ಎಣ್ಣೆನ. ಅಂದ್ಡೀ ಅವ ಮೊರ್ಟತ್. ನಾನ್ ಎಂತೆಲ್ಲೋ ಮಾಡಿತ್ ಸಮಧಾನ ಮಾಡ್ನ. ಇಕ್ಕ ಮನಸ್ಸು ಹಗುರ ಆಚಿಲೊ,

ಮುತ್ತಕ್ಕಿ : ಇವು ಎಂತೆಲ್ಲೋ ಕಥೆ, ಅಯಿಂಗಡ ಅನುಭವ ಎಲ್ಲಾ ಎಣ್ಣೆತ್, ಅದೆಂತೋ ಆತ್ಮ ಪಾತ್ರಾಂದೆಲ್ಲ ಎಣ್ಣೆತ್ ಕಯ್ಯುವಚ್ಚಕ್ ಅರ್ಥ ಮಾಡ್ಚಿಟ್ಟತ್. ಇಲ್ಲೇಂಗಿ ನಾಡ ಕಣ್ಣೀರೇ ನಿಪ್ಪ ಇಂಜಿಲೆ. ನಾಡದೆಂತ ತಪ್ಪು, ಅಂತ ತಪ್ಪುನನ್ನುಂಡ್ ಎಲ್ಲಿ ಆಯೋನ ಎಣ್ಣೆಯೆಂಡ್ ದುಖಿ ಆಪ ಇಂಜತ್.

ಪೊನ್ನಣ್ಣ : ನಿಂಗಡದೊಂದೂ ತಪ್ಪು ಇಲ್ಲೆ, ಬಲ್ಯ ಅಣ್ಣಯ್ಯಂಡ ಮನಸ್ಸು ಸರಿ ಇಂಜಿತಿರ, ಕೆಲಸತ್ರ ಒತ್ತಡವೋ, ಬೋರೆ ಎನ್ನೇಂಗಿ ತೊಂದರೆ ಇಂಜಿತಿಕ್ಕು, ಆನ ನಿಂಗಡ ಮೇಲೆ ತೀತತ್, ನಿಂಗ ಬೇಜಾರ್ ಮಾಡಂಡ.

ಬಿದ್ದಪ್ಪ : ನಾನ್ ನೂರ್ ಕುರಿ ಎಣ್ಣೆಯೆ, ನೀಡ ತಪ್ಪು ಇಲ್ಲೆಂದ್. ಮುತ್ತಕ್ಕಿ ಕೇಪದೇ ಇಲ್ಲೆ.

ಪೊನ್ನಣ್ಣ : ಇಕ್ಕ ನಾನು ಎಣ್ಣೆನ ಅಲ್ಲ, ಆಚಪ್ಪಯ್ಯ ಅಂದಕ ನಂಗ ಮೆಲ್ಲೆ ಪೊರ್ಡುವ, ಮಕ್ಕಕ್ ನಾಳೆ ಸ್ಕೂಲ್ ಉಂಡಲ್ಲಾ.

ಬಿದ್ದಪ್ಪ : ಆಚಿ ಮೋನೆ, ಮಕ್ಕಳ ಕೂಟಿಯೆಂಡ್ ಮೆಲ್ಲೆ ಪೋ.

(ಪೊನ್ನಣ್ಣ ಸಂಸಾರ ಸಮೇತ ಕಾರ್ಲ್ ಪೋಪ)ಪೋಪಕ ಬಟ್ಟೆಲ್)

ಪೊನ್ನಣ್ಣ : ಅಲ್ಲ ಪೊನ್ನಕ್ಕಿ, ಬಲ್ಯ ಅಣ್ಣಯ್ಯಂಗ್ ಸೊಯ ಇಲ್ಲಿಯಾ, ಮುತ್ತಕ್ಕಿನ ಎನ್ನಂಗ್ ಬಯ್ಯೆಂಡಿಯೆ, ಪಾಪ ಅವಕ್ ಒರ್ ಸಂಗತಿಯೂ ಗೊತ್ತಿಲ್ಲೆ, ಅವಡ ಕೈಲ್ ಕಾಗದ ಉಂಡೇಂಗಿನೂ ಅವಕ್ ಆಂಡ ಒಳ್ಳಲ್ ಉಳ್ಳ ಸಂಗತಿ ಗೊತ್ತಿಲ್ಲೆ, ಪಾಪ.

ಪೊನ್ನವ್ವ : ಅವಕ್ ಗೊತ್ತಿಲ್ಲೆ ಎಣ್ಣುವಿರಾ, ಅವ ನಾಟಕ ಮಾಡಿತುಂಡೇಂಗಿ, ಅವಳೇ ನಿಂಗಡಪ್ಪನ ಒಳ್ಳಕ್ಟ್ಟುಂಡಿತುಂಡೇಂಗಿ.

ಪೊನ್ನಣ್ಣ : ಇಲ್ಲೆ ಪೊನ್ನಕ್ಕಿ, ನಿಂಗ ಪೊಣ್ಣಾಳಕ್ ಎಲ್ಲಿಂಜಿ ಇಂತ ಐಡಿಯಾ

ಬಪ್ಪ ನಾಕ್ ಗೊತ್ತಪ್ಪಲೆ, ನಾಡ ಆತ್ಮ ಒಂದ್ ಎಣ್ಣುವ, ಇದ್ ಅಪ್ಪಂಡದೇ ತೀರ್ಮಾನ, ಮುತ್ತಕ್ಕಿಕ್ ವಿಷಯವೇ ಗೊತ್ತಿಲ್ಲೆ, ಅವ ಪಾಪ, ಗೊತ್ತಿಂಜಿತುಂಡೇಂಗಿ ಅವಡ ನಡವಳಿಕೆ ಅಚ್ಚಕ್ ಸಾಚ ಇಪ್ಪಕಿಂಜಿಲೆ.

ಪೊನ್ನವ್ವ : ಅದ್ ಬುಡಿ, ಇಕ್ಕ ಮಾಂವಂಡ ಅಭಿಪ್ರಾಯಕ್ ನಿಂಗಡ ಅಭಿಪ್ರಾಯ ಎಂತ?

ಪೊನ್ನಣ್ಣ : ನಂಗಂತೂ ಅಪ್ಪಂಡ ಜೊತೆಲ್ ಇಲ್ಲೆ, ಇಪ್ಪಕೂ ಕಯ್ಯಲೆ, ನಂಗೇಂಗಿ ತಿಂಗಕೊಮ್ಮ ಮನೆಕ್ ಪೋಪ, ಬೋರೆ ದಾರೂ ಅದೂ ಮಾಡುಲೆ, ಒಬ್ಬನೆ, ಒಂಟಿತನ ಭಾರೀ ಪಾಳ್, ಬೋರೆ ಬೋಂಡತದ್ ಒಂದೂ ಮಾಡಿತಿಲ್ಲೆ, ನಲ್ಲದೆ ಮಾಡಿಯವಡ್ ಬುಡ್.

ಪೊನ್ನವ್ವ : ನಾಕೂ ಅದೇ ತೋಂದುವ. ಆಚೆಂಗಿ ಬಾವಂಗ ಅಕ್ಕಯ್ಯಂಗ ಮೊಮ್ಮ ಎಂತ ಎಣ್ಣೋ ಎನ್ನೋ.

ಪೊನ್ನಣ್ಣ : ಅಪ್ಪ ಎಲ್ಲಾಡ ಅಭಿಪ್ರಾಯ ಕೇಟಿತ್, ಪನ್ನೆರಂಡ್ ತಿಂಗ ಕಯಿಂಜದು ಅಪ್ಪ ಮಾಡುವದೇ ಮಾಡುವ, ದಾರ್ ಎಂತ ಎಣ್ಣೆಚೆಂಗಿನೂ ಕೇಪುಲೆ, ಆಚೆಂಗಿ ಅಪ್ಪಂಡ ನಿಯತ್ತಾನ ಮೆಚ್ಚತೆ ವಿದಿಯೇ ಇಲ್ಲೆ, ಪನ್ನೆರಂಡ್ ತಿಂಗ ಕತ್ತಣೆ ನಂಗಡ ಅಭಿಪ್ರಾಯ ಎಣ್ಣಣೆ ಅಪ್ಪ ಮಿಂಞ ತನ್ನಕೇ ಟ್ರೀಟ್ ಮಾಡುವ, ಒರ್ ಅಪಚಾರ ಮಾಡುಲೆ, ಬಯ್ಯ ಮಾಡುವದೇ ಮಾಡುವ.

ಪೊನ್ನವ್ವ : ಅಕ್ಕ ನಂಗಡೆಲ್ಲ ಅಭಿಪ್ರಾಯ ಎನ್ನಂಗ್ ಕೇಟಿಯೆ, ಅದಾನೇ ಮಾಡೊಲಿಂಜತಲ್ಲಾ,

ಪೊನ್ನಣ್ಣ : ಅಪ್ಪಯ್ಯನ ನಾನ್ ಪುಟ್ಟ್ನಲ್ಲಿಂಜಿ ನೋಟಿಯೆ, ಅಪ್ಪಂಡ ಪಾಲಿಸಿ " ಇಂಪ್ಲಿಮೆಂಟ್ ಯುವರ್ ವ್ಯೂಸ್ ಇನ್ ಕನ್ಸಲ್ಟೇಸನ್ ವಿತ್ ಆಲ್"ಕಡೆಕ್ ಅಪ್ಪಂಡ ಪಾಲಿಸಿಯೇ ಆಪ.

ಪೊನ್ನವ್ವ : ಓ ಅನ್ನನೆ

\* \* \* \* \*

## ಸೀನ್ ಪತ್ರ್

(ಬೈಟಾಪಕ ಬಿದ್ದಪ ಮನೆಲ್ ಅಳ್ತಂಡಿಪ್ಪ, ಮುತ್ತಕ್ಕಿ ಕಾಪಿ ಕೊಂಡ ಬಪ್ಪ)

ಬಿದ್ದಪ್ಪ : ಬಾ ಮುತ್ತಕ್ಕಿ ಅಳ್ತ ನೀನೂ ಇಲ್ಲಿಯೇ ಕಾಪಿ ಕುಡಿ, ನೀಡ  
ನಾರಾವಾಹಿ ಸುರು ಮಾಡ್.

ಮುತ್ತಕ್ಕಿ : ನಾಡದೆಂತ ದಾರಾವಾಹಿ, ಎನ್ನ ಟಿ.ವಿ.ಲ್ ಬಂದಂಡುಂಡಾ.

ಬಿದ್ದಪ್ಪ : ನೀಡ ಕಥೆ ಮೂಂದ್ ನಾಲ್ ವಾರತಿಂಜೇ ಕೇಟಾಂಡುಳ್ಳಲ್ಲ, ಇಂಞೂ  
ತೀಂದಿತಿಲ್ಲೆಲ್ಲಾ, ಆಂಗ್ ತಮಾಸಿ ಮಾಡ್‌ನ, ಚೆಡಿಯತೆ, ಬಾ  
ಎಣ್ಣುವಕ್ ಸುರು ಮಾಡ್.

ಮುತ್ತಕ್ಕಿ : (ಊಜಳೆ ಬುಡುವ), ಮಂಗಲಾನಂವ, ಚಾಯಿಕಾರ, ನಲ್ಲ ತಡಿಕಾರ,  
ನಲ್ಲ ಬುದ್ದಿ ಕಾರ, ಕೆಲಸವೂ ಚಾಯಿ ಇಂಜತ್, ಆಚೆಂಗಿ.....

ಬಿದ್ದಪ್ಪ : ಎಂತ ಆಚೆಂಗಿ ಮುತ್ತಕ್ಕಿ, ಪಿಂಞ ಎನ್ನಾಚೆ? ಅವ ಎನ್ನ ಕುಡ್‌ಕನಾ,  
ಪರ ಸ್ತ್ರೀ ಸಂಗ ಎನ್ನೇಂಗಿ ಇಂಜತಾ, ಕಳಿಪ ಚಟ ಇಂಜತಾ,  
ಎಂತ?

ಮುತ್ತಕ್ಕಿ : ಅದ್ ಎಂತ ಇಂಜಿತುಂಡೇಂಗಿನೂ ತಿದ್ದಿಯವಲು ಇಂಜತ್,  
ಆಚೆಂಗಿ...

ಬಿದ್ದಪ್ಪ : ಪುನಹ ಆಚೆಂಗೀ...

ಮುತ್ತಕ್ಕಿ : ಎನ್ನನೆ ಎಣ್ಣುವ. ನಾಡ ದುರಾದೃಷ್ಟಕ್ ಅವ ಅವನೇ ಅಲ್ಲ,  
ಎಲ್ಲಾ ಉಂಡ್ ಆಚೆಂಗಿ ಒಂದೂ ಇಲ್ಲೆ, ಎಣ್ಣುವನ್ನಕೆ ನಾಡ ಜೀವನ.

ಬಿದ್ದಪ್ಪ : ಪಿಂಞ ಅವ ಎನ್ನಂಗ್ ಮಂಗಲಾಪಕ್ ಪೋನ. ಅವ ಮಾಡ್‌ನ  
ಬಲ್ಯ ತಪ್ಪು.

ಮುತ್ತಕ್ಕಿ : ನಾನ್ ಮೊರ್ಡುವಾಂಗುಂಜಿ ಅವ ಮೊರ್ಡುವ ಇಂಜತ್. ಒರೇ  
ಸ್ವರ, ದಾರ್‌ಕೂ ಎಣ್ಣತೆ, ದಾರ್‌ಕೂ ಎಣ್ಣೆರ್‌ತೆ, ನಾಡ ಕಾಲ್  
ಪುಡಿಪ ಇಂಜತ್.

- ಬಿದ್ದಪ್ಪ : ಅಕ್ಕ ನೀನ್ ಎನ್ನ ಮಾಡಿಯ? ಎಂತ ಎಣ್ಣೆಯ?
- ಮುತ್ತಕ್ಕಿ : ಚೆನ್ನ ಸಮಯ ನಂಗಡ ಜೀವನ ಅನ್ನನೇ ಇಂಜತ್. ಒನ್ನಾಂದ್ ತೋಟಕ್ ಪೋನಂವ, ಕೆರೆಲ್ ಎಂತೋ ಪಂಪ್ ರಿಪೇರಿಕ್ಂದ್ ಇಳಿಂಜಿತ್ ಎದ್ದ್ ಬಂದಿಯೆ ಹೆಣವಾಯಿತ್.
- ಬಿದ್ದಪ್ಪ : ಅವ ರೈಟರ್, ಅವ ಕೆರೆಕ್ ಇಳಿಯಂಡಿಯೆ ಅವಶ್ಯಕತೆ ಇಂಜಿಲೆ. ನಾಕಾಪ, ಅವ ಬೋಂಡೂಂದ್ ಕೆರೆಕ್ ಇಳಿಂಜಿತ್ ಚತ್ತಿಯೆ ಕಾಂಬ.
- ಮುತ್ತಕ್ಕಿ : ನಾಕೂ ಅನ್ನನೆ ಆಪ. ಪಾಪತಂವ, ಆಂಗ್ ದಂಡ್ ಮೂಂದ್ ದಿವಸಕ್ ಮಿಂಞ್ಂಜೇ ಎಂತೆಂತೋ ಎಣ್ಣೆಯಂಡಿಂಜತ್, ನಾಕ್ ಅರ್ಥ ಆಯಿಲೆ. ಅವ ಅದೇ ಎಣ್ಣೆಯೆ ಕಾಂಬ, ನಾಕೂ ವಿದ್ಯೆ ಇಲ್ಲತಾಂಗ್ ನಾಕ್ ಅರ್ಥ ಆಯಿಲೆ ಕಾಂಬ. ಇಕ್ಕ ಆಪ ಅವ ಬದ್ಕಿತಿಂಜಿತುಂಡೇಂಗಿ ನಲ್ಲದಿಂಜತ್ಂದ್.
- ಬಿದ್ದಪ್ಪ : ಅಕ್ಕ, ಓರೋರಮ, ನಂಗ ಒಂದ್ ಇಪ್ಪಕ ಆಂಡ ಉಪಯೋಗ ಗೊತ್ತಾಪುಲೆ, ಇಲ್ಲತಾಪಕ, ಅದ್ ಉಪಯೋಗ ಇಲ್ಲತ ವಸ್ತುವೇ ಆಯಿತುಂಡೇಂಗಿನೂ, ಅಕ್ಕ ಅದ್ ಇರೊಂಡಿಂಜತ್ಂದ್ ಆಪ. ಅವ ಇಂಜಿತುಂಡೇಂಗಿ ನೀಕ್ ಕೂಳ್ ನೀರ್ ನೆಲೆಕ್ ಸಮಾಜತ್ ಸ್ಥಾನ ಮಾನಕ್ ತೊಂದರೆ ಇಂಜಿಲೆ, ಸಂಸಾರ ಸುಖ ಮಾತ್ರ ಇಪ್ಪಕಿಂಜಿಲೆ.
- ಮುತ್ತಕ್ಕಿ : ಅಕ್ಕ, ಅದೆಲ್ಲಾ, ಇಪ್ಪಕಿಂಜತ್, ಎಲ್ಲಾಂಗುಂಜಿ ಸಮಾಜತ್ ಒರ್ ಸ್ಥಾನ ಇಪ್ಪಕಿಂಜತ್. ಇಕ್ಕ ಅದೂ ಇಲ್ಲತಾಯಿರ್ತ್.
- ಬಿದ್ದಪ್ಪ : ಇದಾನ ಪಿಂಞ ನೀನ್ ಎನ್ನ ಮಾಡಿಯ, ನೀಡ ಸಾಹುಕಾರ ಎನ್ನ ಮಾಡ್ಚಿ?
- ಮುತ್ತಕ್ಕಿ : ಸಾಹುಕಾರ ದೇವಡಂತ ಮನುಷ್ಯ. ಅವಂಡ ಬಾಕಿ ಪಣ, ಪಿ,ಎಫ್. ಬೋರೆ ಎಂತೆಲ್ಲೋ ಎಣ್ಣೆತ್ ಚೆನ್ನ ದುಡ್ಡ್ ತಾತ್. ಅವಂಗ್ ಬೋರೆ ದಾರೂ ಇಲ್ಲತಾಂಗ್, ಆ ದುಡ್ಡ್ನ ನಾಕೇ ತಾತ್.
- ಬಿದ್ದಪ್ಪ : ಆ ದುಡ್ಡ್ನ ಎನ್ನ ಮಾಡಿಯ? ನೀಡ ಪೆದತ್ ಬ್ಯಾಂಕ್‌ಲ್ ಬೆಚ್ಚವಂಡು ಇಂಜತ್
- ಮುತ್ತಕ್ಕಿ : ಬ್ಯಾಂಕ್‌ಲೇ ಬೆಪ್ಪು ಚಿಟ್ಟೆತ್ ಇಂಜತ್ ಸಾಹುಕಾರ, ಆಚೆಂಗಿ..

ಬಿದ್ದಪ್ಪ : ಪುನಹ ಎಂತ ಆಚೆಂಗಿ...

ಮುತ್ತಕ್ಕಿ : ಆಚೆಂಗಿ ಆ ದುಡ್ಡಾಕೂ ಬಾತ್ ಗ್ರಾಹಚಾರ ಎಲ್ಲಾ ನಾಡ ಚಿಕ್ಕವ್ವಂಗ್ ಎನ್ನನೆಯೋ ಗೊತ್ತಾಯೋಚಿ. ಅದೇ ಸಮಯಕ್ ನಾಡ ತಂಗಿರ ಮಂಗಲ ಕುರ್ಚಿತಿಂಜತ್. ಆ ಕ್ಕಣ್ಣ ದುಡ್ಡಾಕ್ ಹಟ ಮಾಡಿ ಯೇಂಡಿಂಜತ್ಲೋ., ಅವ ಅಪ್ಪನ ಕೂಟಿಯ ಬಂತ್ ಮೊರ್ಟಿತ್ ಕೆಜ್ಜಿತ್ ಆ ದುಡ್ಡಾನೆಲ್ಲ ಕೇಟ ಪೋಚಿ. ಬಯ್ಯಕ್ ತಪ್ಪೀಂದ್ ಎಣ್ಣೆತಿಂಜತ್. ಆಚೆಂಗಿ ಚಿಕ್ಕವ್ವ ತಪ್ಪವ ಅಲ್ಲ, ನಾನೂ ಕೇಟಿತಿಲ್ಲೆ, ಅವೂ ತಂದಿತಿಲ್ಲೆ, ಅದ್ ಪೋಚಿ ಬುಡಿ.

ಬಿದ್ದಪ್ಪ : ಅದ್ನೋ ಕಳಂದಂಡಿಯಾ?, ಪಿಂಇ ಎನ್ನ ಮಾಡಿಯ,

ಮುತ್ತಕ್ಕಿ : ಆ ಮನೆ, ಈ ಮನೆ ಪಣಿ ಕೆಜ್ಜಂಡ್ ನಿಂಗಡ ಪಾದಕ್ ಬುದ್ಧ.

ಬಿದ್ದಪ್ಪ : ಪಿಂಇ ನೀಕ್ ಮಂಗಲತ್ರ ಗ್ಯಾನ ಬಂದಾಲಿಯಾ, ಎನ್ನ?

ಮುತ್ತಕ್ಕಿ : ಇಲ್ಲೆ, ನಾಕ್ ಮಂಗಲ ಎಣ್ಣುವಕ ಪೋಡಿ ಸುರು ಆಯಿರ್ತ್, ಆಂಗ್ ಆ ವಿಷಯ ಗ್ಯಾನ ಮಾಡುವದೇ ಬುಟ್ಟಿತ್, ರಾಮಾ ಕೃಷ್ಣಾಂದ್ ಉಳ್ಳ.

ಬಿದ್ದಪ್ಪ : ಅದೂ ನಲ್ಲದೆ ಬುಡ್, ಎಲ್ಲಾ ಕಷ್ಟಕೂ ಒರ್ ಸುಖಿತ್ರ ಅಖೀರಿ ಇಪ್ಪ ಬೊತ್ತತೆ, ದೇವ ಒರ್ ಪಡಿ ಮುಚ್ಚ್ಚೆಂಗಿ ಇಂಇೋರ್ ಪಡಿ ತೊರ್ಪ, ದೇವ ಒರ್ ಬಟ್ಟೆ ಕಾಟು.

ಮುತ್ತಕ್ಕಿ : ಆ ಕಾಣತ ದೇವಡ ನಂಬಿಕೆಲೇ ಬದ್ಕಿಯಂಡುಳ್ಳ.

ಬಿದ್ದಪ್ಪ : ದೇವ ನಂಬಾನವನ ಕೈ ಬುಡುಲೆ, ಅದ್ ಸತ್ಯ ಸತ್ಯ..

\* \* \* \* \*

## ಸೀನ್ ಪನ್ನಂದ್

- ಮುತ್ತಕ್ಕಿ : ನಾಡ ದಾರಾವಾಹಿ ತೀಂದತ್, ಇಕ್ಕ ನಿಂಗಡ ಸಿನೆಮಾ ಕಥೆ ಎಣ್ಣೆ ನಿಂಗಲೂ ಕಷ್ಟ ಜೀವೀಂದ್ ಗೊತ್ತಾಪ. ನಾಡ ಮನಸ್ಸು ಎನ್ನನೆ ನಾಡ ಕಥೆನೆಲ್ಲಾ ಎಣ್ಣೆತ್ ಹಗುರ ಆಚೋ ಅನ್ನನೆ ನಿಂಗಡ ಕಥೆ ಎಣ್ಣೆತ್ ನಿಂಗಡ ಮನಸ್ಸು ಹಗುರ ಮಾಡಿಯೋಳಿ.
- ಬಿದ್ದಪ್ಪ : ಅಕ್ಕು ಮುತ್ತಕ್ಕಿ, ನಾನ್ ನೀಕ್ ಎಣ್ಣೆತೆ ಇಕ್ಕ ದಾಕ್ ಎಣ್ಣುವ, ಜಾಸ್ತಿ ಎಣ್ಣುವಕ್ ಪೋಪುಲೆ, ಮನುಷ್ಯನಾಯಿತ್ ಪುಟ್ಟನ್ ಪಿಂಞ ಕಷ್ಟ ಸುಖ ಇಪ್ಪದೇ ಅಲ್ಲ.
- ಮುತ್ತಕ್ಕಿ : ಅದೇ ಮಾಮೂಲ್, ಆಚೆಂಗಿನೂ ಎಣ್ಣೆ ನಿಂಗಡ ಅನುಭವತ್ ಎಣ್ಣುವದೆಲ್ಲಾ ದುಂಬಾ ಪಡಿಪಕ್ ಉಳ್ಳದ್, ಎಣ್ಣೆ.
- ಬಿದ್ದಪ್ಪ : ನಾಡ ದುಂಬನ ಸಂಸಾರ, ಅಪ್ಪಂಡ ಚೆರಿಯ ಸಂಬಳ, ಮಕ್ಕ ದುಂಬಾ, ಆಚೆಂಗಿ ಅಪ್ಪ ಭಿನ್ನ ಬೇದ ಭಾವ ಇಲ್ಲತೆ ಮಕ್ಕಳ ಚಾಕಿತ್, ವಿದ್ಯೆ ಬುದ್ಧಿ ತಂತ್. ಮಕ್ಕಳೆಲ್ಲ ಒರೋರ್ ಬಟ್ಟೆಕ್ ಕೂಡಿಯಂಡತ್.
- ಮುತ್ತಕ್ಕಿ : ಅಕ್ಕ ನಿಂಗ?
- ಬಿದ್ದಪ್ಪ : ಅಕ್ಕ ನಾನೂ ಒರ್ ಚೆರಿಯ ಕೆಲಸಕ್ ಕೂಡಿಯಂಡ, ಬೋರೆ ದಾರೂ ಅಪ್ಪ ಅವ್ವನ ನೋಟಿಯವತೆ ಪೋಚೆಂಗಿನೂ ನಾನ್ ಮಾತ್ರ ಅಯಿಂಗಳ ಚಾಯಿತೇ ನೋಟಿಯಂಡಿಂಜ. ಅಯಿಂಗಡ ಕಷ್ಟ ಸುಖಕ್ ಆಪ ಇಂಜ. ವಾರ ವಾರ ಪೋಯಿತ್ ಮನೆಕ್ ಸಾಮಾನ್, ಅಪ್ಪಂಡ ಗೂರ್ಲ್ಕ್ ಮದ್ದ್ ಪಿಲ್ಸ್ ಕೂಡಪಂಜಿ

ಬಪ್ಪ ಇಂಜ, ನಾಕೂ ಮಂಗಲ ಆಚಿ.

ಮುತ್ತಕ್ಕಿ : ಮಂಗಲ ಆನ ಪಿಂಞ ನಿಂಗ ಬದಲಾಯಿರಾ?

ಬಿದ್ದಪ್ಪ : ಇಲ್ಲೆ, ಗಂಗು ನಲ್ಲವಳೆ, ಅವಳು ನಾಡ ಅಪ್ಪ ಅಪ್ಪಂಡ ಸೇವೆ ಮಾಡುವ ಇಂಜತ್. ಅವಳೂ ಸಹಕಾರ ತಾತ್, ಸಹಾಯ ಮಾಡ್ಚಿ, ಅವಳೂ ಅಪ್ಪ ಅಪ್ಪನ ಚಾಯಿತೆ ನೋಟಿಯವ ಇಂಜತ್, ಚಾವಲ್ಲಿಕತ್ತಣೆ ಅಯಿಂಗಡ ಸೇವೆ ಮಾಡುವ ಭಾಗ್ಯ ನಂಗಡದಾಚಿ.

ಮುತ್ತಕ್ಕಿ : ಪಿಂಞ ಎನ್ನಾಚಿ.

ಬಿದ್ದಪ್ಪ : ಅಕ್ಕಣೆ ನಾಕೂ ಮಕ್ಕಳಾಚಿ, ಅಯಿಂಗಕೂ ಕೈಲಾಪ ವಿದ್ಯೆ ಬುದ್ಧಿ ಕೊಡ್ತ. ದೇವಡ ದಯತ್ ಅವು ನಲ್ಲ ಬಟ್ಟೆಕ್ ಕೂಡಿಯಂಡ್, ಅಯಿಂಗಡ ಕಾಲ್ ಅವು ನಿಂದಂಡತ್.

ಮುತ್ತಕ್ಕಿ : ಸುಖ ಸಂಸಾರ ಎಣ್ಣೆ, ನಿಂಗಡ..

ಬಿದ್ದಪ್ಪ : ಅಕ್ಕಣೆಕ್ ಸುಖ ಸಂಸಾರ..

ಮುತ್ತಕ್ಕಿ : ಅದೆನ್ನ, ಅಕ್ಕಣೆಕ್ ಸುಖ ಸಂಸಾರ, ಪಿಂಞ ಎನ್ನಾಚಿ?

ಬಿದ್ದಪ್ಪ : ನಾಡ ಮಕ್ಕಕೆಲ್ಲಾ ಮಂಗಲ ಆಚಿ, ಪೆರಿಯ ದಂಡಾಳ್ಕೂ ನಾಡ ಸಿನೇತಂಗಡ ಮಕ್ಕಳೇ ಮಂಗಲ ಆಚಿ, ಮೂಂದನೆ ಮೋವ ಅಮೆರಿಕಾಕ್ ಕೆಲಸಕ್ ಪೋಚಿ ಅಲ್ಲೇ ಮಂಗಲ ಆಪಂಜಿ, ಒರ್ ಕುಂಞಿ ಆನ ಪಿಂಞ ಇಲ್ಲಿಕ್ ರಜತ್ ಬಪ್ಪಂಜಿ ಪೊಣ್ಣಾನೋ ಕುಂಞಿನೋ ಕಾಟಿ ತಾತ್. ಪೊನ್ನಣ್ಣ ನಲ್ಲ ಮೂಡಿನ ಮಂಗಲ ಆಚಿ, ಒಂದುಳ್ಳ ಮೋವ, ಅವಡ ಕೂಟ್ಕಾರ, ಒರ್ ಆಂದ್ರಕಾರನ ಮಂಗಲಾಚಿ.

ಮುತ್ತಕ್ಕಿ : ಅಕ್ಕ ಮೋವಕ್ ನಿಂಗ ವಿರೋದ ಮಾಡ್ಲಿಯಾ?

ಬಿದ್ದಪ್ಪ : ಅಯಿಂಗಡ ಬಿಸಿ ಚೋರೆ, ನಂಗಡ ತಣ್ಂಜ ಚೋರೆರ ತಕ್ಕನ ದಾರ್ ಕೇಪ. ಅದೂ ಅಲ್ಲತೆ ಅಯಿಂಗ ಎಲ್ಲ ಪಣಕಾಸ್ ದುಂಬನವು. ನನ್ನನ್ನಕೆ ಚೆರಿಯ ಕೆಲಸ, ದುಂಬಾ ಮಕ್ಕ, ಶಿಸ್ತ್, ನಿಯತ್



ಪ್ರಾಮಾಣಿಕತೆ ಇಂಜವು ಅಲ್ಲಲ್ಲ. ಎಲ್ಲಾಂಗುಂಜಿ ಮನುಷ್ಯತ್ವ ಉಳ್ಳವು  
ಅಲ್ಲಲ್ಲಾ, ನಾನೂ ಮುಂಡತಾಯಿಟ, ಆಚೆಂಗಿ ಗಂಗು ಮಾತ್ರ  
ಕೊರ್ಗೀ ಕೊರ್ಗಿ ಆ ಚಿಂತೆಲೇ ಚತ್ತ ಪೋಯಿರ್ತ್.

ಮುತ್ತಕ್ಕಿ : ಅವು ಚತ್ತ ಪಿಂಇ ನಿಂಗ ಮಕ್ಕಡ ಪಕ್ಕ ಎನ್ನಂಗ್ ಪೋಯಿಲೆ,  
ಅಲ್ಲೇ ಇರೋಲು ಇಂಜತಲ್ಲಾ?

ಬಿದ್ದಪ್ಪ : ಅದೂ ಮಾಡ್‌ನ, ಆಚೆಂಗಿ ಅಲ್ಲಿ ನಾಕ್ ಕಟ್‌ನ ತಿರಸ್ಕಾರ, ಹಂಗ್ರಾಣೆ,  
ಕೊಂಕ್ ತಕ್ಕ, ನನ್ನ ಬರಡ್ ಮಾಡಿರ್ತ್. ನಾನ್ ಎಲ್ಲೂ  
ದಾರ್‌ಕೂ ಒಂದೂ ಬಾಯಿ ಬುಟ್‌ಲೆ, ಎಲ್ಲ ಚವುಂತ್ ಎರ್‌ಕಿಯಂಡ,  
ಎಲ್ಲಾಡಲ್ಲಿ ಪೋಯಿತ್ ಇಂಜ ಎಲ್ಲಾ ತರ ಅನುಭವ ಪಡ್‌ಂದಂಡ.

ಮುತ್ತಕ್ಕಿ : ಅಕ್ಕ ಪೊರ ದೇಶತ್ ಉಳ್ಳ ಮೋಂವಂಡ ಪಕ್ಕಲೂ ಪೋಯಿರಾ?

ಬಿದ್ದಪ್ಪ : ಅಲ್ಲಿಯೂ ಪೋಯಿತ್ ಆರ್ ತಿಂಗ ಇಂಜ, ಎಣ್ಣುವಕ್ ಪೋಚೆಂಗಿ  
ನಾನ್ ಸಂತೋಷತ್ ಇಂಜದ್ ಅಲ್ಲೇ. ಪಿಂಇ ಪೊನ್ನಣ್ಣಂಡಲ್ಲಿ,  
ಬಾಕಿ ಎಲ್ಲ ಕೆಟ್ಟ ಅನುಭವ, ಆ ದಂಡ್ ಮನೆರ ಸುಖಿತ್‌ರ ಗ್ಯಾನತ್  
ಇಕ್ಕಣೆಕೂ ಬದ್‌ಕಿಯಂಡಿಂಜ, ಆ ಮೌಪು ಗ್ಯಾನವೂ ಬ್ಯಾಂಕ್  
ಡಿಪಾಸಿಟ್ ನನ್ನಕೆ ಕರಿಯಂಡೇ ಬಂದ್‌ರ್ತ್.

ಮುತ್ತಕ್ಕಿ : ಇಕ್ಕ ಎನ್ನ ದುಂಬಾ ಬೇಜಾರತ್ ತಕ್ಕ ಪರ್‌ಂದಂಡುಳ್ಳಿರಾ, ನಿಂಗಕ್  
ಅಚ್ಚಕ್ ಬೇಜಾರಾಪ ಸಂಗತಿ ಎಂತ ನಡ್‌ಂದಿಯೆ?

ಬಿದ್ದಪ್ಪ : ನೀಕ್ ಗೊತ್ತಿಲ್ಲತದಲ್ಲ, ನಾಕ್ ಈ ಆರ್ ತಿಂಗಕ್ ಬಯ್ಯ ಸರ್ಪ  
ಸುತ್ತ ಆಪಂಜಿ ಪಟ್ಟ ಪಾಡ್..

ಮುತ್ತಕ್ಕಿ : ಅದೇ ನಾನೂ ಇಂಜಲ್ಲಾ, ಭಾರೀ ಕಷ್ಟ ಪಟ್ಟಿರ, ನರ್‌ಳಿರ. ಎಂದೂ  
ಮೊರ್‌ಡತವು ಮೊರ್‌ಡುವ ಇಂಜಿರ.

ಬಿದ್ದಪ್ಪ : ಅಕ್ಕು ಮುತ್ತಕ್ಕಿ, ಅಕ್ಕ ನಾಡ ಮಕ್ಕ ದಾರೂ ನಾಡ ಪಕ್ಕ ಸಹ  
ಸುಳ್‌ಂಜಲೆ. ನಾನ್ ಕಾಯಿಲೆರ ನೊಂಬಲಕಾಯಿತ್ ಮೊರ್‌ಟದ್  
ಅಲ್ಲ, ಮನಸ್ಸಕ್ ಆನ ನೊಂಬಲಕಾಯಿತ್ ಅಂದೂ ಮೊರ್‌ಟಯೆ.

ಇಂದೂ ಮೊರಟಂಡೇ ಉಳ್ಳ,

ಮುತ್ತಕ್ಕಿ : ನಿಂಗಳೇ ಎಣ್ಣೆರ, ಜೀವನ ನಿಂಗ ಎಡ್ತಂಡನ್ನಕೇಂದ್, ಇಕ್ಕ ನಿಂಗಳೇ ಮೊರಟಂಡೇ ಉಳ್ಳ ಎಣ್ಣುವಿರಾ?

ಬಿದ್ದಪ್ಪ : ನಾನ್ ಮೊರಡುವದ್, ನರ ಮನುಷ್ಯಂಗಕ್ ಕಾಂಬುಲೆ,, ದೇವಕ್ ಮಾತ್ರ ಕಾಂಬ, ನಾನಿಕ್ಕಣೇ ಕಾಯಿಲ ವಾಸಿ ಆನಲ್ಲಿಂಜಿ ಕಣ್ಣೀರ್ ಇಟ್ಟಿಯನಾ?

ಮುತ್ತಕ್ಕಿ : ನಿಂಗ ಕಣ್ಣೀರ್ ಇಡತೆ ಪೋಚೆಂಗಿನೂ ನಿಂಗಡ ಮೂಡಲ್ ಆ ಭಾವನೆ ಇಪ್ಪ ಇಂಜತ್. ನಾನೇ ಕಂಡಿಯೆ, ನಾನೂ ಸುಮಾರ್ ಕುರಿ ನಿಂಗಳ ಕೇಟಿಯೆ, ನಿಂಗ ತಕ್ಕ ಮಾತಿರುವ ಇಂಜಿರಾ, ಉಪಾಯತ್..

ಬಿದ್ದಪ್ಪ : ಅಕ್ಕ ನಾನ್ ಒಳ್ಳಲ್ ಮೊರಡುವದ್ ನೀಕ್ ಕಂಡತಲ್ಲಾ?

ಮುತ್ತಕ್ಕಿ : ಅಕ್ಕು ಖಂಡಿತಾ ಅಕ್ಕು ಎಚ್ಚಕೋ ಕುರಿ ನಾನೆ ನಿಂಗಳ ಕೇಟಿಯೆ.

ಬಿದ್ದಪ್ಪ : ಅಕ್ಕು ನೀಕ್ ನಲ್ಲರಿಮೆ ಉಳ್ಳಾಂಗ್ ನೀಕ್ ಅದ್ ಕಾಂಬ ಇಂಜತ್. ಎಲ್ಲಾಂಗೂ ಒರ್ ಅಂತ್ಯ ಇಪ್ಪ. ದೇವ ಎನ್ನ ಮಾಡುವ ಪಾರ ಕಾಕನ.

\* \* \* \* \*

## ಸೀನ್ ಪನ್ನೆರಂಡ್

(ತಿಂಗ ತಿಂಗ ಬಪ್ಪನ್ನಕೆ ಪೊನ್ನಣ್ಣ ಮನೆಕ್ ಬಪ್ಪ)

(ಕಾಲ್ ಪುಡ್‌ಚಿತಾನದು ಅಪ್ಪಂಡ ಕೂಡೆ ಅಳ್ತವ)

ಬಿದ್ದಪ್ಪ : ಎನ್ನ ಪೊನ್ನೂ, ಪೊಣ್ಣ್ಣ ಮಕ್ಕ ಚಾಯಿತೆ ಉಂಡಾ? ಮಕ್ಕಡ  
ವಿದ್ಯಾಭ್ಯಾಸ ಎನ್ನನೆ ಆಯೆಂಡ್ ಉಂಡ್?

ಪೊನ್ನಣ್ಣ : ಎಲ್ಲಾ ಚಾಯಿತೆ ಉಂಡ್. ಮಕ್ಕ ಸ್ಕೂಲ್‌ಕ್ ಪೋಯೆಂಡುಂಡ್,  
ಪೆರಿಯಂವ ದುಂಬಾ ಕಷ್ಟ ಪಡುವ, ಎಂಬತಂಜಿ ತೊಂಬದ್  
ಎಡ್‌ಪ, ಚೆರಿಯಂವ ಓದುವದೇ ಕಾಂಬುಲೆ, ಆಚೆಂಗಿ ಮಾರ್ಕ್  
ಮಾತ್ರ ಎಂಬತಂಜಿ ತೊಂಬದ್ ಎಡ್‌ಪ, ನಾನ್ ಅವಂಗ್ ಎಚ್ಚಕ್  
ಎಣ್ಣೆಚೆಂಗಿನೂ ಅವ ಓದುಲೆ, ನಾನೂ ಜಾಸ್ತಿ ಎಣ್ಣುವನ್ನಕೆ ಇಲ್ಲೆ  
ಅವಂಡ ಮಾರ್ಕ್‌ಲೇ ತೃಪ್ಪಿ,

ಬಿದ್ದಪ್ಪ : ಅದೂ ಸರಿ, ಇಕ್ಕತ ಈ ಪೈಪೋಟಿ ಜಗತ್ ಚೆನ್ನ ಓದ್‌ಚೆಂಗಿ,,  
ತೊಂಬತಂಜಿ ತೊಂಬತೇಳ್ ಎಡ್‌ಕೋಲು. ಅವಂಗ್ ಎಣ್ಣೆತ್  
ಕೇಕತ ಪಿಂಚಾ ನಂಗ ನಿಂಗ ಎಂತ ಮಾಡುವ ಕಯ್ಯುವ. ಅಯಿಂಗಕ್  
ಇಕ್ಕ ಅರ್ಥ ಆಪುಲೆ, ಅರ್ಥ ಆಪಕ ದುಂಬಾ ತಡ ಆಯಿತಿಪ್ಪ.  
ಅದೇ ಜೀವನ ಅಲ್ಲಾ.

ಪೊನ್ನಣ್ಣ : ಅಕ್ಕು ಅಪ್ಪಯ್ಯ, ಪೆರಿಯಂವಂಗ್ ವೆರಿಟ್ ಸೀಟ್  
ಇಂಜಿನಿಯರಿಂಗ್‌ಕ್ ಕೆಟ್‌ಚೆಂಗಿ ಮದಿ, ಚೆರಿಯಂವ  
ಮಾಡುಲೆಲೋ, ಡಾಕ್ಟರೇ ಆಂಡುಲೋ, ಅವನೂ ಡಾಕ್ಟರ್  
ಆಯಿರೊಂಜಿ ಮಾದಪ್ಪಣ್ಣಯ್ಯ ನನ್ನಕೆ ಪರದೇಶಕ್ ಪೋಯಿರುವಾ  
ಕಾಂಬ.

ಬಿದ್ದಪ್ಪ : ಅವನನ್ನಕೆ ಅಲ್ಲಿಯೇ ಮಂಗಲ ಆಕತ ಪೋಚೆಂಗಿ ಮದಿ.

ಪೊನ್ನಣ್ಣ : ಅಪ್ಪಯ್ಯ, ನೀನೆ ಎಣ್ಣುವ ಇಂಜಿಯ, ಜೀವನತ್ ನಡಪದ್ ನಂಗಡ

ಕೈಲ್ ಇಲ್ಲೆ, ಆ ಭಗವಂತಂಡ ಕೈಲುಂಡ್.

ಬಿದ್ದಪ್ಪ : ಅಕ್ಕು ಪೊನ್ನಣ್ಣ, ನೂರಾಂಗ್ ಪತ್ತ ಪಾಲ್ ಆಪ, ತೊಂಬದ್ ಪಾಲ್ ನಂಗ ಮಾಡಿಯವದ್, ಅದ್ ಮರ್ಪಕಾಗ.

ಪೊನ್ನಣ್ಣ : ಅಕ್ಕು ಅಪ್ಪಯ್ಯ, ಇಕ್ಕಲೇ ಆಂಡ ವಿಷಯ ಮಂಡೆ ಕೆಡ್ತಿಯವದ್ ಬೋಂಡ, ಬಪ್ಪಕ ನೋಟನ.

ಬಿದ್ದಪ್ಪ : ಅಕ್ಕು, ಇಕ್ಕ ನೀನ್ ಮಕ್ಕಕ್ ನಲ್ಲ ವಿದ್ಯ ಬುದ್ದಿ ಕೊಡ್, ಅಯಿಂಗಕ್ ನಲ್ಲ ಬಟ್ಟೆ ಕಾಟಿ ಕೊಡ್, ದುಡ್ಡ್ ಕಾಸ್ಕೆನ್ನೇಂಗಿ ತೊಂದರೆ ಆಚೆಂಗಿ ಎಣ್ಣೆ, ಕೈಲಾಪ ನಾಲ್ ಕಾಸ್ ಸಹಾಯ ಮಾಡುವಿ, ಕೇಪಕ್ ಮಡಿಕತೆ.

ಪೊನ್ನಣ್ಣ : ದುಡ್ಡ್ ಕಾಸ್ತರ ತೊಂದರೆ ಬಪ್ಪಕಿಲ್ಲೆ, ಮೆರಿಟ್ ಸೀಟ್ ಕೊಟ್ಟೆಚೆಂಗಿ ನಂಗಕ್ ಸಾಧ್ಯ ಆಪಚ್ಚಕ್ ಮಾತ್ರ ಫೀಸ್ ಇಪ್ಪ, ಆನ ನಂಗಡ ದಂಡಾಳ್ ಸಂಬಳತೇ ಮಾಡಿಯವ. ಅನ್ನನೆ ಅರ್ಜೆಂಟ್ ಉಂಡೇಂಗಿ ಖಂಡಿತಾ ಕೇಪಿ, ಮಡಿಪುಲೆ, ನಾನ್ ನಿನ್ನ ಕೇಕತೆ ಪಿಂಞ ದಾರ್ನ ಕೇಪ. ನೀಕೂ ವಯಸ್ಸ್ ಕಾಲತ್ ದುಡ್ಡ್ ಬೋಂಡಿಯಾಕು, ಬೆಚ್ಚ, ಕಡೇ ಕಾಲತ್ ದಾರ್ನೋ ನಂಬುವ ಕಯ್ಯಲೆ.

ಬಿದ್ದಪ್ಪ : ಅದ್ ಸರಿ ಕುಂಞಿ, ಬೋರೆ ದಾರೇ ಕೇಟತೇಂಗಿ ಕೊಡ್ಪುಲೆ, ಅಯಿಂಗ ಕೇಪ ಸ್ಥಿತಿಲೂ ಇಲ್ಲೆ, ಎಲ್ಲಾ ಪಣ ಕಾಸ್ತರ ವಿಷಯತ್ ಚಾಯಿತೇ ಉಂಡಲ್ಲಾ.

ಪೊನ್ನಣ್ಣ : ಮನುಷ್ಯಂಗ್ ಎಚ್ಚಕುಂಡೇಂಗಿನೂ ಪೋರ, ಪಾಳ್ ದುರಾಸೆ ಇಪ್ಪ, ಆಂಗ್ ಎಣ್ಣೆಯೆ, ಚೆನ್ನ ಎಚ್ಚರಾಂಡ್.

ಬಿದ್ದಪ್ಪ : ಆಚಿ ಬುಡ್ ಪೊನ್ನಣ್ಣ,

ಮುತ್ತಕ್ಕಿ : ತಕ್ಕಲೇ ಮೋಂವಂಡ ಕೆಲ ದುಂಬ್ಚೆಟ್ಟುಂಡುಳ್ಳಿರ ಕಾಂಬ, ಉಂಬ ನೇರ ಆಚಿ, ಉಂಬಕೇಳಿ, ನಿಂಗಡ ಮೋಂವಂಗ್ ಕುಷೀಂದ್ ಕಿರ್ ಕೋಳಿ ನೆರ್ಚೆತ್ ನೂಪುಟ್ಟ್ ಮಾಡಿಯೆ, ಬಾರಿ ಉಂಬಕೇಳಿ.

ಬಿದ್ದಪ್ಪ : ಅಕ್ಕು ಮುತ್ತಕ್ಕಿ, ಉಂಬ ನೇರ ಆಚಿ, ಏಳ್ ಪೊನ್ನಣ್ಣ, ಮುತ್ತಕ್ಕಿ ಎಂತೆಲ್ಲೋ ಗದ್ದಾಳ ಮಾಡಿತ್ಲೋ, (ಉಂಡಂಡ್)

ಪೊನ್ನಣ್ಣ : ಎಂತೇ ಎಣ್ಣೆ ಅಪ್ಪಯ್ಯ, ಮುತ್ತಕ್ಕಿ ಆಂಟಿರ ಅಡಿಗೇ ದುಂಬಾ ಚೋದ್,

- ಅವ್ವಯ್ಯಂಡ ಗ್ಯಾನ ಬಪ್ಪ. ಮಸಾಲೆ ಎಲ್ಲಾ ಅದೇ ಗಮ , ರುಚಿ.
- ಬಿದ್ದಪ್ಪ : (ಮೋವಂಡ ಮೂಡೇ ನೋಟುವ) ಅಕ್ಕು ಪೊನ್ನಣ್ಣ, ಅದೇ ಚೋದ್, ಗಮ, ಆನುಂಡೇ ನೀಡಪ್ಪ ಇಕ್ಕಣೇ ಆರೋಗ್ಯತ್ ಬದ್ಕಿಯಂಡುಂಡ್.
- ಮುತ್ತಕ್ಕಿ : ನಿಂಗ ನಾಡ ಅಡಿಗಿನ ಅಚ್ಚಕೊಂದು ಮೆಚ್ಚಂಡ, ನಾಡದ್ ಎಂತೋ ಒರ್ ಅಡಿಗೇ, ಅಚ್ಚಕೇ. ಆನ ಅಚ್ಚಕೊಂದೂ ಹೊಗ್ಳಂಡ.
- ಬಿದ್ದಪ್ಪ : ಇಲ್ಲೆ ಮುತ್ತಕ್ಕಿ, ಇದ್ ಹೊಗಳಿಕೆ ಅಲ್ಲ, ನೇರಾನ ಸಂಗತಿ, ಆಂಗಿ ಪೊನ್ನಣ್ಣ ಸಹ ಎಣ್ಣಿಯೆ.
- ಮುತ್ತಕ್ಕಿ : ಅದೆಂತೋ, ಇಕ್ಕ ಮಾಡ್ನ ಅಡಿಗಿನ ಚಾಯಿತೆ ಉಣ್ಣೆ, ಅದೇ ನಾಕ್ ಸಂತೋಷ ಅದೂ ಅಲ್ಲತೆ ನಿಂಗ ಮಾತ್ರ ತಿಂಗಕೊಮ್ಮೇಂಗಿ ಬಪ್ಪಿರ, ಬೋರೆ ದಾರೂ ಬಪ್ಪುಲೆಲ್ಲ, ಆಂಗ್ ನಿಂಗಕ್ ಮಾತ್ರ ಅಡಿಗೇ ಮಾಡಿತ್ ಇಡುವ ಭಾಗ್ಯ ನಾಕ್.
- ಪೊನ್ನಣ್ಣ : ಇಲ್ಲೆ ನಿಂಗಡ ಕೈರ ಅಡಿಗೇ ಉಂಬದ್ ನಾಡ ಸೌಭಾಗ್ಯ, ಎಲ್ಲಾರ್ಕೂ ಕಟ್ಟುಲೆಲ್ಲಾ, ಆಂಗಿ ನಾನ್ ಎಣ್ಣುವ ಅದೇ ನಾಡ ಸೌಭಾಗ್ಯಾಂದ್.
- ಬಿದ್ದಪ್ಪ : ನೀಡ ಅಣ್ಣಂಗನ್ನೆಂಗಿ ತಕ್ಕ ಪರ್ಂದತಾ, ಪೋನ್ ಮಾಡಿತಿಂಜತ್ತಾ?
- ಪೊನ್ನಣ್ಣ : ಇಲ್ಲೆ ಅಪ್ಪಯ್ಯ, ಅಯಿಂಗಕ್ ನನ್ನ ಕಂಡಕ ಅಚ್ಚಕಾಲೆ ಉಂಡ್, ನೀಕೂ ಗೊತ್ತುಂಡ್.
- ಬಿದ್ದಪ್ಪ : ಇಕ್ಕಲೂ ಅನ್ನನೆ ಉಂಡಾ, ನೀನೊಂದೂ ಕೆಟ್ಟದ್ ಅಯಿಂಗಕ್ ಮಾಡಿತಿಲ್ಲೆಲ್ಲಾ.
- ಪೊನ್ನಣ್ಣ : ನಾನ್ ದಾರ್ಕೂ ಕೆಟ್ಟದ್ ಮಾಡಿತಿಲ್ಲೆ, ಅಪ್ಪಯ್ಯ, ಆಚೆಂಗಿ ನಂಗ ದಂಡಾಳೂ ಚೆರಿಯ ಕೆಲಸ ಆಚೆಂಗಿನೂ, ನೀನ್ ಪಡ್ಪ್ ಚೆಟ್ಟಿ ಶಿಸ್ತ್, ನಲ್ಲರಿಮೆಲ್ ಬದ್ಕಿಯಂಡುಂಡ್, ಮಕ್ಕಳೂ ಪೋಲಿಯ ಅಲ್ಲ, ಚಾಯಿತೇ ಓದಿಯಂಡುಂಡ್. ಅದೇ ಹೊಟ್ಟೆಕಿಚ್ಚ್, ಆಂಗ್ ನಾಡ ಮೇಲೆ ಸವಾರಿ ಮಾಡುವ ಪ್ರಯತ್ನ.
- ಬಿದ್ದಪ್ಪ : ಅವು ಎಂತ ಮಾಡ್ಚೆಂಗಿನೂ ನೀಕ್ ಒಂದೂ ಆಪುಲೆ, ಆ ಗುರು ಕಾರಣ ಅಜ್ಜಪ್ಪ, ಇಗ್ಗುತಪ್ಪ ಕಾವೆರಮ್ಮೆ, ನಂಗಡ ಊರ್ ದೇವ, ನಿನ್ನ ನೀಡ ಸಂಸಾರತ್ನ ಕಾಪಾಡುವ, ನೀನ್ ಧರ್ಮ ಪ್ರಕಾರ ಉಳ್ಳಿಯ, "ದಾರ್ ಧರ್ಮತ್ನ ಕಾಪಾಡುವೋ, ಅಯಿಂಗಳ

ಧರ್ಮವೇ ಕಾಪಾಡುವ" ಪಳಂಜೊಲ್ಲ ಎಂದೂ ಪೊಟ್ಟಾಪುಲೆ.  
ದೇವ ನಲ್ಲದ್ ಮಾಡುವ ಬುಡ್, ಹೊಟ್ಟೆ ಕಿಚ್ಚ್ ಪಟ್ಟಂವ ನಂದಾಪುಲೆ,  
ಜಗಕೇ ಗೊತ್ತ್. ಬುಡ್.

ಪೊನ್ನಣ್ಣ : ಅವು ಹೊಟ್ಟೆ ಕಿಚ್ಚ್ ಪಡುವ, ಎಂತೆಲ್ಲೋ ಎಣ್ಣುವ, ನಾಡ ನಾಡ  
ಪೊಣ್ಣಾರ ಮಂಡೆ ಕೆಡ್ತುವಕ್ ಪ್ರಯತ್ನ, ನಾನ್ ಮುಂಡತಿಂಜ್‌ರುವಿ,  
ಪೊನ್ನಕ್ಕಿ ಚೆನ್ನ ಪಾರಿ ಕಳಿಪ, ಒಂದೋ ನಾನ್ ಸಮಾಧಾನ ಮಾಡುವಿ  
ಇಲ್ಲೆ ಅವಳೆ ಅರ್ಥ ಮಾಡಿಯಂಡ್ ಮುಂಡತಾಯಿರುವ.

ಬಿದ್ದಪ್ಪ : ಮೋನೆ ಹೊಟ್ಟೆ ಕಿಚ್ಚ್ ಪಡುವಂವಂಡ ಕೆಲ ಬೇವ, ಬೋರೆ  
ಉಳ್ಳಯಿಂಗ ಬೀಡಿ ಕತ್ತಚಿಟ್ಟವ, ಒಲೆ ಕತ್ತಚಿಟ್ಟವ, ಆಂಡ  
ಉಪಯೋಗ ಎಡ್ತವ, ಕಡೇಕ್ ಕಿಚ್ಚ್ ಪಟ್ಟವುವೇ ಪಾಳಾಪ.  
ಆಂಗೇ ದೇವ ಉಂಡ್‌ಂದ್ ಎಣ್ಣುವ.

ಪೊನ್ನಣ್ಣ: ಆಕು ಅಪ್ಪಯ್ಯ..

\* \* \* \* \*

## ಸೀನ್ ಪದಿಮೂಂದ್

(ಬಿದ್ದಪ್ಪ ಪೊಲಾಕ ತಿಂಡಿಕ್ ಮೇಜೆರ ಎದಿಕೆ ಅಳತಿಪ್ಪ. ಮುತ್ತಕ್ಕಿ ಒಟ್ಟಿ ಕರಿ ಕೊಂಡ  
ಬಪ್ಪ- ಮುತ್ತಕ್ಕಿ ತಲೆ ತಿರಿತ್ ಬುದ್ದೋಪ)

ಬಿದ್ದಪ್ಪ : ಎನ್ನಾಚಿ ಮುತ್ತಕ್ಕಿ, ಹುಷಾರಿಲ್ಲಿಯಾ? ಪಣಿ ಮಾಡಿಯಂಡೇ  
ಆಯಿಟಿಯಾ?(ಎಣ್ಣೆಯಂಡ್ ಮುತ್ತಕ್ಕಿನ ಎಪ್ಪುವ), ಮುತ್ತಕ್ಕಿ,  
ತೊಡುವಕ ಚುಡುವನ್ನತ ಪನಿ, ಚಿ, ಎಂತ ಮುತ್ತಕ್ಕಿ, ನೀನ್ ಇಚ್ಚ  
ಪನಿ ಬಕ್ಕಣೆ ಎಣ್ಣೆತೆ ಇಂಜಿಯಲ್ಲ(ಅವಳ ಒಪ್ಪಿತ್, ಕಾರ್ಲ್ಟ್ವಂಡ್  
ಆಸ್ಪತ್ರೆಕ್ ಕೂಟಿಯಂಡ್ ಪೋವ--ನರ್ಸಿಂಗ್ ಹೋಮ್ಲ್ ಅಡ್ಡಿಟ್  
ಮಾಡುವ).

ಬಿದ್ದಪ್ಪ : ಡಾಕ್ಟರ್, ಇವಕೆನ್ನಾಯೆ, ನೋಟಿ, ಪೊಲಾಕ ತಿಂಡಿ ಬೆಪ್ಪಕ ಮಂಡೆ  
ತಿರಿತ್ ಬುದ್ದೋಚಿ, ಬೆರಿಯ ನೋಟಿ ಡಾಕ್ಟರೆ, ಎಚ್ಚಕ್ ದುಡ್ಡ್  
ಕರ್ಚಾಚೆಂಗಿನೂ ಪರೋಲೆ, ಇವಳ ವಾಸಿ ಮಾಡಿ ಡಾಕ್ಟರ್.

ಡಾಕ್ಟರ್ : ಆಕು ಬಿದ್ದಪ್ಪಣ್ಣ, ನಿಂಗ ಎನ್ನಂಗ್ ಇಚ್ಚಕ್ ಟೆನ್ಸನ್ ಎಡ್ತವ,  
ನಿಂದೊಳಿ, ನೋಟನ ಅಯಿಂಗಕ್ ಎನ್ನಾಯೇಂದ್.

ಬಿದ್ದಪ್ಪ : ಇವ ನಾಕಿಂಜ ಒರೇ ಒರ್ ಆಸರೆ, ಅದೂ ಬುದ್ದೋಚಿಂಗಿ, ನಾನೂ  
ಬುದ್ದನ್ನಕೆ.

ಡಾಕ್ಟರ್ : ಅನ್ನನೆಲ್ಲ ಎನ್ನಂಗ್ ಗ್ಯಾನ ಮಾಡುವಿರಾ, ನೋಟನ ಎಂತ  
ಆಯೇಂದ್, ಪಿಂಇ ಟ್ರೀಟ್‌ಮೆಂಟ್ ಸುರು ಮಾಡನ. ನಿಂಗ  
ಪೊರ್‌ಮೆ ಅಳತೋಳಿ, ನರ್ಸ್ ಬಾರಿ(ಮುತ್ತಕ್ಕಿರ ಪಕ್ಕ ಬಪ್ಪ ಪರೀಕ್ಷೆ  
ಮಾಡುವ)(ಚೋರೆ ಪರೀಕ್ಷೆ ಮಾಡ್‌ಚಿರುವ) ರೆಪೋರ್ಟ್ ಬರಡ್  
ಬಿದ್ದಪ್ಪಣ್ಣ, ಪಿಂಇ ನೋಟನ, ಎಂತ ಮದ್ದ್ ಕೊಡ್‌ಕೊಂಡೂಂದ್.  
ನಿಂಗ ವರೀಸ್ ಮಾಡಿಯೆಂಡ್ ಟೆನ್ಸನ್ ಮಾಡಿಯವತಿ, ರಿಪೋರ್ಟ್  
ಬರಡ್, ಪಿಂಇ ನೋಟನ.

ಬಿದ್ದಪ್ಪ : ನಾನ್ ಇವಡ ಪಕ್ಕ ಅಳತವಲು ಅಲ್ಲ. ತೊಂದರೆ ಆಪಕಿಲ್ಲೆಲ್ಲ.  
 ಡಾಕ್ಟರ್ : ಆಚಿ ಬಿದ್ದಪ್ಪಣ್ಣ, ಅದೊಳಿ ರಿಪೋರ್ಟ್ ಬಾತ್,(ರಿಪೋರ್ಟ್ ನೋಟುವ) ಬಿದ್ದಪ್ಪಣ್ಣ, ನಿಂಗ ಅನಾವಶ್ಯಕವಾಯಿತ್ ವರೀಸ್ ಮಾಡುವ, ಇದ್ ವೈರಲ್ ಪನಿ, ವೀಕ್ನೆಸ್ಸ್, ಮದ್ದ್ ತಿಂದಂಡ್ ಚೆನ್ನ ರೆಸ್ತ್ ಎಡ್ತಂಡಕ ಮದಿ, ವಾಸಿ ಆಪ, ಸದ್ಯಕ್ ಒರ್ ಇಂಜೆಕ್ಸನ್ ಮಾಡುವಿ, ಸುಮಾರ್ಕ್ ವಾಸಿ ಆಪ, ಪನಿ ಕಮ್ಮಿ ಆಪ,

ಬಿದ್ದಪ್ಪ : ಡಾಕ್ಟರ್, ಇವಳ ಇಲ್ಲೇ ಅಡ್ಮಿಟ್ ಮಾಡಿ, ಮನೆಕ್ ಬಾತೆಂಗಿ ರೆಸ್ತ್ ಎಡ್ಪುಲೆ, ಕೆಲಸ ಮಾಡಿಯೆಂಡ್ ಪುನಹ ವೈಂಗಿ ಪೋಕು. ಆಂಗ್ ಇವ ಚೆನ್ನ ದಿನ ಇಲ್ಲೇ ಅಡ್ಮಿಟ್ ಮಾಡಿಯೋಳಿ, ಆಚೆಂಗಿ ಅವಕ್ ಮಾತ್ರ ಗೊತ್ತಪಕಾಗ, ನನ್ನುಂಡ್ ಅವ ಅಡ್ಮಿಟ್ ಆಯೆಂಡ್, ದಯ ಬೆಚ್ಚಿತ್ ಡಾಕ್ಟರ್ ಇದೊಂದ್ ಮಾಡಿ, ಅವ ಪೂರ್ತಿ ವಾಸಿ ಆಕಣೆ ಇಲ್ಲೇ ಇರಡ್.

ಡಾಕ್ಟರ್ : ಆಚಿ ಬಿದ್ದಪ್ಪಣ್ಣ, ನಿಂಗ ಆಸ್ಪತ್ರೆ ಬಿಲ್ ಕೆಟ್ಟುವವು, ಅಕ್ಕಲೇ ಎಣ್ಣೆತುಳ್ಳಿರಾ, ಎಚ್ಚಕ್ ದುಡ್ಡ್ ಖರ್ಚಾಚೆಂಗಿನೂ ಪರೋಲೇಂದ್, ಪಿಂಇ ನಾಕೆನ್ನ, ಅವು ಇಲ್ಲೇ ಇರಡ್,

ಬಿದ್ದಪ್ಪ : ಡಾಕ್ಟರೆ, ಇಲ್ಲಿ ಊಟ ತಿಂಡಿಕ್ ಕ್ಯಾಂಟೀನ್ ಉಂಡಾ?

ಡಾಕ್ಟರ್ : ಎನ್ನಂಗ್ ಕ್ಯಾಂಟೀನ್, ಬಿದ್ದಪ್ಪಣ್ಣಾ?

ಬಿದ್ದಪ್ಪ : ಮನೆಲ್ ನಾನು ಅವಳೇ ಉಳ್ಳ, ಅಡಿಗೇ ತಿಂಡಿ ಮಾಡುವಕ್ ಅವ ಇಲ್ಲಿ ಆಪಲ್ಲಾ, ಆಂಗ್ ಅವಕೂ ಸಮಯಕ್ ಸರಿ ಊಟ ತಿಂಡಿ ಆಂಡು, ನಾಕೂ ಆಂಡು, ಆಂಗ್ ಕ್ಯಾಂಟೀನ್.

ಡಾಕ್ಟರ್ : ಇಲ್ಲಿ ಕ್ಯಾಂಟೀನ್ ಉಂಡ್, ಆಂಡ ಓನರ್ ಬಾರಿ ನಲ್ಲವ, ನಿಂಗಕ್ ಬೋಂಡಿಕಿ ಬೋಂಡಿಯದ್ ಎಣ್ಣೆ, ಎರ್ಚಿ ಮೀನ್ ಬುಟ್ಟಿತ್, ಮಾಡಿ ತಕ್ಕು.

ಬಿದ್ದಪ್ಪ : ದುಂಬಾ ತ್ಯಾಂಕ್ಸ್ ಡಾಕ್ಟರ್, ಅವಕ್ ಟ್ರೀಟ್‌ಮೆಂಟ್ ಇಕ್ಕಲೇ ಸುರು ಮಾಡಿ.

ಡಾಕ್ಟರ್ : ಬಿದ್ದಪ್ಪಣ್ಣ, ಆಯಿಂಗಕ್ ಟ್ರೀಟ್‌ಮೆಂಟ್ ಸುರು ಆಯಿ ಪೋಯಿತ್, ಅಲ್ಲಿ ನರ್ಸ್‌ರ ಪಕ್ಕ, ಪೋಯಿ ಒರ್ ಪಟ್ಟಿ ತಪ್ಪ, ಆ ಮದ್ದೆಲ್ಲಾ



ಫಾರ್ಮಸಿಂಜಿ ಕೊಂಡ ಬಂತ್ ಕೊಡಿ. ಟ್ರೀಟ್‌ಮೆಂಟ್‌ರ ವಿಷಯ ನಿಂಗ ವರೀಸ್ ಮಾಡಂಡ, ಬೈಟಾಕಣೇ ಅಯಿಂಗಡ ಪನಿ ವಾಸಿ ಆಕು. ದಾರೇಂಗಿ ಅವಡ ರೂಮ್‌ಲ್ ಬುದ್ದವಲು, ಅವಕ್ ಬೈಟ್ ಎನ್ನೇಂಗಿ ಬೋಂಡಿಕಿ.

ಬಿದ್ದಪ್ಪ : ಆಕು ಡಾಕ್ಟರೆ, ನಾನೇ ಬುದ್ದವಿ, ಅವಕ್ ಸೊಯ ಬಂದ ಪಿಂಞ ಅವಕ್ ಎಣ್ಣಿತ್, ಮನೆಕ್ ಪೋಯಿತ್, ನಾಡ ಅವಡ ಬಟ್ಟೆ, ತಟ್ಟೆ ಗ್ಲಾಸ್ ಫ್ಲಾಸ್ಕ್ ನೀರ್ ಎಲ್ಲ ಕೊಂಡ ಬರೊಂಡು, ಮನೆಕ್ ಬೀಗ ಇಟ್ಟಂಡ್ ಬರೊಂಡು.

ಡಾಕ್ಟರ್ : ಅಯಿಂಗಕ್ ಉಂಞೋರ್ ಗಂಟೆಲ್ ಸೊಯ ಬಕ್ಕು, ಅಕ್ಕ ನಿಂಗ ನರ್ಸ್‌ಕ್ ಎಣ್ಣಿತ್ ಮನೆಕ್ ಪೋಯಿ.

ಬಿದ್ದಪ್ಪ : ಆಕು ಡಾಕ್ಟರೆ.

(ಮುತ್ತಕ್ಕಿರ ಕಟ್ಟಾರ ಪಕ್ಕ ಅಳ್ತವ ಬಿದ್ದಪ್ಪ).

\* \* \* \* \*

## ಸೀನ್ ಪದಿನಾಲ್

(ಆಸ್ಪತ್ರೆಲ್ ಮುತ್ತಕ್ಕಿಕ್ ಎಚ್ಚರ ಆಪ.. ಬಿದ್ದಪ್ಪ ಅವಡ ಕಟ್ವರ ಪಕ್ಕತ್ ಅಳಾತಿತಿಪ್ಪ)  
(ಅವಡ ಡ್ರಿಪ್ಸ್ ಇಟ್ಟ ಕೈನ ಪುಡ್‌ಚಂಡಿತಿಪ್ಪ)

ಮುತ್ತಕ್ಕಿ : ಕೈ ಬುಡಿ, ಎನ್ನಂಗ್ ಕೈ ಪುಡ್‌ಚಂಡೀತುಳ್ಳಿರಾ?

ಬಿದ್ದಪ್ಪ : ನೀಕ್ ಮಂಡೆ ತಿರಿತಿಂಜತ್, ಡ್ರಿಪ್ಸ್ ಇಟ್ಟಿತಿಂಜತ್, ನೀನ್ ಕೈ ತಿರ್‌ಕ್‌ಚೆಂಗಿ ನೊಂಬಲ ಆಕೂಂದ್ ಅನ್ನನೇ ಪುಡ್‌ಚಂಡಿತಿಂಜ.

ಮುತ್ತಕ್ಕಿ : ನಾಕೆನ್ನಾಯೇಂದ್ ನಿಂಗ ಇಲ್ಲಿ ಬುದ್ದಾಕಿಯೆ, ಮನೆಲ್ ಎಚ್ಚಕ್ ಕೆಲಸ ಉಂಡ್, ನಿಂಗಕ್ ಟೈಮ್‌ಕ್ ಸರಿಯಾಯಿತ್ ಊಟ ತಿಂಡಿ ಬೋಂಡು.

ಬಿದ್ದಪ್ಪ : ಮುತ್ತಕ್ಕಿ ಚೆನ್ನ ಮುಂಡತಿಪ್ಪಿಯಾ, ಸುಸ್ತಾಪ, ನಾಡ ಊಟ ತಿಂಡಿರದೇ ಚಿಂತೆ ನೀಕ್, ನೀನ್ ನಿನ್ನ ಪೂರ್ತಿ ಮರ್‌ಂದಿತುಳ್ಳಿಯು, ಡಾಕ್ಟರ್ ಇಂಞೋರ್ ಎಟ್ವ ದಿವಸ ಇಲ್ಲೇ ಇರೊಂಡು ಎಣ್ಣೆತ್. ನಾನೂ ಒತ್ತಂಡ, ಎನ್ನ ಮಾಡೊ ಪಿಂಞ ಡಾಕ್ಟರ್ ಅನ್ನನೆ ಎಣ್ಣೆಚಲ್ಲ.

ಮುತ್ತಕ್ಕಿ : ಅನ್ನನೆಲ್ಲಾ, ನಿಂಗಕ್ ಮನೆ ಕೆಲಸ, ಅಡಿಗೆ ಮಾಡಿತ್ ಅಭ್ಯಾಸ ಇಲ್ಲೆ, ಅದೂ ಅಲ್ಲತೆ ಈ ವಯಸ್ಸಲ್, ಅದೂ ನಾನಿಪ್ಪಕ ನಿಂಗ ಕಷ್ಟ ಪಡುವದ್ ನಾಕ್ ಸರಿ ಕಾಂಬುಲೆ.

ಬಿದ್ದಪ್ಪ : ನೀಕ್ ಸರಿ ಕಾಂಗಂಡ, ಡಾಕ್ಟರ್ ಎಣ್ಣೆಚಲ್ಲಾ, ನೀನ್ ನಾಡ ಬಗೆ, ಮನೆ ಕಡೆ ಚಿಂತೆ ಮಾಡತೆ ಗೊತ್ತಾಚಾ. ಅಂದಕೇ ನೀಡ ಕಾಯಿಲ ಬೆರಿಯ ವಾಸಿ ಆಪ. ಬೆರಿಯ ಮನೆಕ್ ಬರೋಲು. ನೀನ್ ಚಿಂತೆ ಮಾಡಿಯೆಂಡುಂಡೆಂಗಿ ಇಂಞೂ ತಡ ಆಪ ನೀನ್ ಮನೆಕ್ ಬಪ್ಪದ್. ಏದ್ ಬೋಂಡು ಎಣ್ಣೆ, ಇದ್ ಎನ್ನನೆ ಎಣ್ಣೆಚೆಂಗಿ "ವಿಷ್ಟುರ ದ್ವಾರ ಪಾಲಕಂಗ ಜಯ ವಿಜಯಂಗಕ್ ಒರ್ ಶಾಪ ಇಡುವ, ಎನ್ನ ಎಣ್ಣೆಚೆಂಗಿ, ಅವು ಭೂಲೋಕತ್ ಜನ್ಮ ಎಡ್‌ಪನ್ನಕೆ, ಅಕ್ಕ

ಮರು ಶಾಪತ್ ವಿಷ್ಣು ಅಯಿಂಗಕ್ ದಂಡ್ ಆಯ್ಕೆ ಕೊಡ್ಪ, ಅದತ್ ಒಂದ್: ಭೂಲೋಕತ್ ವಿಷ್ಣು ಭಕ್ತಂಗಳಾಯಿತಿರೊಂಡುವೇಂಗಿ ಏಳ್ ಜನ್ಮಾಂದು, ದಂಡ್: ವಿಷ್ಣು ಶತ್ರು ಆಯಿತ್, ವಿಷ್ಣುರ ಕೈಂಜೇ ಚಾವು, ಆಚಿಂಗಿ ಮೂಂದ್ ಜನ್ಮಾಂದೂ ಎಣ್ಣುವ. ಅಕ್ಕ ಆ ದ್ವಾರ ಪಾಲಕಂಗ ನಂಗ ಆಪಚ್ಚಕ್ ಬೆರಿಯ ನೀಡ ಪಡಿ ಪಾರಕ್ ಬಪ್ಪ, ನೀಡ ಶತ್ರು ಆಚಿಂಗಿನೂ ಪರೊಲೆಂದ್ ಎಣ್ಣುವ. ಅನ್ನನೆ ಇಕ್ಕ ನೀಕ್ ದಂಡ್ ಆಯ್ಕೆ, ಒಂದ್: ನೀನ್ ಬೆರಿಯ ಮನೆಕ್ ಬಂತ್, ಪುನಹ ಕಾಯಿಲ ಬಪ್ಪಂಜಿ ದುಂಬಾ ದಿವಸ ಆಸ್ಪತ್ರಲ್ ಇಪ್ಪದ್, ದಂಡ್: ಇಕ್ಕ ಡಾಕ್ಟರ್ ಎಣ್ಣಾನನ್ನಕೆ ಇಲ್ಲಿ ಎಟ್ಟ್ ದಿವಸ ಇಪ್ಪಂಜಿ ಮನೆಕ್ ಬಪ್ಪನ್ನಕೆ, ನೀನ್ ಇಕ್ಕ ಎಣ್ಣ್ ಎನ್ನ ಮಾಡುವಿಯಾ.

ಮುತ್ತಕ್ಕಿ : ಇಲ್ಲೆಪ್ಪ, ನಾನ್ ಇಕ್ಕಲೆ ಎಟ್ಟ್ ದಿವಸ ಇಲ್ಲೇ ಇಪ್ಪಂಜಿ ಮನೆಕ್ ಬಂದುರುವಿ, ಪುನಹ ಬಪ್ಪದ್ ಬೋಂಡಪ್ಪ.

ಡಾಕ್ಟರ್ : ಪೇಷಂಟ್ ಎನ್ನನೆ ಉಂಡ್, ಎನ್ನಣ್ಣುವ?

ಬಿದ್ದಪ್ಪ : ಅವಕ್ ನಾಡದೇ ಚಿಂತೆ, ಅಡಿಗಿ ಮನೆ ಕೆಲಸ ಆಂಡದೇ ಚಿಂತೆ. ನಾನೊರ್ ಕಥೆ ಎಣ್ಣಾವಂಜಿ ಇಕ್ಕ ಮುಂಡತೆ ಬುದ್ಧವಕಾಕಿಯೆ.

ಡಾಕ್ಟರ್ : ಚೆನ್ನ ಮಿಂಞ ಬಂದಿತುಂಡೇಂಗಿ, ನಾನೂ ನಿಂಗಡ ಕಥೆ ಕೇಕೋಲು ಇಂಜತ್ ಎಲ್ಲಾಂಗು ಪೇಷಂಟ್ ಮನಸ್ಸು ಮಾಡೊಂಡು, ಅಂದಕೇ ಡಾಕ್ಟರ್‌ರ ಮದ್ದ್ ಪತ್ತುವ. ಕಾಯಿಲ ಬೆರಿಯ ವಾಸಿ ಆಪ.

ಮುತ್ತಕ್ಕಿ : ನಿಂಗಳಂತ ಡಾಕ್ಟರ್, ಈಯಂಗಳಂತ ಯಜಮಾನ ಇಪ್ಪಕಾಪಕ, ಚಾವು ಸಹ ಪಕ್ಕ ಬಪ್ಪಲೆ. ಯಮನೇ ಬಾತೆಂಗಿನೂ ಪಡಿರ ಪೊರ್‌ಮೆ ನಿಂದೋಪ. ನಾಕ್ ಬೆರಿಯ ವಾಸಿ ಆಯಿತ್ ಮನೆಕ್ ಪೋಂಡ, ಈಯಂಗಡ ಕಷ್ಟ ಗ್ಯಾನ ಮಾಡೋ ಪೋಡ್, ಕೆಂಚಿಲೂ ಕಾಂಬ ಕಯ್ಯುಲೆ.

ಬಿದ್ದಪ್ಪ : ನೀಕ್ ಎಚ್ಚಕ್ ಕುರಿ ಎಣ್ಣುವ, ನೀನ್ ನಾಡ ಬಗ್ಗೆ ವರೀಸ್ ಮಾಡತೇಂದ್.

ಡಾಕ್ಟರ್ : ನಿಂಗ ದಂಡಾಳೂ ವರೀಸ್ ಮಾಡತಿ, ಇಕ್ಕ ಪನಿ ಕಮ್ಮಿ ಆಯಿತ್, ವೀಕ್‌ನೆಸ್ಸ್ ಉಂಡ್, ಇಂಞೆ ದಂಡ್ ಮೂಂದ್ ದಿವಸತ್ ಮನೆಕ್

ಕೂಟಿಯ ಪೋಲು. ಆಚೆಂಗಿ ಮನೆಲ್ ದುಂಬಾ ದಣಿವು ಆಪನ್ನಕೆ ಕೆಲಸ ಮಾಡೂಕಾಗ, ಎಚ್ಚರತಿರೊಂಡು. ಈ ಪನಿ ಪುನಹ ಬಂದ್‌ರ್‌ತೆಂಗಿ, ದುಂಬಾ ಕಷ್ಟ ಆಪ.

ಬಿದ್ದಪ್ಪ : ಡಾಕ್ಟರ್, ಆಂಗಿ ಇವ ಇಂಞೋರ್ ಎಟ್ತ್ ಪತ್ತ ದಿವಸ ಇಲ್ಲೇ ಇರಡ್ ಎಣ್ಣುವ. ಇವ ಮನೆಕ್ ಎತ್ತನದು ನೈಪು ಸುರು ಮಾಡಿರುವ, ನೈಚ ತಡಿ, ಅಳ್‌ತಿತ್ ಗೊತ್ತಿಲ್ಲೆ. ಕೆಜ್ಜಂಡೇ ಇಪ್ಪ ಜಾಯಮಾನ. ಇವ ಇಲ್ಲೇ ಎಟ್ತ್ ಪತ್ತ ದಿವಸ ಉಂಡೇಂಗಿ, ಚಾಯೋಡೆ ವಾಸಿ ಆಯಿತ್ ಮನೆಕ್ ಅಯಿಚಕ ಮದಿ.

ಮುತ್ತಕ್ಕಿ : ನಾನ್ ಅಚ್ಚ ದಿವಸ ಒಂದೂ ಇಲ್ಲಿ ಇಪ್ಪುಲೆ, ಪನಿ ಬುಟ್ಟದು ನಾನ್ ಮನೆಕ್ ಬಪ್ಪಿ, ನಾಕಯ್ಯ ಇಲ್ಲಿಂಜಂಡ್ ನಿಂಗಕ್ ಕಷ್ಟ ತಪ್ಪಕ್.

ಡಾಕ್ಟರ್ : ನಿಂಗ ದಂಡಾಳು ಅಲ್ಲ ಆನ ತೀರ್ಮಾನ ಮಾಡುವ. ಒರ್ ವ್ಯಕ್ತಿರ ಕಾಯಿಲ ಪೂರ್ತಿ ವಾಸಿ ಆಕತೆ, ಏದ್ ಡಾಕ್ಟರೂ ಆ ವ್ಯಕ್ತಿನ ಡಿಸ್ಚಾರ್ಜ್ ಮಾಡುಲೆ. ಅನ್ನನೆ ನಿಂಗಡ ಪನಿ ವಾಸಿ ಆಯಿತ್, ನಿಂಗಕ್ ತ್ರಾಣ ಕೂಡ್‌ನ ಪಿಂಞ ನಾನೇ ಅಯಿಪಿ.

ಬಿದ್ದಪ್ಪ : ಅದೇ ಸರಿ ಡಾಕ್ಟರ್, ನಾನ್ ಎಣ್ಣೆಚೆಂಗಿ ಇವ ಕೇಪುಲೆ, ನಾನಿಕ್ಕ ಪೋಯಿತ್ ಇವಕ್ ತಿಂಬಕೆನ್ನೇಂಗಿ ಕೊಂಡ ಬಪ್ಪಿ, ಎಂತ ಕೊಡ್‌ಕೊಲು ಡಾಕ್ಟರ್.

ಡಾಕ್ಟರ್ : ಬೆರಿಯ ಕರುವಂತದ್, ಗಟ್ಟಿ ಅಲ್ಲತದ್, ಎಂತ ಬೋಂಡಿಕಿ ಕೊಡಿ, ಯರ್ಚಿ ಮೀನ್ ಬೋಂಡ ಅಚ್ಚಕೆ.

ಮುತ್ತಕ್ಕಿ : ನಾಕ್ ಕೂಳ್ ತರಕಾರಿ ಕರಿ ಮದಿ.

ಬಿದ್ದಪ್ಪ : ಕ್ಯಾಂಟೀನ್‌ಲ್ ಎಂತ ಕ್‌ಟ್ಟುವ ನೋಟಿಯಂಡ್ ಎಡ್‌ತ ಬಪ್ಪಿ.

ಮುತ್ತಕ್ಕಿ : ನಿಂಗಲೂ ಒಂದೂ ತಿಂದನ್ನಕೆ ಕಾಂಬುಲೆ, ನಿಂಗ ಅಲ್ಲಿಯೇ ತಿಂದ್‌ರೊಂಜಿ, ನಾಕ್ ಕೊಂಡ ಬಾರಿ,

ಬಿದ್ದಪ್ಪ : ಆಕು.

ಬಿದ್ದಪ್ಪ ಕ್ಯಾಂಟೀನ್‌ಕ್ ಪೋಪ, ದಂದಾಳುಕು ಕೂಳ್ ಕರಿ ಪ್ಯಾಕ್ ಮಾಡ್‌ಚಿಟ್ಟಂಡ್ ವಾರ್ಡ್‌ಕ್ ಬಪ್ಪಿ)

ಬಿದ್ದಪ್ಪ : ಇದಾ ಕೂಳ್ ಕರಿ ಕೊಂಡ ಬಂದಿಯೆ, ಎದ್ದಿತ್ ಉಣ್ಣೆ,

ಎಪ್ಪೊಂಡುವಾ(ಎಣ್ಣೆತ್ ಬೆನ್ನಾಕ್ ಕೈ ಕೊಡತ್ ಎಪ್ಪುವ).

ಮುತ್ತಕ್ಕಿ : ಇಚ್ಚೆನ್ನಂಗ್ ಕೊಂಡ ಬಂದಿಯೆ, ನಾಕ್ ಅಚ್ಚಕಾನ ತಿಂಬ ಕಯ್ಯುವಾ?

ಬಿದ್ದಪ್ಪ : ಇದ್ ನಾಕ್, ಎಲ್ಲಾ ನೀಕೊಂದಲ್ಲ, ನಾನೂ ನೀಡ ಕೂಡೆ ತಿಂಬೀಂದ್ ಇಲ್ಲಿಕೇ ಕೊಂಡ ಬಂದ. ನೀ ತಿನ್ನ.

ಮುತ್ತಕ್ಕಿ : (ಕಣ್ಣೀರ್ ಬಪ್ಪ) ನಿಂಗಲೂ ಇಟ್ಟೊಳಿ, ನಿಂಗಡ ಕೂಡೆ ನಾನೂ ತಿಂಬಿ, ನಿಂಗ ಇಟ್ಟೊಳಿ.

ಬಿದ್ದಪ್ಪ : ಆಂಗೆನ್ನಂಗ್ ಕಣ್ಣೀರ್, ಮುತ್ತಕ್ಕಿ, ಇಕ್ಕ ನಾಕ್ ನೀನ್, ನೀಕ್ ನಾನ್ "ಆಸರೆ", ಅದೆಲ್ಲಾ ಬುಡ್, ಕೆಲ ದುಂಬ್ಚಿರುವಕ್ ನೋಟ್. ನೀಕ್ ತ್ರಾಣ ಬರೊಂಡು ಅಲ್ಲ, ನೀಡ ತಿಂದಿತಾನ ಪಿಂಇ ನಾನ್ ಮನೆಕ್ ಪೋಯಿತ್ ಬರೊಂಡು.

ಮುತ್ತಕ್ಕಿ : ನಿಂಗ ಎನ್ನಂಗ್ ಪುನಹ ಬಪ್ಪ, ನಿಂಗ ಮನೆಲೇ ಬುದ್ದೊಳಿ. ನಾನ್ ಇಲ್ಲಿ ಇಪ್ಪಿ, ನಾಡ ಬಗ್ಗೆ ನಿಂಗ ಚಿಂತೆ ಮಾಡಂಡ, ಇಲ್ಲಿ ನರ್ಸ್ ಡಾಕ್ಟರ್ ಇಪ್ಪಲ್ಲ.

ಬಿದ್ದಪ್ಪ : ಅದೆಲ್ಲಾ ನೀಕ್ ಬೋಂಡ, ನಾನ್ ಮನೆಕ್ ಪೋಯಿತ್ ಬೆರಿಯ ಬಂದ್‌ರುವಿ.

ಮುತ್ತಕ್ಕಿ : ನಿಂಗಡ ಎಂತೋರ್ ಹಟ, ಆಚಿ ಅನ್ನನೆ ಮಾಡಿ.

(ಬಿದ್ದಪ್ಪ ಮನೆಕ್ ಪೋಪ, ಬೆಡ್ ಶೀಟ್, ತಳಿಯ, ಗ್ಲಾಸ್, ಫ್ಲಾಸ್ಕ್, ಬಿಸ್ಕೆಟ್, ಗ್ಲುಕೋಸ್, ಹಾರ್ಲಿಕ್ಸ್, ಸೇಬು ಕೊಂಡ ಬಪ್ಪ).

(ಮುತ್ತಕ್ಕಿ ಪಡಿಕತ್ತಟಿಯೇ ನೋಟಿಯಂಡಿಪ್ಪ)

ಬಿದ್ದಪ್ಪ : ಎನ್ನ, ಪಡಿಕತ್ತಟಿಯೇ ನೋಟಿಯಂಡಿಂಜಿಯೆ? ನನ್ನ ಬರಂಡಾಂದ್ ಎಣ್ಣುವಿಯ, ಪಡಿಕತ್ತಟಿಯೇ ನೋಟಿಯಂಡಿಪ್ಪಿಯಾ.

ಮುತ್ತಕ್ಕಿ : ಒಬ್ಬಳೇ ಬುದ್ದಂಡಿಂಜ, ರೂಮ್‌ಲ್ ಬೋರೆ ದಾರೂ ಇಂಜಿಲೆ, ಎಂತೆಲ್ಲೋ ಗ್ಯಾನ ಬಾತ್, ಅನ್ನನೆ ಪಡಿನೇ ನೋಟಿಯಂಡಿಂಜ.

ಬಿದ್ದಪ್ಪ : ಅಂತೂ ನೀನ್ ನನ್ನ ಪಾರಕಾತಾಂಡಿಂಜಿಯೇಂದ್ ಒತ್ತವಲೆಲ್ಲ, ಸರಿ ಬುಡ್, ನಾನ್ ನೀಕ್ ಎಂತಾಂಡೂಂದ್ ನೀನ್ ನನ್ನ ಪಾರ ಕಾಪ, ಅದ್ ಬುಡ್, ಇದ ಗ್ಲುಕೋಸ್, ಹಾರ್ಲಿಕ್ಸ್ ಕೊಂಡ ಬಂದಿಯೆ, ಕುಡಿಪಕಾಪಕ ಇದ್‌ನೇ ಕುಡಿ, ಪಣ್ಣು ತಿನ್ನ.

ಕ್ಯಾಂಟೀನ್‌ಕ್ ಪೋಯಿತ್ ಫ್ಲಾಸ್ಕ್‌ಲ್ ಕಾಪಿ ಕೊಂಡ ಬಪ್ಪಿ,  
ಬೋಂಡಿಯಾಪಕ ಕುಡಿಕೋಲು.

ಮುತ್ತಕ್ಕಿ : ನಿಂಗ ಎನ್ನಂಗ್ ಇದೆಲ್ಲ ಕೊಂಡ ಬಪ್ಪಕ್ ಪೋನ, ನಾಡ ಕೆಲವಾ  
ಮುನಿಸಿಪಾಲಿಟಿ ತೊಟ್ಟಿಯಾ.

ಬಿದ್ದಪ್ಪ : ನೀಕ್ ಬೆರಿಯ ತ್ರಾಣ ಕೂಡೊಂಡೊಂದಾಚೆಂಗಿ ಇದೆಲ್ಲ  
ಎಡ್‌ತವಂಡು.

ಮುತ್ತಕ್ಕಿ : ಆಚಿ ಆಚಿ, ಡಾಕ್ಟರ್ ಬಂದಂಡುಂಡ್.

ಡಾಕ್ಟರ್ : ಎನ್ನನೆ ಉಳ್ಳಿರಾ?

ಮುತ್ತಕ್ಕಿ : ಪನಿ ಬುಟ್ಟಿತ್ ಡಾಕ್ಟರೆ,

ಡಾಕ್ಟರ್ : ಪನಿ ಕಮ್ಮಿ ಆಯೆ ಬುಟ್ಟಿಯೆ ಅಲ್ಲ, ಪಿಲ್ಸ್ ತಿಂದಂಡುಳ್ಳಿರಾ,  
ನರ್ಸ್ ಇಂಜೆಕ್ಶನ್ ತಾತ.

ಮುತ್ತಕ್ಕಿ : ಇಂಜೆಕ್ಶನ್ನೂ ತಾತ್, ಪಿಲ್ಸ್ ತಾತ್, ಇಕ್ಕ ತಿಂತ್ ಬುದ್ದಂಡಿಯೆ.

ಡಾಕ್ಟರ್ : ಇಂಇ ನಾಳೆ ಪೊಲಾಕ ಬಪ್ಪಿ, ಗುಡ್ ನೈಟ್ ಬಿದ್ದಪ್ಪಣ್ಣ.

ಬಿದ್ದಪ್ಪ : ಗುಡ್ ನೈಟ್ ಡಾಕ್ಟರೆ.

ಮುತ್ತಕ್ಕಿ : ನಿಂಗ ಆ ಕಟ್‌ಲ್, ಬುದ್ದವದಾ, ಅದ್ ಬಾರಿ ಚೆರಿಯ ಕಟ್,  
ನಿಂಗಕ್ ಎದ ಆಪಕಿಲ್ಲೆ.

ಬಿದ್ದಪ್ಪ : ಪರೋಲೆ, ನೀನ್ ಸದ್ದಿಲ್ಲತೆ ಬುದ್ದ.

\* \* \* \* \*

## ಸೀನ್ ಪದಿನಂಜಿ

(ಆಸ್ಪತ್ರೆ ಪೊಲಾಕ ಕ್ಯಾಂಟೀನ್‌ಂಜಿ ಇಡ್ಲಿ ವಡೆ ಬಿದ್ದಪ್ಪನು ಮುತ್ತಕ್ಕಿಯು ತಿಂದತ್)

(ಬಿದ್ದಪ್ಪ ಫೋನ್ ಎಡ್‌ತವ)

ಮುತ್ತಕ್ಕಿ : ಇಕ್ಕ ದಾಕ್ ಫೋನ್ ಮಾಡುವ?

ಬಿದ್ದಪ್ಪ : ಮಕ್ಕಕೆಲ್ಲಾ ಎಣ್ಣನಾಂದ್.

ಮುತ್ತಕ್ಕಿ : ನಿಂಗಡ ಪೆರಿಯ ಮೋಂವಂಗ್ ಮಾತ್ರ ಎಣ್ಣತಿ, ನಾಡ ಕೂಡೆ ಅಂದ್ ಪಾರಿ ಕಳೀಚದೇ ಮದಿ.

ಬಿದ್ದಪ್ಪ : ನಾನ್ ಎಲ್ಲಾಕು ಎಣ್ಣವಿ, ನೋಟನ ಅಯಿಂಗಡ ರಿಯಾಕ್ಸ್‌ನ್ ಎನ್ನನೆ ಇಪ್ಪ. ಅದ್‌ನೋ ನೋಟನ, ಇದೂ ಒರ್ ಅವಕಾಶ.

ಮುತ್ತಕ್ಕಿ : ನಿಂಗ ಎಂತ ಎಣ್ಣಿಯಂಡುಳ್ಳಿರ ನಾಕ್ ಅರ್ಥ ಆಪುಲೆ, ಮಕ್ಕಕ್ ಫೋನ್ ಮಾಡುವದ್ ಬೋಂಡಾಂದ್ ನಾಡ ಅಭಿಪ್ರಾಯ.

ಬಿದ್ದಪ್ಪ : ನೀನ್ ಮುಂಡತಿರ್, ನಾನೇ ತಕ್ಕ ಪರೆವಿ.

(ಪೆರಿಯ ಮೋಂವಂಗ್ ಫೋನ್ ಮಾಡುವ)

ಬಿದ್ದಪ್ಪ : ಚಿಂಗಪ್ಪ ಎನ್ನನೆ ಉಳ್ಳಿರಾ, ಪೋಣ್ಣ್ ಮಕ್ಕ ಎಲ್ಲಾ ಚಾಯಿತೆ ಉಂಡಾ?

ಚಿಂಗಪ್ಪ : ನಂಗ ಎನ್ನನೆ ಉಂಡೆಂಗಿ ನೀಕೆನ್ನ, ನೀನ್ ಚಾಯಿತೆ ಉಂಡೆಂಗಿ ಮದಿಯಲ್ಲ.

ಬಿದ್ದಪ್ಪ : ಆಂಡ ವಿಷಯ ಬೋಂಡ, ನಾನಿಕ್ಕ ಫೋನ್ ಮಾಡಿಯೆ ಎನ್ನಂಗ್ ಎಣ್ಣಕ, ಮುತ್ತಕ್ಕಿಕ್ ಸಧ್ಯ ಹುಷಾರ್ ಇಲ್ಲತೆ, ಸಿಟಿ ನರ್ಸಿಂಗ್ ಹೋಮ್‌ಲ್ ಅಡ್ಡಿಟ್ ಮಾಡಿಯೆ.

ಚಿಂಗಪ್ಪ : ಅವ ಅಡ್ಡಿಟ್ ಆಚೆಂಗಿ ನಾಕೆನ್ನ, ಅದೂ ಅಲ್ಲತೆ ಇಕ್ಕ ನಾಕೂ ರಜ ಇಲ್ಲೆ, ಮಕ್ಕಕೂ ರಜ ಇಲ್ಲೆ. ಬೆರಿಯ ವಾಸಿ ಆಡ್.

ಬಿದ್ದಪ್ಪ : ಆಚಿ ಚಿಂಗಪ್ಪ, ಪೋಣ್ಣ್ ಮಕ್ಕಳ ಕೇಟರ್‌ಂದ್ ಎಣ್ಣ್. (ಫೋನ್ ಕಟ್ ಮಾಡುವ).

(ಬಿದ್ದಪ್ಪ ತಿಮ್ಮಯ್ಯಂಗ್ ಪೋನ್ ಮಾಡುವ)

ತಿಮ್ಮಯ್ಯ : ಎಂತ ಅಪ್ಪಯ್ಯ, ನಾನ್ ಆಪ್ಲೀಸ್‌ಲ್ ಬ್ಯುಸಿ ಆಯಿತುಳ್ಳ, ಬೆರಿಯ ಎಣ್ಣೆ.

ಬಿದ್ದಪ್ಪ : ಇಲ್ಲಿ ಮುತ್ತಕ್ಕಿನ ಸಿಟಿ ನರ್ಸಿಂಗ್ ಹೋಮ್‌ಲ್ ಅಡ್ಡಿಟ್ ಮಾಡಿಯೆ.

ತಿಮ್ಮಯ್ಯ : ಅವ ಅಡ್ಡಿಟ್ ಆಚೆಂಗಿ ನಾಕೆನ್ನಂಗ್ ಅರಿಚೆಡೋ. ನಾನೆನ್ನ ಅವಡ ಮೋಂವನಾ? ಸರಿ ಬುಡ್, ನಾನ್ ಬ್ಯುಸಿ ಆಯಿತುಳ್ಳ.

ಬಿದ್ದಪ್ಪ : ಆಚಿ ತಿಮ್ಮಯ್ಯ, ಪೋಣ್ಣ್ ಮಕ್ಕಳೆಲ್ಲ ಕೇಟತ್‌ಂದ್ ಎಣ್ಣೆ. (ಅಕ್ಕಣೆ ಪೋನ್ ಕಟ್ ಆಯಿರುವ).

ಬಿದ್ದಪ್ಪ : (ಪೊನ್ನಣ್ಣಂಗ್ ಪೋನ್ ಮಾಡ್‌ಚಿ)

ಪೊನ್ನಣ್ಣ : ಎನ್ನ ಅಪ್ಪಯ್ಯ, ಚಾಯಿತೆ ಉಳ್ಳಿಯಾ.

ಬಿದ್ದಪ್ಪ : ನಾನ್ ಚಾಯಿತೆ ಉಳ್ಳ ಪೊನ್ನು, ಆಚೆಂಗಿ ಮುತ್ತಕ್ಕಿನ ಸಧ್ಯ ಕಯ್ಯತಾಯಿತ್, ತಲೆ ತಿರಿತ್ ಸಿಟಿ ನರ್ಸಿಂಗ್ ಹೋಮ್‌ಲ್ ಅಡ್ಡಿಟ್ ಮಾಡಿಯೆ. ಆನ ಅರಿಚೆಡನಾಂದ್ ಪೋನ್ ಮಾಡ್‌ನ.

ಪೊನ್ನಣ್ಣ : ಎನ್ನಾಯೆ ಆಂಟಿಕ್?

ಬಿದ್ದಪ್ಪ : ಅವಕ್ ಪನಿ ಇಂಜತ್‌ಲೋ, ಪೊಲಾಕ ತಿಂಡಿ ಮೇಜ್‌ಲ್ ಬೆಪ್ಪಕಾಪಕ ಮಂಡೆ ತಿರಿತ್ ಬುದ್ದಾ ಪೋಚಿ, ಅವಳ ಅಕ್ಕಲೇ ಸಿಟಿ ನರ್ಸಿಂಗ್ ಹೋಮ್‌ಕ್ ಅಡ್ಡಿಟ್ ಮಾಡ್‌ಚಿ, ಇಕ್ಕ ಚೆನ್ನ ಪರೋಲೆ, ಆಚೆಂಗಿ ಇಂಇನು ಚೆನ್ನ ದಿವಸ ಆಸ್ತೆಲೇ ಇರೊಂಡುಲೋ.

ಪೊನ್ನಣ್ಣ : ಈ ಚೆನಿಯಾಚೆ ನಾನ್ ಮನೆಕ್ ಬಪ್ಪಿ, ಎನ್ನೇಂಗಿ ಎಡ್‌ತ ಬರೊಂಡುವಾ?

ಬಿದ್ದಪ್ಪ : ಒಂದೂ ಬೋಂಡಪ್ಪ, ಇಲ್ಲಿ ಕ್ಯಾಂಟೀನ್‌ಂಜಿ ಊಟ ತಿಂಡಿ ಎಡ್‌ತವ, ಅನ್ನನೆ ತೊಂದರೆ ಒಂದು ಇಲ್ಲೆ.

ಪೊನ್ನಣ್ಣ : ಮಕ್ಕಕ್ ಪರೀಕ್ಷೆ ಕಾಲ, ಅವಕೂ ಬಪ್ಪ ಕಯ್ಯಲೆ, ನಾನ್ ಚೆನಿಯಾಚೆ ಬಪ್ಪಿ.

ಬಿದ್ದಪ್ಪ : ಆಚಿ ಪೊನ್ನಣ್ಣ, ಪೋಣ್ಣ್ ಮಕ್ಕಳ ಕೇಟತ್ ಎಣ್ಣೆ.

ಪೊನ್ನಣ್ಣ : ಆಚಿ ಅಪ್ಪಯ್ಯ, ಪೋನ್ ಬೆಕ್ಕಡಾ, ಬೈ ಬೈ..

ಮುತ್ತಕ್ಕಿ : ಎಂತ ಪೊಲಾಕಂಜಿ ಪೋನ್ ಮಾಡಿಯೆಂಡೇ ಉಳ್ಳಿರಾ,

ಬಿದ್ದಪ್ಪ : ಜನಡ ರಂಗ್ ಗೊತ್ತಾಪ, ಉಪ್ಪುನ ನೀರ್‌ಲ್ ಕರ್‌ಕಿತ್, ದುಂಬಾ



ನೀರ್ ಕೂಟ್‌ಚೆಂಗಿ ಉಪ್ಪು ರಸ ಕಮ್ಮಿ ಆಕು, ಆಚೆಂಗಿ ಅದನೆ ಜಾಯಿಲ್ ಕಾಚಿರ್‌ತೆಂಗಿ, ಪುನಹ ಉಪ್ಪುರ ಘಾಟ್ ಚೋದ್ ಬಪ್ಪ, ಬಯ್ಯ ಉಪ್ಪೇ ಆಯಿರುವ, ಅನ್ನನೆ ಜನಳ ಸಮಯತ್ ಪರೀಕ್ಷೆ ಮಾಡ್‌ನಕ ಅಯಿಂಗಡ ಮೂಲ ರಂಗ್ ಗೊತ್ತಾಪ. ಇಂಚು ಗೌರಿಕು ಮಾದಪ್ಪಂಗೂ ಫೋನ್ ಮಾಡೊಂಡು.

ಮುತ್ತಕ್ಕಿ : ನಿಂಗಕೆನ್ನ ಇಚ್ಚೆ ಹಟ, ನಾಕೊಂದು ಅರ್ಥ ಆಪುಲೆ. ಎನ್ನೆಂಗಿ ಮಾಡಿ, ನಾಕೆನ್ನ.

ಬಿದ್ದಪ್ಪ : (ಗೌರಿಕ್ ಫೋನ್ ಮಾಡುವ)

ಗೌರಿ : ಎಂತಪ್ಪ, ಅಪರೂಪತ್ ಫೋನ್ ಮಾಡಿಯ, ಎನ್ನ ವಿಶೇಷ.

ಬಿದ್ದಪ್ಪ : ಅಕ್ಕು ನಿಂಗ ಭಾರಿ ಫೋನ್ ಮಾಡುವಿರಲ್ಲಾ, ಅದ್ ಬುಡ್, ನಿಂಗಲ್ಲಾ ಚಾಯಿತೆ ಉಳ್ಳಿರಾ.

ಗೌರಿ : ನಂಗೆಲ್ಲ ಚಾಯಿತೇ ಉಂಡ್, ನೀನ್ ಎನ್ನನೆ ಉಳ್ಳಿಯಾ?

ಬಿದ್ದಪ್ಪ : ನಾನ್ ಚಾಯಿತೆ ಉಳ್ಳವ್ವ, ಮುತ್ತಕ್ಕಿಕ್ ಸದ್ಯ ಕಯ್ಯತೆ ಸಿಟಿ ನರ್ಸಿಂಗ್ ಹೋಮ್‌ಲ್ ಅಡ್ಡಿಟ್ ಮಾಡಿಯೆ, ಇಂಚು ಚೆನ್ನ ದಿವಸ ಆಸ್ವತ್ತಲೇ ಇರೊಂಡುಲೋ.

ಗೌರಿ : ಅಕ್ಕು ಎನ್ನಾಯೆ?

ಬಿದ್ದಪ್ಪ : ಅವಕ್ ಪನಿ ಇಂಜದ್ ಎಣ್ಣತೆ, ಮಂಡೆ ತಿರಿತ್ ಬುದ್ಧೋಚಿ, ಅಕ್ಕ ಆಸ್ವತ್ತೆಕ್ ಕೂಟಿಯ ಬಂದಿತ್ ಅಡ್ಡಿಟ್ ಮಾಡ್‌ಚಿ, ಇಕ್ಕ ಚೆನ್ನ ಪರೋಲೆ,

ಗೌರಿ : ನೀನ್ ಊಟಕೆಲ್ಲ ಎಂತ ಮಾಡಿಯೆಂಡುಳ್ಳಿಯ, ಕಷ್ಟ ಕಾಂಬ.

ಬಿದ್ದಪ್ಪ : ಆಸ್ವತ್ತೆ ಕ್ಯಾಂಟೀನ್‌ಂಜಿ ಊಟ ತಿಂಡಿ, ಎಂತೋ ಬದ್‌ಕುವಕ್ ತಿಂಬ. ತಿಂಬಕಾಯಿತ್ ಬದ್‌ಕುವ ಕಾಲ ಆಚಿ, ಆಚವ್ವ ಅಂದಕ ಫೋನ್ ಬೆಕ್ಕಡಾ, ಬೈ ಬೈ..

ಬಿದ್ದಪ್ಪ : (ಮಾದಪ್ಪಂಗ್ ಫೋನ್ ಮಾಡುವ)(ಹಿಳ್ಳ ಫೋನ್ ಎಡ್‌ತವ)

ಹಿಳ್ಳ : ಯಾ, ಡ್ಯಾಡ್..ಆರ್ ಯು ಆಲ್‌ರೈಟ್, ವಾಟ್ ನ್ಯೂಸ್, ಆಲ್ ವೆಲ್?

ಬಿದ್ದಪ್ಪ : ಎವೆರಿ ತಿಂಗ್ ಫೈನ್ ಹಿಯರ್, ಹೌ ಈಸ್ ಮಾದಪ್ಪ ಐಂಡ್ ಚಿಲ್‌ರನ್.

- ಹಿಳ್ಳ : ಆಲ್ ಆರ್ ಫೈನ್ ಡ್ಯಾಡ್, ವಾಟ್ ನ್ಯೂಸ್.
- ಬಿದ್ದಪ್ಪ : ಮುತ್ತಕ್ಕಿ ಹ್ಯಾಸ್ ಬೀನ್ ಅಡ್ಮಿಟ್ಟೆಡ್ ಟು ಸಿಟಿ ನರ್ಸಿಂಗ್ ಹೋಮ್,  
ಶಿ ಈಸ್ ನಾಟ್ ವೆಲ್, ಹೌಎವೆರ್ ಶಿ ಈಸ್ ಇಂಪ್ರೂವಿಂಗ್ ನೌ.
- ಹಿಳ್ಳ : ಮ್ಯಾಡಿ, ಈಸ್ ನಾಟ್ ಹಿಯರ್ ನೌ, ವಿ ರಿಗ್ರೆಟ್ ಅವರ್ ಇನೆಬಿಲಿಟಿ  
ಟು ಅಟ್ಟೆಂಡ್ ಪರ್ಸನಲಿ. ವಿ ಆಲ್ ಪ್ರೇ ಗಾಡ್ ಫ್ಲಾರ್ ಹರ್  
ಅರ್ಲಿ ರಿಕವರಿ ಡ್ಯಾಡ್.
- ಬಿದ್ದಪ್ಪ : ತ್ಯಾಂಕ್ ಯು ಹಿಳ್ಳ, ಗಾಡ್ ಬ್ಲೆಸ್ ಯು ಆಲ್, ಕನ್ನೆ ಮೈ ರಿಗಾರ್ಡ್ಸ್  
ಟು ಆಲ್, ಬೈ ಬೈ...

\* \* \* \* \*

## ಸೀನ್ ಪದಿನಾರ್

(ಚೆನಿಯಾಚೆ - ಪೊನ್ನಣ್ಣ ನೇರೆ ಆಸ್ಪತ್ರೆಕ್ ಬಪ್ಪ)

ಮುತ್ತಕ್ಕಿ : ಬಾರಿ ಬಾರಿ ಆಸ್ಪತ್ರೆಕ್ ಬಪ್ಪಕಾಚಿ, ಚೆ, ಅವು ಕ್ಯಾಂಟೀನ್‌ಕ್ ಪೋಯಿತ್, ಮಜ್ಜಣ್ಣತರ ಊಟ ಕೊಂಡಾಪಕ್, ಇಕ್ಕ ಬಕ್ಕು ಅಳೆರಿ.

ಪೊನ್ನಣ್ಣ : ಇಕ್ಕ ಎನ್ನನೆ ಉಳ್ಳೀರಾ. ಪನಿ ಎಲ್ಲ ಪೋಚಾ, ಚೆನ್ನಂಗೇಂಗಿ ತ್ರಾಣ ಬಾತ.

ಮುತ್ತಕ್ಕಿ : ನಾನ್ ಚಾಯಿತೇ ಉಳ್ಳ, ನೀಡ ಅಪ್ಪನೂ ಆ ಡಾಕ್ಟರೂ ನನ್ನ ಏವಕೇ ಬುಡುಲೆ. ನಾನ್ ಎಕ್ಕ ಮನೆಕ್ ಪೋಪಂದ್ ಪಾರ ಕಾತಾಂಡುಳ್ಳ, ಈ ಕ್ಯಾಂಟೀನ್ ಊಟ ತಿಂಡಿ ತಿಂದ್ ತಿಂದ್ ಬಾಯಿ ಚಪ್ಪೆ ಬುದ್ದ ಪೋಯಿತ್. ನಿಂಗಡ ಅಪ್ಪ ಎನ್ನನೆ ತಿಂದಂಡುಂಡೋ ಗೊತ್ತಿಲ್ಲೆ(ಅಕ್ಕಣೆ ಬಿದ್ದಪ್ಪ ಬಪ್ಪ).

ಬಿದ್ದಪ್ಪ : ಎನ್ನ ಪೊನ್ನಣ್ಣಬಂದದೇ ಅವಂಡಪ್ಪಂಡ ಮೇಲೆ ಚಾಡಿಯಾ, ಪೊನ್ನಣ್ಣ ಎನ್ನನೆ ಉಳ್ಳೀಯಪ್ಪ. ನೀನ್ ಉಂಡಿಯಾ, ನೀಕೂ ಇಲ್ಲಿಕೇ ಕೊಂಡಬಂದ್‌ರಡ.

ಪೊನ್ನಣ್ಣ : ಇಕ್ಕ ಬೋಂಡ ಅಪ್ಪಯ್ಯ, ಬಟ್ಟೆಲ್ ಬಸ್ ನಿಪ್ಪಾಚಿಟ್ಟಲ್ಲಿ ನಾನೂ ಎಂತೋ ತಿಂದಂಡ, ಬಯ್ಯ ನೋಟನ, ಇಕ್ಕ ನಿಂಗ ಉಣ್ಣೇ.

ಮುತ್ತಕ್ಕಿ : ನಾನ್ ಇಲ್ಲಿ ಬುದ್ದಂಡಲ್ಲಿ ಆನಲ್ಲಿಂಜಿ ನಿಂಗಡಪ್ಪ ಇಲ್ಲಿಯೇ ಉಂಬ ತಿಂಬ, ನಾನೆಕ್ಕೋಲು ಎಣ್ಣುವಿ, ನಿಂಗ ಅಲ್ಲಿ ತಿಂದಿತ್, ನಾಕ್ ಕೊಂಡ ಬಾರೀಂದ್, ಅವು ದಂಡಾಳ್‌ಕೂ ಇಲ್ಲಿಕೇ ಕೊಂಡ ಬಂತ ನಾಡ ಕೂಡೆ ತಿಂಬ, ನಾಕ್ ಅಯಿಂಗಡ ಕಷ್ಟ ನೋಟುವ ಕಯ್ಯುಲೆ. ಎಕ್ಕ ಇಲ್ಲಿಂಜಿ ಮನೆಕ್ ಪೋಪಂದ್ ಕಾತಾಂಡುಳ್ಳ.

- ಬಿದ್ಧಪ್ಪ : ಜಾಸ್ತಿ ತಕ್ಕ ಪರಂದಿತ್ ಸೋತೋಪಿಯ, ಚೆನ್ನ ಮುಂಡತಿರ್.
- ಪೊನ್ನಣ್ಣ : ಅಣ್ಣಯ್ಯಂಗಕ್, ಗೌರಿಕ್ ಈ ವಿಷಯ ಎಣ್ಣಿಯಾ.
- ಬಿದ್ಧಪ್ಪ : ಎಲ್ಲರ್ಕು ಎಣ್ಣಾನ, ಅಯಿಂಗಡ ಅಯಿಂಗಡ ಅಭಿಪ್ರಾಯ ಎಣ್ಣಾಚಿ, ಎಂತ ಎಣ್ಣಾಚಿಂಗಿನು ಅಯಿಂಗಡ ಅಪ್ಪಂಗ್ ಎಣ್ಣಿಯೆ. ನಾಕಲ್ಲಾಂದ್ ಗ್ಯಾನ ಮಾಡಿಯಂಡ್ ಮುಂಡತುಳ್ಳ ಆಚಿಂಗಿ ಅಮೆರಿಕ ಮೈಮ ಮಾತ್ರ ಮುತ್ತಕ್ಕಿಕ್ ಬೆರಿಯ ವಾಸಿ ಆಡ್ಂದ್ ದೇವಡಲ್ಲಿ ಬೋಡುವಿ ಎಣ್ಣಾಚಿ. ನಲ್ಲ ಸಂಸ್ಕೃತಿ ಅವಡ.
- ಪೊನ್ನಣ್ಣ : ಆ ಮೊಮ್ಮೆ ಚೆನ್ನ ನಲ್ಲವಳೆ. ನಂಗಡಯಿಂಗಡ ನಂಜಿ ಮನಸ್ಸ ಇಲ್ಲೆ, ಕಿಂಚಿತ್ ಬುದ್ಧಿಯೂ ಇಲ್ಲೆ.
- ಬಿದ್ಧಪ್ಪ : ಅವು ಅಚ್ಚ ದೂರತ್ ಉಂಡೇಂಗಿನೂ ನಂಗ ಬಪ್ಪಕಯ್ಯತಾಂಗ್ ಬೇಜಾರ್ ಉಂಡ್, ಆಚಿಂಗಿ ಬೆರಿಯ ವಾಸಿ ಆಡ್ಂದ್ ನಂಗೆಲ್ಲಾ ದೇವಳ ಬೋಡುವ ಎಣ್ಣಾಚಿ. ಅದ್ ಮದಿ, ನೀನಿಕ್ಕ ಬಂದಿಯ, ಅದ್ ಮದಿ, ಯೋಗವೂ ಯೋಗ್ಯತೆಯೂ ಉಂಡೇಂಗಿ ಮಾತ್ರ ಕೆಲವೆಲ್ಲ ಸಾಧ್ಯ ಆಪ. ಅಯಿಂಡಯಿಂಡ ಜೀವನ ಚಾಯಿತೇ ಇರಡ್ ಬುಡ್, ಪೆರಿಯವು ದಂಡಾಳು ಅಯಿಂಗಕ್ ಸಮ್ಮಂದವೇ ಇಲ್ಲತನ್ನಕೆ ತಕ್ಕ ಪರಂದತ್. ಗೌರಿ ಭಾರಿ ಬ್ಯುಸಿಲೋ, ಆಚಿಂಗಿ ಎನ್ನಾಯೆಂದ್ ಕೇಟತ್, ಪರೋಲೆಂದ್ ಆಚಿ.
- ಪೊನ್ನಣ್ಣ : ಬಲ್ಯಣ್ಣಯ್ಯಂಗು ಬೋಜಣ್ಣಯ್ಯಂಗು ಎನ್ನಾಯೆಂದ್, ಅಯಿಂಗಡದೇ ಆಂಡು ಎಣ್ಣುವ ಹಟ, ಇಂಇಲೊಬ್ಬಂಡ ಕಷ್ಟ ಸುಖಿತ್ ಕಿಂಚಿತ್ ಚಿಂತೆ ಇಲ್ಲೆ.
- ಬಿದ್ಧಪ್ಪ : ಚೋರೆ ದುಡ್ಡ್ ಅಧಿಕಾರ ಉಂಡೇಂಗಿ ಮನುಷ್ಯಂಗ್ ಕಣ್ಣ ಕಾಂಬುಲೇಂದ್.
- ಪೊನ್ನಣ್ಣ : ಅಪ್ಪಯ್ಯ ಆಚಿಂಗಿ ನೀನ್ ಎಣ್ಣಾನ ಮೂಂದ್ ಶಾಸ್ವೀತ ಅಲ್ಲ, ಚೋರೆ ವಯಸ್ಸಾನನ್ನಕೆ ತಣಿವ, ದುಡ್ಡ್ ಚಂಚಲೆ, ಎಲ್ಲಿಪ್ಪ ಎಣ್ಣುವ ಕಯ್ಯಲೆ, ಅಧಿಕಾರ ಜಾಸ್ತಿ ಉಂಡೇಂಗಿ ಅರುವದಾಕಣೆ, ಪಿಂಇ ರಿಟ್ಟೆರ್ ಆಂಡು. ಅಕ್ಕ ಎನ್ನ ಮಾಡೋ.

ಬಿದ್ದಪ್ಪ : ಅಯ್ಯೋ ಮೋನೆ, ಪಾಲ್ ಕುಡ್‌ಚ ಕುಂಚೆಯೇ ಬದ್‌ಕುಲೆ ಇಂಚೆ ವಿಷ ಕುಡ್‌ಚ ಕುಂಚೆ. ನಂಗ ಒಂದೂ ಎಣ್ಣುವದ್ ಬೋಂಡ ಬುಡ್. ಅಯಿಂಡಯಿಂಡ ಅಯಿಂಗಯಿಂಗಕ್.

ಮುತ್ತಕ್ಕಿ : ನಿಂಗ ಅಪ್ಪನು ಮೋಂವನು ಬರೀ ಪಂಚಾಯಿತಿಗೆಲ್ ಕಾಲ ಕಯಿಪಿರಾ ಅಲ್ಲಾ ಮೋಂವಂಗ್ ಎನ್ನೇಂಗಿ ತಿಂಬಕ್ ಕುಡಿಪಕ್ ಕೊಡ್‌ಪಿರಾ.

ಬಿದ್ದಪ್ಪ : ಓ ಅಕ್ಕು ಅಲ್ಲಾ, ಮರ್‌ಂದೇ ಪೋಯೆ, ಬಾ ಪೊನ್ನಣ್ಣ ಕ್ಯಾಂಟೀನ್‌ಕ್ ಪೋಯಿತ್ ಎಂತೇಂಗಿ ತಿಂದಂಡ್ ಬಕ್ಕ.

ಪೊನ್ನಣ್ಣ : ಇಲ್ಲೆ, ನಾನೊಬ್ಬನೇ ಪೋಯಿತ್ ತಿಂತ್ ಬಪ್ಪಿ, ನೀನ್ ಬಾತೆಂಗಿನೂ ಒಂದೂ ತಿಂಬುಲೆಂದ್ ನಾಕ್ ಗೊತ್ತುಂಡ್, ನಾಕಾಯಿತ್ ನೀನ್ ಅಲ್ಲಿಕತ್ತಣೆ ಬರಂಡ, ನಾನೇ ಪೋಯಿತ್ ಬಪ್ಪಿ.

ಬಿದ್ದಪ್ಪ : ಆಚಪ್ಪ ನೀನೆ ಪೋಯಿತ್ ತಿಂತ್ ಬಾ.

ಪೊನ್ನಣ್ಣ : ಆಚಿ ಅಪ್ಪಯ್ಯ(ಕ್ಯಾಂಟೀನ್‌ಕ್ ಪೋಪ),

ಮುತ್ತಕ್ಕಿ : ನಿಂಗಡ ಈ ಮೋಂವನೇ ತಿಂಗಕೊಮ್ಮ ಬಪ್ಪ, ಕಷ್ಟಾಂದ್ ಎಣ್ಣಾಚೆಂಗಿ ತಕ್ಕಾಚೆಂಗಿ ಪರೆವಕ್ ಬಪ್ಪ. ಪರದೇಶತ್ ಉಳ್ಳವು ಅಕ್ಕಕ್ಕ ಬಪ್ಪ ಕಯ್ಯುವಕಿಲ್ಲೆ, ಬೆಂಗಳೂರ್ ಹೈದರಾಬಾದ್ ಉಳ್ಳಯಿಂಗಕ್ ಎನ್ನಾಯೇಂದ್.

ಬಿದ್ದಪ್ಪ : ರೆಕ್ಕೆ ಪುಕ್ಕ ಬಂದ ಪಕ್ಷಿಯಳನ್ನಕೆ ಮಕ್ಕ ಬಲ್‌ಂಜನೆ ಆನ ಪಿಂಞ ಅವು ಪಾರಿಯೇಂಡ್ ಅಯಿಂಡ ಬಟ್ಟೆ ನೋಟಿಯವ. ಅಪ್ಪ ಅವ್ವನ ಮರ್‌ಂದ್‌ರುವ. ಅದ್‌ಂಗೆಲ್ಲ ನಂಗ ಬೇಜಾರ್ ಮಾಡುವಕಾಗ. ಆಂಗೆಲ್ಲ ಬೇಜಾರ್ ಮಾಡಿಯೇಂಡ್ ನಂಗಡ ತಡಿ ಪಾಳ್ ಮಾಡಿಯವಕಾಗ, ನಂಗಡ ಬದ್‌ಕ್‌ನ ನಂಗಕ್ ಬೋಂಡಿಯನ್ನಕೆ ಬದ್‌ಕಿವಂಡು, ದಾರೂ ಅಡ್ಡ ಬಪ್ಪುಲೆ.

ಮುತ್ತಕ್ಕಿ : ವಯಸ್ಸಾನ ಪಿಂಞ ಕಷ್ಟ ಅಲ್ಲ, ಮಕ್ಕಡ ಆಸರೆ ಬೋಂಡೂಂದ್ ಆಪ. ನಾಡ ಅಭಿಪ್ರಾಯತ್ ಪೊಣ್ಣಾಳ್ ಎನ್ನನೇಂಗಿ ಬದ್‌ಕಿರುವ, ಆಣಾಳ್‌ಕ್ ಕಷ್ಟಾಂದ್ ಆಪ.

ಬಿದ್ಧಪ್ಪ : ಅಕ್ಕು, ನೀನ್ ಎಣ್ಣುವದ್ ಸತ್ಯ, ಪೊಣ್ಣಾಳ್‌ಕ್ ತಾಳ್ಗೆ ಜಾಸ್ತಿ ಇಪ್ಪ, ಭೂಮಿ ತಾಯಿ ಎನ್ನನೆ ಎಲ್ಲಾನೋ ಸಹಿಸಿಯವೋ ಅನ್ನನೆ ಪೊಣ್ಣಾಳ್‌ಕೂ ಕ್ಷಮಾಗುಣ ತಾಳ್ಗೆ ಇಪ್ಪ, ಆಂಗೆ ಪೊಣ್ಣಾಳ್‌ನ "ಕ್ಷಮಾಯ ಧರಿತ್ರಿ" ಎಣ್ಣುವ. ಆಚೆಂಗಿ ಅಣಾಳ್ ಅನ್ನನೆ ಅಲ್ಲ, ಅಡಿಗೆ ಗೊತ್ತುಳ್ಳಂವ ಇಪ್ಪ, ಇಲ್ಲತಂವ ಇಪ್ಪ ಆಚೆಂಗಿ ಅಹಂಕಾರ, ದರ್ಪ, ಗತ್ತ್ ಎಲ್ಲಾ ಅಣಾಳಡಲ್ಲಿ ಜಾಸ್ತಿ ಇಪ್ಪ, ಅದೇ ಪಾಳಾಪ,ಸಮಯಕ್ ಸರಿಯಾಯಿತ್ ಹೊಂದಿಯವಕ್ ಕಯ್ಯತೆ ಒದ್ದಾಡುವ.

ಮುತ್ತಕ್ಕಿ : ಅಕ್ಕು ನಿಂಗ ಎಣ್ಣುವದ್ ನೇರ್, ಆಂಗೆ ಓರೋರ್ ಅಣಾಳ ಕಳ್ಳೆರದೋ, ಜೂಜ್‌ರದೋ ಅಥವಾ ಬೋರೆ ಪೊಣ್ಣಾಳಡ ಗುಲಾಮ ಆಯಿರುವ. ಚಟ ಸಾರ್ವಭೌಮ ಆಯಿರುವ.

ಬಿದ್ಧಪ್ಪ : ಎಲ್ಲಾರು ಆಪುಲೆ, ಆಪವು ಮಾತ್ರ ಆಪ, ಆಚೆಂಗಿ ನೀನೆಣ್ಣಾನನ್ನಕೆ, ಜಾಸ್ತಿ ಭಾಗ ಆಯಿರುವ.

ಮುತ್ತಕ್ಕಿ : ನಾನಿಕ್ಕ ಇಚ್ಚೆ ಕಾಲತಿಂಜಿ ನೋಟಿಯಂಡುಳ್ಳ, ನಿಂಗ ಅನ್ನನೆ ಆಯಿಲೆ, ಅದೇ ಬಲ್ಯದ್.

ಬಿದ್ಧಪ್ಪ : ಅದೆನ್ನೋ ನಿನ್ನಂತವಡ ಆಸರೆ ತಾತ್, ಆನುಂಡ್, ನಾನ್ ಅನ್ನನೆ ಆಯಿಲೆ ಕಾಂಬ. ಎಲ್ಲಾರೂ "ಆಸರೆ" ಕಾಯಿತೇ ಅನ್ನನೆಲ್ಲಾ ಆಪ. ಪಬ್ಬುವ ಬಳ್ಳಿ ಮುಳ್ಳು ಮರವಾ ನಲ್ಲ ಮರವಾ, ಒಣಕ್ ಪಚ್ಚೆ ಮರವಾ ನೋಟುಲೆ, ಪುಡ್‌ಚಿ ಪಬ್ಬಿರುವ. ಅನ್ನನೆ "ಆಸರೆ" ಕಾಯಿತ್ ಮನುಷ್ಯ ಅನ್ನನೆಲ್ಲಾ ಆಯಿರುವ. ದಾಡದೂ ತಪ್ಪು ಎಣ್ಣುವ ಕಯ್ಯಲೆ. ಇಕ್ಕ ವಯಸ್ಕ ಬಿಡಾರ ದುಂಬಾ ಕಂಡಂಡುಂಡ್, ಪುದಿಯದ್ ಎದ್ದಂಡೇ ಉಂಡ್, ಇದ್ ನಲ್ಲದಲ್ಲ, ಮಕ್ಕ ವಯಸ್ಕಂಗಳ ಉದಾಸೀನ ಮಾಡುವಕಾಗ. ಅಯಿಂಗಕೂ ವಯಸ್ಸಾಪ ಎಣ್ಣುವ ಕಿಂಚಿತ್ ಜ್ಞಾನ ಕೂಡ ಇಲ್ಲೆಲ್ಲಾ, ಅದೇ ಬೇಜಾರ್.

ಮುತ್ತಕ್ಕಿ : ನಾಕೂ ವಯಸ್ಸಾಯಂಡ್ ಬಾತ್, ದೇವಳನ್ನಕೆ ನಿಂಗಡಲ್ಲಿ ಉಳ್ಳಾಂಗ್

ನಾಕೊಂದೂ ಅನುಭವ ಆಯಿತಿಲ್ಲೆ, ಇಲ್ಲೇಂಗಿ ನಾಡ ಗೋಳ್, ಇಕ್ಕತ ಸಮಾಜವೋ ಒರ್ ವಯಸ್ಸರ ಪಾಕುಂಜಿನ ತೊಟ್ಟ ತೊಂಬದ್ ವಯಸ್ಸರ ಮುದುಕಿಕತ್ತಣೆ ಬುಡುಲೆ, ಮೃಗ ಜಾತಿಯ ಆಯಿ ಪೋಯಿತ್, ಮಿಂಇಕ್ ಬದ್ಕೇ ಪೋಡಿ ಆಪ.

ಬಿದ್ದಪ್ಪ : ಅಚ್ಚಕ್ ಎನ್ನಂಗ್ ಚಿಂತೆ ಮಾಡುವಿಯ ಮುತ್ತಕ್ಕಿ, ದೇವ ಏದೇಂಗಿ ಬಟ್ಟೆ ಕಾಟುವ. ದಾರ್ನೋ ಅನ್ನನೆ ನಡು ನೀರ್ಲ್ ಬುಡುಲೆ.

ಮುತ್ತಕ್ಕಿ : ನಾನ್ ಚಾಯಿತೆ ಇಪ್ಪಕಲೆ ನಾಡ ಪ್ರಾಣ ಕೊಂಡೋಯಿರ್ಂದ್ ದೇವಳ ಎಕ್ಕಾಲು ಬೋಡಿಯವಿ, ದಾರ್ಕೇಂಗಿ ಭಾರ ಆಪಕ್ ನಾಕ್ ದಾರೂ ಇಲ್ಲೆಲ್ಲಾ.

ಬಿದ್ದಪ್ಪ : ಭಾರ ಆಪಕ್ ನಾಕೂ ದಾರೂ ಇಲ್ಲತಂತ ಸ್ಥಿತಿ ನಾಡ, ಎಲ್ಲಾ ಇಂಜತೆಂಗಿನೂ ಕೂಡ ನಾಡ ನೀಡ ಸ್ಥಿತಿ ಒಂದೇ ಬುಡ್.

\* \* \* \* \*

## ಸೀನ್ ಪದಿನೇಳು

(ಮುತ್ತಕ್ಕಿನ ಆಸ್ಪತ್ರೆಯ ಡಿಸ್ಟಾರ್ಟ್ ಮಾರ್ಚಿಂಗ್ ಮನೆಕ್ ಕೂಟಿಯ ಬಪ್ಪ, ಬಿದ್ದಪ್ಪ ದಂಡ್ ಆಳಳ ಕೂಟಿತ್ ಮನೆ, ಮನೆರ ಸುತ್ತು ಎಲ್ಲ ಒಡ್ಕಚಿ ತೀಟಿಚಿರುವ)

ಮುತ್ತಕ್ಕಿ : ಪತ್ ದಿನ ಮನೆಲ್ ಇಲ್ಲತೆ ಪೋಚಿಂಗಿ ಬಲೆ ಕೆಟ್ಟಿತ್, ಉರುಪ್ ಗೂಡ್, ಕೆದ ಎಲ್ಲ ಪತ್ತಿರುವ ಕಾಂಬ, ಮನೆಲ್ ದೂಳ್ ದುಂಬಿತ್.

ಬಿದ್ದಪ್ಪ : ದಂಡ್ ಆಳಳ ಕೂಟಿಯೆ, ಅದೇ ಪಣಿಕ್ಂದ್, ನೀನೊಂದು ಮಾಡಂಡ, ಕೈಯೂ ಇಡಂಡ, ಗೊತ್ತಾಚ, ಡಾಕ್ಟರ್ ಎಂತ ಎಣ್ಣೆಯೆ ಪುನಹ ಪನಿ ಬಾತೆಂಗಿ ಭಾರಿ ಕಷ್ಟ ಆಪಾಂದ್, ಗೊತ್ತುಂಡಲ್ಲಾ,

ಮುತ್ತಕ್ಕಿ : ಈ ಮನೆ ಈ ಸ್ಥಿತಿಲ್ ಕಾಂಬಕ ಎನ್ನನೆ ಮುಂಡತಿಪ್ಪ ಎಣ್ಣೆ.

ಬಿದ್ದಪ್ಪ : ಅನ್ನನೆ ಎಣ್ಣೆಯಂಡ್ ಪುನಹ ಸುರು ಮಾಡಿರಾತೆ. ಆಳ ಬಂತ್, ಅಯಿಂಗಳಗುಂಡ್ ಮಾಡ್ಚಿರುವಿ, ಬಯ್ಯ ಮೇಲೆ ಮೇಲೆ ನೀನ್ ಬೋಂಡಿಕಿ ಮಾಡಿಯ.

ಮುತ್ತಕ್ಕಿ : ನಾನೇ ಆಳ್, ನಾನೇದ್ ಆಳ್ಕ್ ಎಣ್ಣುವ, ಅದೂ ಅಲ್ಲತೆ ಎನ್ನನೆ ಎಣ್ಣುವ.

ಬಿದ್ದಪ್ಪ : ಆಂಗಿ ಎಣ್ಣೆಯೆ, ನಾನ್ ಮಾಡ್ಚಿರುವಿಂದ್, ಬಯ್ಯಂಜಿ ನೀನ್ ಮಾಡ್ಚಿಟ್ಟಿ.(ಬಿದ್ದಪ್ಪ ಆಳಳ ಗುಂಡ್ ಒಡ್ಕಚಿ ತೀಟಿಚಿರುವ, ಅಡಿಗಿ ಮನೆಲ್ ಪಾತ್ರ ಎಲ್ಲ ಪುನಹ ಕತ್ತಾಚಿಡುವ.. ಆಳ ಪೋಪ)

ಮುತ್ತಕ್ಕಿ : ಇಲ್ಲೆ ನೋಟಿ, ಈ ಪಾತ್ರಲ್ ಧೂಳ್ ಅನ್ನನೆ ಉಂಡ್, ಎಂತ ಪಣಿ ಮಾಡಿತ್ ಪೋಯೆ ಅವು.

ಬಿದ್ದಪ್ಪ : ಇಕ್ಕ ಅವು ಪೋಯಿತಾಚಿ, ಎಣ್ಣೊಂಡುವೇಂಗಿ ನಾಕೇ ಎಣ್ಣೊಂಡು, ನಾನೇ ಮಾಡುವಿ.

ಮುತ್ತಕ್ಕಿ : ಅಯ್ಯೋ, ಅಯ್ಯೋ, ದಮ್ಮಯ್ಯ, ನಿಂಗ ಮಾಡೊಂಡೂಂದ್ ಎಣ್ಣೆಯೆ



ಅಲ್ಲ, ಅವು ಮಾಡ್‌ನ ಪಣಿ ಮನಾರ ಇಲ್ಲೇಂದ್ ಎಣ್ಣೆಯೆ.

ಬಿದ್ದಪ್ಪ : ಅದ್‌ಂಗೇ ಗಾದೆ ಉಳ್ಳೆ ಆಳ್ ಮಾಡ್‌ನದ್ ಪಾಳ್,

ಮುತ್ತಕ್ಕಿ : ನಾನೂ ಆಳೇ, ಅಕ್ಕ ನಾನ್ ಮಾಡ್‌ನದೂ ಪಾಳಾ.

ಬಿದ್ದಪ್ಪ : ನೀನ್ ಆಳ್‌ನನ್ನಕೆ ಅಲ್ಲಾಂದ್ ಎಚ್ಚಕ್ ಕುರಿ ಎಣ್ಣುವ, ಅದ್ ಬುಡ್, ನೀಕ್ ಬಯ್ಯ ಅರ್ಥ ಆಪ.

ಮುತ್ತಕ್ಕಿ : ಇಂಜಿ ಮಕ್ಕ ಬಪ್ಪಕ್ ಎಚ್ಚ ದಿವಸ ಉಂಡ್.

ಬಿದ್ದಪ್ಪ : ಕೆಲವೇ ದಿವಸ ಉಳ್ಳೆ, ನಂಗ ತಯ್ಯಾರ್ ಆಯಿತ್ತಿಕ್ಕೊಂಡು.

ಮುತ್ತಕ್ಕಿ : ಆಂಗ್ ನಂಗ ಎಂತ ತಯಾರಿ ಮಾಡಿಯವಕುಳ್ಳೆ,

ಬಿದ್ದಪ್ಪ : ಅದೂ ನೀಕ್ ಬಯ್ಯ ಗೊತ್ತಾಪ. ಅವು ಬಂದ ಪಿಂಜಾ ನೀಕ್ ತಂದ ಕಾಗದ ಓದ್‌ಚಿರುವಿಯಲ್ಲ, ಅಕ್ಕ ಗೊತ್ತಾಪ, ಅಲ್ಲ ಇಕ್ಕಲೇ ಆ ಕಾಗದ ಓದ್‌ಚಿರುವಿಯಾ.

ಮುತ್ತಕ್ಕಿ : ನಿಂಗಡ ಮಕ್ಕ ಬಂದ ಪಿಂಜಾ ಪೊನ್ನಣ್ಣನೋ ಪೊನ್ನವ್ವನಗುಂಡೋ ಓದ್‌ಚಿರುವಿ, ನಾಕಂತು ಓದೋಕ್ ಬಪ್ಪಲೆ, ಅದೂ ಅಲ್ಲತೆ ನಿಂಗಡ ಸಂಸಾರತ್‌ರ ವ್ಯವಹಾರತ್ ನಾಡದೆಂತ.

ಬಿದ್ದಪ್ಪ : ಇಲ್ಲೆ ನೀಡ ಅಭಿಪ್ರಾಯವೂ ನಾಡ ಎಲ್ಲಾ ಮಕ್ಕಡ ಅಭಿಪ್ರಾಯತ್‌ರ ಅಚ್ಚಕೇ ಮುಖ್ಯ. ನೀನ್ ಕಾಗದತ್‌ನ ಎಕ್ಕ ಬೋಂಡಿಕ್ಕಿ ಓದಿಯ. ಆಚೆಂಗಿ ನಾನ್ ಪುನಹ ಪುನಹ ಎಣ್ಣುವಿ, ನೀಡ ಅಭಿಪ್ರಾಯವೂ ಮುಖ್ಯ.

ಮುತ್ತಕ್ಕಿ : ನಿಂಗ ಎಂತ ಎಣ್ಣೆಯೆಂಡುಳ್ಳೆಂದ್ ನಾಕ್ ಅರ್ಥ ಆಯೆಂಡ್ ಇಲ್ಲೆ.

ಬಿದ್ದಪ್ಪ : ಅದಿರಡ್, ನೀನ್ ಇಕ್ಕ ರೆಸ್ಪ್ ಎಡ್‌ತ, ಕೆಲಸ ನಿಧಾನತ್ ಮಾಡೋಲು, ನಂಗ ದಂಡಾಳೆ ಉಳ್ಳೆ, ಜಾಸ್ತಿ ಒಂದೂ ಮಾಡಂಡ.

ಮುತ್ತಕ್ಕಿ : ಆ ಆಸ್ವತ್ತೆ ಕ್ಯಾಂಟೀನ್ ಊಟ ತಿಂದ್ ತಿಂದ್ ನಾವು ಚಪ್ಪೆ ಬುದ್ದಾ ಪೋಯಿತ್. ಚೆನ್ನ ಚಾಯಿತೆ ಕರಿ ಮಾಡಿತ್ ಉಂಗೊಂಡು.

ಬಿದ್ದಪ್ಪ : ನಾಡ ಬಾಯಿಯೂ ಚಪ್ಪೆ ಬುದ್ದಾ ಪೋಯಿತ್, ಡಾಕ್ಟರ್‌ನ ಕೇಟ ನೀನ್ ಎರ್ಚಿ ತಿಂಗೋಲುವಂದ್, ತಿಂಗೋಲು ಎಣ್ಣೆಚಿ, ಆಂಗ್ ಒರ್ ಕೆ.ಜಿ. ನಲ್ಲ ಕೊರಿ ಎರ್ಚಿ ಕೊಂಡ ಬಂದಿಯೆ, ತೆಂಗೆ ಇಡತೆ

ಚೆನ್ನ ಖಾರ ಖಾರ ಬರ್‌ತ್‌ರ್. ಪುಡ್‌ಕಿತ್ ಉಂಡ್‌ರೊಲು.

- ಮುತ್ತಕ್ಕಿ : ನಿಂಗ ಎರ್ಬಿ ಕೊಂಡ ಬಂದಿತುಂಡೇಂಗಿ ಒಟ್ಟಿಯೇ ಮಾಡಿರುವಿ, ನಿಂಗ್ ದಂಡ್ ಒಟ್ಟಿ ಮಾಡುವಕೆನ್ನ, ನಾನ್ ಕೂಳ್ ಉಂಡವಿ.
- ಬಿದ್ದಪ್ಪ : ನೀಕೂ ಕೂಳ್ ಬೋಂಡ, ನೀಕೂ ದಂಡ್ ಒಟ್ಟಿಯೇ ಮಾಡಿರ್, ಅದೆಂತ ಬಲ್ಯ ಕಷ್ಟ. ಬೋಂಡಿಕಿ ನಾನೂ ಸಹಾಯ ಮಾಡುವಿ.
- ಮುತ್ತಕ್ಕಿ : ದಮ್ಮಯ್ಯ ನಿಂಗ ಸಹಾಯ ಮಾಡಂಡ, ನಿಂಗ ಈ ವಯಸ್ಸ್ ಕತ್ತಣೆಯೂ ಅಂತ ಕೆಲಸ ಮಾಡ್‌ನವು ಅಲ್ಲ, ನಾಕ್ ಚಾಯಿತೆ ಗೊತ್ತುಂಡ್, ಇಕ್ಕಲೂ ಮಾಡಂಡ.
- ಬಿದ್ದಪ್ಪ : ನೀನ್ ಎಕ್ಕೋಲು ನಾಡ ಕೂಡೆ "ಆಸರೆ" ಆಯಿತುಂಡೇಂಗಿ ಪರೋಲೆ, ಇಲ್ಲೆಂಗಿ ನಾನೆನ್ನ ಮಾಡೋ.
- ಮುತ್ತಕ್ಕಿ : ಇಕ್ಕಿ ನಿಂಗಲೇ ನಾಕ್ "ಆಸರೆ" ದೇವ ಎನ್ನನೆಲ್ಲ ಮಾಡುವ ನೋಟನ.
- ಬಿದ್ದಪ್ಪ : ದೇವ ಮಾಡುವ ಎಣ್ಣಿಯಂಡ್, ನಂಗ ಕೈ ಕೆಟ್ಟಿತ್, ಮನಸ್ ಉತ್ತತೆ, ಬಾಯಿ ಬುಡತೆ ಅಳ್‌ತಕ ಆಪುಲೆ, ನಂಗಡ ಪ್ರಯತ್ನವೂ ಬೋಂಡು ಅಲ್ಲ.
- ಮುತ್ತಕ್ಕಿ : ಅಕ್ಕು ನಂಗಡ ಪ್ರಯತ್ನವೂ ಬೋಂಡು, ಅದೂ ದೇವಲೇ ಬಟ್ಟೆ ಕಾಟಿ ತಪ್ಪ. ಅದ್ ನಾಡ ನಂಬಿಕೆ.
- ಬಿದ್ದಪ್ಪ : ನೀಡ ನಂಬಿಕೆನ ಆ ದೇವ ಎಂದೂ ಪೊಟ್ ಮಾಡುಲೆ, ಬೊತ್ತತೆ.

\* \* \* \* \*

## ಸಿನ್ ಪದಿನೆಟ್ಟ್

(ಬಿದ್ದಪ್ಪ ಕಾಗದ ಕೊಡ್ತಿತ್ ಪನ್ನೆರಂಡ್ ತಿಂಗ ಆಯಿತಿಂಜತ್.. ಸುರೂಲ್ ಮಾದಪ್ಪ, ಹಿಳ್ಳ ಅಮೆರಿಕಾತ್ಂಡೆ ಬಪ್ಪ)

ಬಿದ್ದಪ್ಪ : ಅಮೆರಿಕಾ ಕಾರ ಬಂದ್‌ರ್ತ್, ಬೆಂಗಳೂರ್ ಹೈದರಾಬಾದ್ ಕಾರ ಬಂದ್‌ಲೆ. ಚಾಯಿತೆ ಉಳ್ಳಿರಾ, ಹೌ ಆರ್ ಯು ಹಿಳ್ಳ,

ಹಿಳ್ಳ : ಎವೆರಿ ತಿಂಗ್ ಫೈನ್ ಡ್ಯಾಡ್. ಮ್ಯಾಡಿ ಹ್ಯಾಸ್ ಕೆಪ್ಪ್ ಆಲ್ ಆಪ್ಲ ಅಸ್ ಹ್ಯಾಪಿ.

ಮಾದಪ್ಪ : ಇಲ್ಲೆ ಡ್ಯಾಡ್, ಅವಳೇ ನಂಗಡ ಮನೆ ನಡ್ತಿಯಂಡುಳ್ಳ, ನಾನ್ ದುಡಿಯೊ ಅಚ್ಚಕೆ, ಮಕ್ಕಡ ಮನೆ, ನಾಡದೂ ಕೂಡ, ಎಲ್ಲಾ ವ್ಯವಹಾರ ಅವಡದೇ.

ಬಿದ್ದಪ್ಪ : ನಾನ್ ಎಕ್ಕೋಲು ಎಣ್ಣುವ ಅದೇ, "ಪೊಣ್ಣ್ ನಂದಾಚೆಂಗಿ ಮನೆ ನಂದಾಪ" ಂದ್.

ಮಾದಪ್ಪ : ಅಕ್ಕು ಡ್ಯಾಡ್.

(ಅಕ್ಕಣೆ ಚಿಂಗಪ್ಪ, ತಿಮ್ಮಯ್ಯ ಸಂಸಾರ ಬಂದೆತ್ತುವ)

ಬಿದ್ದಪ್ಪ : ಬಂದಿರಾ ಮಕ್ಕಳೆ, ಎನ್ನನೆ ಉಳ್ಳಿರಾ,

ಚಿಂಗಪ್ಪ : ನೀನೆ ಬರೊಂಡೂಂದ್ ಮಾಡಿರೊಂಜಿ ಇಕ್ಕ ನಂಗಳೇ ಬಂದಿರಾಂದ್ ಕೇಪಿಯ, ನಂಗೆಲ್ಲ ಚಾಯಿತೆ ಉಂಡ್.

ತಿಮ್ಮಯ್ಯ : ನಂಗೆಲ್ಲ ಚಾಯಿತೆ ಉಂಡ್. ಬೆರಿಯ ಬೆರಿಯ ನೀಡ ಅಭಿಪ್ರಾಯ ಎಣ್ಣೇರ್.

ಬಿದ್ದಪ್ಪ : ತಿಮ್ಮಯ್ಯ, ಚೆನ್ನ ತಾಳೆ ಇರಡ್, ಇಂಜು ಗೌರು ಪೊನ್ನು ಬರೊಂಡು. ಅವೂ ಬರಡ್.

(ಅಕ್ಕಣೆ ಗೌರು ಸುಧಾಕರ್ ರೆಡ್ಡಿ ಬಪ್ಪ)

ಬಿದ್ದಪ್ಪ : ಬಾ ಅವ್ವ, ಬನ್ನಿ ಬನ್ನಿ ಹೇಗಿದ್ದೀರಿ.

ಸುಧಾಕರ್ ರೆಡ್ಡಿ : ಚೆನ್ನಾಗಿದ್ದೇವೆ ಮಾಂವ, ನೀವು ಹೇಗಿದ್ದೀರಿ.

ಬಿದ್ದಪ್ಪ : ನಾವು ಚೆನ್ನಾಗಿದ್ದೇವೆ, ನಿಮ್ಮನ್ನೆಲ್ಲಾ ಕಾಯುತ್ತಿದ್ದೆ.

(ಅಕ್ಕಣೆ ಪೊನ್ನಣ್ಣ ಸಂಸಾರವೂ ಬಪ್ಪ)

ಬಿದ್ದಪ್ಪ : ಬಂದಿಯ ಪೊನ್ನು, ಚಾಯಿತೆ ಉಳ್ಳಿರಾ,

ಪೊನ್ನಣ್ಣ : ನಂಗ ಚಾಯಿತೆ ಉಂಡಪ್ಪಯ್ಯ, ನಾನ್ ಕಯಿಂಜ ಕುರಿ ಬಪ್ಪಾಂಗುಂಜಿ  
ಲಾಚಾರ್ ಆಯಿತುಳ್ಳಿಯಾ, ಎನ್ನ ಸೌಖ್ಯ ಇಲ್ಲಿಯಾ?

ಬಿದ್ದಪ್ಪ : ಇಲ್ಲೆ ಪೊನ್ನು, ನಾನ್ ಚಾಯಿತೆ ಉಳ್ಳ, ಮನಸ್ಸುಕ್ ಗೊಂದಲ,  
ನೆಮ್ಮದಿ ಕಮ್ಮಿ ಅಚ್ಚಕೇ.

ಚಿಂಗಪ್ಪ : ನೀನೇ ಮಾಡಿಯಂಡಿಯೆ, ಇಕ್ಕ ಅನ್ನನೆ ಎಣ್ಣೆಚಿಂಗಿ.

ಬಿದ್ದಪ್ಪ : ಅದ್ ಬಯ್ಯ ನೋಟನ, ಇಕ್ಕ ನಿಂಗಲ್ಲ ಬಂದಿಯೆ, ಸುಸ್ತಾಯಿತಿಕ್ಕು,  
ಉಂಡ್‌ರೊಂಜಿ ಬುದ್ದೋಳಿ, ಚಾಯಿತೆ ವರಿ, ನಾಳೆ ಎಲ್ಲಾ ನೋಟನ.  
ಎನ್ನ.

ತಿಮ್ಮಯ್ಯ : ಚಾಯಿತೆ ವರುವ, ಎಲ್ಲಿಂಜಿ, ವರ್ಕ್ ಕೆಡ್‌ತಿತುಳ್ಳಿಯಲ್ಲ.

ಬಿದ್ದಪ್ಪ : ನಾನ್ ದಾಡ ವರ್ಕೂ ಕೆಡ್‌ತಿತಿಲ್ಲೆ, ಅವು ಆಯಿತ್ ಕೆಡ್‌ತಿಯಂಡಕ  
ನಾಡ ತಪ್ಪು ಅಲ್ಲ, ಎಲ್ಲಾ ನಾಳೆ ನೋಟನ.

(ಎಲ್ಲ ಉಂಡ್‌ರೊಂಜಿ ಬುದ್ದವಕ್ ಪೋರಡುವ.. ಮುತ್ತಕ್ಕಿ ಪೊನ್ನಣ್ಣನ ಒರ್  
ಬರಿ ಕಾಕಿತ್ ಅವಡ ಕೈಲುಳ್ಳ ಕಾಗದತ್‌ನ ಓದುವಕ್ ಎಣ್ಣುವ)

ಪೊನ್ನಣ್ಣ : ಅಲ್ಲ ಆಂಟಿ, ಇದ್ ನಾನೇ ಓದೊಂಡುವಾ, ನಿಂಗ ಇಕ್ಕಣೆ  
ಓದ್‌ಚಿಟ್ಟಿತಿಲ್ಲಿಯಾ?

ಮುತ್ತಕ್ಕಿ : ಇಲ್ಲೆ, ನಾನ್ ದಾರ್‌ನಗುಂಡ್ ಓದ್‌ಚಿಡೊ, ಆಂಗ್ ಓದ್‌ಚಿಟ್ಟಿತಿಲ್ಲೆ.  
ನಾಕೂ ಓದೊಕ್ ಬಪ್ಪುಲೆ, ಆಂಗೇ ನೀನೇ ಓದ್ ಎಣ್ಣುವ.

ಪೊನ್ನಣ್ಣ : (ಮನಸ್ಸಲ್.. ಪಾಪ.. ಇದೋರ್ ಕಷ್ಟ ಜೀವಿ.. ಈ ಕಾಗದ ಅವಡ  
ಜೀವನ. ಗೊತ್ತಿಲ್ಲೆ)

(ಮುತ್ತಕ್ಕಿರ ಮೂಡೇ ನೋಟುವ ಮುಂಡತಿಪ್ಪ)

ಮುತ್ತಕ್ಕಿ : ಕಾಗದ ಓದ್ ಎಣ್ಣೆಚಿಂಗಿ, ನಾಡ ಮೂಡೇ ನೋಟಿಯಂಡುಳ್ಳಿಯಲ್ಲ,  
ಓದ್.

ಪೊನ್ನಣ್ಣ : ಆಚಿ. " ನಾಡ ಮಕ್ಕ ಮೈಮಕ್ಕ, ಮೈಮ, ಕರ್‌ಮಕ್ಕಕ್, ಅಪ್ಪ, ಮಾಂವ, ತಾತಂಡ ಆಶೀರ್ವಾದ, ಎನ್ನ ಎಣ್ಣೆಚೆಂಗಿ, ನಿಂಗಡ ಅಪ್ಪ ಮಾಯಿ ತಾಯಿ ಚತ್ತಿತ್ ಮೂಂದ್ ನಾಲ್ ಕಾಲ ಆಚಿ. ಈ ಕಾಲತ್ ನಾಡ ಬದ್‌ಕ್ "ಆಸರೆ" ಇಲ್ಲತಾಯಿ ಪೋಚಿ, ಆನುಂಡ್ ಈ ವಯಸ್ಸ್ ಕಾಲತ್ ಒರ್ ತೀರ್ಮಾನ ಮಾಡಿಯೆ. ನಿಂಗಡ ಅಭಿಪ್ರಾಯ ನಾಕ್ ಇಂಚೆ ಪನ್ನೆರಂಡ್ ತಿಂಗ ಕಯಿಂಜಿತ್, ಇದೇ ತಾರೀಕ್, ನಿಂಗೆಲ್ಲ ಮನೆಕ್ ಬಪ್ಪಂಜಿ ಎಣ್ಣೊಂಡು. ಅಲ್ಲಿ ಕತ್ತಣೆ ಸ್ಥಿತಿ ಅನ್ನನೆ ಇಪ್ಪ. ನಾಡ ತೀರ್ಮಾನ: ನಾನ್ "ಆಸರೆ" ಕಾಯಿತ್ ಮುತ್ತಕ್ಕಿನ ಕೂಡಾವಳಿ ಮಾಡಿಯವಿ"

ನಿಂಗಕೆಲ್ಲಾ ಆಶೀರ್ವಾದ.

- ಬಿದ್ದಪ್ಪ

(ಮುತ್ತಕ್ಕಿ ಒಂದೂ ಅರ್ಥ ಆಕತನ್ನಕೆ, ತೆಡ್ ಬಡ್‌ಚನ್ನಕೆ ಅಳತಿಪ್ಪ)

ಪೊನ್ನಣ್ಣ : ಆಂಟಿ, ಎನ್ನಾಚಿ, ನಿಂಗೆನ್ನಂಗ್ ಇನ್ನನೆ ಅಳತಂಡಿಯೆ?

ಮುತ್ತಕ್ಕಿ : ಜೋರ್‌ತೆ ಮೊರ್‌ಟಂಡ್, ನೀಡ ಅಪ್ಪಂಗ್ ಎನ್ನಾಯೆ, ನಾನ್ ಮನೆ ಆಳ, ನನ್ನ ಕೂಡಾವಳಿ ಮಾಡಿಯವಲೋ, ನಿಂಗಡೆಲ್ಲ ಮರ್ಯಾದಿಕ್ ಕುಂದ್. ಅಪ್ಪ ಎನ್ನಂಗ್ ಇನ್ನನೆ ಮಾಡಿಯೆ ಪೊನ್ನು. ನಾಡ ತಪ್ಪು ಒಂದೂ ಇಲ್ಲೆಪ್ಪ, ನಾನ್ ನೀಡಪ್ಪಂಡ ಸೇವೆ ಮಾಡಿಯೆ ಅಚ್ಚಕೇ. ಇದ್ ನಾಡ ಅಭಿಪ್ರಾಯ ಅಲ್ಲಪ್ಪ, ನಾಕ್ ಇದ್ ಗೊತ್ತೇ ಇಲ್ಲೆಪ್ಪ.

ಪೊನ್ನಣ್ಣ : ನಾಕೂ ಗೊತ್ತುಂಡ್ ಆಂಟಿ, ಇದ್ ನಾಡಪ್ಪಂಡ ತೀರ್ಮಾನಾಂದ್ ಗೊತ್ತ್, ನಿಂಗಕ್ ಗೊತ್ತಿಲ್ಲೆಂದೂ ಗೊತ್ತ್. ನಿಂಗ ಧೈರ್ಯತ್ ಇರಿ, ನಾಳೆ ಅಪ್ಪಂಡ ಎದಿಕೆ ಎಲ್ಲಾರು ಅಯಿಂಗಡ ಅಭಿಪ್ರಾಯ ಎಣ್ಣುವ, ನಿಂಗಕ್ ನೊಂಬಲ ಆಪ ತಕ್ಕ ಬಕ್ಕು, ನಿಂಗ ನಿಂಗಕಲ್ಲಾಂದ್ ಮುಂಡತಿಂಜರಿ. ದೇವ ನಲ್ಲದೇ ಮಾಡುವ.

ಮುತ್ತಕ್ಕಿ : ನೀನ್ ಸಹ ನೀಡಪ್ಪನನ್ನಕೆ ತಕ್ಕ ಪರಿಯುವಿಯಪ್ಪ, ನೀಕಾಚೆಂಗಿನು ನೀಡಪ್ಪಂಡ ನಲ್ಲರಿಮೆ ಬಂದಿತ್ತಲ್ಲ, ನಾಕ್ ಇಕ್ಕು ಗೊತ್ತಾಚಿ, ನೀಡ

ಅಣ್ಣಂಗ ಫೋನ್‌ಲ್ ನಾಡ ಕೂಡ ಅನ್ನನೆ ಎನ್ನಂಗ್  
ನಡಂದಂಡಂದ್.

ಪೊನ್ನಣ್ಣ : ಅಕ್ಕು, ಇದೇ ಕಾರಣ, ಅವು ಗ್ಯಾನ ಮಾಡಿತಿಪ್ಪ, ನಿಂಗ ಅಪ್ಪನ  
ಬಗಳೆಕ್ ಇಟಂಡ್ ಇನ್ನನೆ ಮಾಡ್‌ಚಿಟ್ಟಿಯೆಂದ್.

ಮುತ್ತಕ್ಕಿ : ದೇವಡಾಣೆ ನಾಕ್ ಈ ವಿಷಯ ನೀನ್ ಕಾಗದ ಓದಿತ್ತೆಣ್ಣೆ  
ಗೊತ್ತಿಲ್ಲೆಪ್ಪ, ಇದ್ ಸತ್ಯ.

ಪೊನ್ನಣ್ಣ : ಅದ್ ನಾಕ್ ಗೊತ್ತ್ ಆಂಟಿ, ನಿಂಗ ಮುಂಡತಿರಿ, ನಾಳೆ ನೋಟನ,  
ಆಚೆಂಗಿ ಅಪ್ಪ ಮಾಡುವದೇ ಮಾಡುವ, ದಾಡ ತಕ್ಕೂ, ವಿರೋದತ್‌ನ  
ಕೂಟಾಕುಲೆ, ಇದ್ ಸತ್ಯ, ಎಲ್ಲಾಂಗು ನಾಳೆ ನೋಟನ.

\* \* \* \* \*

## ಸೀನ್ ಪತ್ತಾಯಿಂಬದ್

(ಪಿತ್ಯಾಂದ್ ಪೊಲಾಕ ತಿಂಡಿ ಆನದು.. ಎಲ್ಲರ್‌ನೋ ಅಳಪಕೆಣ್ಣುವ ಬಿದ್ದಪ್ಪ)

ಬಿದ್ದಪ್ಪ : ಕಯಿಂಜ ಕಾಲ ನಿಂಗಕೆಲ್ಲ ನಾನ್ ತಂದಿತಿಂಜ ಕಾಗದತ್‌ರ ಅಭಿಪ್ರಾಯ ಎಣ್ಣೆ.

ಚಿಂಗಪ್ಪ : ನೀಕ್ ಈ ವಯಸ್ಸಲ್ ಬೋಂಡು ಇಂಜತಾ ಈ ಕೂಡಾವಳಿ, ನೀಕೆಂತ ಕಮ್ಮಿ ಆಯೇಂದ್?

ತಿಮ್ಮಯ್ಯ : ಅಕ್ಕು ಅಪ್ಪಯ್ಯ ಈ ವಯಸ್ಸಲ್ ರಾಮಾ ಕೃಷ್ಣಾಂದ್ ಇಪ್ಪ ಬುಟ್ಟಾರೊಂಜಿ ಇಂಜೋರ್ ವಂಗಳ ಕಯಿಪಕ್ ಪೊರ್‌ಟಿತುಳ್ಳಿಯಲ್ಲಾ, ನಂಗಡೆಲ್ಲ ಮರ್ಯದಿಕ್ ಕುಂದ್.

ಪೊನ್ನಣ್ಣ : ಅಣ್ಣಯ್ಯ, ಮರ್ಯದಿಕ್ ಕುಂದಾಪಂತ ಕೆಟ್ಟ ಕೆಲಸ ಅಪ್ಪ ಎಂತ ಮಾಡಿಯೆ?

ಬಿದ್ದಪ್ಪ : ಪೊನ್ನು ನೀನ್ ಮುಂಡತಿರ್, ಅಯಿಂಗಡ ಅಭಿಪ್ರಾಯ ಅವು ಎಣ್ಣಡ್, ಬುಡ್, ನೀನ್ ಮುಂಡತಿರ್.

ಮಾದಪ್ಪ : ನಾನ್ ದೂರತ್ ಉಳ್ಳ, ಅಪ್ಪಂಗ್ ಸಹಾಯ ಮಾಡುವ ಸ್ಥಿತಿಲ್ ಇಲ್ಲೆ, ನೀಡ ಇಷ್ಟ, ಅನುಕೂಲ ಪೋಲೆ ಮಾಡಿಯ.

ತಿಮ್ಮಯ್ಯ : ದೂರತ್ ಅಮೆರಿಕಾತ್ ಉಳ್ಳಾಂಗ್ ಅವಂಗ್ ಇಲ್ಲಿಯತ ಸಮಾಜತ್‌ರ ವಿಷಯ ಗೊತ್ತಾಪುಲೆ, ಅಪ್ಪ ಇನ್ನನೆ ಮಾಡ್‌ಚೇಂದ್ ಗೊತ್ತಾಚೆಂಗಿ ಜನ ಎನ್ನ ಎಣ್ಣು.

ಬಿದ್ದಪ್ಪ : ಮೈಮಕ್ಕ ನಿಂಗಳು ಎಣ್ಣೋಲು.

ಸೀತವ್ವ : ನಂಗಡ ಒಡಿಯಂಡ ಅಭಿಪ್ರಾಯವೆ ನಾಡದು.

ಮುತ್ತವ್ವ : ನಾಡದೂ ಅಚ್ಚಕೆ.

ಹಿಳ್ಳೆ : ಐ ಡು ನಾಟ್ ಸೀ ಎನಿತಿಂಗ್ ರಾಂಗ್ ಇನ್ ದಿಸ್, ಲೆಟ್ ದ ಓಳ್ಡ್ ಮ್ಯಾನ್ ಲಿವ್ ಹಿಸ್ ಲೈಫ್, ವೈ ವಿ ಶುಡ್ ಅಬ್ಬೆಕ್ಟ್, ಐಂಡ್ ವೈ ವಿ ಶುಡ್ ಕೇರ್ ವಾಟ್ ಅದರ್ಸ್ ಸೇ, ವಿ ಲಿವ್ ಅವರ್ ಲೈಫ್.

ಬಿದ್ದಪ್ಪ : ಪೊನ್ನು ನೀನ್ ಒಂದೂ ಎಣ್ಣೆಲೆ ಇಕ್ಕಣೆ.

ಪೊನ್ನಣ್ಣ : ನಾಡದೂ ನಾಡ ಸಂಸಾರತ್‌ರದೂ ಒರೂ ಅಭ್ಯಂತರ ಇಲ್ಲೆ. ನೀಕ್ ನೆಮ್ಮದಿ ಶಾಂತಿ ಸೌಕರ್ಯ ತಪ್ಪಾಚೆಂಗಿ ನೀಡ ಇಷ್ಟ ಪ್ರಕಾರ ಮಾಡಿಯ.

ಬಿದ್ದಪ್ಪ : ನಿಂಗಡ ಅಭಿಪ್ರಾಯ ಎಲ್ಲಾ ಆಚಿ, ಅಂದಕ ಮುತ್ತಿಕ್ಕಿನ ಕಾಕ್ ಪೊನ್ನಣ್ಣ.

(ಮುತ್ತಕ್ಕಿ ಬಪ್ಪ)

ಬಿದ್ದಪ್ಪ : ಮುತ್ತಕ್ಕಿ ನೀಕ್ ನಾನ್ ತಂದ ಕಾಗದ ಓದಿಯಾ?

ಮುತ್ತಕ್ಕಿ : ಮೊರ್‌ಟಂಡೇ ಇಪ್ಪ...

ಪೊನ್ನಣ್ಣ : ಅಪ್ಪಯ್ಯ ನಿನ್ನಾಂದ್ ಬೈಟ್ ಆ ಕಾಗದತ್‌ನ ನನ್ನುಂಡ್ ಓದ್‌ಚಿಟ್ಟತ್, ಅಕ್ಕಂಜಿ ಮೊರ್‌ಟಂಡೇ ಉಂಡ್.

ಬಿದ್ದಪ್ಪ : ಮುತ್ತಕ್ಕಿ ನೀಡ ಅಭಿಪ್ರಾಯ ಕೇಪಾಂಗ್ ಮಿಂಞಾ ನಾಡ ಮಕ್ಕ ಎಣ್ಣಾನಾಂಗ್ ಸಮಜಾಯಿಸಿ ಕೊಡ್‌ಪದ್ ನಾಡ ಧರ್ಮ. 'ಅಕ್ಕು ನಿಂಗೆಲ್ಲ ಎಣ್ಣೆನನ್ನಕೆ ನಾಕ್ ಅರುವತ್ತಾರ್ ವಯಸ್ಸ್ ಆಯಿತ್, ಅವ್ ಚತ್ತಿತ್ ಮೂಂದ್ ನಾಲ್ ಕಾಲ ಆಚಿ, ನಾನ್ ಈ ಮನೆಲ್ ಒಬ್ಬನೇ ಉಳ್ಳ, ನಾಕೂ ದಂಡ್ ಮೂಂದ್ ಕುರಿ ಆರೋಗ್ಯ ಸರಿ ಇಲ್ಲತಾಚಿ, ಕಯಿಂಜ ಕುರಿ ಸರ್ಪ ಸುತ್ತ ಆಯಿತ್ ನರಳಿಟ. ಅಕ್ಕ ನಾಕ್ "ಆಸರೆ"ಯೇ ಇಲ್ಲತಾಚಿ. ನಿಂಗೆಲ್ಲ ಇಂಜಕ್ಕಲೂ ಇಲ್ಲತನ್ನಕೆ ಬದ್‌ಕನ. ನಿಂಗ ದಾರೂ ನಾಡ ಕಡೆ ಗಮನ ಕೊಡ್‌ತಲೆ. ಅಕ್ಕ ಈ ಮುತ್ತಕ್ಕಿ ಮಾಡ್‌ನ ನಿಸ್ವಾರ್ಥ ಸೇವೆನ ಕಂಡಿತ್ ನಾಕೆನ್ನಂಗ್ ಇವಳ "ಆಸರೆ" ಮಾಡಿಯವಕಾಗ, ಇವಳು ಸುಮಾರ್ ಕಾಲತ್‌ಂಜಿ ನಾಡ ನಿಂಗಡ ಸೇವೆ ಮಾಡಿಯಂಡುಂಡ್. ಅವಕೂ "ಆಸರೆ" ಇಲ್ಲೆ. ಆಂಗ್ ಈ ತೀರ್ಮಾನ ಮಾಡ್‌ನ. ಇದ್ ಸೆಕ್ಸ್‌ಕಾಯಿತ್ ಅಲ್ಲಾ, ಸೆಕ್ಯುರಿಟಿ ಕಾಯಿತ್, ಕಾಮಕಾಯಿತ್ತಲ್ಲ-ಕ್ಷೇಮಕಾಯಿತ್. ನಾಡ ಆಸ್ತಿ ಉಳ್ಳ ಈ ಮನೆ, ಈಂಡ ಸುತ್ತ ಉಳ್ಳ ಜಾಗ, ಒರ್ ಏಕ್ರೆ, ನಾಡ ಜೀವ ಅಥವಾ ಅವಡ ಜೀವ ಇಕ್ಕಣೆ ನಂಗಳೇ ಅನುಭವಿಚಿರುವ, ನಂಗ ದಂಡಾಳ್‌ರ ಮರ್ ದಿನಕ್ ಇದ್ ನಾಡ ಎಲ್ಲ ಮಕ್ಕಕ್ ಸಮ ಪಾಲ್, ನಾಡ ಪೆನ್ನನ್‌ನ ಇವಡ ಪೆದಕ್ ನಾಮಿನೇಶನ್



ಮಾಡುವಿ, ಅದ್ ನಿಂಗಡ ಪೆದಕ್ ಮಾಡುವಕಯ್ಯುಲೆಲ್ಲ, ಅಲ್ಲತೆ  
ನಾನಿಲ್ಲತೆ ಪೋಚೆಂಗಿಯೂ ಅವಕ್ ಬದ್ಕುವಕ್ "ಆಸರೆ" ಆಪ,  
ಇದ್ಲ್ ನಿಂಗಕ್ ದಾಕೂ ಅನ್ಯಾಯ ಆಪುಲೆ, ಮುತ್ತಕ್ಕಿಕೂ ಅನ್ಯಾಯ  
ಆಪುಲೆ, ಮುತ್ತಕ್ಕಿರ ಅಭಿಪ್ರಾಯ ನಾಕ್ ಭಾರೀ ಮುಖ್ಯ, ಇಕ್ಕ  
ನಿಂಗ ಎಣ್ಣೆ ನಿಂಗಡ ಅಭಿಪ್ರಾಯ ಎಂತ.

ಪೊನ್ನಣ್ಣ / ಮಾದಪ್ಪ : ಅಪ್ಪಯ್ಯ ನೀಡ ಇಷ್ಟ ಪ್ರಕಾರ ಮಾಡಿಯಪ್ಪ.

ಹಿಳ್ಳೆ : ಗೋ ಅಹೆಡ್ ಡ್ಯಾಡ್.

ಸುಧಾಕರ್ ರೆಡ್ಡಿ : ನಿಮ್ಮಿಷ್ಟದಂತೆ ಮಾಡಿಕೊಳ್ಳಿ ಮಾಂವ.

ಚಿಂಗಪ್ಪ/ತಿಮ್ಮಯ್ಯ : ನೀಡ ಇಷ್ಟ.

ಬಿದ್ದಪ್ಪ : ಮುತ್ತಕ್ಕಿ, ನೀಡ ಅಭಿಪ್ರಾಯ ಎಂತ, ಎಣ್ಣೆ, ಪಿಂಚ ಎಲ್ಲಾ ನಡಪ.

ಮುತ್ತಕ್ಕಿ : ಮೊರ್ಟಂಡೇ ಬಿದ್ದಪ್ಪಂಡ ಕಾಲ್ಕ್ ಬುದ್ಧಾರುವ.

ಆಸರೆ ಆಸರೆ ಆಸರೆ ಬೋಂಡು,

ಗಿಡ ಬಳ್ಳಿಕೂ, ಪ್ರಾಣಿ ಪಕ್ಷಿಕೂ ಆಸರೆ ಬೋಂಡು,

ಅಕ್ಕ ಮಾಲವಂಗ್ ಬೋಂಡು ಆಸರೆ ಬೋಂಡು,

ಬುಟ್ಟ ನೆಟ್ಟುವಕ ಕೊತ್ತ ಬೆಕ್ಕೊಂಡು,

ವಯಸ್ಸಾಪಕ ತಂಡ್ ಪುಡಿಕೊಂಡು,

ಮಕ್ಕ ಬರತಿಪ್ಪಕ ಆಸರೆ ಬೋಂಡು

ಎಚ್ಚಕ್ ದುಡ್ಡ್ ಇಂಜತೆಂಗೆನ್ನ ನೀಡ ಖರ್ಚಿಕಾಗತದ್,

ಎದ್ ಸಂಸಾರ ಇಂಜತೆಂಗೆನ್ನ ನೀಡ ಸೇವೆಕಾಗತದ್.

ಎದೇದ್ ತೀನಿ ಇಂಜಕೆನ್ನ, ನೀಕ್ ತಿಂಬಕಾಗತದ್.

ಪುಟ್ಟ್ಚೆಟ್ಟಿದ್ ಮಾತ್ರ ಸಂತಾನ ಅಲ್ಲ,

ಕಷ್ಟ ಕಾಲತ್ ಆಪವುವೇ ಸಂತಾನ,

ಚೋರೆ ಸಂಬಂದಕುಂಜಿ ಮೂತದ್ ಆಪತ್ಕಾನವು.

ನಂಗ ಮರ್ಪ ವಯಸ್ಸಾನಯಿನ,

ಮಿಂಚಾಕ್ ನಂಗಕೂ ಇದೇ ಗತೀಂದ್.

ಮರ್ಂದಿತ್ ನಂಗಕೂ ವಯಸ್ಸಾಪಾಂದ್,

\* \* \* \* \*

# ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ

ಮಡಿಕೇರಿ

2014-2017ನೇ ಕಾಲಠರ ಸಮಿತಿ ಸದಸ್ಯಂಗ

ಬಿದ್ದಾಟಂಡ ಎಸ್. ತಮ್ಮಯ್ಯ	ಅಧ್ಯಕ್ಷ
ಉಮರಬ್ಬ	ರಿಜಿಸ್ಟ್ರಾರ್
ಡಾ   ಮೇಚೆರ ಸುಭಾಷ್ ನಾಣಯ್ಯ	ಸದಸ್ಯ
ಪಡಿಇಾರಂಡ ಜಿ. ಅಯ್ಯಪ್ಪ	ಸದಸ್ಯ
ಡಾ. ತೀತಿರ ರೇಖಾ ವಸಂತ್	ಸದಸ್ಯ
ಮುಲ್ಲೇಂಗಡ ಬೇಬಿ ಚೋಂದಮ್ಮ	ಸದಸ್ಯ
ಚೇರಮ್ಮನ ವಾಣಿ ಚಂಗುವಮ್ಮಯ್ಯ	ಸದಸ್ಯ
ಮಾದೇಟಿರ ಬೊಳ್ಳಪ್ಪ	ಸದಸ್ಯ
ಮದ್ರೀರ ಸಂಜು ಬೆಳ್ಳಪ್ಪ	ಸದಸ್ಯ
ಕುಡಿಯರ ಬೋಪಯ್ಯ	ಸದಸ್ಯ
ಮೂಕೈರೀರ ಲೀಲಾವತಿ	ಸದಸ್ಯ
ಮೇದರ ರಾಣಿ	ಸದಸ್ಯ
ಕಾಳಚಂಡ ಜಿ. ಕಾರ್ಯಪ್ಪ	ಸಹ ಸದಸ್ಯ
ಅಣ್ಣೇರ ಹರೀಶ್ ಮಾದಪ್ಪ	ಸಹ ಸದಸ್ಯ
ಚೋವಂಡ ಎಸ್. ಬೋಪಯ್ಯ	ಸಹ ಸದಸ್ಯ



## ಜಾಲ ಸೋಮಣ್ಣ ಕೊಟ್ಟುಕತ್ತಿರ

ಎಕ್ಸ್‌ಕಾರ ಬೇಂಗ್‌ನಾಡ್, ಕೋಪಟ್ಟ ಊರ್ಲ್ ಕೊಟ್ಟುಕತ್ತಿರ ಪೊನ್ನಪ್ಪ ಅಕ್ಕವ್ವ ದಂಪತಿಯಡ ಅಂಜನೆ ಮೋಂವನಾಯಿತ್ ಪುಟ್ಟತ್, ಕೋಪಟ್ಟ, ಚೆಟ್ಟಮಾನಿ, ಚೇರಂಬಾಣಿ, ಮಡಿಕೇರಿಲ್ ಓದಿತ್, ಇಂಡಿಯನ್ ನೇವಿಲ್ ಪತ್ತ್‌ಕಾಲ, ವಿದೇಶತ್ ಒರ್ ಕಾಲ, ಸ್ಟೇಟ್ ಬ್ಯಾಂಕ್ ಆಫ್ ಮೈಸೂರ್ಲ್ ನುಪ್ಪತ್ತೊಂದ್ ಕಾಲ ಸೇವೆ ಮಾಡಿತ್ ಚೀಫ್ ಮೇನೇಜರ್ ಆಯಿತ್ ನೈಚಿತ್. ಪಿರಿಯಾಪಟ್ಟಣ ಕೊಡವ ಸಮಾಜತ್ ಅಧ್ಯಕ್ಷ, ಕನ್ನಡ ಬಳಗ ಅಧ್ಯಕ್ಷ, ಕೊಡಗು ಜಿಲ್ಲಾ ಬ್ಯಾಂಕ್ ನೌಕರಂಗಡ ಯೂನಿಯನ್ ಅಧ್ಯಕ್ಷ, ಕೊಡಗು ಜಿಲ್ಲಾ ಬ್ಯಾಂಕ್ ಅಧಿಕಾರಿಯಡ ಸಂಘತ್ ಕಾರ್ಯದರ್ಶಿ, ಅಖಿಲ ಭಾರತ ಬ್ಯಾಂಕ್ ಅಧಿಕಾರಿಯಡ ಒಕ್ಕೂಟತ್ (ಯುನಿಟ್ ಎಸ್.ಬಿ.ಎಂ.) ಮೇನೇಜಿಂಗ್ ಕಮಿಟಿ ಸದಸ್ಯನಾಯಿತು ಸೇವೆ ಮಾಡಿತ್. ಇಕ್ಕ ಪೊನ್ನಂಪೇಟೆಲ್ ವಾಸ ಉಳ್ಳ ಇವು, ಇಜ್ಜಿವಳವಾಡಿ, ಮಡಿಕೇರಿ, ಪೊನ್ನಚೆಟ್ಟಿರ ಜೋಯಪ್ಪ ಕಾಮವ್ವ ದಂಪತಿಯಡ ಮೋವ ಕುಸುಮ(ಸತ್ಯ)ನ ಮಂಗಲ ಆಯಿತ್, ಈಯಂಡ ದಂಡ್ ಮೂಡಿ ಮಕ್ಕಡಾತ್ ಪೆರಿಯವಳ (ನಮ್ಮತ-ಪ್ರೀತಿ) ಚೌಂಡಿರ ವಿನು ಹೇಮಂತ್, (ಒರ್ ಮೂಡಿ ಕುಂಚಿ-ಥನ್ನಿ) ಬೆಂಗಲೂರ್‌ಕೂ, ಅಳಿಯವಳ (ಸೌಮ್ಯ-ನೀತಿ) ಕಿರಿಯಮಡ ಸೂರಜ್ ಗಣಪತಿ (ದುಬಾಯಿ) (ಒರ್ ಕಣ್ಣ ಕುಂಚಿ-ಏಕಾಗ್ರ ಚಿಣಪ್ಪ) ಮಂಗಲ ಮಾಡಿತ್, ಆರಾಮ್ ಜೀವನತ್ ಉಂಡ್, ಬಿ.ಎ. ಡಿಗ್ರಿ, ಜಿ.ಎ.ಐ.ಐ.ಬಿ. ಆನ ಇವು, ಪುಸ್ತಕ ಓದುವಾತ್ ದುಂಬಾ ಕುಷಿ ಕಾಂಬ, ಟೈಪಿಂಗ್, ಕಂಪ್ಯೂಟರ್, ಫೈರ್ ಫೈಟಿಂಗ್, ಫರ್ಸ್ಟ್ ಏಯಿಡ್, ಟ್ಯಾಲಿ, ಹಿಂದಿಲ್ ಪ್ರಬೋದ್, ಇಕ್ಕ ಈ ಬುಕ್ ಎಳೆದುವಕ ಕನ್ನಡ ಟೈಪಿಂಗ್-ಬರಹ ಪಿಂಚಾ ನುಡಿ ಪಡ್‌ಚಂಡೇ ಇರೋಂಡು, ಎಣ್ಣುವ ಹವ್ಯಾಸ ಉಳ್ಳ ಇವು 'ರಿಟೈರ್ಡ್ ಬಟ್ ನಾಟ್ ಟೈರ್ಡ್' ಎಣ್ಣುವ, ಅನ್ನನೆ ಇಕ್ಕಲೂ ಬೆಂಗಲೂರು ಕಾಳದಾಸ ಬ್ಯಾಂಕ್‌ಲ್ ಬ್ಯಾಂಕಿಂಗ್ ಅಡ್ವೈಸರ್ ಆಯಿತುಳ್ಳ ಇವು ಮೂಂದ್ ಖಂಡತ್ ಒಯಿಂಬದ್ ಪರದೇಶ ಸುತ್ತನ ಒರ್ ವ್ಯಕ್ತಿ. ಏದೇ ವ್ಯಕ್ತಿಕ್, ಅವಂಡ ಜೀವನತು, ಅನ್ನನೆ ಪೊಣ್ಣ್ ಮಕ್ಕಡ ಪ್ರೀತಿ ವಿಸ್ವಾಸ ಉಳ್ಳಾಂಗ್, ನೆಮ್ಮದಿರ ಆರಾಮ್ ಜೀವನತ್ ಉಂಡ್.

### ಜಾಲಿ ಸೋಮಣ್ಣ ಕೊಟ್ಟುಕತ್ತಿರ.

ಗಣಪತಿನಗರ, ಕಾವೇರಿ ಸಂಘ ರಸ್ತೆ,  
ಪೊನ್ನಂಪೇಟೆ 571216. ಕೊಡಗು ಜಿಲ್ಲೆ.

ಮೊ : 9448447158, 08274 - 261559